

ЎЗБЕКИСТОН ССР ФАНЛАР АКАДЕМИЯСИ
А. С. ПУШКИН НОМИДАГИ ТИЛ ВА АДАБИЁТ ИНСТИТУТИ

М. М. СУЛТОНОВА

АБДУЛЛА ҚАҲХОР
УСЛУБИНИНГ
БАЪЗИ МАСАЛАЛАРИ

ЎЗБЕКИСТОН ССР «ФАН» НАШРИЁТИ
Тошкент — 1967

Ўзбек совет адабиёти асосчиларидан бири Абдулла Қаҳорнинг сермазмун ва серқирра ижоди умумсовет адабиётининг тараққиёт тарихида, шаклан миллий, мазмунан социалистик маданиятимиз тарихида мұхым воқеадир. Ўзбек совет адабиётининг гоявий-бадий камолотга эришишида, ўзбек адабий тилининг бойиши ва такомиллашишига муносиб ҳисса құшган Абдулла Қаҳор ижоди тўғрисида йирик монографиялар, мақолалар ва тақризлар ёзилған. Сизнинг эътиборингизга ҳавола этилаётган китобда ана шу монография ва мақолаларда кам тилга олинған масала — Абдулла Қаҳорнинг ижодий услуги ёзувчи асарларидаги автор ва персонаж нутқи хусусиятлари тўғрисида баҳс боради.

Монография адабиётшунослар, олий ўқув юртлари филология факультетларининг ўқитувчи ҳамда студентлари, шунингдек барча адабиёт ихлосмандларига мўлжалланади.

Масъул муҳаррирлар:

*Н. КАРИМОВ
ва Б. САЙИМОВ*

Султонова М. М.

Абдулла Қаҳор услубининг баъзи
масалалари. Т., «Фан», 1967.
136 бет. (ЎзССР Фан. Акад. А. С. Пушкин номидаги Тил ва адабиёт ин-ти).
Тиражи 3000.
Султанова М. М. Стиль Абдуллы Каҳхара.

АВТОРДАН

Шундай ёзувчилар бўладики, уларнинг ижодисиз бирор миллий адабиётнинг тараққиёт йўлини тасаввур этиш қийин. Ўзбек адабиётининг йирик арбоби, кўп миллатли совет адабиётининг ўзига хос овозга эга бўлган намояндадаридан бири Абдулла Қаҳҳор — ана шундай ёзувчилардан. Ўзбек адабиёти ҳақида фикр юритилар экан, Абдулла Қаҳҳор номи Ҳамза, Абдулла Қодирий, Ойбек, Fafur Furom, Ҳамид Олимжон номлари билан бир қаторда туради.

Одатда чинакам истеъдод соҳиблари бир-бирларига асло ўхшамайди. Ҳамза асарларини Ҳамид Олимжон асарларидан ажратиш учун уларнинг имзосига қараш шарт бўлмаганидек, Абдулла Қаҳҳор билан Абдулла Қодирий ёхуд Ойбек асарларини ҳам «адаштириб қўйиш» мумкин эмас. Абдулла Қаҳҳор инсонпарвар ёзувчилардан. У инсонни улуғлайди, ҳурматлайди. Ёзувчининг инсонга бўлган муҳаббати уни хўрловчи, қадрсизловчи, инсоний туйғуларни поймол қилувчи ҳамма нарсаларга нисбатан шафқатсиз, муросасиз бўлиши орқали тасдиқланади. Ёзувчи кўзига биринчи навбатда ижтимоий тенгсизлик натижасида келиб чиққанadolatcizlik, ночорлик, қашшоқлик ташланади (ўтмиш темасидаги ҳикоялар цикли); яшашга, ишлашга ҳамма шароит яратилган бир даврда эса у ўтмиш сарқитларининг сақланиб қолишига нисбатан айниқса муросасизлик қиласди. Ёзувчининг ҳаётга бундай муносабатда бўлиши, ҳаёт масалаларига шу нуқтаи назардан ёндашиши, ҳаётни шундай «кўриши» унинг ижодий манерасини белгилайди. Ёзувчи асар асосига олинган даврни, воқеани, қаҳрамонни жуда яхши билади. Шунинг натижасида А. Қаҳҳор асарларида катта бир тарихий давр қаҳрамон ҳаётидаги характерли бир воқеа тасвири орқали мужассамланади. Бу ҳол айни пайтда А. Қаҳҳорнинг бадиий тасвирий воситаларини ҳам белгилаб келади.

Абдулла Қаҳҳор қаҳрамонлари — оддий одамлар; улар ҳа-

ётида рўй берган воқеа ва ҳодисалар ҳам одатдан ташқари ва фавқулодда эмас; шунга қараб ёзувчининг тасвирий воситалари ҳам оддий бўлиб қолади. Бироқ бу оддийлик остида ёзувчининг катта маҳорати, истеъоди, билими ётади.

Бирор ёзувчининг маҳорати ўрганилар экан, унинг дунёқараши, воқеликка муносабати ва шунга ўхшаш масалаларни гина эмас, балки бу маҳорат жараёнини ҳам тадқиқ этиш талаб этилади. Бу ишда биз ёзувчининг ижодий индивидуаллиги, стили, асарларининг ўзига хос садоси ва таъсир кучи сингари масалаларни ана шу маҳорат жараёнини озми-кўпми кўрсатиш, бадиийлик компонентларини текшириш орқали очишга уриндик.

Табиийки, А. Қаҳҳор ижоди кўплаб адабиётшунос ва танқидчиларни қизиқтириди ва қизиқтириб келмоқда. Ёзувчи ижодига бўлган эътибор «Сароб» романни нашр этилиши билан айниқса кучайган эди. Бу асар ўз даврида республика жамоатчилиги томонидан кенг муҳокама қилинди. «Ўзига бундай жамоат фикрини, муҳокамасини тортган асар сўнгги вақтгача адабиётимизда йўқ эди, десак бўлади»¹ деб ёзган эди ўша вақтда «Ўзбекистон адабиёти ва санъати» журнали. Бу ўша пайтда «Сароб» романидан бошқа йирикроқ асарлар бўлмаганидан эмас, балки романнинг ёзувчи ижодида ва умуман ўзбек адабиётида муҳим воқеа бўлганидан эди. Абдулла Қаҳҳор «Сароб»дан кейин китобхонларга манзур бўлган тарихий темадаги ҳикоялар циклини яратди. Унинг уруш ҳаётидан олинган повестлари, «Қўйчинор чироқлари» романни, совет ва чет эл саҳнасида катта муваффақият билан қўйилган пьесалари, «Синчалак» повести ва ниҳоят Ҳамза мукофоти билан тақдирланган «Утмишдан эртаклар»и ўзбек адабиётининг юксалишида муҳим омил бўлди.

Абдулла Қаҳҳорнинг деярли ҳамма асарлари рус ва қардош халқлар тилларига таржима қилинди. Унинг «Синчалак» повести ва бошқа асарлари чет тилларда ҳам нашр этилди.

А. Қаҳҳор асарлари эълон қилиниши билан улар ҳақида газета ва журналларда, альманах ва тўпламларда кўпгина тақриз ва мақолалар босилди, қизғин мусоҳаба ва мунозаралар бўлди. А. Қаҳҳор ижодига бағишлиланган бир неча маҳсус диссертацион ишлар ёзилди², И. Боролина ва Ҳ. Абдусама-

¹ Р. Мажидий, «Сароб» тўғрисида, «Ўзбекистон адабиёти ва санъати», 1941, № 5, 46-бет.

² А. Алимұхamedов, Абдулла Қаҳҳор ҳикояларида одам образи, Тошкент, 1948 (ЎзФАН кутубхонаси); И. Боролина, Рассказы Абдуллы Қаҳхара, Москва, 1953 (В. И. Ленин номидаги Давлат халқ кутубхонаси); П. Қодиров, Послевоенное творчество А. Каххара, М., 1954 (В. И. Ленин номидаги Давлат халқ кутубхонаси); А. Геворкян, Сатира

товнинг монографиялари босилиб чиқди³, қатор илмий ва илмий-оммабоп мақолалар эълон этилди⁴. Ўзбек совет адабиёти тарихига, унинг айрим масалалари ва проблемаларига бағишиланган тадқиқотларда А. Қаҳҳор асарлари ҳам таҳлил қилинади.

Қўлингиздаги рисолада А. Қаҳҳор асарларида автор ва қаҳрамонларнинг нутқ хусусиятлари, образ яратишнинг муҳим компонентларидан бири бўлмиш портрет чизиш манераси, бадиий ижоддаги пейзаж ва рамзий деталларнинг роли каби масалалар тадқиқ этилади. Биз бундай бадиий-тасвирий компонентларни А. Қаҳҳор ижодида асар ғояси, образ яратиш усули сингари масалалар билан боғлиқ ҳолда қараб чиқишга ҳаракат қилдик. Шуни айтиш керакки, биз Абдулла Қаҳҳор асарларини умуман баҳолашни, шунингдек, қўйилган масалалардан келиб чиқсан ҳолда ёзувчи ижодини бошқа ўзбек ёзувчиларининг асарлари билан солиштириб ўрганишни ўз зиммамизга олмаймиз.

Биз бу ишга асосан ёзувчининг 1956—57 йилларда нашр этилган уч томлик «Танланган асарлар» ини асос қилиб олдик, зарур ўринларда эса А. Қаҳҳор асарларининг бошқа нашрларига ҳам мурожаат этдик.

в прозе Абдуллы Қаххара, Самарканд, 1963 (ЎзДУ асосий кутубхонаси); И. Қўчқортов, Абдулла Қаҳҳорнинг фразеологик новаторлиги, Тошкент, 1965 (ТошДУ асосий кутубхонаси).

³ И. Боролина. Абдулла Қаххар Очерк творчества, Ташкент, Госиздат, 1957; Х. Абдулсаматов, Абдулла Қаҳҳор ҳаёти ва ижоди ҳақида очерк, Уззадабийнашр, 1960.

⁴ Р. Мажидий, «Сароб» тўғрисида, «Ўзбекистон адабиёти ва санъати», 1941, № 5; Еқубов, Абдулла Қаҳҳор новеллалари, «Шарқ юлдузиги», 1946, № 1—2; А. Алимухамедов, А. Қаҳҳор ҳикояларида психологияк тасвир, «Шарқ юлдузиги», 1947, № 2—3; П. Қодиров, Абдулла Қаҳҳор, Танланган асарлар, 1-том, Тошкент, 1957; О. Шарифуддинов, Келажакка чорловчи повесть, «Ўзбек адабиёти масалалари», Тошкент, 1959; Л. Тожиева, Абдулла Қаҳҳорнинг фельетонлари ҳақида, «Ўзбек адабиёти масалалари», Тошкент, 1958; М. Құшчонов, «Синчалак», «Ҳаёт ва маҳорат», Тошкент, 1962.

ОБРАЗ ВА БАДИЙ НУТҚ ҚИРРАЛАРИ

Дунёда қалб ҳарорати билан жон киргизилмаган нутқ — ўлик нутқдан совуқроқ нарса бормикин!

Абдулла Қаҳҳор

ПЕРСОНАЖ НУТҚИ

Абдулла Қаҳҳорнинг ўзига хослиги, индивидуал хусусияти даставвал унинг тилида кўринади. Ўзбек адабиётида бадиий тил ҳақида, ёзувчининг ўзига хос тили ҳақида гап кетар экан, даставвал Абдулла Қаҳҳор номи тилга олинади. Тилдаги бу ўзига хослик А. Қаҳҳор асарларидаги автор ва персонаж нутқларининг таҳлилида равшан кўринади.

А. Қаҳҳор қаҳрамонлари ёш ва қари, бой ва камбағал, саҳий ва баҳил, илғор ва қолоқ, маҳмадона ва камғап — хуллас, жамиятнинг турли қатламларига мансуб бўлган персонажлардир. Уларнинг ўзига хос индивидуал хусусиятларининг ҳаммаси уларнинг тилида ҳам акс этади.

Ёзувчи қаҳрамоннинг сўзлаш манерасини, унинг ўзига хос интонациясини қисқа ва лўнда жумлалардан ташкил топган сұҳбатлар, диалоглар, монологлар орқали тасвирлашга, қаҳрамон характерига хос чизиқларнинг шаклланишини унинг нутқи орқали акс эттиришга алоҳида эътибор беради.

Ёзувчининг илк асарларига, чунончи ҳикояларига назар ташласак, унинг персонажлар нутқига алоҳида эътибор берганини кўрмаслик мумкин эмас.

Лекин ёш ёзувчи қаҳрамон нутқидан турли мақсадларда фойдаланиш йўлларини бу даврда ҳали топиб олмаган эди. А. Қаҳҳор ижодидаги илк ижобий қаҳрамонлардан бири — Утбосар («Қишлоқ ҳукм остида», 1932) образини олайлик. Ёзувчи Утбосарни «гапиришишда» ҳам, унинг гапларининг мазмунини келтиришида ҳам муайян мақсадни кўзда тутмаганини кўрамиз. Тўғрироғи, ёзувчи фақат бир мақсадни, яъни воқеанинг мазмунинигина тушунтиришни кўзлайди. Лекин шунга қарамай унинг персонаж нутқининг аҳамиятини, ҳар бир воқеа иштирокчisinинг ўзига сўз бериш ва уни гапиришишнинг адабий асардаги ролини тушунганини сезиш қийин эмас. Афсуски, ёзувчida маҳоратнинг етишмаслиги асардаги ҳамма бадиий-тасвирий компонентларни асар фоясини очишига, характер яратишга сафарбар қила билмаслик натижасида

бўлса керак, персонажларнинг «тузуккина» гаплари ҳам нишонга бориб тегмайди.

«Қишлоқ ҳукм остида» асарида саводсиз, дунё ишларидан бехабар кампир (қишлоқда) бўлаётган ўзгаришлар, бунинг натижасида туғилаётган миш-мишлардан ваҳимага тушади, ўғлининг аскарликка боришини истамайди. Ўғлининг қарори қатъий эканини кўргач, у дарров ўзгариши. Аввалига юбормайман, деб қаттиқ туриб олган она ўғлининг асаби бузилганини кўриб: «Болам нега шундай дейсан. Мен борма деганим йўқку... Майли бор. Аммо тез-тез хат ёзиб тур демоқчи эдим. Боришга шунча иштиёқманд бўлсанг, нега олиб қолай. Аммо урушга борманглар...». Бу онанинг ҳақиқий кечинмаларини фикр-туйғуларини ифодаловчи гаплар. Ёзувчи онанинг шу фикрларини унинг тилидан айтиши билан катта мақсадга эришган. Ахир, она ўз ўғлига ёмонлик тиламайди, шу билан бирга ёнидан кетишини ҳам истамайди, кўнглини аллақандай ваҳималар қоплади, «буларни урушга солади», деган мишмиш гапларга дам ишониб, дам ишонмай турари ва ўғлига урушга бормагин дея олмайди, чунки армияга ёлғиз унинг ўғлигина кетмаяпти, шунинг учун ҳам у «урушга борманглар», деб ўтинади. Онанинг бу сўзларидан гапирувчи образни яққол ҳис қилиш мумкин. Лекин шу билан бирга бу мисол яхши тошлигдан бир-икки деталь асар қимматини ҳали белгилай олмаслигини ҳам кўрсатишга хизмат қиласди.

Абдулла Қаҳҳорнинг қаҳрамонлар нутқларини ишлаш санъати ана шундай сабоқларнинг мантиқий маҳсули ўлароқ вужудга келди. Катта истеъодини дастлабки ҳикояларида тоблаб олган А. Қаҳҳор «Сароб» романида персонаж тилини унинг ўз тафаккури ва дунёқарashi билан диалектик бирликда акс эттириш қобилиятига эга бўлган санъаткор сифатида танилдики, бу унинг маҳорат чўққиларига кўтарилишида сезиларли қадами эди. А. Қаҳҳорнинг персонажлар нутқларига алоҳида эътибор бергани бу асарнинг севилиб ўқилишига сабаб бўлди.

Ёзувчи Саидий тақдирни тасвирини унинг руҳий дунёси тасвири билан бирликда олиб боради, Саидий қалбининг нозик ва мураккаб «жойлари»га анча чуқур киради. Саидий асар бошида содда, кўнгилчан, ўзига, қобилиятига кўпда ишонавермайдиган йигит. У Мунисхонга ҳам ботиниб гапира олмайди, ундан уялади. Саидийнинг камтарлиги унинг биринчи марта редакцияга келишида, Кенжা билан учрашгандаги гапларида айниқса кўзга яққол ташланади. Мана, Саидий янги дўстлар орттириди, совет тузуми душманлари билан яқинлашди, улар билан сұхбатларда бўлди, уларнинг қарашларига, ишларига шерик бўлди — энди аввалги Саидийдан ҳеч нарса қолмади.

У Кенжабилан бирга ишлар экан, унинг гапларига энди та-каббурлик, ўта фуур билан жавоб қиласди, ўзининг ҳар жиҳатдан Кенжадан юқори туришини таъкидлаб туради. Мана, Сайдийнинг умидлари чил-парчин бўлди. Унинг учун яашнинг қизифи ҳам, маъноси ҳам қолмади. У ҳаётдан безиди. Энди Сайдийнинг атрофдагиларнинг саволларига фақат бир нима дейиш учунгина гапираётганини сезиш қийин эмас. Ёзувчи қаҳрамонлар тилини ниҳоятда моҳирлик билан беради, қаҳрамон ҳаётида, фикрларида, кечинмаларида, кайфиятларида со-дир бўлган билинар-билинмас ўзгаришлар ҳам уларнинг тилларидан билинади. Ёзувчи қаҳрамонларни характерлашни уларнинг ўзларига топширган кезларда бу нарса айниқса яқ-қол ҳис қилинади.

Мунисхон воқеаларга кириши биланоқ унинг такаббур, ҳеч кимни месимайдиган, назар-писанд қилмайдиган, ўзини ҳаммадан юқори қўядиган мағрур бир қиз экани билинади. Унинг характеридаги бу хусусият ҳатто севгилиси Сайдийга бўлган муносабатида ҳам кўринади. Мунисхондаги бу хусусият пировардида уни ҳалок этган омиллардан бири бўлиб қолади.

Сайдий билан Мунисхон тамоман ажралиб кетишади. Уларнинг ҳар иккалалари ҳам оиласи бўлишади. Кунларнинг бирида Сайдий тасодифан Мунисхон билан учрашиб қолади: «Қалай, омонмисан? Кўринмайсан?— деди Мунисхон,— одам соғиниб қолар экан. Нега мунча озиб кетибсан? Қалай, хотининг билан иноқмисан?» Мунисхоннинг унча-мунча одамни назар-писанд қилмаслик, такаббурлик хусусиятларига энди беадаблик ҳам қўшилади. Мунисхондан бундай гапни эшитган ўқувчи бироз ҳушёрроқ бўлади, бошига кўнгилсиз фикр келади. Бир пастандан сўнг эса Мунисхон гапларининг ўзгариши унинг хулқ-атворида рўй берган ўзгариш билан боғлиқ экани кўринади, билинади.

Яна «Сароб»дан мисол: Муродхўжа домла қишлоқдан фифони фалакка кўтарилиб қайтади: хизматкорларнинг кўпчилиги колхозга киришга истак билдирган эди. Ёзувчи бу ҳақда ҳали ҳеч нарса демайди. Домланинг кўринишидаги ўзгариш яхшиликдан дарак бермайди. У Сораҳонга қараб ўшқиради:

«— Тур, йўқол!

Сораҳон ўрнидан турәтиб, ҳиқиллаб:

— Нима қилдим, ахир? Бекордан бекорга...— деди.

— Айтдим-ку, жон қизим, кўзингни лўқ қилма. Сигирга ўҳшаб қарама!— деди домла...». Домла умуман қаттиқ қўл одам, лекин қизини жуда яхши кўради, унинг камчиликларини ҳам фазилат деб билади. Агар у қизигаки дўқ урибдими, демак, вазият ниҳоятда оғир. Бу ерда гап Сораҳоннинг «кўзини лўқ» қилиши устида эмас, балки домланинг кечинмалари, қиши-

лоқда рўй берган тузатиб бўлмас ўзгаришлар устида кетаётибди. Ҳолбуки, домла бу ҳақда ҳали бир оғиз ҳам гапиргани йўқ.

Ёзувчи асардаги иккинчи даражали, эпизодик образларни яратишда, уларни характерлашда улар нутқидан айниқса унумли фойдаланади. «Сароб»даги Йўлчибой шундай образлардандир.

«Сароб» романининг асосий қаҳрамонлари Совет давлатига қарши турган шахслардир. Лекин уларнинг катта ва кучли оқим олдида иочорлиги, улар таянган устунларнинг ниҳоят даражада мўртлиги ҳар қадамда билиниб туради. Совет ҳукуматининг ўтказаётган тадбирлари (ерни миллийлаштириш, колхозлар тузиш) душманларни саросимага солади, уларнинг умидларини пучга чиқаради. Чунки улар оми, билимсиз деб юрган оддий дәхқонлар Совет давлати ўтказаётган тадбирларнинг туб моҳиятига тушуниб, бу тадбирларни қўллаб қувватлайдилар. Факультет комсомол ячейкасининг топшириғи билан ер ислоҳотига тайёргарлик компаниясими ўтказиша қатнашиш учун Саидий бир группа студентлар билан қишлоққа чиқади. Ер ислоҳотининг «ўзбек қишлоқларини хонавайрон қилишини» ўз улфатларидан эшигтан Саидий турли миш-мешларга ишонган эди. Лекин у қишлоқда бутунлай бошқа бир кайфиятга дуч келиб, қишлоқ аҳолисининг ер ислоҳотига тарафдор эканини кўради.

«— Ростини айтинглар, мулла акалар, чучунтиргани келдиларингми, ер бўлиб бергани келдиларингми?

Ҳамма қайрилиб қаради.

— Ер керакми, ахир?

— Ўзим бир батракман...— деди йигит сўраган кишидан кўзини олмай,—куч кўп... хотин, бола-чақа йўқ. Союз—қўйчиға, ер беринглар, деб ариза бердим; яланг чучунтиради денг. Ерди тайини йўқ...». Бу гапларни эшишиб келаётган бир мўйсағифид: «— Пешаннингга ер битган бўлса, оласан,—деди ва шундай эмасми, демоқчи бўлиб аравадагиларга қаради...

— Битмаганига қарайдими,вой... деди йигит, чолни нодонга чиқарган оҳангда,— пешанамга чойракорчилик қиласан деб битган бўлса, уни ўчириб, йигирма танобча ер битса ҳам бўлади.

Ҳамма кулди. Йигит давом этди:

— Ҳар ерлар бор денг... Агар шу кўптирма нондай ерлар чойракорнинг ўзиники бўлса-чи, ҳой... яна ҳукумат машина, омоч берса... эллик пайса уруғликдан ўнта туюга юқ унмаса, жиртак чалинг, афандихон!... Охунбобоев мияси путун одам экан, деб қўйдим... Шуни билади. Лекин, иш бошига камбағал ўтирсин дегани мияси путун одам ўтирсин, дегани экан-да!

Е гапим беандозами?» Революцион ўзгаришларнинг моҳиятини ўзича тушунган Йўлчибойнинг бу гаплари кишида ҳузурбахш кулги уйғотади. Бу йигит ёш бўлишига қарамасдан ерни, дэҳқончиликни яхши билади. Унинг гапларидан меҳнатга чанқоқлиги ҳам кўриниб туради. Саидий Йўлчибойни гапга согланида бу тушунмаган йигитнинг ўз ҳукуматини ҳимоя қилишга тайёр экани маълум бўлади:

«— Хўп,— деди Саидий бир кечаси Йўлчибойга,— ерни олдингиз, пешанангиздан чойракорчиликни ўчирдингиз, борди-ю, замон тескари бўлиб кетса нима бўлади?

— Оқ пошто келса, дейсизми?

— Йўқ, оқ пошто ўлган, бошқа... Уруш бўлса дейман... Ҳукуматимиз бойни ёмон кўради, ҳар ким ўзи ишласин, дейди. Бойни ёмон кўрадиган ҳукумат билан алваттаинки бойни яхши кўрадиган пошто уришади. Николай ҳам бойни яхши кўрар эди. Энди, алваттаинки ҳукуматимиз: «қани, Йўлчвой», деса, «лаббай,— деб милтиқ кўтариб чиқамиз-да, Раҳимжон ака!». Йўлчибойнинг билгани шу: бойлардан ерлар тортиб олиниади, камбағалларга бўлиб берилади. Ҳукумат камбағалларнинг тарафдори. Шунинг учун Йўлчибой «ҳукуматимиз» деб гапиради.

Орадан бир неча вақт ўтгач, Саидий яна Йўлчибойни учратиб қолди. «Унинг устида яхши бекасам тўн, бошида чуст нусха дўппи, белида шоҳи қийик, оёғида қишлоқ йигитлари яхши кўрган пошнаси бир қарич ағдарма этик» эди. У шаҳарга, секретарлар курсига ўқишга юборилган экан. Энди у аввалгидек жуда ҳам содда эмас, дунёқараши, савиаси анча ўзгарган, бўлаётган воқеаларга, ҳаётий масалаларга аввалгидек мустақил қараши, фикр-мулоҳазалари бор — ҳаётни, сиёsatни чуқурроқ тушунади. Энди уни ўзининг шахсий манфаатлари: қандай қилиб бўлса ҳам ер олиш, рўзгорини эпақага солиш масаласигина қизиқтирмайди.

Суҳбат вақтида Саидий «ўзини овсарликка солиб ўртага босмачилар кимлар?» деган мазмунда бир савол ташлайди. Йўлчибой ўз мулоҳазаларини билдиради: «— Батрак «яхши» деса, хўжайн, «ёмон» дейди. Батрак «ёмон» деса, хўжайнин бор товуш билан «яхши» деб бақирмасдан иложи йўқ. Батрак гап қайтарса, хўжайнин пичноқ суғуради, болта кўтаради. Буни мен ўз кўзим билан кўрдим... Ҳозир батраклар, камбағаллар ҳар ерда хўжайнинга гап қайтаради, илгаригидай шапалоқ еб қуллуқ қилмайди. Шундай бўлганидан кейин ҳамма хўжайнинлар ҳам пичноқ суғуриб, болта кўтаради... Босмачилик ўша хўжайнинлар кўтарган болта...». Кўрган-кузатганларидан шундай хулоса чиқарган Йўлчибой бу гапларини мисоллар билан исботлаб айтади. Ўқувчи Йўлчибой билан китоб саҳифаларида

икки мартағина учрашганига қарамасдан, уни севиб қолади, унинг қиёфасида 20-йиллардаги деҳқонлар оммасининг типик вакилини кўргандек бўлади.

Ёзувчи Йўлчибой образини кўрсатишда ортиқча тафсилотларга берилмайди. Йўлчибойнинг ўтмиши, яшаш шароити, билавий аҳволи, ҳаётга бўлган қараши — ҳаммаси унинг сўзлари орқали очилади.

«Сароб»да мамлакатимиз тарихининг мураккаб бир даври тасвирланади. Ёзувчи асарнинг бош қаҳрамони қилиб халқ ишига қарши турган Саидийни олади. А. Қаҳҳор Саидий қиёфасида тарих ғилдирагини орқага буришга уринган халқ ишига қарши юрган кишилар тақдирини кўрсатади. Характерлиси шундаки. А. Қаҳҳор душманлар фаолиятлари, ҳаракатлари, тақдирлари орқали мустаҳкамланиб бораётган, ҳамма фронт бўйлаб ғалаба қозонаётган тузумнинг афзаллигини ҳам ишонарли қилиб тасвирлайди. Саидий Йўлчибой билан суҳбатлашар экан, унинг гапларига етарли эътибор бермайди. Саидилар фожиасининг бошланиши ҳам шунда эди. Улар халқни, меҳнаткашларни тушунмадилар, уларга ишонмадилар. Йўлчибойнинг гаплари қишлоқдаги эзилган, хўрланган меҳнаткашлар вакилларининг гапи эди. Бу гапнинг асар бошланишидаёқ келтирилиши Саидийлар фожиасига сигнал эди.

Ёлғончи ва мақтанчоқ Жамол Қаримий — Улфат душман лагерида туриб ҳаракат этади. Унинг қандай одам эканини билиш учун бирорта ёрдамчи характеристика керак эмас, унинг сўзлари етарли. У Саидий учратган кишилар орасида мафкураси бузуқ бўлганлардан. Улфат бир амаллаб кун кўраётган Саидийнинг бор-йўғини шилиб олади, олган қарзини вақтида қайтармай, ваъдасини бузади. Саидийни учратгач, уни гап билан кўмиб ташлайди. «Бадбахт Илҳомни бир жойга пулга юборган эдим, дараги йўқ,— деди Улфат ўз ўрнига ўтириб,— бачағар ичib, бир жойда учиб қолдими?... Унга ишониб ёнимда бор пулимни ҳам бирор сўрагандага бериб қўйибман. Ҳали овқат қилганим йўқ. У келмаса ҳам, барибир, топамиз. Кутиб қоласиз-да. Аттанг, келмаса, жуда чатоқ бўлади-да. Кечқурун бирорвга ваъда берган эдим. Янги танишган қиз, ўн уч ё ўн тўрт ёшда. Мен шу кунда гўдагини хоҳлаб қолибман. Ўпсангиз ҳам, йиғласа! Сиз-чи?... Дафъатан ваъдага вафо қилинmasa, яхши бўлmas... Вақtingиз бўлса, кечқурун истироҳат боғига чиқайлик. Жуда ўткир қиз-да!». Улфатнинг гаплари ниқобсиз. Ўзини ҳурмат қилган одам бундай кишилардан узоқ юриши керак. Чунки Улфатни бирор орқали эмас, «ўзи орқали», гаплари орқали билиб олиш мумкин. Ёзувчининг мақсади фақатгина шу эмас, балки шу орқали Саидийни ҳам кўрсатиш. Ахир, Саидий кўра-била туриб, шундай одамларга яқин бўла-

ди, бирга бўлишни хоҳлайди, гап мана шунда. Саидий кўри-нишда душман лагерига беихтиёр ўтгандай бўлиши мумкин. Ҳолбуки, у кўра била турраб, улар билан яқинлашади. Худди шу учрашувдан сўнг ёзувчи Саидийни Шафрин билан ҳам кў-риштиради. Шафрин Саидийни қийин аҳволдан қутқаради. Саидий бу икки учрашувдан ўзига хулоса чиқариши, ким унга ҳақиқий дўст эканини билиб олиши мумкин эди. Лекин Саидий шундай қилмайди. Унинг фожиаси ҳам шунда.

Абдулла Қаҳҳор мана шу тариқа персонажлар нутқларини асарнинг асосий гояси билан, характер шаклланиши билан боғлаб боради, бу эса бош қаҳрамон характеристидаги нозик томонларни сезишга ёрдам қиласди. Ёзувчи салбий типларни воқеаларга олиб кирар ва уларни Саидий билан учраштирас экан, бунда уларнинг ўзларини ўзлари дарров фош қилиб қўйишиларига урғу қиласди. Худди Улфат сингари адабиётчи Аббосхон ва терговчи Мирза Муҳиддиннинг сўзлари ҳам ёзувчига уларни характерлаш имконини берган.

Шу нарса характерлики, Саидий атрофини ўраган кишилар мураккаб кечинмалардан ҳоли. Улар бошлигар ишларининг тўғри-нотўғрилигини ўйламайдилар, виждонлари азобланмайди, бирор хаёл ҳам сурмайдилар. Уларнинг бўш қалбларини, олиб бораётган ишларини, ҳаёт режаларини билиб олиш қийин эмас. Саидий зиёлиларнинг мажлисига келганда, «Қорни чиққан, йўғон гавдали нотиқ ўзининг ўрта мактабдаги мураббийси Саидийнинг диққатини жалб қиласди».

Саидийнинг бу қараши Аббосхон ҳақида ҳеч нарса билдири-майди. Шундан кейин Аббосхон нутқининг (у адабиёт ҳақида гапираётган эди) якунловчи қисми берилади: «...унинг шеъри юқори санъатга эга, дедингиз. Демак, «мафкурасига тегизмай» фойдаланиш мумкин. Сиз мафкуравий соғломми, бўлди». Шу билан «адабиёт майдонида ўзининг танқидлари билан жавлон урган танқидчи Аббосхон»нинг санъат ва адабиётта қўйган талаби, уни тушуниши маълум бўлади. Бу ерда гап айни гоявий саёс асар ёзган ёзувчига эмас, ўқувчига қўйишида. Аббосхон асар қандай бўлса бўлаверсин, фақат сен тўғри тушунсанг бўлгани, демоқчи. Иккинчи бир персонаж — терговчининг ҳам адабиётга «ўзига хос» қарашлари бор. У воқеага аралashiши билан, тўғрироғи оғзини очиши билан «кашфиёт» қиласди. У бир ҳикояни ўқиб, унда тасвиirlangan персонажларни топиб, суд қилмоқчи бўлади. Айборларни ҳам топади. Лекин ёзувчи: «Йўқ,— дейди мен бу одамларни танимайман. Мен булар тўғрисида ёзганим йўқ». У асар қаҳрамонлари ҳаёттий шахслар эмас демоқчи бўлади. Лекин терговчи: «Зиёлиларнинг энг қўрқоғи ёзувчилар экан», деб хулоса чиқаради. У ўзининг ҳақлигига шубҳа қилмайди. Унинг ноҳақ эканлигини

тушунтироқчи бўлган одамни нодонга чиқаради. Умуман унга бирор гап тушунтириш мушкул экани билинади. Саидий Аббосхон ва терговчи гапларини уларнинг оғзидан ўз қулоғи билан эшигади, уларнинг фикрлари тўғри эмаслигини билади, лекин шунга қарамасдан, улар билан танишади, уларнинг фикрини маъқуллайди, уларга улфат бўлади.

Шундай қилиб, иккинчи даражали персонажларнинг нутқлари фақат уларнинг ўзларинигина характерлаш билан чегараланмай, балки асарнинг бош қаҳрамони — Саидий характери моҳиятини очиш масаласи билан ҳам боғланиб кетади. Дарвоҷе, ёзувчиларнинг бу персонажларни гапиртиришдан кузатган мақсади ҳам Саидий характерини очиш эди.

«Сароб» даги Домла — жуда зиқна, тубан бир шахс. У ўзининг фойдаси олдида ҳеч нарсадан тап тортмайди, ниятини яшириб ҳам ўтиромайди. У ўзининг тез ўзгарувчан ниятларини ўз оғзи билан айтмаса, таъсирсиз чиқиши, балки ўқувчини ишонтирумаслиги ҳам мумкин эди. Саидий Тўпани касалхонага етказиш кераклигини Домлага айтади.— «Шунга ҳам касалхонами? Бу замонда ўрус табиб нимани билар эдики, энди ўзбеги билсин! Аҳмоқ! Касални билмайди, билмагандан кейин касалхонага юбор, деб осонгина қутила қолади...». Лекин Домланинг гаплари эътиrozга учрайди. Унинг хотини ва қизи Тўпанинг уйда қолиши манфаатдан эмас, деб Домлани ишонтиришади. Домла шу дақиқанинг ўзида уялмай-нетмай ўз фикридан қайтади «...табибингиз қанча нодон бўлса ҳам, ҳар ҳолда неча йил меҳнат қилиб шу илмни ўқиган-ку. Бир нарса билар, дейман? Майли, Тўпани юборайлик. Бир банда зораики шифо топса. Бир Мұҳаммад уммати деб яхшилик қылсангиз — савоб, бир одам дессангиз — инсонлик вазифаси...». Домла бир дақиқанинг ўзида ўзгаргани, савобни эсига олгани, фикрини дарров асослагани уялмайди, «йўқ» деганида ҳам докторларнинг ҳеч нарса билмаслигини ўз ҳаётидан олинган бир мисол билан асослаган эди. Атрофидагилар, шу жумладан Саидий ҳам бунга ўз муносабатларини билдиrmайди. Улар бунга ўрганиб кетишган, қолаверса, уларнинг ўзлари ҳам шу тақлитдаги кишилар.

Демак, Саидийнинг душманлар лагерига ўтишига сабаб унинг Мунисхонга бўлган муҳаббатида ҳам, ўзининг тушунмаслигига ҳам эмас, балки Саидий дунёқараши ва онгидаги уларга бўлган яқинликда эди. Ёзувчининг персонажларга сўз бериши, уларни Саидийга «кўрсатишдан», сўзларини «эшигтиришдан» кўзлаган мақсади ҳам шу эди.

Гап ёрдамчи персонажларнинг асар ғоясини бош қаҳрамон образи моҳиятини очишдаги роли ҳақида борар экан, Абдулла

Қаҳҳорнинг бошқа асарларига ҳам экскурсия қилиш мақсадга мувофиқ кўринади.

«Қўшчинор чироқлари» романининг бош қаҳрамони Сидиқжоннинг онаси Ҳадича хола образини олиб кўрайлик. Ёзувчи заҳматкаш аёл Ҳадича хола нутқи орқали унинг ажойиб қалбини, ўғлига бўлган чексиз муҳаббатини, ташвишларини, фикрўйларини, яшаш шароитини, дунёқарашини, соддалигини, поклигини кўрсата олган. Кўпдан бери Сидиқжон билан бафуржа ўтириб гаплаша олмаган аёлнинг ўғлига айтмоқчи бўлган гаплари ниҳоятда кўп. Кампир бир мантиқ, план асосида гапирмайди — у дам колхоздаги янгиликлар ҳақида гапиради, дам кичик ўғлининг уйларини «янгича» қилмоқчи бўлгани, дам қишлоқда тарқалган миш-мишлар ва уларга нисбатан муносабати ҳақида гапиради.

Сидиқжоннинг онаси ва укасининг гапларидан колхоз бу оиласа янги ҳаёт, баҳт ва истиқбол олиб келгани кўриниб туради. Бу гапларда зўрма-зўракилик, ўринсиз пафос ўйқ. Ҳадича хола Сидиқжоннинг Зуннунхўжалар оиласидан бутунлай кетганлигини эшитиб, «ўғлим, жон ўғлим,— деди ҳўплаган чойини «қўлт» этиб ютиб,— нега бундоқ қилдинг? Ўғлинингни тирик етим қилма. Боланг туфайли ҳар қанча оғирчилик бўлса, устингга ол». Шу пайт Зуннунхўжа келиб, Сидиқжоннинг уйга қайтишини сўрайди. Ҳозиргина ўғлининг хотинидан ажралишига қарши турган она Сидиқжоннинг Зуннунхўжага бир-икки кундан кейин боришга ваъда берганидан сўнг эса иккиланиб қолади: «—Болам,— деди Ҳадича хола узоқ жимликдан сўнг,— борасанми?» Бу саволи билан она асосий мақсадини билдириб қўяди. Ҳадича хола, бир тарафдан, ўғлининг колхозга киришини хоҳлади. Иккинчи тарафдан эса, унинг оиласини бузилишини истамайди. У ўғлидан: «Кўр ҳассасини бир марта йўқотади»,— деган жавобни олгач, «Колхозга кирасанми?» дейишга ботинади. Кўринишидан оддийгина гаплар, лекин уларнинг персонажларнинг жонли ва такрорланмас тили билан катта ўй-фикрлар натижаси сифатида айтилиши катта аҳамият касб этади.

Сидиқжон колхозга киришга аҳд қилган. Она ўғлининг қўйини пуч ёнгоққа тўлғазишини истамайди. Сидиқжон олдида ҳали анчагина қийинчиликлар учраши мумкин, у шулар ҳақида ўғлини огоҳлантиришини ўзининг оналиқ бурчи деб билади. «— Гап битта Сатторқул акангда эмас, болам,— деди,— сенга ҳозир ҳеч ким ҳам рўйихуш бермас. Эски ўртоқларингдан айрилгансан, янги ўртоқ орттирмадинг... Элдан қолгунча, эрдан қолган яхшироқ деб шуни айтса керак-да. Бу колхозни ҳозиргидай колхоз қилгунча одамларнинг эси кетди. Тайёр ошга баковул бўламан десанг, ҳаммасининг ҳам кўзига хунук кўри-

насан. Кўзинг кеч очилди, болам, жуда-жуда кеч очилди». Ниҳоятда аччиқ, лекин тўғри гаплар. Бу сўзларни катта йўл бошида турган ўғлига онадан бошқа ким шундай жон куйдириб айтиши мумкин? Иккинчи тарафдан, бу сўзлари билан ёзувчи Хадича холанинг доно хотин эканини, ўғлининг руҳий ҳолатини жуда яхши ҳис қилишини кўрсата олган. Бу гаплар билан ёзувчи Сидиқжоннинг Зуннунхўжа оиласидан кетиши унинг катта ҳаёт йўлидаги биринчи қадами эканлигини айтмоқчи. Бугина эмас, ёзувчи бу персонаж нутқи орқали, бир тарафдан унинг ўзини характерласа, иккинчи тарафдан бош қаҳрамон характеристидаги айрим чизиқларни кўрсатишни ҳам кўзда тутади. Шу билан бирга Хадича холанинг нутқи совет ҳукумати ўтказаётган тадбирларнинг халқ манфаатига мос эканлигини, меҳнаткаш халқ билан ёш советлар республикаси ўртасида монолит бирлик вужудга келаётганини ҳам кўрсатади. Унинг фонида ёш, янгиликка тез тушуниши керак бўлган Сидиқжоннинг иккиланиши, бир фикрга кела олмаслиги аянчли ва кулгили ҳолдир. Демак, А. Қаҳҳор эпизодик образларга сўз бериб, уларни гапиртирас экан, бунга катта бадиий эҳтиёж борлигини сезиш қийин эмас.

Ёзувчи манерасига хос бу йўл «Синчалак» да ҳам анча ривожлантирилган.

Мана, бўйни меҳнатга ёр бермаган, катталарнинг эшигига кун кўришга ўрганиб қолган Эшон. Қаландаров гап келганда, Эшоннинг хотинидан ёш эканини, ундан кўп калтак ейишини айтади. Атрофдагилар бу гапни ҳазилга йўнмоқчи, Эшонни хижолат бўлади деб уни қутқармоқчи бўладилар. Шунда Эшон: «— Қайси йили Шоҳимардондан қайтишда Фарғонада меҳмонхонада турганимизда тепиб, зинадан юмалатиб юборди, пес! Ушанда қаншарим ёрилган эди, мана... деб қаншарини» кўрсатади. Эшоннинг «ҳақиқат озор чекмасин» қабилида Қаландаровнинг сўзларини тасдиқлашидан мақсад хотинининг ёмонлигини исботлаш эди. Ҳолбуки, бу ҳақиқатда ўзининг қиёфаси намоён бўлади. Хотинидан калтак еб юрган одамга нисбатан ачиниш эмас, нафрат уйғонади. Бу ерда Эшон тилидан Қаландаров гапининг тасдиқланиши муайян шароит учун аҳамиятли. Чунки, агар бу гаплар фақат Қаландаров гаплари бўлиб қолса эди, уларнинг қанчалик тўғри эканига ўқувчи шубҳаланиши, муболағадир деб ўйлаши мумкин. Бошқа тарафдан эса, Эшонда озгина фаросат бўлса, ўз ҳолининг қанчалик аянчли эканини тушунмасмиди? Қаландаров уйидаги бу суҳбат фақат Эшон қиёфасини очиш вазифасини ўтамайди. Қаландаров Эшонга гап ташлаб уни суҳбатга тортиб, Саида олдида унинг устидан кулмоқчи бўлади. Лекин шу орқали ўзининг ҳам ками-кўстлари очилиб қолганини сезмай қолади. Эшон ҳурмат-

га сазовор одам бўлмаса ҳам, буни Қаландаров доим таъкид-лаб боради — Қаландаров усиз «кун кўра олмайди», усиз бир чизиқ нарса ёзомайди, энг керакли нарсаларни эшонсиз, унинг маслаҳатисиз қилолмайди. Бу «беозор» суҳбатнинг подтексти асосий образнинг мана шу характерли чизиқларининг тасвири билан боғланиб кетади.

Бу ерда гап фақат Эшонда эмаслигини, ёзувчи Эшонни рўйч қилиб, Қаландаровни кўрсатмоқчи эканлигини сезиш қийин эмас. Лекин бу суҳбатга сатирик тон бериш ва шу орқали Эшон, шунингдек, Қаландаров устидан кулиш учун Эшоннинг ўзини гапиртириш шарт экани кўриниб турибди.

Абдулла Қаҳҳор услубининг ўзига хос қирраларидан бири шунда кўринадики, ёзувчи ўзи хуш кўрган қаҳрамонини ҳам ноқулай аҳволда қолдираверади, уни изза ҳам қилаверади. А. Қаҳҳорнинг севимли қаҳрамонларидан бири Саидадир. У кунларнинг бирида Тожихонларнига боради. Тожихон оиласи нотинч. У эри билан яшаб кетишига кўзи етмайди. Саида унинг эри билан гаплашади, қўлидан қелганича Ҳамидулла гапиришни ошиҳат қилмоқчи бўлади. Ҳамидулла Саиданинг «ошгача, ош маҳалида, ошдан кейин гапирган ҳамма гапларини бир оғиз сўз билан бир пул қилди-қўйди. Тожихон меҳмонга бергани гул кесиб юрганида, Ҳамидулла Саидага яқин келиб секин сўради:

— Кечирадилар... Сўраганинг айби йўқ... ўзлари куёв қилганмилар?». Ҳамидулла Саиданинг ғаплари қанчалик тўғри бўлмасин, ўзинг оилавий ҳаёт қурмаган экансан «сенга ким қўйибди менга насиҳат қилишни», демоқчи бўлади. Бу билан кифояланмай, Саида устидан очиқдан-очиқ қулиб, «мавсумни ўтказмасдан куёв қилсалар ўзларига ҳам яхши, бизга ҳам яхши» дея ақл ҳам ўргатади: «Тожихон ўзларидан ибрат олса, камина куёвларидан ибрат олсан, турмушимиз бундан ҳам яхши бўлиб кетса ажаб эмас». Ҳамидулла Саида насиҳатларига насиҳат билан жавоб қайтариб, уни ноқулай вазиятга қўяди. Ёзувчи бу билан ҳамма нарсага ўринли-ўринсиз аралаша берадиган Саиданинг «кўзини очади», уни изза қилади.

Шундай қилиб, персонаж нутқи асаддаги воқеалар ривожида, қаҳрамонлар ҳаётида, кечинмаларида муҳим ўзгаришлар юз берган ёки юз берётган пайтда катта аҳамият касб этади. Шунинг учун ҳам муайян шароитдаги персонажлар ҳолатининг тасвирида автор нутқи «кучсизлик» қилиб қолган-дек туюлади.

Ёзувчи шунинг учун ҳам «Қўшчинор чироқлари»да «ҳаётингиздаги ҳал қилувчи дақиқаларда ўзларингиз бир-бирларингиз билан юзма-юз туриб, гаплашиб, муносабатларингизни

«белгилаб олинг» дегандек ўзи «чет» га чиқиб, персонажларнинг гап-сўзларига кўпинча аралашмайди. Романинг энг драматик саҳифаларидан бири — Сидиқжоннинг Зуннунхўжа уйидан чиқиб кетиш эпизодига эътибор берсак, персонажлар кайфиятига қараб диалогларнинг характеристи ҳам ўзгариб борганини кўрамиз. Аввалига жанжал Сидиқжон билан унинг қайнанаси ўртасида борар экан, бунга қайнатаси Зуннунхўжа ҳам, хотини Шарофат ҳам аралашмай туришади. Қанча оғир гап қилмасин, Сидиқжон қайнанасининг гапига яраша жавоб қайтаради. Ниҳоят, Сидиқжонда гап қолмайди, у ўз қарорида қатъий турди. Энди гапга оила бошлиғи — ҳамма нарсани ҳал қилувчи Зуннунхўжа аралашади. У Сидиқжонга «хотин кишининг гапини гап деб ўтириш керак эмас», деган маънода гапиради ва шу билан рўй берган кўнгилсизликни босди-босди қилмоқчи бўлади. Лекин Зуннунхўжа ҳам хотини билан ҳамфикр бўлиб, Сидиқжоннинг колхозга киришига жон-жаҳди билан қарши эди. Буни яшириш энди мумкин бўлмай қолади. Зуннунхўжа қизиқ устида ўз мақсадини ошкор қилиб қўяди. Зуннунхўжа билан Сидиқжон диалоги ҳар иккала қаҳрамон ҳаётида ҳал қилувчи роль йўнайди:

«— Кирмайсиз колхозга!

— Қираман!

— Қирмайсан!

— Қираман!

— Аҳмоқ!

— Аҳмоқ бўлмаганимда шу аҳволга тушармидим?

— Ғалчани иззат қилсанг, чориги билан тўрга чиқади.

— Ғалча бўлмасам тўпимдан айрилармидим. Айрилганни бўри ер дейдилар.

— Мен бўри бўлдимми?! Ит!

— Қуллиқ! Биз ит бўлсак, бўйнимиздаги тилла занжирингиз ўзингизга: янгичасига айтганда, мен қизингизни хоҳламайман, эскичасига керак бўлса — уч талоқ қўйдим!».

Бирорта изоҳсиз «соғ» диалог! Дарвоқе, изоҳ керакмикан?! Йўқ! Чунки гапиувчилар шундай бир кайфиятдаки, улар ҳолларини изоҳловчи бирорта штрих ҳам ортиқча бўлар эди.

«Кучли фикрлар курашини ифодалаётган бу диалог ўз ассоциативлиги, яъни занжирсимонлиги билан характерланади. Яъни гаплар бир-биридан келиб чиқади, қаҳрамоннинг бирин томонидан айтилган фикр иккинчи томонда муайян бир қарама-қарши фикр туғдиради. Бундан ташқари келтирилган бу диалог китобхон эътиборини ўзига муттасил жалб қилиб туради. Яъни у жуда ҳам қизиқарли диалог. Чунки бунда сафсата эмас, фикрлар кураши боряпти. Фикрлар кураши эса

жуда ҳам ихчам ва метин мантиқ билан майдонга чиқяпти... Зуннунхўжа ва Сидиқжон, Сидиқжон ва Шарофат, қайнана ва Сидиқжон ўртасидаги диалоглар шунинг учун ҳам ўзига тортиб, асарнинг шу бобига алангали эмоционаллик бағишилаб турадики, уларда, биринчи навбатда, қаҳрамонлар ўз мақсад-интилишларини ва иккинчидан, ички қиёфаларини ошкор қиласидилар⁵.

Сидиқжон Зуннунхўжага бир нима дейишдан аввал Ўрмонжонни эслайди. Келтирилган диалогда Сидиқжоннинг Ўрмонжондан эшитган мақолдан фойдаланишини ўқувчи сезмасдан иложи йўқ (Ўрмонжон Сидиқжонга «Нега сен ўз тўпингдан айрилиб қолдинг? Айрилганни бўри ер эди-ку!» деган эди). Сидиқжон Ўрмонжон гапларини тасодифан келтиргани йўқ, албатта, Ўрмонжоннинг аччиқ, лекин тўғри гапларини «Сидиқжон бошини қўйи солиб, ерга кириб кетгудай бўлиб «чурқ» этмасдан ўтириб» эшитгани бекор кетмади. Сидиқжоннинг колхозга кириши аниқ, уни бу йўлдан ҳеч ким қайтара олмайди. Лекин буни у яхшилик билан, маслаҳат билан қиласман деб ўйлаган эди, бўлмади.

Сидиқжон билан Зуннунхўжа диалоги улар ўртасидаги фарқлар, ғоялар курашини ифодалаши билангина эмас, балки фавқулодда қўйма ва табиийлиги билан ҳам, бу гапларни бошқача ифодалашга ҳеч бир имконият қолдирмаётгандиги билан ҳам эътиборни тортади. Дарвоҷе, шакл ва мундарижа-нинг бу диалогда ниҳотда уйғун бўлиб келиши унинг аҳамиятини белгилаб беради.

А. Қаҳҳор «Қизлар» ҳикоясида, воқеаларни ярим ҳазил-ярим чин формада берадики, бу асар руҳига тамомила мосдир. Ёзувчи персонажнинг ажойиб характеристини, дунёқарашини характерли деталларда очиб ташлайди. У қаҳрамонини калака қиласи ва уни яна нималар биландир оқламоқчи бўлади. Нурматжон ўтган асрдан қолган одам. Дунё ўзгариб, янги замонлар барқарор бўлибдию, у бехабарлигича қола берибди. Лекин уни бу дунё ишларидан бутунлай бехабар деб бўлмайди. Масалан, у хотинларнинг ишлашини тан олади. У «Оладиган хотиннинг кўздан панароқ бирон ишхонадами, хотин-халаж кўпроқ маҳкамадами ишлаб беш-ўн танга пул топадиган бўлиши ҳам маъқул, ҳусн — чинни товоқ, қазиси билан бўлса яна яхши бўлади» деган хуолосага келган. Чунки ҳамма жиҳатдан мукаммал бўлган Нурматжоннинг «битта камчилиги бор, у

⁵ И б р о ҳ и м Ғ а ф у р о в , Гўзалликнинг олмос қирралари, Тошкент, Үздавнашр, 1964, 132—133-бетлар.

ҳам бўлса шуки, сал камхаржроқ». Отасидек эшонлик қилмасдан айш-ишратга зўр берган бу шахснинг бўйни ўн беш йилдан бери ишга ёр бўрмайди. Мана шу ишёқмаслик уни бўла жак хотин ишласа ҳам майли, пул топар-ку деган қарорга олиб келади. Унинг бу қарори хотинликка рози бўлар деб умид қилган ва шундай бўлишига ҳеч шубҳаланмаган Адолатхоннинг Тошкентга кимёгар бўлиш учун ўқишига кетганини эшитгач, айниқса мустаҳкамланади. Чунки у «кимёгарлик нима эканини яхши билади — кимёгар истаса фиштни, тошни тилла қиллади. Адолат кимёгар бўлса, айни муддао — ишхона ёки маҳкамада ишламасдан, уйда ўтириб тилла қила беради».

Ёзувчи ҳикояни «Қизлар» деб номласа-да, ўқувчи қизларни кўрмайди. Ўқувчи улар билан Нурматжон орқали танишади. Тошхўжа эшонга бир вақтлар назр қилинган опа-сингил — Каромат ва Адолат, эшон дом-дараксиз кетгандан сўнг, унинг ўғли Нурматジョンга қолиши керак. Бунга Нурматжон сира шубҳа қилмайди. Бундан Каромат ва Адолат хабарсиз, хабари бўлганда ҳам бу улар учун бир қулгили воқеа. Лекин Нурматжон шу умид билан яшайди, қизларни онаси олиб келиб беришини кутади.

Каромат бўйи етиб турмуш қуриб кетади. Бундан хабар топган Нурматжон хафа бўлади. У Кароматга уйланишга ҳаракат қилиб кўради, лекин Кароматни унга беришмайди. Шунда аччиқ қилиб иккинчи марта оғиз очмайди, «...шундай қилгани ҳам яхши бўлган экан, қиз ҳозир аллақайси заводнинг бошлифи, заводда ишлайдиган мингдан ортиқ эркак, шулар қатори эри ҳам, ўшанинг оғзиға қарайди».

Ёзувчи шундай тушунчали одам билан қизларни учраштириб гапиртириб ўтирмайди, балки Нурматжонни бир вақтлар қизларини назир қилган кампир билан учраштиради. Кампир Нурматジョンни танигач, «Бу нимаси, совхозга чиқсанг бўлмайдими?»— дейди. Кампир Нурматジョンнинг кимлигини била туриб, шундай савол беради. Бу билан ёши бир ерга бориб қолган, ўтмишда қандайдир эътиқод билан қизларини назр қилган оми бир хотин янги ҳаётга мослашгани, «ишламаган — тишламас» деган янги ҳаёт талабини тушунганини кўрсатиб турибди. Яна бу савол Нурматジョンнинг фикрлари пуч эканлигига бир сигнал ҳамдир.

Кампир Нурматジョンнинг: «— Э, Адолатхон совхоздамилар?» деган саволига берган жавоби билан назр деган нарса унинг эсидан бутуnlай чиқиб кетганини кўрсатади; у Нурматジョンга замон ўзгарганини тушунтиromoқчи бўлади: «Назр бўлса отангга назр эди-да. Бундан ташқари ҳозирги қизларнинг изму ихтиёри ўзида, кўнглини олиш керак». Биринчи саволига Нур-

матжон босиқлиқ билан: «Қиблагоҳимиэга назр бўлса, у кишининг мендан бўлак меросхўри йўқ»,— деб жавоб беради. Лекин унга кампирнинг қизлар «қўнглини олиш керак» дегани ёқмайди, жаҳли чиқади, бир оз қизишида ва «мен нега Адолатхоннинг қўнглини оламан»,— дейди. «Шу ишнинг шундай бўлиши аввал сизнинг, қола берса қизингизнинг охиратига кепрак!». Кампир кулгисини яшира олмайди ва жаҳли чиқиб кетди шекилли, Нурматジョンни калака қила бошлайди: «— Энди қандай қилай, Нурматジョン,— деди кулги ёшини артиб,— бўлар иш бўлган. Энди ҳар нима ҳам бўлса, отангни туш кўрсанг, чақимчилик қилиб юрганин». Охири кампир «....Адолатга хат ёзай, эридан чиқсин бўлмаса...» деб қутулмоқчи бўлади. Бу гап ҳам ҳазил эканини тушунмаган Нурматジョン «— хола қаҷон хабар олай?»— деб қолади.

Агар ёзувчи бу асарда Нурматジョンни гапиртирмаса эди, ўқувчи Нурматジョンнинг шунчалик тубанлигини муболағага ўйниши мумкин эди. Ёзувчи Нурматジョンни қизлар билан эмас, балки уларнинг онаси билан учраштирас экан, кампир билан Нурматジョンни ўзаро қиёслаш орқали унинг психологиясини очиб беради. Унинг нечоғли кулгили, аянчли экани ўтмишда отасига сифинган, лекин замон ўзгариши билан янгича фикрлашга ўрганган аёл олдида айниқса ёрқин кўзга ташланади.

«Майиз емаган хотин» ҳикояси эса бош қаҳрамон Мулла Норқўзининг гапи билан бошланади. Унинг ҳаётга бўлган муносабати, чунончи хотин-қизлар озодлигига қараши ўта эскича. У паранжи ташлаган хотин-қизларнинг ҳар бир ҳаракатидан «Бузуқликка далолат қиладиган» белгиларни топади. «Етти қават парда ичид» ўтирадиган хотини эса унинг кўзига фаришта бўлиб кўринади: намоз ўқийди, тўпифидан юқорисини оврат ҳисоблаб жиякли иштон кияди... Бундай умумий ҳарактеристикадан кейин воқеага унинг хотини аралаша бошлайди. У Норқўзи айтгандан ҳам ҳаёлироқ бўлиб чиқади. Ҳовли устидан пастлаб учган самолётни кўриб, у «чарс бўланадай патиллаб қочмоқчи бўлганида», юзи бутоққа тегиб, кўнгли озади:

«— Ахир, мунча,— деди Мулла Норқўзи,— самолёт паст кўрингани билан ундаги кишига сен жуда кўринганингда, чумолича кўринасан.

— Чумолича кўринисам ҳам, кўринар эканман-ку иш қилиб! — деди хотин йигламсираб». Норқўзи хотинининг ҳаёли эканини яна бошқа фактлар билан далиллайди. Маълум бўлишича, унинг хотини ўзига ўхшаш ўта ҳаёли, одобли, «одатдаги рўзадан ташқари ашир ойида рўза» тутадиган, заводдан чиққан нонни, ҳозирги күшхоналарда сўйилган молнинг гўштини емай-

диган ўртоғинигина тан олар әкан, Норқўзининг хотини воқе-ага аралашиб гап бошлар, эри айтганларини исботлабгина қолмай, уни янги-янги далиллар билан бойтади. У очиқ хотин-қизларга шундай туҳматлар ёғдирадики, Норқўзи очиқ хотинларни бузуқ, эрини алдаб, ишрат қилиб юришларига тўла ишонч ҳосил қиласди. Норқўзининг ўзи бирор кимсанинг қўлидан тутган эмас, бирор аёл суҳбатида бўлиб, ундан беҳаё гап эшигтан ҳам эмас. Шунинг учун ҳам у эшигтан миш-мишларни гапиради. У чойхонага чиққанида ўзи билган очиқ аёлларни санаб чиқади ва хотини айтган айбларни уларнинг ҳар қайсисига тақаб, «жиндай ўзидан ҳам қўшиб» қўяди.

Шундай қилиб, Норқўзи билан унинг хотинининг ёлғоняшиқ гаплари ҳикояда тасвирланган воқеанинг ривожида муҳим роль ўйнайди. Норқўзи барча хотинлар ичидаги фақат ўз хотинининг пок эканлигига тўла ишонган бир вақтда унинг хотини бузуқликнинг ғаройиб намунасини кўрсатиб, Мулла Норқўзини маҳалла-кўй олдида шарманда қиласди.

Норқўзи хотинларга қандай айб тақаган бўлса, шу айб аввало унинг фаришта бўлиб кўринган хотинига тааллуқли бўлиб чиқди. У хотинларининг очиқ юришига йўл қўйган эркаклар «хотинининг ёки қизининг ўйнашлиқ қилиб тургани устига кирса-чи, қуръон урсин агар, «бенават» деб чиқиб кетади»,— деб катта оғизлик қилган эди. Бу таънаси унинг ўзига қайтди. У чойхонада паранжисиз хотинлар шаънига тош отаётганда кимдир унга қарши: «Паранжилик хотин ҳаром ишга яқинроқ бўлади. Сабаб денг! Агар сиз юзига кулиб қарамасангиз, деворга шоти қўйиб кўчага мўралайди; қўйлаклик олиб бермасангиз, том орқасидан кўйлак узатадиган чиқиб қолади», деган эди. У киши каромат қилган экан: Норқўзининг «заводдан чиққан нонни емайдиган» хотинига ўртоғи ҳар сафар келганда, бирор нарса олиб келади, охирги келишида эса «бир жўра шоҳи олиб» келган эди.

Ёзувчининг энг керакли ерларда персонажларни гапитириши маълум. У бу асарда ҳам қаҳрамонни гапитириб, шарманда қилиш йўлидан боради. Хотинини жиноят устида тутганда ҳам Норқўзи бўлиб ўтган воқеага тушунмайди (хотинининг ўйнаши аёл кийимида бўлади). Норқўзи зўр бериб «синглим, сиз ўзингизни бир четга олинг!» деб унинг ғамини ейди. Бу «бенават» нинг кучлироқ кўриниши бўлади.

Персонажларни уларнинг нутқи орқали характерлаш А. Қаҳҳор услубининг етакчи хусусиятларидандир. Ёзувчи айниқса, сатирик ҳикояларида қаҳрамонлар нутқи — монолог, диалоглар орқали улар образини очиб беришга интилади.

Ёзувчининг монолог, ўз-ўзи билан фикрлаш, сұхбатлашиш, диалог сингари приёмларга мурожаат этиши образ мантиқи билан, асарнинг умумий гояси билан белгиланади. Чунончи, бебурд, маданиятсиз, илмисиз кишиларни у кўп сўзли, гапдон қилиб беради. Маҳмадоналик бундай одамлар учун ниқоб; улар бўш қалбларини гап билан яширмоқчи бўладилар. Ёзувчининг ўттизинчи йиллар ўрталарида ёзилган «Санъаткор», «Адабиёт муаллими», «Ўжар» ҳикояларининг қаҳрамонлари бунга яхши мисол бўла олади. Бу қаҳрамонлар учун умумий нарса шундаки, улар гапираётган гапларини ўйлаб кўрмайдилар, гапираётган гапларини шунчаки механик тарзда ифодалайдилар. Санъаткор «Ж» ҳарфининг каттаси қандай ёзилишини билмайди ва буни очиқ тан олгиси келмайди. Дафъатан бу ҳарфнинг қайси сўзда ишлатилиши унинг эсига тушиб қолиб, «Баржом» деганда ёзилади» деб қўяди. Бу ҳалиги саволга жавоб эмас. Шундан кейин саволга алоқаси бўлмаган масалага кўчади-да, хизматчини яна қайтиб савол беришга ботина олмайдиган вазиятга солмоқчи бўлади, унинг айби билан содир бўлган воқеага ўтади: «Кечаги баржом оғзи очиқ қолипти, гази чиққандан кейин бир пулга қиммат. Сиз ҳам дунёга келиб культурний бўлсангиз-чи!... Бурнингиз терлади, артинг, таъбир жойиз кўрилса!». Санъаткорнинг маданиятсизлиги фақат «Ж» ҳарфини билмаслигига эмас, балки «культурний» бўлиш мақсадида айрим ибораларни ўринисиз қўллашида кўринади. У режиссёрнинг маданийлиги ҳақида мулоҳаза юритар экан, унинг икки гапнинг бирида «таъбир жойиз кўрилса» деб туришини эслайди, бу иборани ишлатишга интилади. Санъаткор кўпинча ўз-ўзи билан сұхбат қиласди. Унинг ёнида ҳеч ким йўқ, ҳеч ким уни эшиитмайди. Ана шу тарзда ёзувчи унга ўзини кўрсатиши учун шароит яратади. Қаҳрамоннинг берилган саволга тўғри жавоб бермаслиги, билмаганини ёки хато қилганини бўйнига олмасдан, бўлаётган баҳсга алоқаси бўлмаган масалаларга кўчиши Абдулла Қаҳҳорнинг «Ўжар» ҳикоясидаги персонажларнинг ҳам ўз-ўзини фош қилувчи омиллардан бирига айланади.

Икки улфат — молия ходими Қутбиддинов билан қўшниси Заргаров бола тарбияси ҳақида сұхбатлашадилар. Сұхбатнинг мавзуи улар учун янги масала, чунки улар қачон учрашмасинлар, сұхбат бошдан-оёқ икки мавзудан четга чиқмас эди: «бира — шу кетишда шаҳаримиз яна эллик йилдан кейин қандай бўлар экан; иккинчиси — бу сўнгги вақтларда фан кишиларни ёшартириш тўғрисида нега индамай қўйди?». Бу сафар эса нима ҳақида баҳслашмасинлар, уларнинг тушунчалари тор, билимлари саёз эканлиги, жон куйдириб гапиришлар эса

уларнинг чегараланганликларини яширувчи бир ниқоб эканлиги яққол кўзга ташланиб қолади. Ёзувчи бунга ҳам персоналлар нутқига синчковлик билан ёндашиш орқали эришади:

Юқорида айтганимиздек, икки улфатнинг суҳбати бола тарбияси устида кетади. Бири бола миясини «молия тили билан айтганда, алоҳида параграф»га ўхшатса, иккинчиси бунга қоғиил бўлишдан бошқа гап топа олмайди. «—Оҳ-оҳ-оҳ. Отангизга раҳмат. Қамол топинг, дўстим. Мен ҳам худди мана шуни айтгман деб турган эдим. Шундоқ, дўстим, бола деганингизнинг мияси...» деб, сўз тополмай ўзлари учун бу гаплардан «муҳимроқ масалага» ўтиб кетади: «Ие, сиз нега оқ ичмадингиз?».

Қутбиддинов бир вақтлар шахмат ўйнаганида содир бўлган воқеани эслаб, «Шундан бери ўйнамайдиган бўлиб кетдим. Нима кераги бор? Хўш, ана қолдирдим, нима бўпти?», — дейди. Қутбиддиновнинг дўсти Заргаров ҳам ундан қолишмайди: «— Шуни айтинг, поезддан қолиптими?» — дейди у. Дарвоқе, шахмат билан поезд ўртасида ёки шахматдан қолиш билан поезддан қолиш ўртасида қандай умумийлик бўлиши мумкин? «Бири тоғдан келса, иккинчиси боғдан келади» қабилидаги бундай диалоглар сўзловчиларнинг саёз ички дунёларни очишга хизмат қиласи, уларнинг ўзларини ўзлари фош қилишларига, ҳақиқий қиёфалари ва савияларини намойиш қилишларига ёрдам беради.

«Ўзининг айтишига кўра «Нафис адабиёт муаллими» ўртоқ Бақижон Бақоев оғилга кириб таъби хира бўлди: сигирнинг қулоғига яна кана тушибди! Қанадан ҳам кўра сигир унинг аччиғини келтиради: канани терай деса қўймайди — бошини силкийди, пишқиради». Абдулла Қаҳҳорнинг «Адабиёт муаллими» номли машҳур ҳикояси шундай бошланади.

Ёзувчи ҳикоя қаҳрамонининг «нафис адабиёт муаллими» эканини «ўзининг айтишига кўра», — деб таъкидлайди, чунки, кейинчалик маълум бўлганидек, Бақоевнинг нафис адабиёт тўғрисидаги билими техникум ўқувчиси Ҳамиданнинг билимидан ҳам паст экани аён бўлиб қолади. Бу — масаланинг бир томони, иккинчидан, Бақоевнинг қилган ишлари, сигир, товуқлар ҳақида юритган «фалсафий» фикрлари нафосатни тушунган, «таъби нозик» бир кишига муносаб эмаслиги ҳам маълум бўлади. У ўзининг гап, сўзлари ва ҳатто гапириш манераси билан ҳам ўзини-ўзи фош этади. Бақоевнинг қачонлардир қулоғига чалинган, лекин ўзи яхши тушуммаган гапларни айтиши, номларни нотўғри талаффуз қилиши, бирор мантиққа эга бўлиб туялган фалсафий фикрларининг маъносизлиги, бошлаган гапини охиригача етказмаслиги — хуллас, ҳамма нарса унинг

қандай «нафис адабиёт муаллими» эканини кўрсатишга қараштилган. Кўринишдан, Бақоевнинг билмайдиган нарсаси йўқ, у ҳамма нарсага аралашар экан, «мен шахсан шундай деб биламан»,— деб қўшиб қўяди. Бақоев ўзининг жуда маданий эканини таъкидлаб боради; қайнинглиси олдида кекиргани учун ундан узр сўрайди. Лекин аслида у энг маданиятсиз одам гапирадиган гапини ҳам тахминан билади — қачондир, қаердадир эшитган-у, уқиб тушунмаган. Масалан, у техникумдан рабфакни яхши деб ҳисоблар экан, нимага шундайлигини ўзи ҳам билмайди. «Мен бир борган эдим. Қанцелярияning эшигига практикум деб ёзиб қўйипти», дейди у ва давом этади: «Тўғри эмас». Нимага тўғри эмас дерсиз: «Практикум, минимум, максимум булар ҳаммаси лотинча ёки лотинчага яқин сўзлар. Мен шахсан шундай деб биламан». Хўп, лотинча сўз экан, нимаси нотўғри? Бақоевни нима тўғри, нима нотўғри деган масала қизиқтирилди, унда қай шаклда ва қай масалада бўлмасин, бари бир, ўз фикри бўлиши керак, холос. Ундаги ҳамма нарса шунга бўйсундирилган.

Бақоев кана терай деса, сигир бошини силкиб, пишқириб, унинг аччиғини келтиради:

— Ҳайвон,— деди Бақоев,— бу сигирни сотиб пулига чўчқа олиш керак. Бақоев бу қарорга жаҳл устида келади. Хотини унга бу нарсани амалга ошириш мумкин эмаслигини айтади: «— Шаҳарда чўчқа асраш мумкин эмас»,— дейди у самоварга кўмир солаётиб. Бақоев бу гапга ҳам ўз фикрини билдиришга тайёр бир важоҳатда: «Нима учун? Тақиқ қилинганми? Ким айтди?» дейди ва бу гап ҳам ўзидан чиққанлигини эслаб, дарров ўзгаради: «Тўғри, мумкин эмас... албатта, мумкин эмас...».

Ёзувчи қаҳрамонини ҳар вақт ҳам узундан-узоқ гапирилмай, баъзан унинг гапларининг мазмунини келтиради. Бироқ у Бақоев гапларининг мазмунини баён қилас экан; унинг нутқи манерасини сақлашга эришади. Ҳамида Чеховнинг «Ўйқу истаги» ҳикоясини қанчалик тўғри тушунганини билмоқчи бўлиб, поччаси Бақоевга мурожаат этар экан, у Чехов ҳақида тушунарсиз гапиради, Бақоевнинг бемаъни гапларини келтира бериши эп билмаган ёзувчи ўқувчини бу гапларнинг мазмуни билан таниширишга ўтади: «Шундан кейин ўртоқ Бақиён Бақоев узундан-узоқ сўзлаб кетди. Унинг нима тўғрисида сўзлаётганини Ҳамида билмас эди. Детирдинг деган аллақандай машҳур танқидчи Шеллинг деган ёзувчига «сен дастёрга зор бўлгунча, ўғлинг дастёрга бўлади» — деб хат ёзган; «Маркс Добролюбовни Меринг билан бир қаторга қўйган; Стендинг деган аллақандай бир драматург ўлар чоғида Демпинг деган;

бир танқидчига: «агар бутун жониворларни худо яратган бўлса, мен унинг завқига қойил эмасман, эчкемар ҳам жонивор бўлдими? деган...». Бақоевни номлари «ўзига хос талаффуз билан» қайд қилинган машҳур кишилар эмас, балки улар «номлари»нинг «-инг» билан тамомланиши қизиқтиради. Баъзи бир хорижий кишиларнинг номлари «-инг» билан тугалланишини тасодифан эшитган Бақоев ҳамма номлар ҳам «-инг» билан тугалланмаслигини билмайди. Натижада у қандай ном ёдига келиб қолган бўлса, уларни «Меринг... Стендинг... Шеллинг», дея бузиб айта беради. Бақоев чала-чулпа эшитган машҳур кишиларнинг номларини ўринли-ўринсиз эсга олиши билан ўзини бой ва кенг тушунчали одам қилиб кўрсатмоқчи бўлади. Бироқ Боқијон бу хилдаги «адабий» атамаларни ҳам унча кўп билмайди. «Суҳбат нима тўғрисида бормасин, у ўз миясидаги мана шу тайёр сўзларни, ҳатто тайёр жумлаларни ишлата беради, баъзан бисотидаги сўзлар тугаб қолса, уларни қайта-қайта ишга солади, суҳбатга ҳеч қандай алоқаси бўлмаган мавзуларга ўтади, агар сўз тополмай қолса, ўзининг заифлигини яшириш учун «ҳимм...» деган товуш чиқариб бироз тўхтаб олади»⁶.

Бақоевнинг ҳамма билган, эшитган гапларини Ҳамидага гапириб ташлаши фақат эзмалингидан эмас. У Ҳамиданинг саволига жавоб беролмайди. У Чехов ҳақида узундан-узоқ гапирмасин, «Чехов» тўғрисида ўзимнинг фикрим бор» демасин, Ҳамида унга: «Уйқу истаги» қайси Чеховники? — деб сўрашга мажбур бўлади. Демак, Ҳамида Бақоевнинг Чехов ҳақидаги мулоҳазаларидан қониқмайди. Бақоев эса — Ҳеч шубҳасиз бу Чеховники,— деб жавоб беради. У Ҳамиданинг тушунмаганини билади. Лекин нима қылсинки, тушунтиришга ожиз. Шундай экан, бошқа билган нарсалари эвазига ўзининг билимидаги камчиликни тўлдирмоқчи бўлади. Ёзувчи Бақоев: айтган гаплар Ҳамидані қизиқтирган масалага алоқаси бўлмагани учун ҳам уларнинг мазмунини келтириш билан қаноатланади.

Маълумки асарда уч қаҳрамон — уч персонаж иштирок: этади. Бош қаҳрамон Бақоев, табиий, ҳаммадан кўп гапиради. Гапиргандаги ҳам, ишонч билан, «илмий асосда» гапиради — у адабиёт муаллими. Энди қолган икки персонажни — Бақоевнинг хотини Мукаррам ва унинг синглиси, техникум ўқувчиси Ҳамидані олиб кўрайлик, уларнинг ҳар иккиси ҳам ўзини Ба-

⁶ А. Алим уҳамедов, Абдулла Қаҳдор ҳикояларида одам образи,. Тошкент, Ўзбекистон ФА асосий кутубхонаси, 1948, 39-бет.

қоев олдида ниҳоятда паст олиб юришади. Уларнинг гапларидан ҳам Бақоевга нисбатан ҳурматлари, камтарликлари сезилиб туради. Қизифи шундаки, улар Чеховни ва унинг «Үйқу истаги» ҳикоясини адабиёт муаллимидан яхши билишади. Ҳамида поччасига савол берар экан, шу саволида ҳикояни тұғри тушунгани билинади. Лекин Ҳамида поччасидан уялади, ҳар ҳолда у адабиёт муаллими. Эрининг нотұғри гапираётганини, қийналиб қолганини сезган Мукаррам ҳам гапга аралашади: «— Чехов Пушкин билан бир даврда яшаган эмас-ку,— деди Мукаррам,— бизнинг кутубхонада унинг Максим Горький билан олдирган сурати бор. Чехов 1904 йилда ўлган бўлса керак». Мукаррам ҳам, Ҳамида ҳам Чеховни билишлари билан Бақоевдан анча юқори эканликларини кўрсатадилар, лекин Бақоев олдида камтарлик қилиб, уялиб, иккиланиб, гумонсираб гапирадилар. Уларнинг ўзларини тутишлари, гапириш манералари ҳам Бақоев қиёфасини очишда катта роль ўйнайди. Адабиёт муаллими булар фонида рўй-рост кўринади. Бақоевнинг хотини билан синглиси унга ёрдамчи саволлар бериб, Чеховнинг ким эканлигини тушунтирмоқчи бўладилар. Лекин улар Бақоевни ҳақиқатга яқинлаштирганлари сари у гапни чалғитади, Чеховни мутлақо билмаслигини кўрсатади.

Бақоевнинг ўзига хос фазилатлардан бири ва энг муҳими шундаки, у гапдан-гап чиқаради; бир нарса устида гап бошлар экан, уни охирига етказмай туриб, иккинчисига ўтади. Бу Бақоев характеристидаги тасодифий нарса эмас, албатта. У умуман ўз предмети — адабиётни, чунончи Чеховни билмагани туфайли, Ҳамидан чалғитиш учун, ўзини қалтис ҳолатдан қутқазиш учун гапдан-гапга кўчиб туради. Унинг умуман ҳеч қандай турғун тушунчаси йўқ. Шу жумладан, адабиёт тұғрисида ҳам. У ҳаётдаги бекарор ва юзаки одамлардан. Гап мана шунда.

Юқорида таҳлил қилинган ҳикоя қаҳрамонларининг ҳеч қайсисида мураккаблик йўқ. Улар ўзлари гапираётган гапларини ҳам «эшитмайдилар». А. Қаҳҳор уларни бирор дақиқа ўйлатиб ҳам қўймайди. Улар билган нарсаларининг ҳаммаси — гап-сўзларида. Ёзувчи бу асарида ҳам персонажлар мөҳиятини бирор воқеа муносабати билан очади. Ёдингизда бўлса, артистни бирор интеллектуал касб кишиси эмас, балки бир тракторчи танқид қилган эди; икки дўст Салтиков-Шедрин — икки одамми, бир одамми — шуни билмас эдилар; нағис адабиёт муаллими эса Чехов «масаласи»да қоқилади, қайси Чехов — «у Чеховми, бу Чеховми» эканлигини ўзича мусоҳаба қилиши билан ўзининг кимлигини намойиш этади. Ҳуллас, ёзувчи ана шу тарзда қаҳрамонлар ҳаётидаги бирор ҳодиса орқали улар қиёфасини тасвиrlайди.

А. Қаҳҳор одатда асосий қаҳрамонни яхшироқ кўрсатиш мақсадида воқеаларга улардан ҳар жиҳатдан пастроқ туолган ёрдамчи персонажларни киритади. Лекин улар «билимдон» қаҳрамонларга қарама-қарши ўлароқ, ўзларининг ақл-фаросати, хулқ-атвори, гап-сўзлари билан ҳам ўқувчи ҳурматини қозонадилар. Ёзувчи бу нарсага кўпинча персонаж нутқи устида моҳирона ишлаш орқали эришади.

А. Қаҳҳор юзаки, билимсиз, маданиятсиз, саводсиз қаҳрамонларни асосан сўзлатиш орқали характерлар экан, айтишга бирор тузукроқ фикри бўлмаган қаҳрамонларга бъязан сўз бермай ҳам қўяди. Бунга Жонифон образи характерли мисол бўлади.

Ёзувчи «Жонифон» ҳикоясида бўлиб ўтган воқеанинг саббчиси, асарнинг бош қаҳрамони Жонифонни «гапиртирмайди. Бир-икки ўринда унга сўз берилгандай бўлади, лекин унинг бир-икки сўзи ҳам ўзини фош қилишгагина қаратилган бўлади. Жонифоннинг хотини эри устидан арз қиласди. Бундан жаҳли чиққан Жонифон — «Гапир, ҳа гапир!... Сенинг гапинг гап-у, бизники гап эмасми?...» деб катта бир нарсани очгандай бўлади. Лекин шу билан ёзувчи Жонифон нутқини тўхтатиб қўяди-да, унинг мазмунини келтириш билан чекланади: «алла-қаерда ўтган бир авлиёнинг ўз ўғлига «хотинлар бевафо», деб қилган насиҳати, жиноят қонунлари мажмуасининг алланечанчи моддаси тўғрисида гапиради», дейилади. Гапнинг мазмунидан Жонифон ўзини ҳимоя қилиш ва ҳақлигини исботлаш учун бирор сўз топа олмагани маълум бўлади. Иккинчи бир ерда саволга «Жонифон жавоб бермоқчи» бўлиб турганда, «Малоҳат гапини оғзидан олади». Лекин бир-икки ергагина Жонифон хотинига ўзи савол бериб, ўзи жавоб қайтаришга мусассар бўлади. «Нима, менга ёқиши учун кестирибсанми? Ҳеч-да! Менга буқонинг билан ҳам ёқа берар эдинг. Бошқага ёқаман деб кестиригансан!. Хотинининг жавобидан бу гаплар ҳам асоссиз экани маълум бўлади. Хуллас, ёзувчи айтишга тузукроқ гапи бўлмаган Жонифонга атайин гап бермайди.

* * *

Ижобий қаҳрамон Абдулла Қаҳҳор асарларида одатда кам гапиради. Лекин воқеа марказига қўйилган образни характерлаш учун айтилган гап ўз салмоғи, психологик подтексти билан катта аҳамият касб этади, қаҳрамоннинг бир-икки сўзи ҳал қилувчи роль ўйнайди. Чунки бу гаплар тагида қаҳрамоннинг борлиғи, ҳаёт-мамоти ётади. Ҳўқиз ўғирланганидан хабар

топган элликбоши («Үгри») Қобил боболарникига кириб, тафтиш ўтказгач, кескин оҳангда: «Ҳўқизинг ҳеч қаёққа кетмайди, топилади!» дейди. Бу гап чолга шундай умид бағишлайдики, унда «топилмаса-чи?» деган фикрга ўрин ҳам қолмайди. Чол хурсандлигини, элликбошига бўлган миннатдорчилигини қандай ифода этишини билмайди. Қобил бобо элликбошини дуо қиласди: «— Худо хайр берсинн...». Бир оз паузадан сўнг эса «Ола ҳўқиз эди...» деб қўшиб қўяди. Бу ердаги бир дақиқалик сукунат Қобил бобо миясида қарама-қарши кечинмалар, фикрлар натижасида пайдо бўлади. Элликбоши нақд қилиб қўйгани билан ҳўқиз ҳали топилганича йўқ-ку! Ҳўқизнинг ола эканини таъкидланиши изтиробда, саросимада айтилган шунчаки гап эмас. Қобил бобо қанча паришон бўлмасин, қидиришга осон бўлсин учун ҳўқизининг бошқалардан ажралиб турадиган асосий белгисини беихтиёр равища айтади. Элликбоши ўзини у ёққа-бу ёққа солиб юради, вақт ўtkазади: ҳўқиз боғланган жойни яна қайтадан синчиклаб кўради. «Ҳўқизинг оқ подшо қўл остидан чиқиб кетмаган бўлса, топилади», дейди. Бу элликбошининг иккинчи айтган гапи эди. Чолнинг тушунчасича, ҳамма ер оқ подшо қўлида — демак, топилади. Элликбоши учун оқ подшо номини эслаш эса ўзининг ҳукумат одами эканлигини таъкидлаш имконини беради. Элликбошининг бир нарса ундириш имконияти туғилган кездаги хатти-ҳаракати шу нарсани ундириб олгандан кейинги хатти-ҳаракатига тамомила зид ҳолда кўрсатилади. Ёзувчи Қобил бобони амин ва элликбоши билан иккинчи бор учраштирганда, аввалги «бемалоллик»нинг, «суҳбатга» бўлган «мойиллик»нинг йўқлигини алоҳида қайд этади, уларнинг чолга айтган гапларинигина келтириш билан чегарала нади. Бундан гап тамом, олинадиган нарса олиниб бўлди, деган маъно англашилади. Элликбоши нутқидаги аввалги кескинлик, ўз кучига ишонч энди гумонсираш ва ажабланиш интонацияси билан алмашади. Элликбоши энди чин гапни айтади. «— Гумонингизни айтинг бўлмаса! — дейди элликбоши тажанг бўлиб. Ким олганини мен билмасам, авлиё бўлмасам! Олган одам аллақачон сўйиб саранжомлади-да! Узоқ демасангиз, эринмасангиз, кўнчиликка бориб, териларни бир қараб чиқинг. Аммо тери кўнчиликка тушган бўлса, аллақачон чарм бўлди; худо билади, кавуш бўлиб бозорга чиқдими...» Тажанглик билан айтилган бу гапда Қобил бобонинг соддалигидан кулиш биринчи планга ўтади. Элликбоши ўзининг «авлиё» эмаслигини, ҳўқизни топиб бера олмаслигини ўғирлик содир бўлган куниёқ билар эди. Бироқ Қобил бобонинг соддалигидан фойдаланиб қолмоқчи, уни лақиллатмоқчи, калака қилмоқчи бўлади.

Қобил бобо билан элликбоши ўртасидаги учрашув таф-силоти ёзувчи томонидан берилмайди; элликбошининг гапи-раётган пайтдаги ҳаракати кўрсатилмайди. Чунки бунинг ҳожати йўқ, асосий диққат элликбошининг гапида. Ёзувчи элликбошининг нутқи орқали рўй берган кўнгилсиз ҳодиса-нинг моҳиятини очишга, ҳаёт фожиасини конкретлаштиришга интилади. Элликбоши ва унинг шериклари билиб туриб, кўриб туриб, камбағални талайди, яна унинг соддалигидан кулади ва тажанг бўлади. Қобил бобо элликбоши ёнига иккинчи марта келар экан, унда аввалги кайфият — ҳўқизи-ни топишга бўлган умиди кўринмайди. У ҳўқизини тилга ҳам олмайди, балки тириклигини қандай ўтказишиň ўйлаб қолади. Чолда рўй берган ўзгариш элликбоши назаридан четда қолмайди. У энди Қобил бобога ёрдам бериш йўлини топади: «Эй, ёш боламисиз! Нега йифлайсиз? Кап-катта одам... Битта ҳўқиз бўлса, бир гап бўлар, худо ажалга тўзим берсин. Мен қайнатамга айтайин, сизга битта ҳўқиз берсин! Битта ҳўқиз одамнинг хуними?». Элликбошининг бу марҳамати Қобил бобога қимматга тушушини билиш қийин эмас эди.

Қобил бобо учрашган кишиларнинг иккинчиси Амин бўлди. Ёзувчи Амин образини яратишда унинг нутқидан фойдаланиш билангина чекланади. Лекин Амин ўзини-ўзи шундай фош қи-ладики, унга яна бирор сўз қўшиш ортиқча бўлар эди. Аминнинг сўзлари, сўзлаш вақтидаги ҳаракати ва чеҳрасидаги ўз-гаришлар унинг портретини гавдалантиради. Амин Қобил бобо келганда, анчагина зерикиб ўтирган бўлса керак, суҳ-батга мойиллик билдиради. «Қобил бобо рўпара бўлганда, Амин оғзини очмасдан, қаттиқ кекиради, кейин бақ-бақасини осилтириб кулади». Аминнинг бу ҳолати унинг олдига арз қилиб келган Қобил бобо ҳолатига бутунлай тескаридир. Мана шу тескарилик, суҳбатлар орасидаги фарқ аста-секин ривожланиб, чуқурлашиб боради. Ёзувчи суҳбат тасвиридан четга чиқмагани ҳолда, Амин характерига мос чизиқларни конкретлаштириб боради. Кекириши Аминнинг тўқлигидан дарак берса, бақ-бақасини осилтириб кулиши эса унинг ўта кетган сурбетлигининг аломати эди. Аминнинг «—Ҳа, сигир йўқолдими?» деган саволидан Қобил бобонинг нимадир йў-қотгани ҳақидаги хабар унинг қулоғига етиб келгани маълум бўлади. Шундай экан, Амин Қобил бобонинг фожиасидан кул-тан бўлиб чиқади. Бу хурсандлик, кайфи чоғлик қисқа савол-жавоб вақтида давом этиб туради. Ҳўқизни сигир билан ал-маштириб юбориш ҳам тасодифий эмас, албатта.

Менсимаслик, бирорнинг баҳтсизлигидан кулиш Амин ха-рактерига хос хусусиятлар сифатида гавдаланади. Бу иккисинф вакиллари, четдан қараганда, бир нарса устида гапи-

раётгандек туюлади, аслида эса улар бир-бирларини ҳеч тушунмайдилар: уларнинг мақсадлари ҳар хил. Ёзувчи ана шу концепцияни уларнинг суҳбатлари орқали реаллаштиради. Амин билан Қобил боболар ўртасидаги синфий зиддиятни шу суҳбат орқали кўрсатади. Суҳбат давомида улар ўртасидаги тушунмовчилик кучая боради. У энди икки синф вакилларининг суҳбатига айланади.

Амин — маълум бир социал тип ва шу билан индивидуал чизиққа эга шахс. Ёзувчи унинг ўзига хос хусусиятларини ҳам шу суҳбат орқали кўрсатиб боради. Амин — одий инсоний хусусиятлардан тамоман маҳрум киши. Қобил бобо унинг тутириқсиз саволларига жон-жаҳди билан жавоб беришга, Аминда бир оз бўлса ҳам инсоф, диёнат уйғотишга ҳаракат қиласди. Қобил бобо: «Бори-йўғим шу битта ҳўқиз эди», — деб зорланса, Амин: «— Йўқолмасдан илгари бормиди? Қанақа ҳўқиз эди?... — «Яхши ҳўқизими ё ёмон ҳўқизими?» — деб сўрайди⁷. Қобил бобо шунда ҳам чидам билан унга тушунтиришга ҳаракат қиласди: «Қўш маҳали...» Қобил бобо ҳўқизнинг камбағал оила учун қанчалик зарур эканини, усиз ҳаёт ўтказиш мумкин эмаслигини қайта-қайта такрорлаш орқали Амин кўнглида озгина бўлса ҳам ўз ҳолига нисбатан ачиниш уйғотмоқчи бўлади. Қобил бобо: «Бисотимда ҳеч нарса йўқ...» деб ёниб куйиб гапирган сари Аминнинг бемаъни саволлари авжига чиқади («Бирор олиб кетса, қайтиб кела бер, деб қўйилмаган экан-да»). Қобил бобонинг гапиришга мадори қолмайди, Аминга бирор нарса тушунтиришга кўзи етмай йиглаб юборади. «Нега йиғланади? А? Йиғланмасин», — дейди Амин. «Йиғланманг» дейишга оғзи бормайди, ахир кимсан Амин бўлса, қандай қилиб бир яланг оёққа «сиз» десин. Қандайдир яқинлик, чол ғамига шерик бўлиб қолиш ҳисси уни бу сўзни ишлатишдан тўхтатади. «Йиғлама» дейишга эса ботина олмайди, ҳар ҳолда чолнинг ёшини ҳисобга олмаслик мумкин эмас. Ўзига маънавий мажбурият олмайдиган, лекин шу билан чолнинг ҳолатига қандайдир ўз муносабатини билдирадиган сўзни ишлатади.

Чол Аминнинг олдига иккинчи марта борганида, унинг гапи қисқа бўлди. Амин «эллик бошига борилсин», деди. «Йиғ-

⁷ Абдулла Қаҳҳор «Йўқолмасдан илгари бормиди?» иборасини қўллаш ҳақида шундай деган эди: «Қунларнинг бирида хотира дафтаримга халқнинг қадим ҳазилмутойибалирдан «Йўқолмасдан илгари бормиди?» деган иборани ёзib қўйдим. «Уғри» ҳикоямни ёзаётганимда шу иш бериб қолди. Шунчаки бегараз ҳазил узил айтиладиган бу иборани кекса дехқон ҳўқизи ўғирлангандан шикоят қилиб боргандা Аминнинг тилидан айтирган эдим, ўткір пичинг маъною касб этди. Менинг ихтиёrimдан ташқари умумлашган кучга эга бўлди, айни чоқда индивидуал шахс характерини очиб юборди», «Шарқ ўлдузи», 1965, 5-сон, 147-бет.

ланмасин», «борилсин» — ҳеч нарсага мажбур қилмайдиган сўзлар. Улар Аминга ёд бўлиб кетган, чунки у бу сўзларни бир кунда бир неча бор ишлатади. Бўлиб ўтган сухбатнинг, хусусан Амин айтган гапларнинг эсда қолишида унинг сухбат пайтидаги хатти-ҳаракатлари ҳам катта роль ўйнайди. Амин жавоби билан камбағалнинг гапларига «кўр» ва «кар» бўлибгина қолмасдан, ўзининг инсон сифатида ҳам жуда мадданиятсиз эканини кўрсатади. Бутун умри меҳнатда ўтган, ёлчиб кийинмаган, тўйиб овқатланмаган бир кишининг наёши ва на аянчли аҳволи бойлар кўнглини юмшатади. Чолдаги чорасизлик унинг шахсий фожиаси эмас, балки давр фожиаси сифатида талқин қилинади.

Ёзувчи Қобил бобога бирор ерда гап бермайди. Тўғрироғи, Қобил бобо ўз ихтиёри, ташаббуси билан гап бошламайди. У фақат саволларга жавоб беради. Қобил бобо даъвогар эмас, балки жавобгар қиёфага киради. Ўндан гап сўрашади, у жавоб беради. Ўнга ёрдам бериши керак бўлган, тўғрироғи, ёрдам беришга мажбур бўлган одамлар бечорага дўқ уришади, уни майна қилишади, ниҳоят, айб Қобил бободан ўтгандай бўлиб қолади.

А. Қаҳҳорнинг бошқа бир асарида бутун воқеалар давомида анчагина гапирган Туробжон охири жим бўлиб қолади, хотинининг саволларига ҳам жавоб бермайди. Персонажнинг ўзини шундай тутиши шароитга, дақиқанинг психологик жиҳатдан ниҳоятда оғирлигига боғлиқ. Туробжон хотинига анор олиб келолмаганини жон куйдириб тушунтиришга ҳаракат қилса ҳам, бунинг уддасидан чиқмайди. Ниҳоят жаҳл устида ҳомиладор хотинига қўл кўтаради. Шундан кейин Туробжон гапирмайди. Энди унинг хатти-ҳаракатлари шу қадар таъсирили ва маъноли кучга эга бўладики, унинг гапиришига эҳтиёж ҳам сезилмагандай бўлади. Ёзувчи хотинининг истагини қондириш мақсадида анор ўғирлаган Туробжон ва унинг хотинининг кечинмаларини тасвирлаб, улар атрофида рўй берётган воқеаларни ҳикоя қиласди.

«Бемор» ҳикоясидаги Сотиболди эса ҳеч гапирмайди. Со-тиболди оиласида рўй берган баҳтсизликни ёзувчининг ўзи хабар тариқасида айтиб беради. Асар руҳи, оҳангни шуни тақозо қиласди. Бу кичик хабарда ўтмиш рўй-рост кўринади. Воқеа содир бўлган пайт, воқеа сабабчилари, уларнинг туриш-турмушлари, умр кечиришлари, оламдан ўтишлари — ҳаммаси оддийгина бир хабарга жойлаштирилади. Бунинг натижасида бу хабар воқеа содир бўлган давр учун жуда оддий, кундалик бир нарсага айланади.

Сотиболди Абдуғанибойга маслаҳатга боради, лекин ҳеч нарсасиз қайтади. Қўшни кампир чиқиб қўлидан келган ҳуна-

рини кўрсатади, фойда бермайди. Мана шундай қандайdir ёлғизлиқ, ўз-ўзи билан овора бўлиш, бирорнинг ҳолидан хабарсизлик, ўз-ўзича яшаш, бир амаллаб кун кўриш ташвиши инсонни фаолиятсиз қилиб қўйган даврга тақалади. Асар асосига олинган воқеа даврдан узилиб қолмаган. У шу давр, шу ҳаёт қўйнида содир бўлади.

Сотиболди ўз ташвиши билан ёлғиз. Абдуғанибой унга қуруқ маслаҳат беради, шу дақиқа эсидан чиқаради. Сотиболди ўз ғамига ўзи қоврилади. Сотиболдидан бошқа ҳеч ким қўлидан җелган ҳамма чораларни кўриб, ёш бир аёлни олиб қолишга жон кўйдирмайди. Ким билан кимнинг иши бор! «Ўғри»да айтилганича, бу даврда: «Одамлар дод овозига ўрганиб қолган: бирорни эри уради, бирорнинг уйи хатга тушади», бирор ўлади. Сотиболдинг ташвиши атрофдаги минглаб кишилар ҳаётидаги ташвишлар олдида, халқ ташвиши олдида денгиздан томчи бўлиб қолади. Шундай экан, ҳамма ўз ишини ташлаб, ташвишини йиғиштириб, Сотиболди дардига шерик бўладими? Шунинг учун ҳам Сотиболди ҳаётидаги фожиа оддий хабар тариқасида ҳикоя қилинади ва ўз навбатида оддий кундалик бир воқеа тариқасида қабул қилинади.

Ёзувчи воқеанинг қисқа-қисқа жумлаларда ҳикоя қиласи: «Сотиболдинг хотини оғриб қолди». Бундан кейин беморни қандай қилиб даволаганликлари, бу йўлда нима қилинганлиги ҳақида ўқувчи хабар топади: «Қасал ўқитилади, қон олдирилади. Натижада «Бетобнинг кўзи тиниб, боши айланадиган бўлиб қолди». Шундан сўнг яна бир қанча тадбирлар кўрилади. Лекин асосийси қилинмайди — бемор врачга кўрсатилмайди. Аниқроғи, врачга кўрсатишнинг имкони бўлмайди. Сотиболди одамлар нима маслаҳат берса, тиниб-тинчимай шуни қилишга ҳаракат қиласи. Қасал бир оз тетиклашгандай бўлади. Лекин узоқча бормайди. «Яна кўзини юмди, шу юмганича қайтиб очмади — саҳарга бориб узилди».

Воқеанинг бош сабабчиси — бемор ҳолати ҳақида ўқувчи тез-тез огоҳлантириб турилади. Шунинг орасида Сотиболдинг кўрган-кечиргандар, ҳаракатлари ва бунинг оқибатсизлиги ҳам хабар қилинади. Сотиболди бутун имкониятини ишга соглан сари хотинининг аҳволи оғирлашади ва ниҳоят ўлади. Чунки Сотиболдинг имконияти ниҳоятда чегаралангандай эди. Тўғри, бу фожиада бидъат ва хурофот таъсири ҳам катта роль ўйнайди. Лекин фожианинг энг асосий сабаби тенгсизликда, камбағалликда, чорасизликда эди.

Шундай қилиб, асардаги иккинчи даражали персонажлар сўзласа, ҳам, Сотиболди бирор гап айтмайди, унинг нутқи берилемайди. Дарвоқе, у нима ҳам дер эди, нима ҳам қила олар эди? Ёзувчи асар ғоясидан, воқеа мазмунидан келиб чиқиб,

персонажни қасддан гапиртирмайди. Сотиболдининг гапир-
маслиги маълум даражада символик характер касб этади
(пули борнинг тили бор, деб шуни айтадилар-да).

Қаҳрамонларнинг ички нутқлари аниқ мақсадга бўйсунди-
рилган бўлиши ўз-ўзидан маълум. Ёзувчи foяси, асар асосига
слингган воқеа характеристи асар жанрини, образларнинг ҳара-
катини, нутқларини белгилайди. А. Қаҳҳорнинг кўп ҳикояла-
рида қаҳрамонларнинг ички нутқига, монологларга кам ўрин
берилади. Персонажлар узундан-узоқ ўйламайдилар, фикрла-
майдилар. Уларда ички монологларга эҳтиёж сезилмайди.
Лекин А. Қаҳҳорнинг йирик асарлари («Сароб», «Қўшчинор
чироқлари» ва «Синчалак») ва баъзи бир ҳикояларини қаҳ-
рамонларнинг ички монологларисиз тасаввур қилиш қийин.

«Киши психологиязмини яратиша,— дейди адаб ижоди-
нинг тадқиқодчиларидан бири,— А. Қаҳҳор ижодида яна бир
муҳим хусусият бор. Бу киши ички дунёсининг диалектикаси-
ни чизишдан иборатдир»⁸. Киши ички дунёсининг диалектика-
сини чизиш ёзувчининг диққат марказида турган асарларда
персонажларнинг ички нутқ ва монологлари муҳим аҳамият
касб этади.

Саидий ўзи билан гаплашган одамга, унинг фикрларига ўз
муносабатини очиқ билдирилмайди. Лекин Саидийнинг ички
нутқи кўпинча уни характеристашга қаратилган. Саидий ёзги
отпушка вақтида университетга бормай қўяди ва стипендиясиз
қийналиб қолади. Шунда Жамол Каримий келиб: «— Ҳуж-
рангиз кўп дилкаш экан-у, битта этажерка билан битта яхши
стол ва курсилар етишмайди. Шулар бўлса, кўп ишлашлик
хужра бўлади. Этажерка менда бор. Берсам бўлади»,— дей-
ди. «Овқатдан гапирсанг-чи, бетамиз!»,— дейди Саидий ичидা
ва кулиб қўяди. Унинг кулиб қўйиши Жамол Каримий гапига
жавоб вазифасини ўтайди, лекин Каримийнинг таклифига
бўлган ҳақиқий муносабати унинг ички нутқи орқали бери-
лади.

Саидий редакцияларга қандай асар юборса ҳам, бари-бир,
босилмас эди. Қунларнинг бирида, Кенжа уни редакцияга хат
орқали чақиритириб, юборган асари бўйича маслаҳат беради.
«Саидий унинг шеър ҳақида берган маслаҳатларини маъқул-
лади, аммо ичидা ўйлар эди: «Бу юмшоқлик, ширин сўзлик
билан одамнинг адабини берадиган хилидан кўринади. Ҳозир-
гина иккала асарни ҳам яроқли деган эди. Мулойимлик би-
лан шеърни чиқитга чиқарди. Энди ҳикояни ҳам қўлимга қай-
тириб беради-ку!».

⁸ М. Қўшчонов, Ҳаёт ва маҳорат, Тошкент, Уззадабийнашр, 1962,
45-бет.

«Ҳикоянгиз яхши, аммо нотамом», дейди Қенжа, «Ана,— деди Саидий ичида,— айтмадимми.

Ички нутқнинг аҳамияти, сўзсиз, персонаж характерини тўлароқ ёритиш билан белгиланади. Ички нутқ шу персонаж характеридаги баъзи чизиқларни ойдинлаштиради, у тўғридаги тушунчани кенгайтиради. Ички нутқ персонажни овоз чиқариб айтолмайдиган дақиқа билан, шароит билан боғлайди. Гапирувчининг ҳеч ким эшитмас деб фараз қилиши унинг эркинроқ, очиқроқ фикрлашига ёрдам беради. Овоз чиқариб айтиб бўлмайдиган фикрлар бемалол ички нутқ орқали берилади. Хуллас, киши ўз ички нутқида ўзини эркин сезади, кўнглига келган гапни очиқ-ойдин айтади. Шу орқали ўқувчи персонажнинг ниҳоят нозик ҳисларини, фикрларини билиб боради.

Саидий Эҳсоннинг Москвада ўқиб дипломли бўлиб келганидан ғижинади, унга ҳаваси келади. Бирор унга буни таъна қилмаса ҳам, Саидийнинг тинчлиги бузилади. Чунки бир неча йил илгари билимлари бир дараҷа бўлган икки дўстнинг бири иккинчисидан ўтиб кетади. Иккови қадам ташлаб борар экан, худди бирор «Эҳсон доктор бўлиб келди, бу орада сен нима бўлдинг?» деб сўраётгандай, Саидий ўзича бу саволга жавоб берар эди. «Бу доктор бўлган бўлса, мен ўз турмушими ташкил қилдим. Менини сингари уй, рўзгорга эга бўлгунча, соchlари оқариб кетади. Наҳот шуни англамаса!». Ёзувчи Саидийнинг ички нутқи орқали унинг Эҳсондан қолиб кетганини тан олишини кўрсатади. Саидийни ҳароб қилган сабаблардан бири унинг молпарастлиги, давлатпарастлигидир. Мана шу психология унинг қон-қонига сингиб кетган. У Эҳсонни тан ола туриб, ўзининг ундан устунлигини исботлашга ҳарарат қиласди. Ёзувчининг бу фикрларини Саидийнинг ички нутқи орқали бериши тасодифий эмас. У бегоналар олдида эмас, балки ўзи олдида Эҳсондан устунлигига ишонч ҳосил қилиши керак. Унинг кўкси турили қарама-қарши туйғулар билан тўла. Лекин шунга қарамасдан ўзига бино қўйиш, ўзининг устунлигини ҳис қилиш майли унинг характеридаги етакчи фазилатлардан бири бўлиб кўринади. Ички нутқ қаҳрамонларнинг энг нозик туйғуларини тасвиirlашда ёзувчига шундай қулайлик туғдиради.

«Синчалак»даги диалоглар одатда катта ғоявий-эмоционал кучга эга бўлса ҳам, миқдор жиҳатидан у қадар кўп эмас. Лекин қаҳрамонлар кечинмаси билан боғлиқ бўлган моментлар, ички нутқлар асарда жуда кўп учрайди. Ички нутқ асарнинг бош қаҳрамонлари — Саида ва Қаландаров образларини яратишдэ айниқса муҳим роль ўйнайди. Бу ҳар иккала қаҳрамон бир-бири билан гаплашишдан кўра кўпроқ мулоҳаза қи-

лади, бир-бирини ўрганади. Шунинг учун ҳам уларнинг ички нутқларига ниҳоят хилма-хил вазифалар юклатилиди. Уларнинг характер яратишдаги роллари ҳам турличадир.

Саида Алиева ўзбек адабиёти тараққиётida из қолдирадиган образлардан бўлиб қолди. Саида ўзининг бутун хусусиятлари билан ўзбек адабиётида яратилган бирорта образга ўхшамади. Саида образини фақат А. Қаҳҳор яратиши мумкин эканлиги кўриниб туради. Саидада совет кишисига хос ҳамма олижаноб фазилатлар мужассамланган. У катта мақсад ва тилаклар билан яшайди, ҳар доим фикрлашда, изланишда. Лекин бу хусусиятлар анчагина умумий. Унинг ўзига хос бошқа чизиқлари ҳам борки, бу чизиқлар А. Қаҳҳор қаҳрамонларигагина хослиги билан ажralиб туради. Саида заҳаргина қиз, ўзини оёқ ости қилишга йўл қўймайди, гап келгандан отасини аямайди, ҳозиржавоблиги билан ўзидан катта, ҳаёт тажрибаси кўп бўлган одамни қойил қолдиради. Саида Қаландаровнинг фойдасини кўзлаб, унинг айрим аччиқ гапларини ҳазм қиласди, лекин ўз шахсиятига тегадиган бирорта гапни жавобсиз қолдирмайди. Қаландаров Саидани изза қилувчи гапларига бир неча баробар кучли жавоб оладики, бунинг таъсирида у анча вақт ўзига келолмай юради. Агар Саида шундай ақлли ва ҳозиржавоб бўлмаса, Қаландаров гапларига қойил қилиб жавоб бермаса, унинг Қаландаровдек бир шахс билан ишлаб кетолмаслиги табиий эди. У партия ташкилотининг раҳбари сифатида катта ишларни амалга оширар экан, хотинларга хос кузатувчанлигини, майда-чуйда нарсаларга синчковлигини кўрсатади. Бу хусусиятлар Саиданинг камчилигига айланиб қолмайди, балки унинг «жонли» одам эканини таъкидлайди. Саида характеристидаги бундай ҳаётий чизиқларни таъкидлашда унинг ички нутқи муҳим роль ўйнайди.

Персонажларнинг ички нутқлари асарда турли вазифаларни адо этади. Қаҳрамоннинг атрофидаги одамларга, воқеа ва ҳодисаларга бўлган муносабатини, унинг ўзида рўй бераётган ўзгаришларни ёзуви кўпроқ ички нутқ орқали кўрсатади. Саида «автобусдан тушиб, кичкина бўлса ҳам, оғирлик қилаётган чамадонини кўтариб, колхоз боғининг темир дарвозасидан кирганида, каттакон сада остидаги сўрида оёғини саланглатиб ўтирган Қаландаровни кўради. Қаландаров илжайди-ю, ўрнидан қимирламай, узун оёқларини қаттиқроқ саланглатади. «Дийдоринг қурсин,— деди Саида ичидা,— ўзимни иззат қилмасанг, аёллигимнинг ҳурмати, чамадонни қўлимдан олсанг ўласанми!». Бу «ички нутқ» партия ташкилотининг секретариники эмас, балки аёллик қадрини билувчи, хотин-қизларга ҳурмат кўрсатилишини истовчи ва уни талаб этувчи

кишиники, оддий аёлники эди. Албатта, бундай гапни Саида ҳеч кимга овоз чиқариб айтмас эди. Лекин у кўнглидан ўтка-зид бўлса ҳам аламдан чиқади. Иккинчи тарафдан, Саида Қаландаровнинг жилла бўлмаса аёл сифатида ҳурмат қилмаганидан аччиғланади. Ҳолбуки, Қаландаров: гижинглаган йигитлар турганда, шу қизни секретарь қилиб юбораман деб ўтирибди, дея райком секретаридан хафаланади. «Қишлоқда одам қолмаса, эчкининг оти мулла Норқўзи бўлади... Шу ҳам гапми!... Одамнинг хўрлиги келади»,— дейди у.

Саида кўнглидан ўтган гап шунчаки эмас: кейинчалик Қаландаров билан тўқнашишларига унинг аёл экани сабаб бўла-ди, кўп масалалар унинг фақат аёл бўлгани учунгина мурак-каблашади. Саида билан танишган ўқувчи унинг ўзига нисбатан бўлган ҳурматсизликни, ҳақоратни индамай кўтариб кетадиганлардан эмаслигини билади. Шунингдек, у бўлар-бўлмасга шовқин ҳам солмайди. «Хўш, нима гап ўзи,— деди ўзича,— нимага келаётиман. Каравотга ўзимни ташлаб йиғлаганими? Кўз ёши ё кўнгилдаги ғам-ғуссанинг дамини кесиш ё бераҳмнинг раҳмини келтириш учун тўклилади, менинг кўнглимда қанақа фусса бор, йиғлаб кимнинг раҳмини келтироқчиман? Раис мени чертган бўлса, мендан шапалоқ егандай бўлди, мени енгмоқчи бўлиб, ўзи енгилди. Унинг сўз тополмай қўй кўтаргани — кучи шляпага етгани шуни кўрсатмайдими?».

Саида ўзининг ҳақ эканига ниҳоят ишонади ва Қаландаровнинг ҳаракатларини кучсизлик аломатлари деб билади. Бу эса Саидага куч бағишлиди. Бу ички нутқдан ўқувчи Саида Қаландаров ҳаракатларидан «аёл бўлганим учун шундай қилдими», деган фикрга келганини кўради. Саиданинг ғазаби қайнақ кетади. У Қаландаров билан учрашиб: «Мен сен айтган муштипар аёллар тоифасидан эмасман!» дейиши истайди. Ана шу тарзда Саида одамларнинг хатти-ҳаракатларига, қилиқларига бўлган муносабатини кўпинча ички монологларида билдиради. Унинг ички нутқида ким тўғрисида нимани ўйла-гани, кимни нимага ўхшатгани маълум бўлади.

Ички нутқ, монологнинг хиллари, унга юқлатилган вазифага кўра, жуда кўп. Персонаж бир ерда ички монолог орқали гапирувчининг мақсади нимада эканини билмоқчи бўлса, бир ерда сухбатдошига бўлган муносабатини билдиради, қилаёт-ган иши тўғри-нотўғрилигини ўйлади.

Қаландаров хотинининг гапларидан аччиғланаб, «хотин киши раҳбарлик қилса, калавамнинг учини йўқотиб қўя-ман!».— дейди. Бу гап Саиданинг кўнглига ғашлик солади: «Хотин киши раҳбарлик қилса, калавамнинг учини йўқотиб

қўяман...». Ҳозир хотинига шундай дейиши зарурмиди ёки бу кирпи чол пайт келганда, мени огоҳлантира ётибдими?...

Кечаси Саиданинг уйқуси қочиб кетиб, ўз-ўзи билан гаплашади: «Қаландаров қаршисида мен ҳеч — пуч эканлигим аниқ. Бунга энди ҳеч қандай шубҳа қолмади. Нима қилиш керак? Партия ташкилоти жонли, мустаҳкам бўлганда ҳам бошқа гап эди!. Саида шундай деди-ю, ўзи кулиб юборди. «Партия ташкилоти жонли, мустаҳкам бўлса, соғ кишига Сукротнинг нима кераги бўлар эди?».

Саида билан Қаландаров ўртасидаги муносабат кескинлашади. Қаландаров таклиф қилган Усмонжон партбюорога ўтмай қолади. Саида бунинг сабабини ишончли далиллар билан тушунтира олади. Саида фикрларининг мантиқий кучи олдида Қаландаров чорасиз қолади. Шу пайт у жон-жаҳди билан «Йўқол!» — деб бақиради ва унинг бошига ургани бир нима қидиргандай у ёқ-бу ёққа аланглайди».

Хуллас, Саида билан Қаландаров ўртасидаги муносабатларнинг ривожланиш мантиқини асосан бир масала — Саиданинг — парторгнинг аёл экани белгилайдики, бу нарса ҳар иккала қаҳрамоннинг ички нутқида чуқурроқ очилади.

* * *

Персонажларни гапиришга тайёрлаган шароит улар гапи-нинг аҳамиятини оширади. Тайёрланган шароит натижасида оддий сўзлар ҳам чуқур мазмун касб этади, шу муайян ситуацияда персонажнинг гапириши шарт экани психологик жиҳатдан асосланади.

Мунисхон билан Саидий ўртасида бўлиб ўтган кичкинагина суҳбатга назар ташлайлик. Ёзувчи бу ўринда персонажларни кам сўзлатади. Уларнинг гаплари бир ёки икки сўздан иборат. Лекин шароитнинг мураккаблиги, Саидий учун эса ҳаёт ва мамот масаласи ҳал бўлаётганини ўқувчи чуқур ҳис қиласди.

Саидий камбағал йигит. У ҳар доим буни эсда сақлайди. Айниқса севгилиси Мунисхон олдида ўзини жуда noctor деб билади. «Бир куни бўш гумон қилинган аудитория банд бўлиб чиқди. Шунда китобларни қўлтиқлаб, қаёққа боришини билмай, танг бўлинганда, Саидий ихтиёrsиз ўзининг ҳужрасини эслатиб юборди. Мунисхон майда ўрилган сочининг учини ўйнаб, ўйланар экан, Саидий шамнинг алансидай бўлиб қолди: Мунисхоннинг ҳар бир ҳаракатидан эсган шабада уни тебратар, агар шу онда у «йўқ», деб юборса, уни абадий сўнди-пар эди. Мунисхон бундай қилмади.

— Узоқми? — деди Саидийнинг юзига қараб. Саидий ўзи-даги ҳаяжонни товушидан билдириб қўймаслик учун бош чай-қади. Мунисхон яна сочининг учини қўлига олди. Саидий анчадан кейин ўзини босиб олди-да:

— Почтанинг қаршисида, автобусга йигирма қадам ҳам келмайди, деди». Мунисхон билан Саидийнинг гап-сўзлари оддий, кундалик гаплардан иборат. Лекин бу гаплар мураккаб шароит туфайли ўз маъносига нисбатан чуқурдашиб, персонажлар ҳаётида рўй бериши мумкин бўлган ўзгаришлар билан боғланиб кетади.

Саидий Мунисхон кўнглини билмоқчи бўлиб, севги-муҳаббат ҳақида гапирганида, Мунисхон: «Мен сенга тегмайман!», — деб очиқ айтади. Бу гап шунчаки айтилгандек кўринади. Чунки Мунисхон ўзи иқрор бўлмаса ҳам, Саидийни севади, ундан бошқасини ёқтирумайди. Лекин шу аснода ўтмишини, отаси ҳаёт вақтидаги, бойликлари ошиб-тошиб ётган, неча қуллар, оқсочлар хизматларига тайёр бўлган «яхши замонани» эслаган Мунисхон ўзи севган кишига ҳам тегмаслигини айтади. Ўтмишдаги шоҳона ҳаёт хотираси Мунисхонни камбағал студент Саидийдан узоқлаштириб юборади.

Персонажлар бирор нарсани эслаб, кўнгилларидан ўтказар ёки бирор нарса ҳақида ўйлар эканлар, бу уларнинг келгуси хатти-ҳаракатларининг йўналишини белгилаб беради. Бошқача айтганда, персонажлар сўзлаётган аснодаги вазият хоҳ у ижтимоий, хоҳ психологик характерда бўлсин — уларнинг тақдирида, ҳаётида, бирор нарсага бўлган муносабатида муҳим роль ўйнайди.

«Синчалак»да Саида Козимбек билан танишгач, колхозда амалга оширмоқчи бўлган режалари ҳақида у билан ўртоқлашмоқчи бўлади. У гапни Эшондан бошлайди:

«Эшон ака дуторга ҳийла чапдаст эканлар, товушлари паст бўлса ҳам, шираликкина... Шу кишини миллий музика тўғрагига раҳбар қилгани дадангиз унармиканлар?».

Шу гапларнинг айтилиш шароитига назар ташлайлик.

Козимбек Саиданинг касаллигини эшитиб, уни кўргани келган эди. Саидани отга ўргатиш баҳонаси билан улар кечки пайтда отда айланадилар. Саида Козимбекнинг Эшонга ва унинг қизига бўлган муносабатини билиб олмоқчи бўлади. Иккинчи тарафдан, Саида саволи билан ўз ниятини ҳам билдириб қўяди: унинг кўнглида нимадир пайдо бўла бошлаганга ўхшар эди. Чунки Саида Козимбек орқали раисга таъсир қилмоқчи бўлган экан, гапни Эшондан бошлаши шартмиди? Тўгарак очишдан кўра зарурроқ тадбир йўқмиди?... Саиданинг саволига Козимбек анчадан кейин жавоб беради:

«Эшонни тўгаракка раҳбар қилгандан кўра, колхоздан ҳайдаган маъқулроқ.

Саида унга ялт этиб қаради...

— Нега? Қайнатангиз... бўлажак қайнатангиз ҳақида ҳозирдан шунаقا десангиз...».

Ташки қўринишдан, бу суҳбат жуда мантиқий, лекин ўйлаб кўрилса, Саиданинг Эшон ҳақида гап очишдан кузатган мақсади бошқа нарсада эканини сезиш қийин эмас. Саида Козимбекнинг Эшоннинг қизига бўлган муносабатини аниқламоқчи. Персонажлар нутқи, улар суҳбатининг характери билан мавжуд шароит ўртасидаги ўзаро уйғунликнинг йўқлиги Саиданинг пинҳон ниятини ошкор қилиб қўяди.

* * *

А. Қаҳҳор қаҳрамонлари бошқа персонажлар «оғзи»дан эшигтан гапларини ўз нутқларида айнан ёки ўзлари тушунган бир тарзда ишлатадилар. Қўринишдан аҳамиятсиздек туялган бундай хусусият ёзувчига характер қирраларини чизиш, унинг дунёқарашини, воқеаларга бўлган муносабатини таъкидлаш имконини беради.

Мунисхон Саидийнинг қолоқ студентларга ёрдам беришини хушламайди. Саидий бундай студентларнинг биридан қутулганини Мунисхонга айтади. Мунисхон хурсанд бўлиб: «Акамнинг айтгани рост: «Ўзингни ҳеч нарса билмаган, кўпчиликнинг ишига уқувсиз қилиб кўрсатсанг, кўп гапирмассанг, қулоғинг тинч бўлади»,— деган эди. Рост. Сизнинг одатингиз ёмон — бирор нарса сўраса, ўзингизни билмасликка солмайсиз. Энди ундаи қилманг»,— дейди. Мунисхоннинг бу фикрни акаси айтган шаклда беришдан мақсади аниқ; акаси кўпни кўрган, кўпни билган одамнинг фикри ҳам тўғри бўлади. Мунисхон бу фикрни тасдиқлайди, унинг тўғрилигига ҳеч иккиласдан қўшилади. Иккинчи тарафдан эса Салимхон асар воқеаларига аралашмасдан олдин, унинг баъзи масалаларга бўлган муносабатини кўрсатиш орқали ёзувчи Салимхон билан ўқувчини учрашувга тайёрлаб боради.

Мунисхон акаси Салимхон ва унинг дўстларининг ер ислоҳотига муносабатини Саидийга билдириб, шундай дейди: «Булар етти киши, масъул ишчилар; ер ислоҳоти ўтказилишига норози бўлиб вилоят партия комитетига ариза беришмоқчи. Шунга акамни қўшмоқчилар. Кеча Аббосхон келиб, акам билан ярим кечагача ўтирди. У акамнинг бунга қўшилишига рози эмас; «Фалокат бўлса фирмадан чиқаради. Бошқаларни ишга солиб, ўзинг четда туравер, бунга қўшилмасликка катта

бир баҳона топ», деди. Ўзи ер ислоҳотига қарши». Мунисхон Аббосхоннинг ер ислоҳотига бўлган муносабатини қатъий оҳангда айтиб, Аббосхоннинг сўзларини («Ислоҳот қишлоқни қўлдан кеткизади») келтириш билан асосслар экан, ўзи ҳам шу фикрга шерик эканини билдиради.

Худди шунга ўҳашаш ҳолни Сидиқжон характерида ҳам кўрамиз. Бой хонадонга куёв бўлган Сидиқжон ҳаётдан, тенгдошлиридан орқада қолади. Дўстлари, айниқса ёшликда бирга ўсан, эндиликда колхоз қурилишининг актив жонкуярларидан бўлган Ўрмонжоннинг таъсири орқасида колхозга киришга аҳд қиласи ва оиласига ўз қарорини етказади. Сидиқжоннинг бу қарори унинг оиласи — хотини, қайнатаси, қайнанаси билан катта конфликтга олиб келади. Сидиқжон уйини, хотинини ташлаб кетади. Қайнатаси Зуннунхўжа Сидиқжонга: колхозга кириб нима қиласиз, деди. «Сидиқжон нималар демоқчи бўлиб икки-уч оғиз ростлаганидан кейин, Ўрмонжоннинг гапи эсига тушиб», қайнатасига жавоб қайтарар экан, колхозга кириш сабабини ўзининг инсоний қадрини тиклаш билан боғлади. Гап бу ерда Сидиқжоннинг Ўрмонжон гапларини эслашида ва унинг гапларининг моҳиятига тушунишидадир. Ёзувчининг бу ўринда ўқувчи эътиборини Ўрмонжонга, унинг сўзларига тортиши бежиз эмас, чунки бу нарса Сидиқжон характерининг эволюцияси, шаклланиши билан боғланади. Агар ёзувчи Ўрмонжоннинг номини эслатмасдан туриб, Сидиқжон билан Зуннунхўжа ўртасидаги кескин муносабатни тасвирлашга ўтса, бу воқеанинг ҳаётйлиги анча сусайган, моҳияти етарли очилмаган бўлар эди. Чунки Сидиқжон колхозга киришга қарор қиласи экан, ҳали ўзи колхоз нима эканини тушумайди. Билгани шуки, тенгдошлири қандайдир фикр билан яшамоқдалар, уларнинг ҳаётларида катта ўзгариш рўй берган. Сидиқжон улардан орқада қолган, энди уларга етиб олмоқчи. Шунинг учун унинг қайнатасига Ўрмонжон номини, айтганларини эслаш орқали жавоб қайташи Сидиқжон савияси, тушунчаларига мосдир.

Сидиқжон ва асардаги бошқа персонажлар ўз нутқларида бир-биrlарининг, айниқса Ўрмонжоннинг гапларига мурожаат этадилар ёки уларнинг фикрларидан айнан фойдаланадилар.

Ўз меҳнати билан кун кўрувчи ўрта ҳол деҳқонлардан бири — Муҳиддин Муҳаммадсолиҳ ўғли колхозга киришнинг афзаллигини тушунди. «Ўзингизга анча дуруст экансиз, колхозга киришга нима мажбур қилди?» — деган саволга у шундай жавоб беради: «Жўжавурдай жонман, ҳаммаси «бер, ейман» дейди. Бу ёқда ҳўқиз, эшак... Булар ҳам «бер, ейман» дейди. Ер ўрик эмаски, ўзи гуллаб, ўзи пишса. Ҳосил олиш.

учун саломатлик бўлса, билакнинг кучидан ташқари асбоб керак, гўнг керак... Шуларнинг ҳаммаси пул билан бўлади. Қўп ер эккани кучим етмайди, оз ер эксам, ўзидан чиққанини ўзига чаплаб қараб туравераман. Энди ташвишнинг кўплигини айтинг... Бирон офат келиб қолса, нима бўлади? Болачақа пўстакнинг жунини ейдими? Қўлтиғимдан ким киради? Акам бўлмаса, укам бўлмаса... Колхознинг буйруғи бошқа экан, буни райкомимиз ўртоқ Аҳмедов тушунтириб бердилар. Мана шуларни хўп ўйладим-у, мен сизга айтсан, ариза ташлашга жазм қилдим, ташладим». Демак, Муҳиддин колхозга киришдан ўзига наф тегишини билди, тинч яшашига ақли етди. Бу масалада Аҳмедовнинг унга айтган гаплари муҳим аҳамиятга эга бўлди. Лекин у ҳали ўз фикрларини бир система мага солиб, бир-икки киши ўртасида айтиб беролмас эди. Шунга ўрганиш кераклиги айтилганда, у асосий масала меҳнатда, гапнинг нима кераги бор, деган мазмунда жавоб қайтаради. Шундан кейин бир оз жим қолади, нима дейишини билмай туриб, ниҳоят, Аҳмедовнинг гапларини эслайди: «Шу ҷоққача мен ерга қул эдим,— деди...— Энди,— деди Муҳиддин ака илжайиб,— кўп қатори хўжайин бўламан».

Умри меҳнатда ўтган, икки одам билан бемалол гаплашиб ўтиришга вақти бўлмаган, фикрини бирорга тушунтиришга қийналадиган бир одамга ўз фикрини тушунтириш (айниқса кўпчиликнинг ўртасида) катта синов эди. Аҳмедов айтганларини шундоққина қайтариш ҳам Муҳиддин ака учун катта жасорат эди.

Сидиқжон колхозга кириб, ўзини таний бошлайди. Ҳаёт унга Ўрмонжоннинг гаплари тўғри эканини тасдиқлаб боради. Хотини Шарофат биринчи марта колхозга эри олдига чиқиб борар экан, Сидиқжон ўзини қандай тутиши, ҳаёти ҳақида нималар дейиши кераклигини билолмай, шошиб қолади. Шунда у Ўрмонжон билан учрашиб, унга бўлган воқеани айтиб беради. Ўрмонжоннинг гаплари Сидиқжонни ўринисиз хижолатдан чиқаради, унинг колхозга, келажакка бўлган ишончи иянада ошириб юборади. Ўрмонжоннинг ҳар бир гапи унга тушунарли. Шунинг учун Сидиқжон хотинига Ўрмонжоннинг гапларини «ўз тили билан» айтади. У: «— Ҳу... кўраяпсизми?— деди.— Канал! Катта канал... ўтган йили чиқардик. Ҳозир тўқайни бузиб ер очаётимиз, қўриқ ҳам очамиз...».

Шарофат Сидиқжон кўрсатган томонга бир қарайди-ю, тупроқ тепага эътибор қилмасдан, яна ўзининг гапини гапиради. Сидиқжон нима бўлса ҳам Шарофатга колхознинг келажагини, демак, ўзининг келажагини тушунтироқчи бўлади. Шунда Сидиқжон тили билан яна Ўрмонжон гапиради: «Лекин мен сизнинг қўйнингизни пуч ёнғоққа тўлғизмайман-

Борини кўрамиз... лекин менинг ҳозирги туриш-турмушимни кўриб юрагингиз ёрилмасин... «Биз гувалак қўяётганимиэда келдингиз... қўлимиз лой...». Бу гапларнинг ҳаммаси Шарофатга тушунарсиз. Сидиқжон билан Зуннунхўжа оиласи ўртасидаги конфликт авваллари фақат мол-дунё устида бўлган эди. Энди Сидиқжон бутунлай бошқа одам: унда социалистик онг, дунёқарашибаклана бошлади. Шунинг учун ҳам Шарофат унинг гапларига (тўғрироғи, Ўрмонжон гапларига) тушунмаслиги мумкин эканини Сидиқжон энди тасаввур эта олмайди.

«Қўшчинор чироқлари»да Абдулла Қаҳҳорнинг бошқа асарларига қараганда персонажлар нутқида кўпроқ бошқа қаҳрамонларнинг, айниқса, колхоз раҳбарлари, ташкилотчиларининг сўзларига мурожаат қилиш тез-тез учрайди. Асар асосига олинган давр, қўйилган масала характери кўпинча шуни талаб қиласи. Колхоз қурилишидан мақсад аввало қишлоқ кишилари ўртасида янгича муносабатларни вужудга келтириш, уларда янгича фикрлаш қобилиятини уйғотиш эди. Ёзувчи масаланинг мана шу томонига айниқса катта эътибор беради. У бу йўлда ҳеч қандай зўрма-зўракиликка йўл қўймайди.

Ҳосилот кенгашининг раиси Ўрмонжон образининг ёрқинроқ чиқишида кўпроқ бошқа қаҳрамонларнинг унга бўлган муносабатлари, у ҳақдаги фикрлари муҳим роль ўйнайди. Масалан, колхоз тузуми орқали рўшнолик кўра бошлаган Анзират кампир ҳаётидан, уй-рўзгоридан мамнун эканини Сидиқжонга гапирар экан, Ўрмонжонни тилга олади: «Ўтган йил бир юз ўн саккиз меҳнат куни ишладим. Қимираган қир ошар экан-да, шунча иш қўлимдан келар деб ҳеч ўйламаган эдим. Меҳнат кунига дон дуруст тушди-ку, пахтамиз оз-да, пул жуда кам тушди. Майли, мана бу канал битса, янги ер очилса, пахта ҳам кўпаяди. Ушанда ҳамманинг егани олдидা, емагани кетида бўлиб қолади. Ишқилиб, худо Ўрмонжоннинг умрини берсин». Кампирнинг бўлажак фаровонлик ҳақидаги ўз фикрларидан Ўрмонжонга кўчиши, кўринишдан, бежиз эмас. Кампирнинг ер очиц, пахтани кўпайтириб, кўп даромад олиш ҳақидаги гапларни Ўрмонжондан эшитгани билиниб турибди. Ўрмонжоннинг гаплари эса ҳар доим тўғри чиқади, ишқилиб, унинг «умрини берсин».

Канизакхон ҳам Самандаровнинг «мусобақанинг маъноси-ни биласанми ўзинг?» деган саволига Ўрмонжондан эшитган гапи билан жавоб қайтаради: «Биламан, мусобақадош икки кишидан бирининг ютуғи иккинчисининг раşкини эмас, ҳавасини, ғайратини келтириши керак». Канизакхон мусобақа нима эканлигини ўзича тушунади, лекин социалистик тузумга

хос бўлган бундай муносабатни ўз сўзлари билан бир қолип-га солиб айта олмайди. Бу бир тарафдан. Иккинчидан эса у шу мусобақадошлар шаънига тўғри келмаган бир ишнинг гувоҳи бўлади. Шунинг учун ҳам ёзувчи Канизакнинг Ўрмонжондан эшитган гапларини қайтаришидан бир қанча мақсадни кўзда тутган.

Қурбон ота Сидиқжонга ўз бошидан ўтган воқеаларни бирма-бир айтиб беради. Асарнинг каттагина қисмини ташкил қилган бу парчада асосий ҳикоячи Қурбон отанинг ўзи-дир. Лекин ёзувчи ҳикояни фақат персонаж тилидан баён этмай, Қурбон ота эслаган одамларнинг гапларини ўрни билан келтиради; ҳикояга шу йўл билан уларни персонаж сифатида киритади. Тўғри, улар бир-бирлари билан диалогга киришмайди. Бу персонажларнинг сўзлари қандайдир ички қонуниятга эга бўлиб, улар маълум мақсадга бўйсундирилган. Натижада уларнинг сўзлари айтuvчи учун ҳам, ҳикоя қилинган воқеа ва ҳодиса учун ҳам катта аҳамият касб этади.

Қурбон отанинг акаси юзбошининг мергандаридан эди. Юзбошининг уйига ўғри тушгач, мергандарни айбдор ҳисоблаб, шаҳарга ҳайдаб кетадилар. Кўп вақт ундан дарак бўлмайди. Чол ҳикоясини давом этиб, «бир куни маҳалламизнинг элликбошиси шаҳарга бориб келиб, «аканг осилди, ўз кўзим билан кўрдим» дегани»ни айтади. Қурбон ота элликбоши келтирган хабарнинг мазмунини билдирамасдан, уни элликбошининг тили билан айтади. Қейинчалик маълум бўлишича, воқеа элликбоши айтганидек эмас экан. Элликбошининг ёлғон гапирганигина маълум бўлмасдан, бундан кўзлаган мақсади ҳам очилади. Шундай қилиб, ёзувчи персонаж гапларини ҳикоячи сўзига қистириш билан гапиравчи шахс қиёфасини ёрқин акс эттиради. Ёзувчи персонажлар суҳбатининг мазмунини келтирад экан, ҳам гапиравчи, ҳам эшитувчи учун муҳим фикрларни гапиравчи тилидан беради.

* *
*

Образ яратиш ва ёзувчи позициясини ифодалашда нутқ беҳисоб имкониятларга эга. А. Қаҳҳор қаҳрамонларининг нутқини ёки автор нутқини ўрганар эканмиз, уларни бошқа бир қанча компонентлар билан ўзаро муносабатда ўрганиш лозим бўлади. Қаҳрамонлар нутқи фақат сўзловчи персонажларнигина эмас, балки тингловчи кишиларни ҳам, воқеа рўй берадётган даврни ҳам тушунишга ва улар характеристикасини беришга ёрдам беради. Айтилган сўз ва луқманинг аҳамияти

тингловчиларнинг муносабати, ҳаракати, интонацияси орқали янада ортади.

Шарофат билан Сидиқжоннинг катта жанжалдан сўнгги биринчи учрашуви романнинг энг ёрқин саҳифаларидан биридир. Бу эпизод драматиклиги жиҳатидан Зуннунхўжа оиласи билан Сидиқжон ўртасидаги ҳал қилувчи жанжал воқеаси билан тенглашади, психологияк жиҳатдан эса ундан кучлилик қилиади.

Бир вақтлар бирга турмуш қилган Сидиқжон билан Шарофат турли ҳаёт йўлидан кетдилар. Улар яна учрашар эканлар, бир-бирларининг мақсадларига, фикр-ўларига тушунмоқчи бўладилар. Ҳар икки томон ўз режа ва қарорларини, мақсадларини бир-бирларидан пинҳон тутади. Мана шу кайфият улар суҳбати орқали очилади. Эрини уйга, эски ҳаётга қайтариш ниятида келган Шарофат унинг ҳар бир ҳаракатига, сўзига ўзича маъно беради, унинг асл мақсадини билиб олмоқчи бўлади. Сидиқжонда эса тайнли фикр йўқ. Хотини билан яшайдими, йўқми, бари бир, лекин... боласи бор. Агар хотини Сидиқжон йўлидан юрса, турмушлари ўнгланиб кетиши мумкин. Бу ниятини ҳам у бирдан айтмайди. Мана шу тариқа икки мураккаб шахс бир-бирини билиб олмоқчи бўлади. Шунинг учун ҳам уларнинг бир-бирларига айтган сўзларидан кўра, бир-бирларини ўрганиши, ҳаракатларини анализ қилиши биринчи планга чиқади. Айтилаётган гаплар мураккаб ўйларнинг ниҳоят кам қисмини ташкил қилиади. Ҳар бирининг бир оғиз сўзи, қарashi, гапириш оҳангি, иккинчисида катта хулосалар чиқаришга туртки бўлади, гумон ва шубҳалар туғдиради. Ёзувчи қаҳрамонлар ўз тиллари билан айтишлари керак бўлган гапларга аралашмайди ва шу билан бу гапларнинг подтекстини очишни ҳам гапирувчи ё эшиштүвчига «ташлаб қўяди». Чунки суҳбатлашувчилар гапларининг «Ўз-ўзича» аҳамиятидан кўра бир-бирига кўрсатаётган таъсири керак. Бу ерда диалоглар нечоғлик шарт бўлса, диалогларнинг ички нутқ ва монологлар билан алмашиб туриши ҳам шунчалик зарурдир.

Сидиқжон Шарофатга колхозда қилинган ишларни айтади, канални кўрсатади. Сидиқжонлар учун катта ҳодиса бўлган нарсалар Шарофатга ҳеч қандай таъсир қилмайди. «Йўқ, канал, тўқай тўғрисида мен гапни мондалаб гапира олмадим,— деди Сидиқжон ичиди.— Одам ёқасини ушлайдиган шундай катта иш менинг оғзимдан кичкинагина бўлиб чиқди. Бу қандоқ бўлди, тайёр турган шундай катта нарсани уддалаб айтолмаётиману, ҳали йўқ нарсаларни бунинг кўзига қандоқ кўрсатаман?». Сидиқжон билан Шарофат бир-бир-

**ларининг гапларига тушунмай, уларни ўзларича талқин қи-
ладилар.** Шарофат Сидиқжонга: «Мен ўғлимни ўйлайман,
болагинамнинг пешанасини ўйлайман»,— дейди. «Ерга қараб
чўп синдириб, унинг сўзларига жимгина қулоқ солиб ўтирган
Сидиқжон ер остидан унга бир кўз ташладио, жилмайиб:

— Бу тўғрида мен сиздан кўпроқ ўйлаб юрган бўлсам ни-
ма дейсиз?— деди ва шу билан «мен ҳозир нима қилиб юрган
бўлсам, ҳаммасини ўғлим учун қилиб юрибман», демоқчи
эди. Бироқ Шарофат буни ўзича тушунди: «Аччиқ устида шун-
доқ бўлиб кетди-ю, ўшандан бери нима қилишимни билмай
юрибман», демоқчи деб ўйлади. Ҳамма гап Шарофат билан
Сидиқжоннинг бир-бирларини тушунмасликларида, фақатгина
гапириш манералари, оҳанги, интонациясини, қарашларини
нотўғри талқин қилишларида эмас (кўринишдан улар гапда,
қарашларида бир-бирларини тутмоқчи бўлсалар ҳам), харак-
терларининг ҳар хиллигida (Шарофатнинг енгил табиатлиги,
шанғилиги, ўз-ўзидан қизиб кетиши) ҳам эмас, балки адашиб
турмуш қуриб, вақтинча бир оила бўлиб яшаган бу шахслар-
нинг икки синфга мансуб бўлганлигida эди. Агар улар аввал
бир оз бўлса ҳам бир-бирларини тушунишлари мумкин бўлса,
энди Сидиқжон ўзини таний бошлагандан сўнг, уларнинг
бирга бўлишлари мумкин эмас эди. Чунки масала тор
шахсийликдан чиқиб, ижтимоий характер касб этган. Ёзувчи
маҳорати ҳам эр-хотин суҳбати орқали бирорта пафосли сўз
ишлиятасдан, ўқувчини масаланинг мдҳиятига олиб кира ол-
танидадир.

Абдулла Қаҳдор асар ғоясини очиши учун ёрдам қилиши
мумкин бўлган ҳамма нарсани аҳамиятли деб билади. Персо-
нажнинг гапириш пайтида қилаётган иши ҳам, гапга гап би-
лан жавоб бериш ўрнига имо-ишора қилиши ҳам ёзувчи
эътиборидан четда қолмайди.

«Бошсиз одам» ҳикоясидаги Нисо буви қизи Мехрини но-
шуд ва бефаросат Фахриддинга эрга беришга рози бўлмайди.
Лекин унинг қўлидан ҳеч нарса келмайди. Тўйдан кейин ҳам
ўз фикридан қайтмаган Нисо буви энди уларда бола бўли-
шини истамайди. Фахриддиннинг гап-сўзлари ва хатти-ҳара-
катлари Нисо бувининг ҳақ эканини тасдиқлайди. Ёзувчи
Фахриддинни «гапиририш» дан олдин унинг нима билан шу-
ғулланаётганини ёки гапириш манерасини кўрсатишга диққат
қиласди. Унинг хатти-ҳаракати гаплари билан жуда мос бўлиб
боради. Нисо буви ўз мақсадини Фахриддинга тушунтиради.

«Фахриддин осилиб турган қалин пастки лабини бир-икки
қимирлатиб, билаги билан бурнини артиб жавоб беради:

— Мен билмасам, дадам биладилар-да».

•••••

Нисо бувининг тадбирлари ўз натижасини беради. Меҳри оғриқ азобидан ўзини қайга қўярини билмай, «дод» деб юмалар экан, «Фахриддин какликка сув қуяётиб, отасига қараб қўйди.— Ҳа ўғлим, хафа бўлаётисанми?— деди отаси.

— Йўқ,— деди Фахриддин чўзиб».

У ҳақиқатан ҳам хафа эмас эди. Чунки ҳаёти хавф остида турган хотинининг аҳволи уни оз бўлса ҳам безовта қилганда, у какликларга бемалол сув қуяётган бўлармиди? Оғир аҳволда касалхонага юборилган хотинини кўргани кетаётган Фахриддин «негадир дам кулар, дам бурники артиб, йўталар эди». Шундай қилиб, ёзувчи образни характерлашда кўпроқ унинг сўzlари, хатти-ҳаракатларидан фойдаланди.

«Қўшчинор чироқлари» романни қайнананинг күёвига гапирган гаплари билан бошланади:

«— Қазисан қартасан, ахир аслингга тортасан,— деди кампир омборни қулфлаётиб.— Энди жир битти-да, битта кўйлак иккита бўлди. Увада ислиқи тўн, чилвир белбоғнинг хумориси тутгандир...».

Ёзувчи ҳали бу персонажни бирор сўз билан ҳам характерлаганича йўқ. Лекин күёв қандай одам бўлишидан қатъий назар, унга шундай гапириш, албатта, кампирга нисбатан ўқувчидаги ёмон ҳис уйғотади. Ёзувчи кампирга нисбатан ўзининг қарашини билдирамасдан туриб, яна унинг гапини келтиради. «—Э, ўл, итялоқ. Дайди итнинг тумшуғини ёғ қилмай ўл. Итга берсанг ошингни, итлар ғажир бошингни. Кошки ўз бошини ғажиса». Бу гаплар қизига қаратилган эди. Фараз қилайлик: күёви ҳам, қизи ҳам кампир олдида гуноҳкор. Лекин қайси она ўз фарзандини шу даражада ҳақоратлай олади? Кампир ўз гаплари билан ўқувчи кўнглига ғашлик солади; китобхонда унга нисбатан маълум муносабат пайдо бўлади. Ёзувчи кампирнинг бир ҳаракати билан унинг ҳаёти мазмунига шама қилгандай бўлади. У Сидиқжонга қащаб гапираётганда, омборни қулфлаётган эди. Ҳамма гап мана шунда — мол-дунёда. Кампирга шундан бошқа ҳеч нарса керак эмас. Ягона фарзанди — қизи ҳам кўзига кўринмайди.

Ёзувчи персонажларнинг юз ҳаракатлари, поза ва қарашлари орқали ҳам уларни чуқурроқ кўрсатади.

Киши психологиясини, унинг намоён бўлиш шаклларини яхши билган Л. Толстой: «Оға-ини, ёру биродар, эр ва хотин, хўжайин ва хизматчи доимо бирга яшаса, хусусан, бу кишилар бир-бирларидан ҳеч нарсани сир тутмайдиган бўлсалар, уларнинг киши сезмас табассумида, имо-ишора ёки кўз қарашида зоҳир бўладиган сўзсиз сирли муносабатларни ким пайқамаган дейсиз. Биргина тасодифий қарашнинг ўзида кўзларингиз ҳайнқиб ва қўрқа-писа бир-бирларига дуч келгани-

да, айтилмай қолган қанчадан-қанча истаклар, фикрлар, қўрқув ҳислари ифодаланади», — деб ёзган эди⁹.

Қараш орқали фикр билдиришнинг турлари кўп бўлади. Бу ҳам қаҳрамон ҳолати билан боғланиб кетади. Саидий Мунисхоннинг ҳар бир ҳаракатини диққат билан кузатади. Мунисхон Саидийнинг қарашини сезиб қолади, шунда Саидий ўзини йўқотиб қўяди.

«— Ёмғир...— деди у. Аммо нима демоқчи бўлиб гапни ёмғирдан бошлаганини билмас эди. Хайриятки, Мунисхон унинг сўзини давом эттириди:

— Ёмғир куни уйда чақ-чақлашиб ўтиранг, шамол куни ухласанг. Саидий боши билан «шуни айтмоқчи эдим», дегандай ишора қилди.

Саидийда бошқа чора йўқ, нима дейишини билмайди, умум овоз чиқарса, ўзини билдириб қўяди. Шунинг учун ишора билан жавоб қайтариб қўя қолди.

«Сароб» персонажлари кўпинча бир-бирларига имо-ишора орқали ўз фикрларини тушунтирадилар ва шуни ўзларига фарх деб биладилар. Аббосхон Саидийга улфатларининг масти бўлиб қолганини айтмоқчи бўлиб, «кўз қисиб, мастлик қилас-ётган одамларни кўрсатади ва мийигида кулиб қўяди. Бундан эса Саидий жуда хурсанд бўлиб кетади: «ҳам жуссаси, ҳам обрўи зўр бўлган кишилар учиб қолганда ёки алжиллаб ўтирганда, у масти бўлган кишининг имо-ишоратини англайдиган даражада ҳушёр бўлса — ёмонми». Кейинчалик эса ўзи ҳам бошқаларга, айниқса «мия механизми бутун кишилар»га имо-ишора билан фикрни тушунтирас экан, ўзини баҳтиёр ҳисоблайди. Бир кун «сиёsat ёмон» демоқчи бўлганини Илҳомга кўз ва юз ҳаракати билан англатишга муваффақ бўлиб, шунча завқ қиласиди, ҳатто ичиде «ер юзида иккита ақлли одам бор: бири — мен, иккинчиси — Илҳом» деб ўйлади. Имо-ишоранинг «қулай» жойи яна шундаки, ҳар бир киши бу ҳаракатни ўзича тушунади, тўғрироғи, ўз фойдасига хизмат қилдирмоқчи бўлади.

Саидийнинг Мунисхонга бўлган муҳаббатини уларнинг оила қуришига ёрдам бериши мумкин бўлган дўст-ёрлари билади. Лекин уларнинг бу муҳаббатга муносабати аниқ эмас. Саидий ҳурмат қилган одамлардан бири «Аббосхон эса, бу тўғридаги ҳазил гапга аралашмайди, фақат бундан бир иш чиқиши ва чиқадиган иш фақат ўзининг қўлида эканини Саидийга имо-ишора билан билдирад эди». У бирон марта ҳам овоз чиқариб, бирон нарса ваъда қилмайди. Имо-ишора би-

⁹ Л. Толстой, Болалик, Усмирлик, Ёшлик, Тошкент, «Ёш гвардия» нашриёти, 1962, 149-бет.

лан тапириш осон. Чунки кейинчалик бу ишга аралашмасдан, четга чиқиб туриш ҳам мумкин. Саидийни шундай қилиб ҳам лақиљлатиш мумкин; чунки шу имо-ишора унинг орзуларига қанот боғлади.

Мунисхон Саидийни ҳамон севишини унинг уйланишини эшитгандан кейин айниқса чуқур ҳис қиласади. Лекин у ҳеч нарсани ўзгаририб бўлмаслигини ҳам билади. Шундай бўлса ҳам, Саидийни кўриш истаги зўрлик қиласади, у редакцияга келади.

Саидий Мунисхондан: «Мухторхон келдими?» — деб сўрайди. «Мунисхон бурнини жийирди. У ҳеч қачон Саидий олдидиа Мухторхонга нисбатан ғойибона бундай муносабатда бўлмаган эди. Саидий унинг Мухторхонга кўнгилсизлигини биларди, аммо сира ўз оғзидан эшитмагани учун доғда эди.

— Ҳа, нега бунаقا қиласан?

— Нима қилдим? — деди! Мунисхон.

— Норизороқ кўринасан...

— Ҳеч-да, — деди Мунисхон, Саидийнинг кўзига қараб бир оз қизарди.

— Йўқ, мен буни ҳозирги кайфиятингга қараб айтиётганим йўқ, умуман, шундай деб эшитаман.

— Ҳеч! Ҳеч! Ҳеч! Эрим яхши!!

Мунисхон астойдил қизарди, кўз қорачуғида юпқагина ёш пардаси пайдо бўлиб, йилтиради...».

Бу ерда Мунисхоннинг сўzlари унинг ҳақиқиј. кечинмаларини акс эттиrmайди. Бу эса Мунисхон ҳолатининг оғир, ачи нарли эканини кўрсатади.

Туробжоннинг хотини эрининг қўлида тугунча кўриб суюниб кетади — анор олиб келган деб умид қиласади; «эшик олдидиа ўтириб тугунчани очди-да, бирдан бўшашиб кетди ва секин бошини кўтариб эрига қаради.. Хотин енгини тишлиб бир нуқтага қараганича қолди». Туробжоннинг хотини ҳеч нарса дегани йўқ. Лекин унинг ҳаракатлари айтилиши мумкин бўлган ҳар қандай сўздан таъсирили эди. Унинг мана шу ҳаракатлари қанчалик «заҳарли» эканини бу ҳаракатларнинг Туробжонга кўрсатган таъсиридан ҳам билиш мумкин. Агар хотини норозилигини бирор сўз билан билдирганида, балки Туробжон шунчалик тутоқмаган бўлармиди. Не ҳасратда топиб келган нарсасини хотини писанд қилмаслиги Туробжоннинг асабини бузиши табиийдир.

Езуви кишиларнинг қарапарига диққатни тортишдан ҳам маълум мақсадни кузатади.

Қурбон ота онасининг охирги дақиқалари ҳақида Сидикжонга гапирав экан: «Охирги нафасни олиб бошларини шундай менга буриб, хира кўзлари билан қарадилар. Шу қарап-

енинг маъносини ҳали-ҳали билмайман: хайр дедиларми ё бирон илож қил дедиларми». Қурбон ота бошидан ўтганларни бирма-бир гапириб, онасининг ақлли, мулоҳазали бир аёл эканини айтади. Онаси билан боғлиқ бўлган ҳамма нарсалар унинг хаёлида кучли, эсдан чиқмас бир ҳолда экани ҳаи, онасининг баъзи ҳаракатларини тушунмаганидан ҳижолагда экани ҳам маълум бўлади. Бу билан Қурбон ота онаси учун кўп нарса қила олмаганини, онаси олдида қарздор бўлиб қолганини билдиromoқчи. Онасини эслаш унда қандайдирти билан айтиш қийин бўлган ҳис-туйфуларни уйғотади.

Кечагина онаси билан учрашган, унинг чексиз меҳр-муҳаббагини чуқур ҳис қилган Сидиқжон Қурбон отага ёрдамга кетади: «Иккови ҳам эмас,— деди Сидиқжон чуқур хўрсаниб,— мен кетдим, энди сенга ким куяди деганлари. Она шундоқ бўлар экан».

Қурбон ота Вася Тюминдан кўп яхшилик кўрганини гапирав экан, унинг гаплари кўпроқ справка характерида бўлади. Тюминнинг охирги яхшилигини, ишсиз қолмайсиз, «ўзим енгил иш топиб бераман», деганини эслаган Қурбон ота «қилт» этиб ютинди, бир оз жим қолгандан сўнг» гапида давом этди. Мана, шу ҳаракати билан Қурбон ота Вася Тюминга бўлган миннатдорчилигини, унинг фожиали ҳалокатидан эзилганини, ўтган умрга ачиниш каби мураккаб кечинмаларини билдириб қўйди. Бир дақиқа бўлса ҳам у ўтмишга қайтади, ўша даврда яшагандай бўлади. Хуллас, шу ҳаракати билан у ўз ҳикоясига бир тон ҳам беради.

Инсон психологиясини чуқур ҳис этган ёзувчи одамларнинг кайфиятларини, минг товланиб турувчи кечинмаларини фақат сўз билангина эмас, балки қандайдир ҳаракатлари, қилиqlари, кулгилари билан изҳор қилишга алоҳида эътибор беради.

Сидиқжоннинг колхозга кириши аниқ. Қайнанаси ер қўлдаги кетиб қолади деб, унга қаттиқ қаршилик кўрсатади. Лекин Сидиқжоннинг кўнгли тинч, кампирнинг гапларига бепарво. Чунки қайнатаси, оила бошлиғи Зуннунхўжа «ихтиёр ўзингда» деган. Қайнанаси жиги-бийрони чиқиб, ерларнинг ўзиники эканини тушунтирас экан, «Сидиқжон мўйловини бурага, кулумсиради ва ер остидан Зуннунхўжага қаради». Сидиқжон бу ҳаракати билан кампирнинг уринишлари зое кетишига ишонади, унинг устидан кулади ва бу кулгисига Зуннунхўжа ҳам шерик эканига ишонади. Лекин Сидиқжоннинг бу маъноли қарашига жавобан «Зуннунхўжа пешанасини бириники уқалади, сўнгра айвоннинг шипидаги қалдирғоч уясига қараб» гапира бошлади. Сидиқжон эса қип-қизарип кетади ва Зуннунхўжага «гапирсангиз-чи» деған мазмунда назар

ташлайди. «Зуннунхўжа кампирнинг гапини гап ҳисобламаганини, бунга эътибор қилмаганини қўрсатиш ва шу билан Сидиқжоннинг тафтини босиши учун ёлғондан эснади».

Зуннунхўжанинг бу ҳаракатидан бирор фикрга келиш қинин. У Сидиқжонга ҳамфикрми, йўқми?.. Зуннунхўжа — мұғамбир одам. У аслида Сидиқжоннинг колхозга киришига қарши. Лекин бу фикрни очиқ айтмайди. Замоннинг нозиклигиги яхши билади. Шунинг учун у «Сидиқжон қайнанасининг хотинининг гапига кирап, улар қарши турса, бу фикрдан қайтар» деган умидда бўлади. Лекин Сидиқжоннинг қарори қатъий эканини тушунгач, колхозга «кирманг», — деб очиқ айтади. Мана шу тафсилотни билгандан кейин эса ўқувчи кўп маъноли қараашларнинг, эснашларнинг моҳиятига тушунади.

Персонажлар бир-бирларини баъзан сўзсиз тушунадилар. Ёзувчи бу билан шароит бирор гапни кўтара олмаслигини таъкидлайди. Сидиқжон қайнанаси ва қайнатаси билан оранг очиқ қилгандан сўнг, уйдан чиқиб кетади. Бундан «Зуннунхўжа шундай гангидики, нима бўлганини тушумай қолгандай, қизига қаради. Кампир беихтиёр «Шарофат» деб юборди. Шарофат отасининг қарашидан ҳам, онасининг «Шарофат» дейишидан ҳам фақат бир маъно англади: иккови ҳам «қайтар» демоқчи эди».

Шунингдек, айтилаётган гапнинг баъзи ҳаракатлар билан тўлдирилиши гап мазмунининг таъсирили чиқишини таъминлайди. Зуннунхўжа муҳим бир далил билан Сидиқжонни шахтидан қайтармоқчи бўлади. У:

«— Болангиз бор! — деди.

— Яна нимам бор? — деди Сидиқжон худди унинг жавобини қулоғи билан эмас, кўзи билан эшитадигандай, кўзларини катта очиб.

Сидиқжоннинг бу важоҳати (сўзларигина эмас — М. С.) Зуннунхўжанинг ўйини пучга чиқарди».

Гапирилган гапларнинг мазмуни, таъсир кучи уни айтиш важоҳати билан боғланаб кетади. Сидиқжон қайнанаси билан уришгач, кўчага йўл олади; шунда хотини унга мурожаат қилиб: «— тўхтанг, ажрим қилиб кетинг,— деди. Сидиқжон ялт этиб хотинига қаради. Хотини, ранги ўчган, ўрнидан туриб болани беланчакка солди ва қаттиқ тебратада бошлади». Шарофат гапларнинг қандай ҳолатда айтилгани шароитнинг мураккаблигини ва бу гапларнинг кучли кечинмалар билан боғлиқ эканлигини кўрсатади.

«Асрор бобо» ҳикоясида тасвирланган вазият психологик жиҳатдан ниҳоятда мураккаб. Ўғли фронтда ҳалок бўлганини билган чол билан кампир бу хабарни бир-бирларидан яшишар эканлар, бунда қаҳрамонларнинг нутқлари билан баравар

уярнинг қарашлари ҳам алоҳида ўрин эгаллади. Чол билан кампирнинг яқин дўсти Ҳайдар ота ҳам уларнинг гапларига шерик бўлади. Қампир унга Асрор бободан ҳасрат қилиб, ўғлимдан келган хатларни менга кўрсатмайди, деб хафа бўлади. Шу вақтгача кампир ўғлининг ҳалок бўлганини билганича йўқ эди. Чол ҳам, кампир ҳам буни билгандаридан кеинин, бир-бирларига сир бой бермай юришади. Қампир кечинмалари оловланганини кўрган Ҳайдар ота уни бир неча кунга хотини олдига юбориши маъқул деб билади. Шунда чол-кампир бир-бирларига ялт этиб қарайдилар. «Бу қарашда ҳар иккисининг ҳам кўнглидан бир гап ўтди: «Мен йўғимда бу хабарни эшитсанг, ёлғизлик қилиб қолмасмикансан?».

Абдулла Қаҳҳор «Синчалак»да «қарашлар» маъносини бошқа асарларига қараганда кенг таҳлил қилиб беради. Қаландаров колхозни «ўзиники» қилиб олган. Шу вақтгача бирор одам ботиниб, уни тартибга чақирмаган. Ҳамма учун мажбурий интизом Қаландаровга тааллуқли эмасдек туялади. У мажлисдан кетиш учун биринчи марта шундай ижозат сўйайди: «Энди менга жавоб, МТСга борадиган ишим бор. Мони кутиб туришиби...». Саида жавоб берилсин деган таклифни овозга қўйишини сўрайди. «Қаландаров жуда хижолатли бир маросимни ўтказаётгандай қип-қизариб, илжайиб, кўзи кўзига тушган одамга «майли, қўя бер, аҳамияти йўқ» деган маънода кўз қисиб тикка турар эди».

Қаландаров қаноти остида беозор яшашга ўрганиб қолганилардан бири Зулфиқоров бўлиб, унинг қўш хотинилиги ҳақидаги масала партия мажлисида тилга олинади. Бунга унинг ўзи сабабчи бўлди. Шунинг учун ҳам мажлисда ўтирган «Қаландаров қип-қизариб, пешанасини тез-тез ишқалай бошлади. Унинг ҳаракатидан Зулфиқоровга фижиниб, ичиди: «Аҳмоқ, нима қиласар эдинг гап ковлаб» дегани билиниб турар эди».

Абдулла Қаҳҳор асарларидан олинган бу сўнгги мисолларда ёзувчи персонажларнинг афт-башараларида акс этаётган фикр ва туйғуларни қайд этибина қолмай, уларда ифодаланаётган маънони ҳам «чақиши»га уринади. Ёзувчи асада иштирок этаётган кишиларнинг маъноли қарашларида ифодаланган мазмунни тушунтирадими, йўқми — бунинг биз айтмоқчи бўлган асосий фикрни рад этувчи томони йўқ. Аксинча, ҳар икки ҳолда ҳам бу қарашлар, афт-башарадаги, важоҳатдаги бу ўзгаришлар бамисоли тилга киргандек, қаҳрамоннинг бирор муҳим масалага бўлган муносабатини кўрсатиш, ёзувчи кўзда тутган ғоявий мазмунни очиш учун хизмат қиласади.



Персонаж саволларининг жавобсиз қолиши ҳам маълум мақсадга бўйсундирилади.

«Сароб» дан бир-икки мисол. Саидий қишлоқ ҳаёти билан танишгач, мушкул бир аҳволда қолади. Шаҳарда дўстлари айтган гаплар унга нотўғри кўринади — меҳнаткаш деҳқон қолхозлаштириш тарафдори. Саидий яна Муродхўжа домла билан учрашиб, у билан махфий йиғинда бўлади. Натижада унинг фикрлари чувалашиб кетади. Шунда Муродхўжа домла Саидийга қишлоқда яна бир неча кун қолишни таклиф қилар экан, «Саидий жавоб бермай, эшикка томон йўналади». Ёзувчи Саидий ҳолатини изоҳламай, воқеани шундай якунлайди: «ётоқ қоронғу, шериклари ухлаган, печкадаги ўт сўнган, уй совуқ.

У қоронғида ечиниб муздек кўрпага кирди ва тиззасини қучоқлади». Бу тасвир Саидий ҳолатига изоҳ ролини йўна-гандай бўлади.

Яна шу асардан бир мисол:

Саидийнинг тўйи арафаси. Саидий ўз истагига қарши ўлароқ, Сораҳонга уйланмоқда. Мунисхон Саидийнинг олдига бир нимани баҳона қилиб келади. Улар бир-биёларини ўз баҳтсизликларининг сабабчиси деб биладилар. Саидий Мунисхон билан энди бирга бўла олмаслигини билса ҳам, «Фақат ажалга илож йўқ... ҳар ҳолда сўнгги сўз сенда қолди. Сен ваъда берсанг...» дейди. Мунисхон бунга жавобан кутилмаганда: «— Москвага кетмайсанми?» — деб сўрайди. Чунки Саидий, бир тарафдан, Сораҳон билан бўлажак севгисиз турмушдан қочиш, ўзини-ўзи баҳтсизликка дучор этмаслик учун Москвага боришига тайёр. Балки Мунисхон ҳам бирга кетишга, қўлдан бой берётган севгини, баҳтини яна ушлаб қолишга интилар. У ҳолда баҳтга ва севигига бўлган умид шуъласи яна порлаши мумкин. Шундай экан, Саидий Мунисхоннинг фикрларига юракдан қўшилади — шунинг учун ҳам йўқ дей олмайди. Лекин, иккинчи тарафдан, шароит унинг измини, ихтиёрини тортиб олган. У оқимга қарши ҳаракат қиолмайди. Шунинг учун у овоз чиқариб, бирор нарса демоқ учун ўзида на куч, на илож топади.

Асқар ота Умринисонинг кимлиги билан қизиқади («Хотинлар»). У: «— Ким ўзи у, қанақа хотин? — дейди. Унинг саволига оқсоқол ҳам ва бошқа ҳеч ким ҳам жавоб бермади. Оғир жимлик чўкди. Шундай жимлик чўкдики, бу хилдаги жимлик айтгани тил бормайдиган, эслашни кўнгил кўтармайдиган бирон даҳшатли фожиага учраб, ҳалок бўлган

кишининг номи беҳосдан тилга олинган вақтда бўлади. Жимлик узоқ давом этди». Шундай қилиб, Асқар отанинг саволи ҳам жавобсиз қолади. Бир оздан сўнг аёллар тамоман бошқа нарса устида гапира бошлишади. Ёзувчи бундай сўкунатни ҳар доим ҳам қандай тушуниш кераклигини гапириб ўтирумайди. Кўп вақт изоҳсиз сукут қандайдир сирга, кўп маъноликка имо ролини ўйнайди.

* * *

Алексей Толстой персонажнинг гапириш манерасининг характерни очишдаги аҳамиятини алоҳида таъкидлаб, ёш ёзувчиларга шундай деган эди: «Инсон тили мураккаб маънавий ва жисмоний жараённинг якунидир. Киши миясида ва тана-сида ҳаяжон, ҳис-туйфу, фоялар оқими, уларнинг онгидан эса, жисмоний ҳаракатлар бетўхтов давом этади. Одам тўхтовсиз равиша қўлларини ҳаракатлантиради, имо-ишора қиласиди.... аммо санъаткор имо-ишорани қалбдаги товланишнинг озигина натижаси сифатида сезиб ола билиши керак.

Имо-ишоранинг кетидан сўз келади. Имо-ишора жумлани аниқлайди. Агар сиз ўзингиз тасвирлаётган персонажнинг (шу персонажни сиз ўзингиз, албатта, кўз олдингизга ҳелтира олсангизги) имо-ишорасини ҳис этган, сезган бўлсангиз, ўша сиз сезиб қолган имо-ишоранинг кетидан сизнинг персонажнинг шу пайтдаги руҳий ҳолатига мос тушадиган худди шундай тартибдаги, худди шундай танланган, худди шундай талаффуз этадиган сўзлардан ташкил топган яккаю ягона жумла келади¹⁰.

Асрор бобо ўғлидан қора хат келганини кампиридан яши ради, ўзи пинҳон эзилади. Унинг дўсти Ҳайдар ота ҳам бу кўнгилсиз воқеадан хабардор, лекин буни очиқ айтмайди. Асрор бобо билан Ҳайдар отанинг сухбатлари психолоgiк жиҳатдан ниҳоятда кучли. Ҳайдар ота саволларига, маслаҳатига Асрор бобо жавоб қайтармайди, лекин шу билан бирга, унинг саволлари ерда қолмайди. Асрор бобо ўз ҳаракатлари, сўзи билан айтиб бўлмайдиган кечинмаларни кўрсатади. Ҳайдар ота Асрор бобога шундай маслаҳат беради: «Ёдғорбойдан хат келмай турган бўлса, кампирини шунаقا овунтириб турганинг ҳам тузук... келиб қолар». Асрорқул бу гапга жавоб бермайди. Кампирини-ку овутиб юрибди, лекин унинг ўзи-чи? Унинг дардини ким енгиллаштиради. «Асрор қул узоқдаги кўм-кўк адирларга соя солиб турган оппоқ бу-

¹⁰ «Бадиий ижод ҳақида», Тошкент, Ўззадабийнашр, 1960, 99-бет.

лут парчаларига қараб жим қолди; анчадан кейин чилим солиб чекди». Дарҳақиқат, бу сўёзиз ҳолат чоннинг бутун кечинмаларини ҳар қандай сўздан кўра ёрқинроқ кўрсатади.

Ота яна савол беришга мажбур бўлади: «— Қанчадан бери хат келмайди? — деди Ҳайдар ота.

— Анчадан бери».

Асрор бобо ичидаги дардини айтмаса бўлмайди, ким биландир, айниқса, шундай яқин дўсти бўлган Ҳайдар ота билан дардлашиши керак. Лекин шу гапни овоз чиқариб айтиш қанчалик оғир. «Ҳайдар ота ер остидан унинг юзига қаради: назарида Асрорқул яна ҳам қорайган ва ҳозир вужудидан тутун чиқиб кетаётгандай кўриниди». Ҳайдар ота уни юпатмоқчи бўлиб: «— Келиб қолар, дўстим, ҳар хил хаёлларга борма», деган сўзларининг таъсири бўлмадигина эмас, балки Асрор бобога сохтароқ бўлиб туюлди, «Асрорқулнинг кўз атрофи қизариб, юзида сохта табассум акс этди». Энди айтмаса бўлмади. Айтди. Ҳайдар ота: «— Қишлоқда эшитган эдим, лекин ишонмаган эдим. Шу аниқми?» — деди. «Асрорқул жавоб бермай, қошини силади». Дарвоқе, Асрорқул қандай қилиб бу хабарнинг аниқ ё аниқ эмаслигини тасдиқлаши мумкин.

Ёзувчи қаҳрамон қалбини, унинг кўксисида туғилиши мумкин бўлган кечинмаларни яхши билади. Биладигина эмас, шуни қандай қилиб намойиш қилишини ҳам ҳис қиласди. Бунинг натижасида айрим гапларида, қисқа савол-жавобларида, ташки ҳаракатларида қаҳрамонлар ўзларини билдирадилар, юракларини ўқувчига очадилар. Ҳайдар ота «Шу аниқми?» деб фронтдан келган Абдумажиддан ҳам сўраган. «Абдумажид унинг саволига жавоб бериш ўрнига гапни бошқа томонга бурди». Бу ерда Ҳайдар отадан ҳам хафа бўлиш ноўрин. Чунки у саволи билан фожиани аниқламоқчи, билмоқчи эмас, балки қора хатда ёзилган гаплар англашилмовчиликдир, демоқчи.

Асрор бобо Ёдгорбекдан келган қора хатни ҳаммадан аввал билган. Лекин у «Нега ўғлимдан келган хатни ўқиб бермайсиз», деб жанжал қилиб юрган хотинидан бу нарсани яширишни маъқул кўради. Хотини йиглаб, Асрор бобога тинчлик бермайди. Шунда Асрор бобо дўқ уради, ҳазилга олади, шароитни тушунтирмоқчи бўлади. Ниҳоят бўлмагач, кампирга таъна қиласди: «На ўзингга қарайсан, на уйга. Чироғнинг шишасини қара. Қишлоқда ҳеч кимнинг уйида пашша йўқ, бизникида кечаси ҳам бурун талашади». Асрор бобо шундай ҳазил-хузул қилгани, фронтдаги шароитни ўзича изоҳлагани билан ҳам ўзини тута олмайди.

Асрорқул образида фарзандидан жудо бўлган, лекин бу мусибат алангасини қайноқ ҳаётга аралашиш, ижтимоий фойдали меҳнат қилиш билан пасайтиришга, яқин кишиларнинг юрагидаги дардни енгиллатишга ҳаракат қилган ажойиб совет кишиси гавдаланади.

Асрорқулнинг гаплари ҳар доим ҳам унинг кечинмалари билан уйғун муносабатда эмас. Ўқувчи аввалига Асрорқул фарзандининг нобуд бўлганини билмайди. Лекин унинг ўзини тувиши, пинҳоний эзилиши ўқувчини нимагадир тайёрлаб боради. Кейинчалик эса Асрорқулнинг бу ҳолати ўғлидан айрилганлиги туфайли эканлиги маълум бўлади. Чидам ва матонат Асрор бобога мамлакат ва ҳалқ бошига катта мусибат тушган бир пайтда фақат ўғлининг ташвиши билан яшашга йўл бермайди. Ўғли ҳалок бўлганини кампир ҳам эшитади. Энди у ҳам Асрорқул ҳолатига тушади. У бу шум хабарни Асрорқулдан яширишни маъқул кўради. Кампирнинг юраги алам билан тўлади. Энди унинг гаплари ўзгариб, бошқача характер касб этади:

«Кампир, дока рўмолининг учини лабига босиб, ерга қаради ва секин:

- Абдумажидлар келди,— деди.
- Нима гап?
- Ўртоғингизга айтманг...
- Нимани?

Кампир товуш чиқармай куйиниб йиғлади».

Ҳайдар ота жавоб ололмаслигини билди. Кампир ўғлиниң ўлганини қандай қилиб айтсин.

Асрорқул келганда, кампир ундан ўз ҳолатини яширишга ҳаракат қиласди.

«Энди у одатдагидан чаққонроқ ҳаракат қиласар ва мумкин қадар сўзлашга тиришар эди». Асрорқул унинг бу ҳолатига разм солиб:

«Э, қўзичогим, яна йиғлабсиз-да», дейди. Кампир боркучини ишлатиб, ўзини тувишга ҳаракат қиласди, кўзига келтган ёшини ўтиннинг тутунидан деб баҳона қиласди. Ахир гап тоға олмагач, чолга ёпишади: «Мунча қурт-қурт қилиб чайнайсиз!» — дейди у.

* * *

*

Қаҳрамон нутқида аҳён-аҳёнда учрайдиган нотабиийлик, луқмаларнинг ўринсизлиги, баъзан образни сунъийлаштиришга олиб келади. Автор қаҳрамонларни зўрма-зўраки га-

пиртиради. Бу нарса «Қўшчинор чироқлари» романининг охириги бобларида айниқса сезилади.

Асадаги Үрмонжон Аҳмедов, Бўтабой ва бошқа қатор образлар ёзувчининг катта муваффақияти. Лекин бу образларнинг янада яхши чиқишига ҳалал бериб турган нарса уларнинг баъзи-баъзида, «чиройли ва равон» гапиришларидир. Уларнинг нутқларига, диалог ва монологларига автор катта ғоявий вазифани юклайди, лекин улар ўз характерларига хос бўлмаган ҳолда автор ғояларини иллюстрация қилишга мажбур бўладилар. Бундай камчилик баъзан Сидиқжон образини яратишда ҳам учрайди.

Мана, Сидиқжон мажлисга тайёргарлик кўрмоқда, у колхоз аъзолигига ўтмоқчи:

— Қани гапиринг,— деди Иброҳимов.

... — Нима дейман?... Мен илгари колхоз деганда одамлар кўплашиб ишлайдио, ҳосилни бўлишиб олади, колхоз шу деб ўйлар эдим. Йўқ, колхоз бошқача бўлар экан...

— Қанақа бўлар экан?— деди Үрмонжон.

— Колхозда одам ўз қадрини билиши керак. Мен умримда гапирган эмасман... кечирасизлар.

Сидиқжон бошқа сўз тополмай қолгандан кейин Иброҳимов «ўтиринг» деб ишора қилди».

Үқувчи Сидиқжоннинг қисқа, лўнда гаплари орқали унинг онги, дунёқараши, колхоз ҳақидаги тушунчаларини билиб олади. Лекин ёзувчи ўқувчига ишонмайди, Сидиқжонни кўп гапириради, Сидиқжон мажлисдан олдин Канизак билан Амзират кампирга ақли кўп нарсага етадиган бўлиб қолганини, инсон қадри нимада эканини энди тушуна бошлаганини кўрсатадиган узундан-узоқ мулоҳазаларини билдиради. Сидиқжон тилидан берилган бу мулоҳазалар, биринчидан, ортиқча, чунки Сидиқжоннинг ўсиши бусиз ҳам воқеалар ривожида етарли далилланган, иккинчидан, Сидиқжон бундай узундан-узоқ, силлиқ гапирмайди. Бундай гапира олмаслиги унинг камчилиги эмас. Образ мантиқи шуни талаб қиласди. Шундай қилиб, ёзувчининг Сидиқжонга ортиқча нагрузка юклагани билиниб қолади.

Абдулла Қаҳҳор асадар автор фикрларининг, ниятларининг лоп этиб билиниб қолмаслиги ҳақида шундай деган эди: «Ҳикоянинг (яъни асарнинг — М. С.) идеясини воқеадан ажратиш мумкин эмас. Ёзувчи истаган бир воқеасини олиб, ташвиқ қилмоқчи бўлган идеясини бирон персонаж тилидан айттирса ёки қандай бўлмасин муносабат топиб, ҳикоянинг бирон бўш жойига қистириб кетса, эффект бўлмайди. Ундай ҳикоя ҳикоя ҳам эмас. Ташвиқ қилинмоқчи бўлган идея воқеаѓа сингдирилиши ва ҳикояни ўқиган киши ёзувчининг

њиятини билмаган ҳолда ўзи ёзувчи кўзда тутган фикр-га келиши керак. Ёзувчининг усталиги, ҳикоянинг кучи ҳамшунда. Шундай бўлгандан кейин воқеанинг типик бўлиши ҳал қилувчи аҳамиятга эга»¹¹.

Баъзан А. Қаҳҳор ижодида — унинг дастлабки ҳикояларида бунга амал қилинмаганлиги кўзга ташланиб қолади. Масалан: «Мастон» ҳикоясида ёзувчи айтмоқчи бўлган фикрини, гапини Maston образига юклайди. Авторнинг фоясини очиқдан-очиқ айтишини унинг зиммасига ташлайди.

Ёзувчи баъзан ўз фикрини персонажлар хаёлидан, қўнглидан ўтган гап сифатида ҳам берар экан, бари бир, билиниб қолади, унинг таъсир кучи бўлмайди.

Ёзувчи «Хотинлар» ҳикоясида хотин-қизларнинг совет даврида беқиёс даражада ўстанликларини тасвирлашни мақсад қилиб олган эди. Асарда тилга олинган воқеа, образлар системаси (Собирахон ва унинг ўртоқларининг гап-сўзлари, меҳнатга бўлган муносабатлари, фикрлаш даражалари, дунёқараши) мана шу ғояни ўтказишга қаратилган. Ҳикояда тасвирланган воқеанинг ўзига хос комментатори қилиб ўтмишни, хотин-қизлар ҳаётини, ҳуқуқ ва муносабатларини билган одамнинг — Асқар отанинг олиниши ҳам бежиз эмас. Унинг қарашлари ҳам асарда маълум мақсадга бўйсундирилган. Асқар ота совет аёлларининг бутунлай янгича онг, янгича дунёқарашга эга эканлиги, уларда «қандайдир, бир ички дард бор»лигини ўз кўнглидан ўтказади. Бу нарса, бир томондан, муайян воқеа ва образлар тасвирига бирор янгилек олиб кирмаса, иккинчи томондан, бу «ўйларнинг» Асқар ота кўнглидан ўтиши мумкин бўлмаган бир ҳолдек кўринади. Бошқача қилиб айтганда, бу кечинмалар Асқар отага хос бўлмаган шаклда берилган. Шунинг учун ҳам ёзувчи «Асқар ота шу сўзларни кўнгилдан ўтказади...» дер экан, ўқувчи бунга ишонмайди, бу гапларнинг зўрма-зўракилиги, ортиқчалиги сезилиб қолади. Дарвоқе, А. С. Макаренко айтганидек; «Бизда кўп кишилар автор айтмоқчи бўлган гапни қаҳрамонлар гапирса, қизиқроқ бўлади, деб ўйлашади. Бу хато. Автор айтиши лозим бўлган гапни қаҳрамонлардан биронрасига топшириш ярамайди. Шундай қилинган тақдирда қаҳрамонлар тузсиз бўлиб қолади, авторнинг жарчисига айланади»¹².

«Синчалакда» А. Қаҳҳор қаҳрамонларни кўп гапиртирмайди. Гапиртирганда ҳам қисқа савол-жавоб билан чега-

¹¹ А. Қаҳҳор. Бадий очерк тўғрисида, «Ўзбекистон эдабиёти ва санъати», 1940, 6-сон, 127-бет.

¹² А. Қаҳҳор. Бадий очерк тўғрисида, «Ўзбекистон адабиёти ва санъати», 1940, 6-сон, 127-бет.

раланади. Шунинг учун бўлса керак, айрим ўринларда персонажлар узундан-узоқ гапирав эканлар, ўқувчида ишонч-сизлик туғдиради. Масалан, мажлисда Ойниса исмли колхозчи хотин-қизларга бўлган феодалларча муносабатнинг айрим кўринишларини танқид қиласди. У аёл кишини ҳурмат қилиш амалда оғир жисмоний меҳнатни енгиллатиш, хотин-қизларга яхши шароит яратиш билан боғлиқ эканини кўрсатади. Ойнисанинг талаби ҳақли, лекин ёзувчи бу нутқни Ойниса орқали бериб, уни индивидуаллаштиришга ҳар қанча ҳаракат қилмасин, барибир, ўқувчи авторнинг бундан кузатган мақсадини сезиб туради. Шунингдек, Саида ҳам бир неча марта ёзувчининг «зўри», билан гапиради. Гапирганда ҳам шаблонлашиб кетган гапларни такрорлади.

Қаландаров жиянини танқид қилгани учун Саидадан хифза бўлади. Кичкинагина қиз Қаландаровга орқа қилиб бўлса керак, албатта, бемазалик қиласди, ўқитувчиларни менси-майди. «Сақич чайнаса чайнагандир қиз бола, лекин бошқасидан хабарим йўқ!», — деди Қаландаров. Шунда Саида: «Ҳамма иллат шунда! Кўп ота-оналар мактабда болалари нима қилиб юрганидан, қанақа ўқиётганидан бехабар, ўқитувчи хабар бергани, гаплашгани келса ота «онасиға айт» деди, она отасига ҳавола қиласди — иккоби қулоқ солмайди». Бу гап тўғри. Мактаб, ўқиш, бола тарбияси ҳақида гап кетар экан, шу фикр, албатта, айтилади. Саида ҳам бу ўринда янги гап айтмайди.

* * *

Персонаж нутқида мақоллардан, фразеологик иборалардан фойдаланиш айниқса катта аҳамият касб этади. «Муно-фика» даги Низомиддинов — тутуриқсиз, лаганбардор, эзма бир одам. Мажлисда ўтирганлар унинг гапидан зерикишади, тез-тез луқма ташлаб, айтилган гапларни қайтармасдан, тезроқ «конкрет фактларга ўтинг», деб талаб қилишади. «Утаман, албатта, ўтаман конкрет фактларга,— деди Низомиддинов материалларни тез-тез варақлаб. — Сабр қилинг-да, гўшт суяксиз бўлмайди...». Бу охирги гапнинг муайян шароитда ўринсизлигини сезиш қийин эмас. Низомиддинов бу ибора билан ўзини-ўзи фош этади. У гап-сўзларининг тутуриқсизлигини оқлар экан, ўзи ҳам уларда маза-матра йўқлигини истар-истамас тан олади. Лекин буларнинг ҳаммаси — масаләнинг бир томони. Иккинчи томони шундаки, ҳалқ мақоллари ва иборалари одатда сермаъно ва сербўёқ бўлади. Уларда кўпинча қандайдир яширин маъно ётади. Ана шундай яширин маъно бу ўринда ҳам бирдан лоп этиб, ловуллаб, Ни-

Зомиддиновнинг бутун қиёфасини дафъатан ёритиб юборади. «Гўшт сұяксиз бўлмайди» ибораси ҳаёт яхши кишилардан-тина иборат эмас, дегандек, Низомиддиновнинг лаганбардорлиги, тутуриқсизлиги ва эзмалигига шама қилади.

Зуннунхўжа қизининг Сидиқжон билан учрашиб юрганини эшитиб, уйдагилар кутганидек, ғазабланмайди, балки қизини Сидиқжонга беришга розилик билдиради ва бу қарорини шундай асослайди: «Сидиқжон безот, Сидиқжон гадобачча... тўғри, лекин замон шударники бўлса нима дейсан? Булар кеча оёғингни босган эди, бугун кўкрагингга оёқ босиб турибди, эртага бўғзингга оёқ қўяди. Ўласан! Жон керакми? Жон керак бўлса, ўлимга чап бериш пайдан бўл». Зуннунхўжа ўз сўзини «Замон сенга боқмаса, сен замонга боқ», деб тугатади. Бу мақол муайян шароитдаги воқеага — қизини эрга бериш воқеасигагина тааллуқли эмас. Бу мақолда Зуннунхўжа ҳаётининг фалсафаси ифодаланади. У бундан кейин ҳам шу қабилда иш тутади ва шуни хотинига тушунтироқчи бўлади. Хотини бўлса, давлатини ҳимоя қилишдан бошқани ўйламайди. Лекин буни сақлаб қолиш йўлини фақат Зуннунхўжа яхши билади.

Айрим ўринларда мақоллар персонажнинг воқеага бўлган муносабатини билдириш учун хизмат қилади. Сидиқжон Зуннунхўжалар оиласи билан орани очиқ қилиб, қишлоққа қайтади. Зуннунхўжа замон Сидиқжонларга боққанини билади, усиз ер-сувларини сақлаб қололмаслигига, хароб бўлишига ақли етади ва нима бўлса ҳам уни қайтаришга ҳаракат қилади. Хадича хола ўғлининг Зуннунхўжа уйнга қайтиш-қайтмаслигини билмоқчи бўлиб, ундан гап сўрайди. Сидиқжон бу ҳақда кўп гапиришни ўринисиз деб билади ва «— Кўр ҳассасини бир марта йўқотади!» — деб жавоб беради. Бу билан шу масалага иккинчи марта қайтишга ўрин қолмайди.

Бу мақолнинг муайян шароитда қўлланиши қаҳрамон қарорининг фақат қатъийлигини билдирибгина қўймайди, балки ўз ҳатосини ҳам, гуноҳини ҳам, омилигини ҳам бўйнига олганини билдиради. Сидиқжоннинг янги ҳаётга қадам қўйиши осонликача бўлмайди. Тўғри, унинг кўзи кеч очилган эди. Шунинг учун ҳам колхоз қуриш йўлида анчагина қийинчиликларни енгиб ўтганлар Сидиқжонга дастлаб унча рўйхуш бермайдилар. Бу нарса Сидиқжонга оғир ботади. Шунда Хадича хола: «Элдан қолгунча эрдан қолган яхшироқ деб шуни айтса керак-да», дейди. Хадича хола Сидиқжоннинг шу ҳолатига ниҳоятда мос мақол билан унга панд-насиҳат бермоқчи, йўл кўрсатмоқчи бўлади. У ўғлига ачинади, лекин бу мақолни айтмаслигининг иложи йўқ. У ўғлининг кўзини очиши, унинг олдида анча қийинчиликлар борлигига имо қили-

ши керак. Шўнинг учун ҳам у халқ ҳаёти тажрибасининг маҳсулни ўлароқ вужудга келган мақол билан иккинчи марта ҳасса йўқотмасликнинг синовдан ўтган ягона йўлини кўрсатади.

Абдулла Қаҳҳор асарларида мақоллар одатда кўп учрайди. Мақоллар-автор нутқида ҳам, персонажлар нутқида ҳам ўринли ишлатилган. Бундай мақоллар салмоқли фикрларни аниқ ифодалашга хизмат қиласиди. Мақолларни ким қўллаши — авторнинг ўзими ёки бирор персонажми — бу асарда олға сурилган ғоя ва уни ифодалаш учун танланган форма билан белгиланади.

* * *

Абдулла Қаҳҳор асарларини халққа ниҳоятда манзур ва яқин қилган омиллардан бири унинг тили экани ҳақида кўп гапирилади. Ёзувчи фикрларининг ниҳоятда қўйма шаклда ифодаланиши образ ва воқеаларнинг ниҳоятда қабартма ва ёрқин тасвирланиши автор ва персонаж нутқларининг гармоник бирлиги натижасидир. Автор нутқи ва персонаж нутқининг ўзаро боғланиш йўллари ҳам, бундан кузатилган мақсад ҳам хилма-хилдир. Бу йўлларнинг ҳаммаси асар асосига олинган воқеанинг, образларнинг жонли, таъсирили чиқишига силиб келади.

Автор нутқининг вазифаси ҳар бир асар характеристидан келиб чиқади. Ёзувчи бир ўринда ўз номидан — ҳикоячи номидан тўппа-тўғри ўқувчига мурожаат қиласиди, иккинчи ўринда айтмоқчи бўлган фикрини бирор персонажга юклайди, тасвирлаётган воқеани шу воқеа иштирокчиси айтиши мумкин бўлган бир шаклда беради.

Бадий асарларда энг кўп учрайдиган бу сўнгги приёмнинг ёрқин намуналарини А. Қаҳҳорнинг 30-йилларда ёзилган ҳикояларида кўриш мумкин. «Қизлар», «Майиз емаган хотин», «Ўғри» ва бошқа қатор ҳикояларда ёзувчи ўз персонажларининг қиёфасига киради ва улар тушунган, тушуниши, гапириши мумкин бўлган тарзда тасвирлайди.

Қобил бобонинг («Ўғри») биринчи учраган одами — унга ёрдам бериши мумкин бўлган шахс — элликбоши эди. У бобонинг ҳўқизини топиб беришга ваъда беради. «Бу худояллақағур шунчалик қилгандан кейин бир нима берни лозим-да, текинга мушук офтобга чиқмайди». Қобил бобонинг мулоҳазалари тарзида айтилган бу гаплар аслида ёзувчиники. А. Қаҳҳор узундан-узоқ тушунтиришларнинг ўрнини босадиган бир мақол билан ўз қаҳрамонининг психологиясини, даврнинг моҳиятини очишга эришади.

Қобил бобонинг иккинчи учраган одами — Амин.

Ү элликбошидан юқори, демак, иштаҳаси ҳам каттароқ жумдор. «Қуруқ қошиқ оғиз йиртади. Аминга қанча пул олиб борса бўлади? Берганга битта ҳам кўп, олганга ўнта ҳам оз». Бу ибораларда Аминнинг ажойиб характеристика-сигина эмас, балки, бир томондан, пораҳўр ва муттаҳам аминлар, иккинchi томондан, ноҳор ва қашшоқ Қобил боболарнинг умумлаштирма қиёфалари чизилади, улар ўртасида-ги конфликтга шама қилинади.

Ниҳоят, бобо учрашган учинчι амалдор — Пристав бўлди. «Маълум бўлдики, уни бегим дегунча кишининг бели синар экан». Шундай қилиб, чол юқори поғонага ёрдам сўраб боргани сари аста-секин бор йўғидан ажраб боради.

Келтирилган парчадаги ҳамма гаплар ёзувчиники. Лекин бу мулоҳазаларни, мақолларни баён қилиш формаси Қобил бобонинг худди ўзиникидек. Ёзувчи Қобил бобо қиёфасига, унинг фикрлаш формасига кириб, фақат Қобил бобони эмас, балки Қобил боболарни кўрсатади. Уларнинг соддалигидан ҳам кулади, ҳам афсусланади. Бу сўзлар Қобил бобо тилидангина гапиририлганда, уларнинг умумлаштириш кучи шунчалик таъсирили бўлмаслиги мумкин эди.

Ёзувчи асар асосига олинган воқеани бошдан-оёқ ўзи хикоя қиласар экан, айрим ҳолларда персонаж гапларини ҳам кептиради. Бу кўп ўринда персонаж ҳаётидаги муҳим воқеалар билан боғлиқ бўлади. Ёзувчи персонажларнинг ўзаро суҳбатларини ўз тили билан баён этар экан, бу суҳбатнинг сўзловчи ё тингловчи учун муҳим бўлган моментини ажратиб, персонажни «гапириради».

Сотиболди («Бемор») хўжайнининг олдига арзга боради, аммо у арздан муддаоси нима эканини аниқ билмайди. Арзга борган Сотиболдининг аниқ мақсади бўлмаса ҳам, у ўзининг моддий аҳволининг оғирлигини айтишни, бойдан бирорта маъноли маслаҳат олишни кўзлар эди. Аммо Абдуғанибий Сотиболдининг дардларига шерик бўлган бир қиёфада: «Девонаий Баҳоваддинга ҳеч нарса кўтардингми? Fav sul-аъзамга-чи?» деб, Сотиболдига чиқим қилиш йўлини кўрсатади.

Лекин ёзувчи қаҳрамонларнинг нутқлари орқали маълум бўлган нарсаларни баъзан-баъзан такрорлар экан, ўқувчи дидига ҳар доим ҳам ишона бермаслигини ошкор қилиб қўяди.

Қаландаров колхозини, ҳар бир колхозчини яхши билади. Мана, у шаҳарга ўқишга юбориладиган колхозчиларнинг Саида томонидан тайёрланган рўйхатини ўқимоқда.

«— Шафоат Каримова! Ҳимм... Бу хотин эрдан чиқсан, уч яшар ўғилчаси бор. Үғлини кимга ташлаб кетади?

— Онаси бор экан.

— Онаси дардчилроқ. Ҳимм... Нусрат Бадалбоева... Үнйилликни яхши битирган эмас, отаси домлани урмоқчи бўлиб, баҳо қўйдирган. Азиза Тиллаева... онаси жуда қарив қолган, қишида тўқсон ёшлигини тақдирлаб, кичкина тўй қилиб бердик... Онаси юбормас. Ҳўш, Лутфи Иноятова... яхши! Ҳожар Турсунова... бир қамчи йўрғаси бор. Буни қўя туринг, бизнинг колхозчилар жуда ҳамиятили, бирон кор-ҳол бўлмасин тағин. Нури Шодиева... жиндай буқори бор, лекин ўзи зеҳни ўтқир қиз. Мехри... буни колхоздан ҳайдаш керак, бошқаларга ибрат бўлсин! Раъно Жалилова... байт ёзади... Яхши!»

Қаландаров бу характеристикиаси билан колхозчиларни ниҳоятда яхши билишини кўрсатади. Бу ерда бирор изоҳ ортиқча. Лекин шунга қарамасдан, ёзувчи буни умумлаштиришга ҳаракат қиласди ва Қаландаровнинг фазилатларини таъкидлайди: «У ҳамманинг касб-корини, қандай ишлашини, оиласини, феъл-авторинигина эмас, дард-ҳасратини, орзу-армонини, қобилиятини, заиф томонларини ҳам жуда яхши, худди ўзи кўтариб катта қилгандай билар эди». Бу ҳол ёзувчининг ўқувчига ишончсизроқ қараши натижасида пайдо бўлади. Бундай мисоллар Абдулла Қаҳҳор ижодида кам учрайди, албатта.

Маълумки, инсон нутқи фақат мазмуни билан эмас, балки интонацияси билан ҳам диққатга сазовор. Ёзувчи одатда персонажнинг гапини таҳлил қиласди, унинг интонациясини, оҳангини белгилайди. Абдулла Қаҳҳор ўз асарларида персонаж нутқиин келтириш билан бирга унинг гапларини таҳлил қилиш ва изоҳлашга ҳам алоҳида эътибор беради.

Шарофат Сидиқжонни ўзи танлайди. Уларнинг оила қуришлари шахсий ташаббуслари туфайли бўлади. Лекин Шарофат билан Сидиқжоннинг ҳаётлари ғурбатда ўтади. Шарофатнинг ота-онасидан эшитмаган гапи қолмайди. Онаси бир куни: «Ҳазилми-чинми, боланг эринингга ўхшамайди»,— дейди. Ёзувчи бу гапнинг Шарофатга ўтказган таъсир кучини таҳлил қилиб ўлтирамай: «Хотин кишининг юрагидан фарзанд дого кетса кетадики, бундай гапнинг алами кетмайди»,— деб қўя қолади. Қизифи шундаки, Шарофат бу гапни туққан онасидан эшитади. Бу она-боланинг муносабатини кўрсатувчи ёрқин фактдир. Ёзувчи бу билан мана шу оилада ичкуёв бўлиб туришнинг нақадар мashaққатли эканини кўрсатмоқчи бўлади. У воқеаларга ўз муносабатини билдирад экан, кўпинча шу воқеада иштирок этган ёки шу муҳитда тарбияланган одам айтиши мумкин бўлган оҳангда гапиради. Унинг фикри бўлиб ўтган воқеага, унинг ўрнига, шароитига қараб,

сирилийкни, тушунмовчиликни кучайтиришга, воқеанинг аҳамиятини таъкидлашга қаратилади.

Шарофат ва Сидиқжон қизиқ бир вазиятда танишадилар Товуғини қидириб, қўшни ҳовлига девордан тушган Шарофат Сидиқжонни кўриб қолади. Кейинчалик у бир неча бор девор ошади. Оқибатда, улар турмуш қуришга мажбур бўлишади. «Сидиқжон — қарол бола, бу — ўзига тўқ бир одамнинг қизи, икки орани ажратиб турган шундай бир тоғни бир зумда талқон қилиб ташлайдиган «калланима бало» бир куч бор эканини ким билиби!» Ёзувчи бу гап билан персонажлар ҳаракатларини маъқуллагандек бўлса-да, аслида улар устидан кулади. Шарофат Сидиқжоннинг ёнига бир неча бор чиқади. «Хавф хатарга юзма-юз келиб, унга чап бериш қандай яхши».

«Анор»да Туробжон билан хотини ўртасидаги конфликт аста-секин ниҳоясига етиб боради. У эрининг жаҳли чиқиб келаётганини кўриб, бир гапдан қолмайди. У эрининг анор олиши мумкин эканлигини исботлашга ҳаракат қиласди.

«— Ўша асалнинг пулига анор ҳам берар эди. Берар эди! — деди Туробжон заҳарханда қилиб, — анор олмай асал слдим!

— Албатта берар эди! Албатта анор олмай, асал олгансиз!»

Ниҳоят гапга ёзувчи аралашиб шундай пайтда одатда нима бўлиши мумкинлиги ҳақида гапиради: «Мана шундай вақтларда тил қотиб оғизда айланмай қолади, мабодо айланса, муштнинг хизматини қиласди». Бу гап сигнал ролини ўйнайди. Туробжон билан хотини ўртасидаги гап тўхтамайди, балки бир-бирларининг асабларига тегадиган даражага етади. Ахири бўлмайди, Туробжон хотинини уради.

Персонаж сўзларини таҳлил қилиш, тўлдириш, аниқлаш масаласи ҳам А. Қаҳҳор асарларида аҳамиятли томонлардан биридир. Ёзувчи кузатилган мақсадга қараб турли формаларни қўллади. Бу персонаж нутқини қандай тушуниш, шароитни қай тариқа баҳолаш, гапирувчининг ҳолатини аниқлашга ёрдам беради. Чунки инсон нутқининг мазмуни гапнинг айтилиш формаси, айтuvчининг ҳолати, гапираётган гапнига муносабати билан бир бутун ҳолда қабул қилинади.

Туробжон билан хотини ўртасида келиб чиққан конфликт ривожланиб, кескинлашиб боради. «— Э, ҳой, анор олиб бермадимми? — деди Туробжон майнин товуш билан, аммо бу майин товушдан қўрқулиқ эди, — сира анор олиб келмадимми?». Туробжон гапларининг қай оҳангда айтилгани туғилиб келаётган конфликтни ечимга тайёрлайди. Туробжон хотинига анор олиб берганини икки марта қайтаради. Биринчи марта

Туробжон хотинига умуман анор олиб берганлигини эслатмоқчи, иккинчи марта гап оҳанги қескинлашви билан бирга умуман қачондир, анор олиб берган эмас, балки яқинда, хотини ҳомиладор бўлганида олиб келганлигини эслатмоқчи. Лекин Туробжоннинг хотини бир оғиз сўз билан «Йўқ» деб уни ёлғончига чиқарди. Туробжон бирдан ҳеч нарса деяолмай қолади, унинг боши ғовлаб, кўзи тинади. Шунда ҳам Туробжон хотинига қарши бирор қўпол ҳаракат қилимайди, балки унга анор олиб келган кунини аниқлайди («Ўтган бозор куни еган анорингни ўйнашинг олиб келганмиди?!»). Шундай қилиб, ёзувчи персонажларнинг гапларини таҳлил қилиш орқали уларнинг кайфиятида рўй берастган ўзгаришларни кўрсатишга муваффақ бўлади.

Сидиқжоннинг дўстлари унинг ҳаммадан орқада қолиб кетганидан хафа бўлибгина қолмай, балки ундан ниҳоятда норозидирлар. Улар Сидиқжонга бўлган ҳақиқий муносабатларини яширмайдилар. Ўрмонжон «Сидиқжонни кўриб ҳийла ўтириди, нимагадир ғаши келаётгандай ундан киноюомиз ҳолаҳвол сўради-да, «бой бўлиб болтанг йўқ, гадой бўлиб халтанг йўқ» деб заҳарханда қилди».

Сидиқжон колхозга киришга қарор қилади. Оиласи бундан норози. Лекин қайнатаси аввалига ўз муносабатини яшириб четда туради, аммо кейинроқ бунга аралашади, аралашмаса бўлмайди, улар орасидаги муносабат мураккаблашади. Зуннунхўжа хотинига, қизига пўписа қилиб дўқ уради, «сўнгра Сидиқжондан ўпкалаб, майин товуш билан гап бошлиди...». Гап оҳангининг белгиланиши Зуннунхўжа кайфиятига контраст. Оила аъзоларини койиб турган одам Сидиқжонга майин гапирав экан, бу билан, биринчидан, Сидиқжонни ҳурмат қилишини эмас, балки унга ятинишга мажбур бўлганини таъкидламоқчи ва иккинчидан, катта суҳбатга отланганини кўрсатмоқчи бўлади. Кўпни кўрган, катта ёшли, улуғ сифат одамнинг насиҳатга тайёрлангани кўриниб туради. Аввалига Сидиқжоннинг ҳам, Зуннунхўжанинг ҳам гаплари шу майин оҳангда боради, лекин кейинчалик уларнинг товушлари кўтарилиб кетади. Уларнинг ҳақиқий кечинмаларига ниқоб бўлган «майнлик» энди ўз ролини ўтолмай қолади.

Сидиқжон колхозга киришга қарор қилиб, Ўрмонжон ёнига боради. «— Энди сизнинг этагингизни ушлаганим ушлаган, Ўрмонжон ака,— деб кўзига ёш олгандай бўлади. Ўрмонжон унга бирон жавоб қилишни хоҳламагандай, ланжроқ товуш билан:— Менинг этагим сенгә нима қилиб берар эди, ўз билганингдан қолма,— деди». Ланжлигининг сабаби шундаки, Ўрмонжон, биринчидан, Сидиқжоннинг ақли кеч кир-

танидан хафа бўлса, иккинчидан, унинг қарори қанчалик қатъийлигига ишонқирамайди.

Персонажларнинг гапларини кўп ўринда ёзувчининг ўзи изоҳлади. Туробжон хотинининг миннатларидан кейин ўзининг камбағал эканини яна бир бор бўйнига олишга мажбур бўлади. Шунда хотини жаҳл билан: «камбағалчилик ўлсин», — дейди. «Хотин бу гапни шикоят тарзида айтди, аммо Туробжон буни таъна деб тушунди». Персонаж нутқининг оҳангига шу даражада муҳимки, уни нотўғри «эшитиш», нотўғри ҳис қилиш эшитувчидаги бутунлай тескари кайфият уйғодади. Бу ўринда вазият шундай оғирки, қаҳрамонларнинг ҳар бири ўз асабини босиб, ўйлаб кўра олмайди — улар бир-бirlарига қилган таъналари ниҳоятда асоссиз эканини билолмайдилар. Туробжон, қандай бўлмасин, чорасиз — анор олиб беришга қурби етмайди. Эрталабдан кечгача меҳнат қиласидаги йигит хотинига икки дона анор олиб беролмаса, бу қандай замона экан!?. Ёзувчи китобхонни ҳамма йўллар билан шу фикрга олиб келади.

Ёзувчи ўтмиш циклига кирган ҳикояларида қаҳрамонларнинг гапларини деярли тушунтиришсиз, уларнинг маъноси-ни таҳдил қилмасдан беради. Ўқувчи персонажнинг гапириш шароитидан, характеристидан, гапларни айтиш оҳангига айтилганларни қай маънода тушуниш керак эканини билиб олади. Лекин А. Қаҳҳорнинг аксарият асаларида, чунончи «Сароб»да ҳам, «Синчалак»да ҳам қаҳрамон сўзларига изоҳ берилади, уларнинг қайси маънода айтилганлиги таъкидланади.

Саидийнинг соддалигидан, уқувсизлигидан хафа бўлган Салимхон унга: «Ҳамма сизми? — деди. Салимхон ўз билан «наҳот ҳануз шундай муҳим одамларни қўлга олиш учун атрофға кўз-қулоқ бўлиб туришнинг зарур эканини англамасанг? Эй, гўдак, қачон пишасан!» демоқчи бўлди. Саидийнинг опаси билан қилган сұхбатида ҳам шундай ҳолни учратамиз. Саидийнинг бемор опаси зиқна бой Муродхўжа домла оиласига ортиқчалик қиласиди. Уни туртишади, камситишади, хўрлашади. Шундай воқеанинг устидан чиқиб қолган Саидий: «— Нима дейди? Сенга гапираётганмиди?» — деб сўрайди. Опаси: «— Йўқ, деди ва шу билан «Наҳот менга ёмон гапирса» демоқчи бўлади».

Қаландаров Саидага «— хўш, сизга қайси йўл билан ойлик тайин қилсан экан», дер экан, ёзувчи унинг бу сўзлари «сени кимнинг ҳисобига боқсан экан» дегандай бир оҳангда айтилганини қайд этади. Дарҳақиқат, Қаландаров Саидани қай йўл билан бўлмасин, камситмоқчи, ҳақоратламоқчи. Гап оҳангини кўрсатиш Қаландаров ҳолати билан боғланиб кетади.

* * *

Инсон кайфиятини, кечинмаларини кўрсатувчи ташқи белгилардан бири кулгидир. Кулгининг тури ниҳоятда кўп. А. Қаҳҳор асарларида кулги хилма-хил маънони ифодалаб, турли вазифаларни бажаради. Ёзувчи қаҳрамонларининг кулишидан ҳам катта мақсадни кўзда тутади. Маҳалла комиссиясининг раиси Мавлонқулов («Сароб») душманлар ишига тўсқинлик қила бошлайди. Лекин у терговчи Мирза Муҳиддиннинг ёрдами билан қамоқقا олинади. Терговчи Мирза Муҳиддин Мавлонқуловни кафилга олмоқчи бўлиб келганларга унинг «жиноят қонунлар мажмуасининг ҳамма моддаси билан айбланганини» айтар экан, кулиб қўяди. Дарвоқе, айтилган воқеанинг қаери кулгили? Аксинча, фожиавий эмасми? Лекин бу ўринсиз кулги терговчининг ҳақиқий баширасини жуда ўринли очиб ташлайди.

Муродхўжа домланинг якка-ю ягона арзандаси Сораҳон — бефаросат, тутириқсиз бир аёл. Бу унинг ҳар бир гапида, ҳаракатида, ўзини тутишида кўриниб туради. Ўқувчи унинг бу қилиқларига кўнишиб боради ва шундай бўлишига ишонади. Саидийнинг опаси эри ташлаб кетганидан кейин борадиган жойи бўлмагани учун Муродхўжа домланинг оиласига келишга мажбур бўлади. Қўзи ожиз, оёғи касал аёл супадан тушаман деб ийқилиб, районлар ичига юмалаб кетади. Буни кўрган Сораҳон: «вой, районларни худо урди», деб қичқиради. «— Нима экан у қоқилганим? Синдими», деб берилган саволга: «— Ҳа... обдаста. Жўмраги синди,— деди Сораҳон ва негадир қиқир-қиқир кула бошлади». Бундан ҳар хил хаёлга келиш мумкин — Сораҳоннинг эсига бирор нарса тушгандир, балки, аёл ийқилганда бирор ўнгайсиз ҳол юз бергандир. Лекин битта фикр аниқ — бу воқеада кулгили нарса йўқ. Бу кулгининг ўринсизлиги ўз-ўзидан кўриниб турибди. Лекин масаланинг бошқа томони ҳам бор. Ёзувчи Сораҳонни унда кулги ўйғотган воқеа устида ўйлатиб кўрмайди, чунки ўйлаш учун ҳам кишида озгина ақл-фаросат бўлиши керак. Ўйлаш, фикрлаш ҳаммага ҳам насиб бўладиган хусусият эмас — Абдулла Қаҳҳор бунга айрича аҳамият беради. Шундай қилиб, персонажларни кулдириш орқали ёзувчи уларга бўлган ўз муносабатини билдиради.

«Ўғри» ҳикоясидаги Амин — халқни эзиб, унинг бор-йўғини талаб, уйини хонавайрон қилган золимларнинг бири. Унинг ўзига хос индивидуал хусусиятлари ҳам бор. У ҳам бўлса, гапиравчига нисбатан тамоман ҳурматсизлиги, ўта кетган маданиятсизлигидир. Қобил бобонинг ҳўқизи билан бирга унинг келажакка, қора қозонни бир амаллаб қайнатиб

туришга бўлган умиди ҳам ўғирланган эди. Унинг қариган чоғида, қолган беш кунлик умрини ўтказиш, хор бўлмаслик умиди ўғирланган ҳўкизи билан барбод бўлади. Қобил бобо ҳўқизини топишга ёрдам бериши мумкин бўлган ҳамма одамларнинг олдига боради, ялинади-ёлборади, пора ҳам беради. У «бор-йўғим шу битта ҳўқиз эди», деб зорланганда, «Амин чинчалоғини иккинчи бўғинигача бурнига тиқиб кулади».

Аминнинг безбетлиги яна бир кичик штрих билан тўлдирилади. У Қобил бобони кўрган заҳоти кулади (бундан ўқувчи Амин чолнинг фожиасини билмагандир, деб ўйлаши ҳам мумкин), содир бўлган воқеани эшитгач, яна кулади. Бу кулгининг ўринсизлиги Аминга нисбатан нафрат уйғотади, камбағалнинг ҳар бир кўргилиги Аминнинг фойдаси экани англашилади. Демак, Аминнинг кулгиси ташки жиҳатдангина ўринсиздек бўлиб кўринади.

Асрор бобонинг хотини ўғлининг ўлганини эшитиб, нима бўлса ҳам, Асрор бобо қулоғига бу хабар етмаслигини ўйлади. Даставвал у ўзини билдириб қўймасликка ҳаракат қиласди. Асрор бобо: — «Э, қўзичогим, яна йиғлабсиз-да», — дейди, шунда «кампирнинг юзида кулгига ўҳшаган бир нима акс этди», лекин у дарров юзини буриб, иш билан банд бўлади. Кўнгли дард-ҳасратга тўлган кампирнинг кулишга ҳоли йўқ. Лекин мажбур. Шунинг учун юзида кулги эмас, кулгига ўҳшаган нарсани кўрсатишга ҳаракат қиласди. Бу эса вазият талабидан келиб чиқади.

Ўринсиз кулгини персонаж хулқ-автори билан боғлаш ёзувчининг «Хотинлар» ҳикоясида ҳам учрайди. Мамлакат ва халқ учун оғир бир пайтда кайф-сафо йўлига тушган, бўйни меҳнатга ёр бермайдиган, енгил табиат Ўринисонинг кулгиси унга нисбатан ўқувчида нафрат ҳиссини янада кучайтиради. Умри шаҳардан ўзгариб, пардоз-андоз билан қайтади. Собирахон: «буни кўриб «Нима қилди, томоғинг оғридими?» деса, «Эшик қисиб олди», деб хир-хир кулади. ҚўлидаFaффоржондан келган хат бор экан, нима дейишимни билмай, хатни қўлидан олдим. У ҳам индамади, ўқидим. Ўқисам... бечора Faффоржон! Шундай хат ёзибди, шундай гапларни ёзидики, кўзларимга ёш келди...». Уринисонинг бутун ҳаракати, хулқ-автори унинг кулгисига ўҳшаш совуқдир.

Абдулла Қаҳҳор асарларида айтилмоқчи бўлган фикр баъзан сўз орқали тўла ифодаланмайди, балки унинг ўрнини кулги бажаради ва фикр кулги билан якунланади. Кўринишдан тасодифий бўлган кулги остида катта мазмун ётади. Киши ўз ҳолатини, гапирувчига муносабатини баъзан кулги орқали ҳам билдиради. Бақоев («Адабиёт муаллимни») бошқа бир адабиёт муаллимидан аччиғланади: «Ҳакимов? Аҳмоқ

өдам! Үз устида ишламайди. Савол аломати ҳамма вақт «ми» дан кейин қўйилади десам, кулади».

Бу мисолдаги кулгига юклатилган вазифа катта. Бу кулги ўртоқ Бақоевни ҳам, унинг ҳамкасиб Ҳакимовни ҳам рўйрост кўрсатиб қўяди. Бақоевнинг тутуриқсизлиги уни таниган одамларга ҳам сир эмаслиги маълум бўлади.

Кулги, илжайиш баъзан кишиларнинг ҳақиқий кечинмаларини яшириш учун ниқоб вазифасини ўтайди. Мунисхондан рад жавобини олган Саидийнинг умидлари чил-парчин бўлади «баланд ердан боши билан тушгандай кўзига юлдузлар кўринади, аммо сирни бой бермасдан, Мунисхоннинг юзига қараб илжаяди.

«Сароб» нинг охирги бобларида Саидий кундан-кун тубанликка қароҳ кетаётганда, унинг ҳаракатлари, шу жумладан, кулгиси ҳам сунъий тус олади. У ўзини бирордан ҳимоя қилиш ёки ўзининг ҳақиқий кечинмаларини яшириш учун кулгидан ниқоб сифатида фойдаланади. Саидийнинг фақат ҳамфирлари ўртасидагина эмас, балки оиласида ҳам субути кета бошлайди. Оиладаги дилисиёҳлик унинг жонини олади. У қайнанасидан жуда қўрқади. Қайнанаси ҳар нарсани баҳона қилиб, Саидий билан жанжаллашиб туради. Шунинг учун ҳам у Саидий билан Сораҳон ўртасидаги дилисиёҳлик устига кириб қолганда, «Саидийнинг юраги шув этиб кетди: «Оббо, бу касофатнинг йиғлаб ўтирганини кўрмаса гўрга эди», деди ичиди ва бор кучини тўплаб, булбули гўёга илжайиб қаради». Саидий қайнанасидан шу қадар қўрқадики, ҳатто ўзининг кўп вақт ўринсиз илжайганини билмай ҳам қолади.

«Булбули гўё» яна бир куни жанжал устига кириб қолади. Саидий Сораҳоннинг нимага тўполон қилаётганини билиб улгурмаган ҳам эдик, эшикдан чойнак кўтариб кириб келган булбули гўёни кўриб қолади. «Нима эканини ҳали менга ҳам айтгани йўқ,— деди Саидий илжайиши ҳаракат қилиб».

Қаҳрамоннинг ҳар бир кулиши ё илжайиши ёзувчининг диққат эътиборини тортар экан, демак, бу кулгига бирор маъно, бирор жозиба, бирор сир ётади. Саидий мазкур ситуацияда ўзининг ўнгайсиз аҳволда қолганини илжайиш билан яширмоқчи, иложи бўлса, мавжуд ҳолатдаги ана шу ягона қуроли билан ўзини ҳимоя қўлмоқчи бўлади. Шунинг учун ҳам Саидийнинг илжайиши унинг сўз билан тушунтириш мумкин бўлмаган ҳолатини тушунтиради, изоҳлади.

Дарвоқе, адабиётдаги, яъни сўз санъатидаги сўз билан тушунтириш қийин бўлган ҳодисаларга келайлик. Инсон ҳаётida сўз воситаси билан тушунтириш ўз кечирмаларини сўз билан ифодалаш мумкин бўлмаган дақиқалар (масалан, йиғи, кулги ва ҳоказо) адабиётда ҳам шак-шубҳасиз акс эта-

ди. Ёзувчи қаҳрамондаги бу ҳолатнинг сабабларини таҳлил қилиши мумкин. Лекин бу йиги ёки кулгининг туб маъноси асосан контекстда очилади. Бўндай ҳолларда қаҳрамон кулгиси унинг чуқур кечинмаларини ифодаловчи сўздан кўра кучлироқ восита сифатида кўринади.

Яна «Сароб»га мурожаат этайлик. Саидийнинг ўз ғавфоси камдек бу оиласа унинг дардманд опаси ҳам келиб туришга мажбур бўлади. У бу уйда вақтинча эканлигини, тузалса, тез кетишини билдиради. «Қачонгача сенинг уйингда турман? Бир рўзғорга ўша рўзғорнинг ўз ғавфоси ҳам етади. Саидий кулди. У шу кулгиси билан «лозим келар экан битта эмас, ўнта опамни умр бўйи боқишига ҳам қудратим етади» демоқчи эди». Дарҳақиқат, ёзувчи уни гапиртирумасдан кулдириб қўя қолади. Чунки бу оиласа Саидийнинг бир кун ҳам тинчлиги йўқ-ку, тағин у опасига шароит яратадими?

Қаландаров — анча мураккаб шахс. Колхозга Саида партбюро секретари қилиб тайинлангач, асаби бузилади, ўзини оёқ ости қилинган, ҳурматсизланган деб билади. Саида Қаландаровга маслаҳат солиб: «Менга қаранг, Арслонбек ака, деди,— ҳозир хаёлимга бир нарса келиб қолди. Колхоз хўжалигини сиздан кўра яхшироқ биладиган одам йўқ, а?

Қаландаров лабини кулгидан аранг йигиштириб:

— Унча-мунча биламиз... деди».

Қаландаровнинг ҳолатини унинг юз ҳаракати билдириб қўяди. Ҳам мамнуният, «сен ҳам билиб қолибсан-ку» деган фикр, шу билан камтаринлик, фурур — ҳаммаси ифодаланади. Иккинчи бир ерда Саида Қаландаровни бюро аъзолигига киритмаслик тўғрисида унинг ўзи билан маслаҳатлашади. Саиданинг бундан кузатган мақсади бор. Қаландаров феълини тушуниб қолган Саида унинг кўнглига маъқул тушадиган йўл тутади:

« — Битта лекини бор, Арслонбек ака,— деди Саида,— сизни бирорга киргизмасликка биронта ҳам коммунист рози бўлмаса керак. Бу тўғрида ўзингиз айтасиз, ўзингизга ўзингиз отвод берасиз.

Қаландаров қаҳ-қаҳ уриб кулди.

— Хўп, хўп, ўзим айтаман!..»

Бу ерда ҳам қаҳрамоннинг кулгиси унинг ҳолатини узундан узоқ тасвирлаш ўрнига ўтади. Кўринишдан Қаландаров ўзига-ўзи отвод бериши керак бўлгани учун кулади. Лекин уни ниҳоят хурсанд қилган нарса бирор коммунист унинг бирорга кирмаслигига йўл қўймаслигини «душман»и Саида оғзидан эшитишдир.

Ёзувчи айрим ўринларда персонажларнинг ичидагулганлиги ҳақида гапиради. Бу қўпинча овоз чиқариб кулишни

шароит кўтармаслигини, шу билан персонажнинг мулоҳаза-кор эканини таъкидлашга имкон беради.

Колхозлаштириш вақтида бойларнинг мулклари мусодара қилинади. Колхоз раҳбарларининг тажрибаси етишмаслиги, кўнгилчанлиги, баъзи масалаларга танқидий қаролмаслиги сингари ҳоллар рўй беради.

Рўзимат, Қамбарави, Сафаров Мирҳомидхўжанинг уйини тинтуб қилишга келишади. Муғамбир бой кўп тадбирлар кўриб, комиссия аъзоларига таъсир кўрсатмоқчи бўлади. «Рўзиматга қараб ўзини сипоҳ тутишга тиришиб, қовоғини очмаган Қамбарави Мирҳомидхўжанинг сўзига жон-дили билан қулоқ солар экан, сипоҳийликни эсидан чиқариб қўйди, ҳатто Мирҳомидхўжага дилсўзлик вожидан чуқур уф тортди. Сафаров ичиде кулдию», ишида давом этди. Сафаров Қамбаравининг соддалигидан, ўз ролига ҳали тамоман киришиб кетолмаганидан кулди. Лекин кулгисини ошкор қилолмайди.

Кулгини яширишга мажбур бўлиш кўпроқ шароит билан, суҳбатдошларнинг муайян ҳолати билан ҳам боғланади. Колхозга бўлган муносабат орқали киши характери, дунё-қарashi, савияси, яққол кўринади. Колхоз нима эканлигини мутлақо тушуниб етмасдан, бирорлар сўзлари билан иш тутувчилар ҳам кўп бўлган. Тўлаган aka («Қўшчинор чироқлари») колхозга кириш ҳақида берган аризасини қайтариб олишга қарор қиласди. Бўлмаса нега ариза берган эдингиз, деган саволга: «Муҳиддин бирга кирайлик», деб қистайверганидан кейин юзидан ўтолмадим», деб жавоб беради. Тўлаган aka мана шу жавоби билан ўзини рўй-рост кўрсатди. Бу гапдан қулмасликнинг иложи йўқ. Ким нима деса ўшангага қараб иш тутган, ўзининг мустақил фикри бўлмаган содда бир одамнинг бу гапларидан «Самандаров кулиб юбормаслик учун лунжини шиширади ва жаҳл билан столнинг тортмасини тортиб, унинг аризасини қидирган бўлади».

Сидиқжоннинг Зуннунхўжалар уйидан кетиш воқеасини эслайлик. Зуннунхўжа Сидиқжоннинг колхозга кириш ниятини билади. Лекин у бу қарорнинг қатъий эканлигига ишонмайди, Сидиқжонни ниятидан қайтараман, деб ўйлади. Сидиқжоннинг гапларидан кейин Зуннунхўжа жуда қийин аҳволга тушади. Унинг «Колхозга кириб нима қиласиз?» деган саволига Сидиқжон:

«— Одам дунёга чўчқадай семириш-у, битдай болалаш учун келмайди,— деди.

Зуннунхўжа унга ялт этиб қаради.

— У нима деганингиз?

— Одамман деганим!— деди Сидиқжон Зуннунхўжанинг кўзига қараб.

— Сизни ким одам эмас деди?

— Мендан юз ўгирган бутун ёрдўстларим, ўртоқларим, эси бор одамнинг ҳаммаси айтади».

Шундан кейин ёзувчи Зуннунхўжанинг «ёлғондан қаттиқ кулганини» айтади. Бу ерда кулгининг ёлғон эканини изоҳлаш ортиқча эмас, чунки куладиган гап бўлаётгани йўқ. Лекин Зуннунхўжа Сидиқжонга «ҳамма нарса сиз ўлаганча эмас», демоқчи. Тўғри, бу кулги ҳеч нарсани ўзгартолмайди, фикр олишув ўз мантиқи билан давом этади. Шундан кейин ёзувчи «Зуннунхўжа не машаққат билан илжайди», деб хабар беради. Сидиқжон фикрларининг мантиқи олдида у энди хаҳолаб кулолмайди. Зуннунхўжанинг «машаққат билан илжайиши» ҳам бундан кейинги айтадиган гапига шароит тайёрлаш эди. У Сидиқжондан эшитган гапларини бирордан чиққан, деб ўйлади. Унинг «Саводингизни анча чиқариб қўйишиптими?» деган гапига Сидиқжон: «Менинг домлам йўқ, домлам икки кўзим», деб жавоб қайтаради. Шундан кейин Зуннунхўжа очиқдан-очиқ бошқа йўлга ўтади.

* * *

Абдулла Қаҳҳор асарларида персонаж нутқи билан боғлиқ бўлган турли-туман масалалар ҳақида сўз борар экан, муҳим бадиий-тасвирий компонентлардан бири — ўхшатиш ҳақида гапирмай илож йўқ. Чунки ўхшатиш образ яратиш воситаси бўлиб қолмай, Абдулла Қаҳҳор қаҳрамонларининг нутқи учун айниқса характерли бўлган, қаҳрамонларининг бир-бирларига нисбатан муносабатларини яққол ифодалаган, улар қиёфасининг, характерининг муҳим томонларини тўлдириб келган воситалардан бири сифатида кўзга ташланади. Ёзувчи ўхшатиш ёрдами билан гоҳ қаҳрамонлар портретини чизса, гоҳ уларга бўлган муносабатини ифодалайди, гоҳ уларнинг бир-бирларига нисбатан ҳис этган субъектив қарашлари кўзгусида уларнинг ўзларига мансуб бўлган яхши ва ёмон фазилатларини акс эттиради.

Абдулла Қаҳҳорнинг ўхшатишдан бу қадар катта маҳорат билан фойдаланиш санъати, шубҳасиз, бирдан туғилмади. Ёзувчининг ilk ҳикояларига назар ташласак, уларда ўхшатишларни қўллаш меъёри бузилгани, ўхшатилаётган нарсанинг ўхшатаётган нарса билан ички боғланиши ҳар доим ҳам мантиқий эмаслиги кўзга ташланиб туради. Абдулла Қаҳҳорнинг ilk асарларидан «Қишлоқ ҳукм остида»ни олиб кўрайлик. Колхозлаштириш даврини тасвирлашга бағишланган бу асарда ёзувчининг эътибори колхоз душманларининг қаршилигини синдириб, катта йўлга чиқиб олган Ўтбо-

сарларни кўрсатишга қаратилади. Бадий тасвирий восита-ларни ҳар доим ҳам асосий мақсадга йўналтира билмаслик натижасида асарда кўп сўзлилик, катта-катта тасвирий пар-чаларнинг узилиб қолиш ҳоллари учрайди. Воқеаларнинг батафсил тасвирига берилиб кетиш натижасида ҳикоянинг бош қаҳрамони — Ўтбосар воқеалар оқимида «чўкиб кета-ди», кўп ўринда меъёр бузилади. Ёзувчи турли-туман ўхша-тишларни қалаштириб юборади. Янги-янги ўхшатишларни топишга берилиб кетиш натижасида автор бу ўхшатишларни асарнинг асосий мазмуни билан боғлашни унудиб қўяди.

Ҳаёт мураккаб, ҳар куни қандайдир мишишлар одам-ларни тинч қўймайди, колхоз ҳақида турли-туман ваҳимали гаплар тарқалади. Натижада янги тузумнинг афзаллигини тушуниб етмаган дэҳқонлар орасида саросималик юз беради: Бу одамларни айлаш қийин, чунки улар саводсиз, савияси паст, лекин шунга қарамасдан, улар душманлар тарафига ўтмайдилар, онгли равишда қўпорувчилик ишини олиб бор-майдилар. Шундай экан, «Уччала кампир туға турган товуқ-дай қаҳқаҳлашиб кетишиди...». «Ҳанифа холани кўриб, совуқ-да қолган пашшадай ўрмалаб, шотидан ҳовли юзига тушди» сингари ўхшатишлар қишлоқдаги мураккаб вазиягни тушун-маган кампирларга нисбатан қаттиқроқ тегади; ўқувчига малол келади.

Яна бир мисол. Душманлар томонидан қўйилган ўт ўчи-рилиб, шаҳардан текширувчилар келади. Одамлар воқеа со-дир бўлган ерга тўпланади. «Милиция уларга қўли билан «Кетинглар» ишорасини қилган эди, улар пашшадай бир тў-зиг яна тўпландилар».

Колхоз омборига тушган ўтни колхозчилар Ўтбосар бош-чилигига ўчиришади. Бу ишда кўпчилик жонбозлик кўрсата-ди. Ут ўчирувчилар орасида ўттиз беш ёшлар чамасидаги бир хотин ҳам бор бўлиб, у икки пакир сув кўтарган ҳолда «ит қувлаган товуқдай қоқолаб келар эди». Бундай ўхшатишлар яхши кишиларга нисбатан ҳурматсизликдай кўринади. Хул-лас, юқорида келтирилган мисоллар ёзувчининг ўхшатишлар «образлилик учун хизмат қилувчи восита экан»лигини маъ-лум даражада схоластик тушунганилигини, ҳар қандай ўхша-тиш образ бўла олмаслигини тушуниб етмаганлигини кўр-сатиб туради.

Ўхшатишнинг асардаги роли, ундан кузатилган мақсади турличадир. Асар фоясини конкретлаштиришда, фикрларни жонли, образли қилиб беришда ўхшатиш катта аҳамият касб этади. Агар ўхшатиш айтилмоқчи бўлган фикрнинг, ин-сон кайфияти тасвирининг аниқ, таъсирли, образли чиқишига хизмат қилмаса, улар асарда салбий роль ўйнашлари

табиийдир. Бундай ҳолни А. Қаҳҳорнинг асосан илк асарларида учратиш мумкин. Ёзувчи хаёлига ҳам мазмун, ҳам форма жиҳатидан ўхшатилиши мумкин бўлмаган жуда иштабиий ўхшатишлар келади. Масалан, «Унинг (чолнинг М. С.) хиргойисидан етилган қиз бош қўйган ёстиқнинг ҳиди келар эди».. («Яна ой қачон куяди»).

Ёзувчи юз, кўз ҳаракатларини тасвирлашда ниҳоят оригинал ўхшатишлар қўллади, лекин бу ҳар вақт ҳам образни ёрқин гавдалантириш имконини бермайди. Агар «Махсум узун эчкиникига ўхшаган соқоли орасидан бармоқларини ўтказиб ғуурона бир кулги билан кулди-да, бойёғлининг кўзи-дай юмалоқ кўзларини шоҳсоққадай ирғитиб чиқариб, бир жуфт байт айтди» дегач тасвирда маълум бир картина кўз олдимизга келса, «Махсум похол орасидаги чумчуқ уядай оғзини очиб қараб қолди» деган ўхшатиш реалликдан узоқ эканлигини кўрамиз. Ёзувчи фикрини бойитмайдиган, унга бирон аниқлик киритмайдиган ўхшатишларни ҳам қўллади.

Лекин кейинчалик Абдулла Қаҳҳор ёзувчилик малакасини орттириши, қаламини ўткирлаб олиши билан ўхшатишдан ҳам ўринли фойдалана бошлади.

Камбағал бўлган Усмонали ўзининг саводсизлиги, омилиги, руҳонийларга эътиқоди зўрлиги натижасида улар тузоғига тушади, ҳалқ ишига қарши юради. Усмонали бўйнига бир вазифа олар экан, «У ўзининг ҳамма суюкларини оғир сезар, ўзини ўргамчи уясига илинган пашшадай ҳис қилар эди». Бирорга нисбатан бу ўхшатишни ишлатиш мумкин, лекин ўзини шундай ҳис қилиши тўғри бўлмаса керак. Умри («Хотинлар») эрини урушга жўнатиб, ўзи бошқаларга кўнгил қўйиб юради. Бу ишлардан хабари бўлган Собирахон шундай дейди: «Довриқа бир борганимда шу тўппини амакиваччам Аминжоннинг бошида кўриб қолдим. Зимдан суриштирсан, бола бечора ўргимчак уяга тушиб қолибди: Умри «мен сени қизлигимда яхши кўриб қолганман, қарамаганингдан кейин сенга ўчакишиб, эрга теккан эдим, ҳозир эримдан чиққанман», дебди.

Ўргимчак билан боғлиқ бўлган ўхшатишни «Сароб»да ҳам кўрамиз.

Саидий Мунисхонлар уйига тез-тез келадиган бўлиб қолади. Бунинг сабаби у ерда Мунисхоннинг борлигигина эмас. «Нечуқдир Салимхон билан икки орада Мунисхондан бошқа яна бир восита туғилди. Бу восита ўргимчакнинг тўридай кучсизгина бир ип бўлиб, унинг нимадан иборат эканини Саидийнинг ўзи ҳам билмас эди». Бу ўхшатиш символик характерга эга эканини билиш қийин эмас. Чунки Салимхон Саидий атрофида парвона бўлиб, уни ўз тўпига тортмоқчи

бўлади. Саидий характеридаги айрим нозик томонларни сезган Салимхон аста-секин иш бошлайди. Саидий ўзи тушунмаган ҳолда аста-секин Салимхон тўпига — ўргимчак инига киради. Тўғри, ўқувчи бу ўхшатишдан олдин ҳам Саидийнинг тузоққа илинганини билган эди. Лекин ўргимчак уяси билан боғланган бу мисолларнинг барчаси ёзувчининг ўхшатишга муҳим гоявий вазифа юклай бошлагани, ундан асар гоясини очиша фойдалана бошлаганини кўрсатади.

«Сароб»да Абдулла Қаҳҳор асар гояси, қаҳрамонлар мөҳияти, давр характеридан келиб чиққан ҳолда қатор оригинал ўхшатишлар яратади.

Саидий душман сафига қўшилиши билан Эҳсонга ёт бўлган йўлдан кетади. Бундан Эҳсоннинг хабари йўқ. Кўп вақт бир-бирини кўрмаган икки дўст фавқулодда учрашиб қолади. «Саидий Эҳсоннинг келганига бениҳоят шод эканини кўрсатиш учун айтган ҳамма гапи, ҳар бир ҳаракати уқувсиз артист томонидан биринчи марта ба биринчи репетицияда бажарилган ролдай ясама чиқди». Бу ўхшатиш Саидийнинг мавжуд шароитдаги мураккаб ҳолатини гавдалантирувчи қурдатга эга эмас. Лекин иккинчи ўринда худди шу типдаги ўхшатиш одамлар ўртасидаги муомалани кўрсатишда катта таъсир кучига эга бўлади. «Саидий илгари муаллимлик қилиб кўп пул топар эди. Шу вақтларда поччаси Муҳаммад Ражаб унга кўтара мол оладиган харидорига қиласидиган муомала қиласиди. Овқатнинг яхиси Саидийники, усиз шишанинг оғзи очилмайди». Бу ерда Муҳаммад Ражабнинг Саидийга муносабати очиқ. Унинг қарашларида зиддият ёки мураккаблик йўқ. У ҳамма нарсани келтирадиган фойдаси билан ўлчайди, унинг одамларга бўлган муносабати ҳам шундан келиб чиқади. Унинг ҳаётга қарashi, фикрлаш доираси ҳам мол билан, давлат билан боғлиқ.

Яна бир ўхшатиш: Саидий Муҳаммад Ражабдан Мухторхонни сўрайди. Шунда Муҳаммад Ражаб Мухторхон бошига тушган бир ташвишни ва бу ташвишнинг Мухторхонга катта таъсир қилганини гапириб: «Келганда ранги ўчган, худди рўзгори описи бўлган одамдай шошилган эди», дейди. Бу ерда ҳам Муҳаммад Ражабнинг фикрлари фақат бир томонга қаратилгани кўриниб турибди. Ўша даврда Муҳаммад Ражаб таниган, бирга иш олиб борган дўстларининг асосий ўйлари ҳаром-хариж йўл билан йиққан давлатини бир амаллаб сақлаб қолиш бўлган. Бу йўлда улар ҳар қандай мунофиқликка тайёр эдилар.

Саидий онгода, дунёқарашида турли қарама-қаршиликлар мавжуд. Ёзувчининг Саидийга бўлган муносабатида — позициясида ҳам маълум даражада шундай. Абдулла Қаҳҳор

Саидийнинг, бир тарафдан, социалистик тузум душманлари лагерига ўтишидан нафратланади, ўқувчини унга нисбатан шафқатсиз бўлишга чақиради, иккинчи тарафдан, Саидийнинг севгисига (у ҳаётининг охиригача ўз севгисига содиқ қолди), ёшига ачинади. Мана шундай мураккаб туйғу асарнинг бутун тасвирий воситаларидан кўриниб туради.

«Сароб» романни ўз даврида жамоатчилик томонидан, танқидчи ва ёзувчилар томонидан кенг таҳлил қилинган. Танқидчилар асарнинг бош қаҳрамони Саидийни шундай тасвирланки, ўқувчидан унга нисбатан қандайдир ачиниш туйғуси пайдо бўлиб қолади, деб ёзувчини танқид қиласидар. Бу таъна, бизнингча, тўғри бўлмаса керак. Ёзувчининг нияти Саидийни тўғридан-тўғри душман қилиб, ватан ишига, халқ ишига қарши қилиб кўрсатиш эмас, балки унинг фожиасини очиш, тўғри йўлдан чиқиш натижасида ундаги инсоний хусусиятларнинг йўқолишини тасвирлаш, инсон фожиасини кўрсатиш эди. Агар Саидий шу йўлга кирмаса эди, балки ёзувчи бўлиши ҳам (ахир, комсомоллар билан қишлоқца чиққа, қанча материаллар билан қайтди, ўзида ҳатто бир роман ёзишга куч-кувват сезди), севгилисига етиши ҳам мумкин эди. Ўқувчи унинг қобилиятининг зое кетганига, эришолмаган муҳаббатига, ёшига ачинади. Бундан ташқари, Саидийнинг нотинчлиги, кўнглидаги доимий ғашлик унга нисбатан ўқувчини бефарқ қилмайди. Ўқувчи унга ачингани ҳолда, ундан нафратланади, унинг кўра туриб, била туриб, ўзини чоҳга ташлаётганидан ғазабланади.

Саидий, бир тарафдан, орзу қилган бойликка эришади, иккинчи тарафдан эса, у тинчлигини йўқотади. «Нимадандир кўнгли ғаш, алланарсасини йўқотгандай». «У истиқболини ўйлар экан, ҳамма вақт «худо, шуларнинг ҳаммаси тушим бўлса эди», дейди. Саидий руҳан тинчлигини йўқотди. Ундан бу кайфият унинг душманлар лагерига ўтишидан бошланиб, умрининг охиригача давом этади. Саидий бойликка — ажойиб уй-жой, хизматчига эга бўлди, лекин ҳаётнинг асосий мазмуни бунда эмаслигини тушунди, унинг умиди чил-парчинг бўлди.

Ёзувчи Саидийга нисбатан икки хил муносабатда бўлади. Саидийнинг Мунисхонга бўлган муҳаббати масаласида ёзувчи тамоман Саидий тарафида. Саидий дўстлари билан бўлиб (энди бу унинг сиёсий тушунчалари, ҳаётга, жамиятга бўлган муносабати билан боғлиқ масалалар), улар олдида ўзини камситганида ёки улардан ўзини ниҳоятда юқори тутиб, керилганида, ёзувчи ундан нафратланади, уни калака қилган оҳангда гапиради. Саидий дўстлари билан иш бошлаб юборади. У ўзидан мамнун, босар-тусарини билмай қолади. «Му-

нажжимлар қуёш тутилишини қандай қарши олса, Саидий «ташкіл қилиш, кенгайтириш» тұғрисида бир фикр айтады-
ган одамни шундай қарши олади ва шу тұғрида сүзлар экан,
қархисида турған киши олдида ҳозир үйнаш құйнидан чиқиб
келиб, уйда әрининг чойга майлини сұраган хотиндей эши-
лар эди». Әзувчи бу үхшатиши билан тасвир объектига нисба-
тан үзининг позициясими күрсатыб, үқувчининг Саидийга бұл-
ган нафратини кучайтиради.

Саидий кирған йұл ниҳоят хатарлы бўлишидан ташқари,
аянчли ҳамдир. Чунки тарих ғилдирагини орқага юрдиришга
ҳаракат қилғанлар тарих олдида ачинарли бир ҳолга туша-
дилар. Саидий енгилди, унинг ҳаракатлари, фикр-ўйлари
пучга чиқди. Мана, унинг охирги ҳаракати: «Поезд яқынла-
шиб келмоқда эди. Саидий, рақибининг қаеридан чўқишини
мўлжалга олаётган хўроздай, келәётган паровозга қараб бир-
икки бош силкитди-ю, ўз мақсадини амалга ошира бешлади». Оқимга қарши одам хўро зга үхшаб қолиши табиийдек бў-
лади.

* * *

А. Қаҳҳор воқеаларни анализ қилишда, қаҳрамон характеристики чизишида тасвирий воситалардан үринли фойдаланади. Үқувчи у ё бу воқеанинг, қаҳрамоннинг фақат әзувчи топған ягона йўл, восита билан тасвирланғанига, унинг бошқача бўлиши ҳам мумкин эмаслигига ишонади.

А. Қаҳҳор ижоди, унинг ўзига хос манераси ҳақида гап юритилгандан унинг уста психологияны алоҳида таъ-
кидлаш лозим. Әзувчи ўз қаҳрамонларининг ҳамма сирла-
ридан хабардор. Унинг дижқатидан бирор нарса четда қол-
майди. А. Қаҳҳор киши қалбини, ўзгарувчан қиёфасини чуқур
ҳис қиласи ва уни аниқ кўрсатиш йўлларини билади. А. Қаҳ-
ҳор ижодий манерасида нутқ масаласи катта аҳамият касб
этади. Автор гапириши керакми, персонаж гапириши керак-
ми — бу әзувчининг бадиий мақсадига қараб принципиал
аҳамиятга эга бўлади. Бир үринда қаҳрамон гапининг маз-
муни, иккинчи үринда гапнинг айтилиш оҳангиги, учинчи үрин-
да гапириш шароити устунлик қиласи. А. Қаҳҳор учун асарда
майда-чўйда нарса йўқ. Ҳамма нарса бош масалага — автор
айтмоқчи бўлган фикр, ўтказмоқчи бўлган ғоя, яратилаётган
характер хизматига сафарбар этилади. А. Қаҳҳор қаҳрамон-
лари турли характердаги, турли ёшдаги, билим, маданият
даражаси турлича бўлган кишилардир. Албатта, әзувчининг
уларга бўлган муносабати, қараши ҳам бир хил эмас. Әзувчи
халқ ишига қарши отланган душманларга нисбатан шафқат-

сиз; муттаҳам, калтафаҳм, маданиятсиз, бекорчи, ғийбатчи-ларни кучли сатира остига олади; умуман ўзи ижобий бўлиб, ҳаётда бир оз янгишиб қолганлар устидан хайриҳоҳ оҳанг-да кулади. Бу йўлда А. Қаҳҳорга энг қулай келган тасвидий материал нутқидир. Ёзувчи айниқса ҳалқ ишига қарши юрганларни, умуман ўзи хуш кўрмаган одамларни уларнинг нутқи орқали характерлаш йўлини маъқул кўради. Салбий типларнинг гапиртирилишидан мақсад уларнинг ўзларини кўрсатиш бўлиб қолади.

А. Қаҳҳорнинг ижобий қаҳрамонлари жуда маъноли, салмоқли гапирадилар. Лекин уларнинг гаплари жуда катта психолигик ҳолат натижасида юзага келади. Уларнинг гаплари фақат шу муайян шароит учунгина эмас, балки умуман уларнинг қиёфаларини, мураккаб психолигик ҳолатларини кўрсатиш учун ҳам аҳамиятлидир. Масалан, Қобил бобо жуда кам гап одам, фақат ҳўқизи ҳақида гапиради. Бу гаплар умри меҳнатда ўтган, келажак ташвиши билан яшайдиган деҳқон фожиасини кўрсатади. Саида ҳар сўзини ўйлаб, ўлчаб гапиради. Унинг ҳар гапи тагида катта ҳаёт ҳақиқати ётади.

Ёзувчи одамнинг хаёлига келиши мумкин бўлган ягона фикрни сезади ва уни қай йўл билан намоён қилиш ўринли эканини яхши билади. Ёзувчи персонажларни уларнинг нутқи ёрдами билангина характерламайди, бунда уларнинг кўриниши ҳам маълум роль ўйнайди.

ФОЯ ВА ПОРТРЕТ

Чехов менга нарса ва ҳодисаларга қараб, уларни қандай кўришини ўргатди. Ойнадан гўё губор кўтарилиб кетгандаи бўлди — дераза сиртидаги турмуш ҳақиқий жилвалари ва тарихи билан гавдаланди, илгаризи хира доғлар билан аралаш-қураш бўлиб кўриниб келган ҳаёт бутун тафсилотлари билан ажаб жамолини кўрсатди. Мен учун ҳаётдаги факт ба характерлар ўзларининг бир томонламалигини йўқотди.

Абдулла Қаҳҳор

Портрет яратишда ҳар бир ёзувчи ўзига хос йўлдан боради. Лекин у қай йўлдан бормасин, бари бир портрет асар-фояси, персонаж характери билан боғланмас экан, бундай портрет бадиий қимматга эга бўлмайди. Бошқача қилиб айтганда, қаҳрамон портретининг тасвири ҳам ўзида муайян юкташиши, характернинг тўлақонли чиқишини таъминлашга ўз ҳиссасини қўшиши керак.

Абдулла Қаҳҳор илк асарлариданоқ қаҳрамон портретини асарнинг фоявий йўналиши, образ характери моҳияти билан боғлашга ҳаракат қилган. Лекин ёзувчининг дастлабки асарларидағи қаҳрамонлар портрети ҳар доим ҳам етарли юкташий олмагани сабабли бу қаҳрамонларнинг ички руҳий ҳолати айрим ўринларда очилмай қолган («Афлотун муҳаббати», «Гумроҳ» ва бошқа ҳикоялар). Ёзувчининг диққатга сазовор илк асарларидан бири — «Қишлоқ ҳукм остида» (1932) ҳам қаҳрамон портретини беришдан бирон мақсад кузатилмаганини, тўғрироғи, кузатилган мақсад батафсил тасвирга арзимаслигини кўриш мумкин. Душманлар таъсирига берилиб, колхоз мулкига ўт қўйган Усмонали образини олайлик. Усмонали моҳият эътибори билан мураккаб образ бўлиши керак эди. Бечора йигит ўз фойдасини — ҳақиқий яшаш даври келганини тушунмади, бидъат, жаҳолат қурбони бўлди (колхоз мулкига ўт қўйди ва ўзи ҳам ҳалок бўлди). Ҳикояда даставвал ёзувчининг бу образга нисбатан тутган позицияси аниқ эмас. Шунинг натижасида Усмоналининг ташки қиёфаси, ҳолатини тасвирловчи моментлар ҳам маъ-

лум мақсадга бўйсундирилмайди. Қишлоқда рўй берган кўнгилсиз воқеа муносабати билан милиция келади, айбордларни қидиради. «Кўзойнакли киши булардан икки-уч қадам наридаги куйган ёғочлар, шиша синиқлари орасидаги бўйрани кўтарган эди, ўнг чаккаси янчилган, ўнг кўзи чиққан кўса бир кишининг калласи чиқди. Ўликнинг оғзи ярим очиқ, лаблари қорамтил кўк бўлиб шишган. Чап кўзи ярим очиқ ва ундан то буруннинг ёнигача қон томчиси оқиб келиб қотиб қолган эди. Оғзининг бир четидан чиққан қон соқолида қотиб қолган. Томоғи бўйин атрофлари билан қорамтил кўк қон томирлари қон тиқилгандай кўкариб бўртиб турар эди. Ўтбосар еллиб чака ва кўз атрофларига қўнгган зангар пашшаларни тўзитди, улар бир кўтарилиб лабига қўндилар». Бундай узундан-узоқ натуралистик тасвирини чизищдан мақсад у қадар равshan эмас. Халқ ишига қарши бўлганлар оқибатда шу ҳолга тушади, дейиш кўзда тутилган бўлса, Усмонали ўлди, дунёга эндиғина келган фарзанди етим қолди, дейилишининг ўзи етарли ва таъсирироқ бўлиши мумкин эди.

Абдулла Қаҳҳор ижодининг дастлабки йилларида ва ҳатто унинг қалами ҳийла ўткирлашиб қолган даврда ёзилган баъзи бир асарларида ҳам портрет тасвиридан асар ғоясини очища ёзувчининг тўла фойдалана олмагани сезилади.

А. Қаҳҳор салбий типларни хунук қилиб тасвирлашга ҳаракат қиласди. Натижада хунуклик ёмонликнинг биринчи шартидек бўлиб қолади. Бу йўлда меъёрнинг бузилиши эса ўқувчи ғашига тегади. Қиёфаси хунук қилиб тасвирланган қаҳрамон асарда пайдо бўлиши биланоқ китобхон унинг қандай одам эканини билиб олади, унга бўлган қизиқиши маълум даражада сусаяди.

Моҳияти салбий бўлган персонажлар қисман «Сароб» романнада ҳам мана шу йўсинда чизилади. «...пакана, юмалоқ, бўйни калта, юзи шишинқираган заҳил бир йигит Саидийнинг афтига ҳам қарамай, столга ўтирида ва қофозларни титклий кетди». Бундай одамдан бирор яхшилик кутилмаслиги ўз-ўзидан маълум бўлиб қолади. Халқ ишига қарши турган Ёқубжоннинг бу портрети кейинчалик тез-тез қайтарилиб, янги-янги чизиқлар билан тўлдирилади. Ер ислоҳотига қарши чиқиб, қайси йўл билан бўлмасин, ўз мулкини сақлаб қолиш чораларини қидирувчи Ниёзмат Ҳожи эса асарга шундай кириб келади: «узун бўйли, паҳмоқ соқолига оқ тушган, ранги сарғимтил, кўп уйқудан қолган кишидай кўзлари қисилган, қизарган, эски чопон бир одам кирди». Саидий ер ислоҳотига қарши кишилар йиғинига кирганида эса «ўрта ёшлардаги, жаги кенг, пешанаси дўнг, маймун қиёфасидаги» бир кишини кўради.

Гап бу мисолларда салбий персонажларнинг кўримсиз ва хунук тасвирланишидагина эмас, балки улар портретининг турғунилигига, ҳаракатсизлигига ҳамdir (Езувчи кейинчалик ҳам салбий типларни асосан хунук қилиб кўрсатади. Масалан, «Синчалак»даги Эшон образи. Лекин бу портрет ҳаракатда, унинг бутун борлифи билан гармоник бирликда берилади).

Бироқ шунга қарамасдан, ёзувчининг изланиш даврини ўтиб, катта йўлга чиқиб олганлигини кўрсатувчи «Сароб» романнада портретнинг роли кучайди. А. Қаҳҳор яхшиларни чиройли, ёмонларни хунук қилиб тасвирлаш маълум даражада «жўн йўл» эканини тушунди. Характернинг мураккаблиги унинг ташқи қиёфаси тасвирига ҳам таъсири эта бошлади.

Мухторхон ва Сораҳон, Саидий ва Мунисхон портретларини беришда ёзувчининг муваффақияти сезиларли бўлди. Бу муваффақият эса портретни катта мақсадга, асардаги образларга юқлатилган ғоявий вазифаларга бўйсундиришда кўринди. Персонажларнинг ташқи портретлари уларнинг ички қиёфаларига, инсоний фазилатларини очишга қаратилди.

Саидий Мунисхонни севади. Мунисхон эса акасининг хоҳиши билан бошқа одамга турмушга чиқади. Бу ҳолат Саидийнинг бутун орзу-умидларини пучга чиқарди. Ахир, Мунисхондек тенги йўқ бир қиз кимга мусассар бўлди экан? «Саидий Мухторхонни тўй ҳафтаси Салимхоннинг уйидаги қўриб ҳайрон қолди. Бунинг нимаси бор, бир бедаво-ку? Қангшари паст, икки кўзи лойга тушган мунчақдай. Бет суюклири чиққан. Қулоқлари елпифичдай. Яна соч-соқолига оқ тушган». Мухторхоннинг бу портрети Саидий нуқтаси назаридан берилади. Ўқувчиде Мухторхонга нисбатан маълум бир қараш пайдо бўллади. Саидий қарашлари қанчалик субъектив бўлмасин, ўқувчи унга ишонади. Бу ерда қаҳрамоннинг Мухторхонни кўришигина эмас, балки унга нисбатан маълум муносабати ҳам берилган. Ўқувчи эса Саидий тарафида; у Саидийнинг Мунисхонга бўлган муҳаббатини ҳурмат қиласи. Езувчининг икки рақиб учрашуви бундай тасвирлаши тасодифий эмас, албатта. Саидий Мухторхон ҳақида эшитган-у, уни кўрмаган, билмайди. Биринчи кўришда унинг даставвал Мухторхон қиёфасига эътибор бериши табиий. Саидий рақибининг ўзидан нимаси билан устун эканини кўрмоқчи бўлади ва «унинг қаршисида ўтирганда, ҳар дам ундан бирон мўъжиза» кутади.

Саидий назаридан улуғ кишилар Мухторхон атрофида парвона бўлишади. Мухторхон сирли бир қиёфада Саидийнинг

танишлигини айтади. Шу куни Мухторхоннинг нимасидир Саидийга ёқади, шу қадар ёқадики, у эртасига Ёқубжонга «Мухторхон тушунадиган одам кўринади», дейди. Дарвоҳе, Саидий нигоҳида ўзгара бошлаган Мухторхоннинг бу портрети Мухторхонда эмас, балки кўпроқ унинг ўзида рўй берган ўзгариши кўрсатиш учун керак эди.

Бу ерда портретнинг ким нуқтаи назаридан берилиши ҳам тасодифий эмаслиги маълум бўлади. Ёзувчи Мухторхонни «ўз тарафидан» чизмайди, балки Саидий нуқтаи назаридан тасвирлайди. Саидий Мухторхонни «бедаво» дейишга дейди-ю (ёзувчи балки шундай кескин характеристика бермас эди!) яна ўз фикридан қайта бошлайди. Саидийнинг турғун бўлмаган фикри мана шундай йўллар орқали ҳам кўрсатилади. Мухторхон қандай бўлса, шундайлигича қолди, лекин Саидий образининг моҳияти чуқурроқ очила бошлади. Саидий катталар эътиборида бўлишни истайди. Шу сабабли Мухторхоннинг Саидийга ёқиши табиий.

Энди яна Мунисхон масаласига қайтайлик. Мунисхон Саидий учун бебаҳо ва тенгсиз қиз. Саидий уни севади, унинг бутун борлигини қоплаган бу туйғу ҳамма нарсадан устун. Шунинг учун ҳам Аббосхон ва Салимхонларнинг Мухторхонга бўлган муносабатлари, Мухторхоннинг қандайдир сирли гаплари, хуллас, «Мухторхоннинг Саидий билган яхши томонлари Мунисхонга кўёв бўлиш учун кифоя қилмас эди».

Мунисхон Саидидан аввал Мухторхонни таниган, «нимажон, хотинчалиш бу одамни бир неча марта кўрган» эди. Хуллас, Мухторхон икки киши — Саидий ва Мунисхон нуқтаи назаридан берилади. Мухторхоннинг Мунисхонга энг ёқмаган томони унинг хунуклигигина эмас, балки хотинчалиш бўлганлиги ҳамdir. Бу Мунисхоннинг Мухторхонга унаштирилмасдан олдинги фикри эди. Бироқ Мунисхон у билан унаштирилганини эшитгач, Мухторхон тўғрисида ўйлаб, «жуда ҳам хотинчалиш эмас эди, шекилли, назаримга шундай кўрингандир-да», деган фикрга келди; икки кундан сўнг онасидан Мухторхоннинг бойлигини эшитиб, хаёл сурди. Мухторхон бориб-бориб тўлишади, чинакам йигитга ўҳшаб қолади; қаср солади, қасрнинг орқасида кичкина боғча — истироҳат ва хаёл суриш ўрни бўлади. Боғчанинг ўртасидаги мармар ҳовузда олтин балиқлар юзиб юради. Шабада эсганда дарахтлардан мусиқа товуши чиқади... «Йўқ,— деди Мунисхон сесканиб,— худо кўрсатмасин!». Мунисхон унинг суратини қидириб топди-да, унга узоқ тикилиб, анча нарсалар кашф этди: кўзи унча ҳам юмалоқ эмас, қора билаги унча ҳам ингичка кўринмайди; озгина семирса, ўртacha одам бўлар», деган умид билан Мунисхон тақдирига тан беради. Бу тас-

вирни изоҳлашга ҳожат йўқ. Мунисхон — ўз синфининг фарзанди. У киши қадрини, одамгарчиликни, муҳаббатни ҳам пул билан, бойлик билан ўлчайди. Мунисхон Мухторхонни мулк-давлат қўйнида кўра бошлар экан, унинг ташқи қиёфаси ҳам ўртacha одам даражасига кўтарилади.

Қейинчалик Сайдий ҳам шу кўйга тушади. Бу тасодифий эмас.

Асарда қиёсий тасвир приёми кенг қўлланилади, бу йўл билан янги тузум душмани Муродхўжа домла ва унинг қизи Сорахон образлари чизилади. Бу икки шахс бир-бирини тўлдиради, конкретлаштиради. Домла портретини батафсил чизишда ёзувчи ўхшатишлардан кенг фойдаланади. Ўхшатишлар домланинг характеристига мос тушади. Ўйга «Ўрта бўйли, йўғон гавдали, кўк мовут авраги пўстин кийган, қирқ беш ёшлардаги бир киши кирди. Унинг мўйловгага ўхшаган қошлиари кўзининг устига тушиб турар, кичкина дўпписи қоплай олмаган тепакал боши ҳозиргина пардозланган сариқ этикнинг тумшуғидай ялтирас эди. Икки лунжи осилган. Домла ҳаракатда айик, юришда ўрдакни хотирларатарди». Домла ҳаракатларини ҳайвонга ўхшатиш бежиз эмас; унинг бутун вужуди ҳайвондан фарқланмаслиги аста-секин очила боради.

Ёзувчи Сорахон портретини чизиш процессида домла портретини ҳам янги-янги деталлар билан тўлдиради. Шу тарзда уларнинг портретларини китобхоннинг кўз олдидаги ёрқин гавдалантириб беради. «Муродхўжа домла йўғон, барваста одам, шундай бўлишига қарамасдан, қизининг озғин эканига ўзи ҳам таажжубланар эди. Сорахон отасига нисбатан ориқ бўлса-ку, росмана қизлардай кўркам ва сергўшт бўлар эди-я, у энг ориқ қизларга қараганда ҳам ориқ, шунинг учун бўлса керак, одатдан ташқари новча кўринади, юрганда худди икчи-уч еридан букилиб кетаётгандай туюлади; шундан ўзи ҳам хавфсирагандай, гавдасини олға ташлаброқ юради. Кўк қарға шоҳи кўйлагининг кенг этаги остидан чиққан сава чўп сингари оёқлари доим гавдасидан кейинда қолиб, мувозанатни сақлашга шошилади. Унинг узун-узун ва ингичка бармоқлари, кўк томирлари кўриниб турган қўллари икки ёнида эмас, қорнининг устида қимирлайди. Елкасидан озгина пастга тушиб турадиган икки ўрам қора, эотли сигирнинг думи сингари қўнғироқ соchlари тез-тез кўкрагига тушиб, уни қаҳр билан олиб елкага ташлашга мажбур қилмаса, орқадан кўрган киши Сорахонни оғир бир нарса олиб кетаётган гумон қилилади.

Сорахоннинг ранги домланинг рангидай хамирга ўхшаган эмас. Сорахон қорачадан келган; кулганда отаси сингари оғзини катта очиб эмас, юпқа лабларини қимтиб, юқориги

лабини күтарибров турган ўғри тишини кўрсатмасликка тиришади; гапирганда ҳам шундай, қандай кайфиятда ва қандай қаттиқ гапирмасин, юпқа лаблари худди пичирлагандай ҳаракат қилади. Учли пешанасининг ўртасидан фарқ очилиб, жингалак сочи қошларига тегай-тегай деб, қулоқлари орқасига ўтиб кетган. Аччиғи келгандা қошининг бири паст, бири баланд бўлиб кичкина кўзларининг ости пир-пираб учади ва кичкина, ўта кўринарлик даражада юпқа бурнидан унчамунча бор қон ҳам қочади, тешиклари керилади».

Портрет тасвири кўринишдан «объектив» характер касб этади, лекин бу тасвирнинг турган-битгани киноя-кесатиқдан иборат бўлиб ёзувчининг Сораҳонга бўлган қараши астасекин кескинлашиб боради. Одатда хотин-қизларга чирой бағишиловчи нарсалар ҳам (соҳининг жингалаклиги) Сораҳонга ярашмайди. Чунки шу чиройли нарса ҳам қандайдир ўхшовсиз бир деталь билан ёнма-ён келади (пешанасининг учлилиги). Ёзувчи Сораҳон портретини чизишида ҳар доим уни отаси билан солишитириб боради. Отасининг «ҳусни»ни бузиб турувчи чизиқлар келтирилиб, «қизиники ундаи эмас, бошқачароқ» деган интонацияда гап тузилади, лекин айни пайтда Сораҳондаги бу «ўхшамаслик» унинг ниҳоятда бесўнақай, хунук белгиларидан эканлиги билинади. У бир ўринда отасига ўхшамайди, отасидан ҳам баттар деса, иккинчи ўринда отасига ўхшаса эди, балки тузукроқ бўлар эди,— деб унинг яна ҳам кўримсиз эканини таъкидлайди. Бундай тўла-тўқис тасвирланган портрет камлик қилганидек ёзувчи Сораҳон билан ўқувчини учраштирас экан, ҳар гал унинг кўринишини, ҳаракатларини янги-янги чизиқлар билан бойитиб боради. Агар Сораҳоннинг юқорида келтирилган портрети «ёзувчи томонидан» чизилган бўлса, энди бу портрет бошқалар қараши орқали тасдиқлатиб борилади. Бундай баҳони Сораҳонга биринчи бўлиб Саидий беради.

Саидий Сораҳон ҳақида умумий таассуротга эга. У бир ҳикоясида ниҳоятда хунук хотин образини яратиши керак. «...қаҳрамон — хунук хотинни барча келишмаган қилиқлари билан тасвирлаш Саидий учун тайёр, ёзилганни кўчиришдан-гина иборат эди. Ушандай хунук, ўшандай хулқларга эга бўлган хотин — Сораҳон». Демак, Саидий Сораҳоннинг хунук-чиройлилигини сезмади, фарқига бормади, дейиш тўғри бўлмайди. Сораҳон прототиплик қилган ҳикоя босилиб чиққанда, отаси уни Сораҳонга ўқиб ҳам беради. Шунда «Сораҳон узун, ингичка бармоғи билан Саидийнинг пешанасига туртиб, «боқса одам бўласиз», дейди. Албатта, бу ҳаракатларни сезмаслик, унга эътибор бермаслик мумкин эмас. Лекин Саидий Сораҳон кўринишини, хулқ-авторини кўнглига

олмади, унга объектив, ўзига ҳеч қандай алоқаси бўлмаган бир қиз, деб қаради. Масаланинг бундай қўйилиши кейинчалик Саидий баҳтсизлигининг чегарасизлигини таъкидлаш имконини беради.

Энди Саидий ҳаётига Сораҳон кира бошлади. Сораҳондан қутулиш мумкин эмаслиги аниқ бўлиб қолди. Бундан кейин Сораҳон кўпроқ Саидий қарашида кўрсатилади. Саидий Мунисхон кўйига тушади. У Сораҳондан фазилат қидиради. Мунисхон Мухторхондан топган фазилатларни Саидий Сораҳондан топади. Саидий Сораҳонга нисбатан умумий таассуротдан конкретликка ўтади, унинг юз тузилишидан, ҳаракатларидан гўзаллик, олижаноблик қидиради.

Мунисхон билан Мухторхон муносабатлари Саидий билан Сораҳон ўртасидаги муносабатлардек батафсил тасвирланмайди. Бу асар ғояси, персонажларга ажратилган ўрин ва шунингдек, ёзувчи позицияси билан ҳам белгиланади. Ёзувчи ҳар ҳолда Мунисхонга ён босади, уни аягани сезилиб туради. Лекин у Сораҳонга нисбатан аёвсиз. Шу қизга уйланишга ўзини мажбур ҳисоблаган, тўғрироғи, ўзини ўзи тутиб бергани учун Саидийни ҳам аямайди. Сораҳон образининг тўлаттўқис очилиши Саидий билан боғланади. Унинг ҳаёти, қиёфаси, қилиқлари, фикрлашлари Саидий образини конкретлаштиришга хизмат этади — асар ғояси билан боғланади.

Сораҳон, шубҳасиз, хунук кўриниши учун айбдор эмас (ўзига қолса шундай бўлармиди?). Лекин гап фақат унинг хунуклигига эмас, хунуклик унинг қашшоқ ички дунёсига, қилиқларига, гапириш манерасига мос. Бу энди унинг ўзига, тарбиясига боғлиқ.

Саидий билан Сораҳоннинг танишишлари шундай:

«Саидий ўрнидан туриб, эшикка томон борди. Домла Сораҳонни етаклаб ҳар сафардагидан кўра дадилроқ кирди ва қизини Саидийга томон йўллади.

— Сўраш, ўрисча, знаком бўлинглар... Сораҳон панжалари орасидан Саидийга қараб, қад-қоматига келишмаган бир қийшанглаш билан қўй узатди. Унинг терлаган кафти текканда, Саидийнинг қулоғига «чиپ» этган товуш эшитилиб кетди».

Кўрамизки, ёзувчи энди Сораҳон қиёфасини кенгроқ очиб, унинг ёпишмаган қилиқ ва ҳаракатларини ҳам чизишга эътибор беради. Сораҳон нима демасин, нима қилмасин — ҳаммаси киши ғашига тегади, асабини бузади. У Саидийга панжалари орасидан қарайди. Бу ҳаракати унинг уятчанлигини билдириши керак эди. Ҳолбуки, ҳеч ким бундай фикрга келмайди. Шунча камчиллик етишмаганидай, унинг қўли ҳам терлайди.

Ёзувчи Сораҳоннинг Сайдийда қолдирган таассуротини, унга нисбатан Сайдийда пайдо бўлган ҳис-туйғуларни тасвирлаб ўтирамайди. Чунки Сайдий аввалига Сораҳон билан танишишни, шунчаки ҳеч қандай маъно талаб қилмайдиган оддий бир воқеа деб билади. Сайдий домланинг уйида туради, уй ичида гилар билан танишиш эса одоб доирасига кирадиган бир нарса. Домланинг асл мақсадлари Сайдийга номаълум, унинг фикри-хаёли Мунисхонда. Унинг учун Мунисхондан бўлак қиз йўқ. Шунинг учун бўлса керак, ўз-ўзи билан банд бўлган Сайдий домланинг асл мақсадини билмай ҳам қолди. Иккинчи тарафдан, бу ҳолат Сайдийнинг ўз қобилиятига — келажакда катта-катта ишлар қилишига ишончи кучли деган фикрни ҳам тасдиқлаб боради. Ёзувчи домланинг Сайдийга катта эътибор ва умид билан шароит яратганини батафсил тасвирлайди. Домланинг кузатган мақсади аниқ — шу йўл билан (домла Сайдий характеридаги нозик томонни — бойлик орттириш, шоҳона ҳаёт кечириш орзусини яхши билиб олган) Сайдийни қўлга туширмоқчи, ўзига куёв қилмоқчи. Сайдий домланинг бу ҳаракатларини ўзича тушунади. Сайдий — катта талант эгаси, унинг кўнглига қараш, унга шароит яратиш ҳар бир тушунган одам учун фарз — Сайдий домла ҳаракатларидан ана шундай маъно ўқниди.

Ёзувчи бу ерда ниҳоят бир контраст картина яратади ва шу орқали Сайдийнинг хаёллари, ўй ва режалари пуч ва ачинарли эканини очиб ташлайди. «Неча минг сўм харжланиб ясатилган уй Сайдийни эди. У истаса, қора барҳит билан қопланган диванга белигача ботиб ўтириб, деворларга осилган шарқ ва ғарб адиларининг олтин рангли ҳал билан бўялган нақшли рамкалардаги портретларини, кун ботиши, ой чиқишини тасвирлайдиган ва киши ҳар қараганда бир янгилик топадиган, чиройли манзараларни томоша қиласди: истаса, чиройли жовонга терилган китоблардан бирини олиб, оёқларидан қуббаларигача никель каравотдаги шоҳи кўрпа ва пар ёстиқлар орасига кўмилиб ўқиди. Серсавлат иш столининг бир томонига тахланган ёзув қофозлари, қўлига сиёҳдон ушлаб, «арзимас тортиқни қабул этинг» деган вазиятда турган кумуш ҳайкалча — яланғоч хотин Сайдийни доим ишга чақиради. Уй тинч, ерга ёйилган патгилам оёқ товушини чиқармайди. Исталган вақтда эшик ёнидаги кнопкани босилса, ичкаридан оқсоч хотин чиқиб хизматга тайёр бўлади». Ёзувчининг ижодий манерасидан маълумки, қаҳрамонни ўраб турган буюмлар тасвири лўнда, ихчам ва шу билан гоявий мақсадга боғлиқ. Шу жиҳатдан бу мисол жуда характерли. Сайдий учун маҳсус ажратилган ва жиҳозланган хона тасвири, Сайдийнинг буларга бўлган муносабати — ҳаммаси

Саидий тушунчасидаги шароит. «Шароит»га маҳлиё бўлган Саидий, бунинг бош сабабчиси бўлган Сораҳонга эътибор ҳам бермайди. Ёзувчи Саидийни «раҳмсиз» равишда неча бор оғир аҳволга қўяди. «Саидий тош ойналарининг қирралари ёруғ чироғ шуъласида ранг-баранг зиё берган катта жавонга терилган китоблардан бирини олар экан, электр қуввати теккандай бир иргиб тушди ва олаётган китобини ярим суфурилган ҳолича қолдириб, Сораҳонга қаради». Чунки Сораҳон Мунисхон устида гап очади (бу ерда ҳам контраст приёми қўлланмоқда).

Саидий ўзи орзу қилган бойлик ичиди. Лекин Мунисхон номини эшитиш Саидийни бир қанча вақт карахт қилиб қўяди, ҳамма нарсани унугтиради. Яна шу бойлик уни Сораҳонга қаттиқроқ боғлайди. У «Сораҳонга эр бўлишга кўника» бошлайди. Унинг хаёллари қанот боғлаб фақат бойлик, шоншуҳрат орттириш томон учади: «...бутун води ва ундаги ўтлаб юрган қўй-қўзилар, йилқилар, тоғ ён бағирларида ўсган писта, арча, кўм-кўк ўланлар ва уларнинг орасидан илон изи бўлиб оққан, қўёшнинг нурида кумуш тасмадай ярқираган ариқ ва ариқчалар кўриниб туради. Унинг қасри орқасида ер юзидағи ҳамма мевалардан топиладиган катта боғ бўлади. Саидий олтиннинг кучи билан бу боғларда лотос гуллари, хурмо ва апельсин «дараҳатлари ўстиради...». Бундай шоҳона ҳаётни барпо қилиш учун... «аввал водига қаср солишдан илгари қул ва чўрилар топиш керак. Бунинг учун бу оқим — замонни ўзгартириш зарур». Бу ишда унга маслакдош бўлган (тўғрироғи, Саидий фикрларини тушунар-тушунмас қувватлаган) Сораҳон «Саидийга шунча яқин бўлдики, бир лаҳзали тикилишда унинг яна талай гўзаллик чизиқларини топди».

Ёзувчи гўзаллик чизиқларининг нимада кўринганини аниқламайди. Саидий фикр-хаёлларига шерик бўлган, уни тушуна бошлаган Сораҳон унинг кўзига чиройли кўрина бошлаган бўлиши мумкин. Лекин Сораҳонда бундай чизиқлар йўқ, шунинг учун Саидий гўзалликни бошқа нарсаларда — моддий ва маънавий бирликда, ҳамфикрликда топа бошлайди. Энди Саидийнинг Сораҳон қиёфасида ўзига маъқул тушадиган чизиқларни кўра бошлаши табиий бўлиб қолади. Саидий бунга кўниккан сари ўқувчи кўзи олдида аянчли кўрина боради. Сораҳон «фазилатларидан» энг каттаси — маст одамнинг ташна бўлиши мумкинлигига ақли етишидир. Буни кашф қилган Саидий ўзида йўқ хурсанд бўлиб кетади. «Наҳот Сораҳон шуни билса! Демак, туппа-тузук! Саидий шифтга қараб, узоқ ўйланиб ётди. Унинг кўз олдидан бу кунгача кўрган қизлари ўта бошлади. Буларнинг ичиди Сораҳон қўлидаги чойнаги

билан ажралиб турар эди. Саидий шунча вақтдан бери биринчи мартаба унинг афт-бошига тузукроқ қарашга қарор берди» ва «кatta бир нарса кашф қилди: Сораҳоннинг кўзи қора, киприклари бу кунгача кўргани ҳамма киприклардан узун». Саидийнинг оила қуришдан кўзлаган мақсади бойлик бўлгани сабабли, ёзувчи тўй тасвирини Саидий қарашлари орқали беради. Характерлиси шундаки, Саидий тўй кунлари бир дақиқа ҳам Сораҳонни ўйламайди, келажак турмушлари қандай бўлиши тўғрисидаги фикр унинг хаёлидан ҳам ўтмайди. Ҳамма гап тўйга қанча пул, бойлик сарфланганида. Ёзувчи Саидийдан кулади, унинг ҳоли ачинарли эканига ишора қиласди. Пул, бойликка маҳлиё бўлган Саидий ўз баҳтини қўлдан бой берганини билмай қолди. «Саидий тўйни бундай дабдабали бўлар, деб сира ўйламаган эди. Татаристон ва бошқа жумҳуриятлар, Ўрта Осиёнинг кўп шаҳарларидан шунча кўп меҳмон келдики, булардан бир қисмининг келтирган тўёналарини пулга чаққанда, оддий тўйлардан ўнтасининг харажатини кўтарадиган эди».

Ёзувчи Саидий ва Сораҳон тўйидан сўнг улар ҳаётини, муносабатларини кўрсатишдан аввал Муродхўжа домла билан Саидий режаларини, қарашларидағи умумийликни тасвирлайди. Бир тарафдан, Саидий орзу қилган қаср қурилди, иккинчи тарафдан эса, орзу ҳавас билан яратилаётган «шароитда», Саидийга бирор кун тинчлик йўқ; жанжалтуполон, тъяна ва шубҳалардан боши чиқмайди.

Ёзувчи Сораҳон ўйлаб фикр суриши учун бир неча марта «шароит яратади». Лекин у ўйламайди. Сораҳоннинг ойиси унга ёлғон-яшиқ гаплар гапириб, унда рашк уйғотмоқчи бўлади, шунда Сораҳон «шунча иш бўлган экан, мен қаерда эдим, доим уйдаман-ку», дейиш ўрнига, тутоқиб кетади.

У буюрилган ишни ҳам ўринли қилиб бажара олмайди. Отаси Саидий билан Сораҳоннинг ҳовли олиб чиқиб кетишлиарини маъқул кўради. Бу режани Сораҳон орқали бажаришни мўлжаллайди.

«— Қуриб кетсан! — деди ўсмали пиёлани нари суриб — мени хотин қиладиган бўлсангиз, уй олинг, кўчириб кетинг, ота-онам билан турмайман!

Муродхўжа домла унга бу гапни ўргатган вақтда «Раҳим-жоннинг кайфи чоқ вақтини топиб айтгин», деган, бунга бирон ҳафта бўлиб Сораҳоннинг эсидан чиққан эди». Хуллас, Сораҳон ота-онаси тузган бу режани ҳам улар айтгандай қилмасдан, Саидийнинг кайфи йўқ вақтини «топиб» айтади.

Ёзувчи қачон Сораҳон ҳақида гапирмасин, у билан боғлиқ бўлган воқеани тасвирламасин, унинг ташқи кўринишини, ҳаракатларини янги-янги деталлар билан тўлдириб боради.

Чунки Сорахоннинг маънавий қиёфаси унинг ташқи қиёфаси билан чамбарчас алоқада очила боради. Сорахоннинг мураккаб руҳий кечинмалари йўқ, маънавий дунёси қашшоқ. У ҳаёт, ўз турмуши, оиласи тўғрисида — умуман ҳеч нарса устида ўйламайди. Сорахон Саидийни севадими-йўқми, ўқувчи буни билмайди. «Сорахон бениҳоят кунчи хотин» дейилиши у Саидийни севади, деган гап эмас, албатта. Унинг отасига ниҳоятда ўхшашлиги фақат ташқи тарафидангина эмас. Сорахон битта нарсани уқиб олган: ота-онасига пул керак. Нимага керак эканлигини ҳам ўйлаб ўтирамайди.

Ёзувчи Саидийнинг кишиларнинг ташқи кўринишига бўлган қаравишидаги принципсизликни икки ерда очиқ кўрсатади: биринчидан, у «бедаво» Мухторхондан нимадир топган бўлса, кейинчалик хунукларнинг хунуги бўлган Сорахонни ҳам ўртача аёл қаторига кўтаради. Ҳолбуки, бундай фазилатлар уларда мавжуд бўлмай, Саидий уларга мослашмоқда эди. Ёзувчи Саидийнинг Сорахон портретига бўлган муносабати орқали унинг характерли чизиқларини очади, унинг келишувчан, оғмачи ва фикрда мустақил эмаслигига шама қиласди.

Агар Абдулла Қаҳҳор Сорахонга нисбатан муносабатини пинҳон тутмай, уни ҳар доим билдиришга ҳаракат қилса, Мунисхонга нисбатан бўлак муносабатда бўлади. Мунисхон — мураккаб образ. У ҳам Сорахонга ўхшаш бой оиласдан чиқсан; бойлика, мол-мulkка бефарқ қарамайди. Автор Мунисхоннинг гўзаллигини тан олади; унинг Саидийга бўлган севгисига ачинади; адабиёт, музика билан қизиқишини ёқлайди. Мунисхон Сорахонга ўхшаш тор ўйловчи, дунёбехабар эмас. Мунисхоннинг ўзини тутиши, ўлим олдида қолдирган хати ҳам унинг ақлли, фаросатли, лекин шу билан ўз синфининг фарзанди эканини кўрсатади. Унинг бойлар синфи билан алоқани узолмагани ва шунинг натижасида ҳалок бўлгани ҳам унга нисбатан ачиниш кайфиятини уйғотади. Мунисхон янги тузум, янги ҳаётий шароитни хушламайди. Отаси ҳаёт давридаги турмуш, яшаш шароити ва умуман бойлика асосланган тузум Мунисхон онгига сингиб кетган. Баъзи-баъзида янги тузум, янги инсоний муносабатлар унга маъқул тушгандай бўлади. Лекин бу узоққа бормайди. Мунисхоннинг шундай бўлишига унинг ўзигина эмас, балки унинг муҳити ҳам айбдор эди.

Олий инсоний туйғулардан бири — муҳаббат ҳам Сорахонга насиб қилмади. У муҳаббат ўтида ўртамади. У мамлакатдаги сиёсий вазиятни ҳам Мунисхончалик тушунмади. Мунисхон эски тузумга қайтиш тарафдори бўлар экан (бу йўлда акалари олиб бораётган курашни би-

лади, уларга хайрихоҳлик билдиради), бундан маълум мақсадни кўзда тутади. Сорахон бўлса мақсадсиз одам, уни на муҳаббат, на санъат қизиқтиради. Мана шу хусусиятлар ёзувчининг ғашига тегади. Автор Сорахоннинг ҳар бир ҳаракатидан нафратланади. Мунисхон Сорахонга нисбатан хавфлироқ, чунки у кўп нарсадан хабардор, кўп нарсага ақли етади. Шундай бўлишига қарамай, Мунисхон ўқувчидаги Сорахондек нафрат уйғотмайди. Ҳаёт зиддиятлари, муаммолари, Мунисхоннинг ўз шахсий кечинмалари уни ўлим қучоғига итарди. Мунисхон шу ҳаракати билан ўз «гуноҳини» ювади.

Саидий ва Мунисхонларнинг тақдирлари, ҳаёт йўллари қандай ҳал бўлишидан қатъий назар, улар бир-бирларини севадилар. Ёзувчи уларнинг ана шу севгисини тасвиirlар экан, уларнинг портретларини чизишга ҳам алоҳида эътибор беради. Бу икки персонаж портрети Муродхўжа домла ва Сорахон портретлари каби бир ерда мукаммал чизилмайди. Ўқувчи ўрни-ўрни билан келтирилган айрим-айрим штрихлардан Мунисхон ва Саидий кўринишлари ҳақида яхлит тасаввурга эга бўлади. Уларнинг портретлари асосан бир-бирларининг нуқтаи назарлари, бир-бирларининг қарашлари орқали берилади. Бу эса ўз ўрнида персонажларнинг фақат «соғ кўринишинигина эмас, балки кўрувчининг унга бўлган муносабатини ҳам тасвиirlash имконини яратади.

Саидий асар воқеаларига кириб келар экан, унинг ташқи кўриниши қандай экани ўқувчига хабар қилинмайди. Биринчи марта Мунисхоннинг фикр-йлари орқали Саидийнинг гўзал йигит экани билинади. Саидий ва Мунисхон бир-бирлари билан тасодифий учрашиб, саросимага тушиб қолишади. Шунда Мунисхонга гўё бирор: «Э, ўл-а, шунаقا чиройли йигитни кўрсанг, юрагинг тутдай тўклилади», деб таъна қилаётгандай, у қизариб кетади. Мунисхоннинг саросимага тушиши Саидийнинг нима биландир унга маъқул келганидан далолат бериб турарди. Шундан кейин Саидийнинг «чиройли йигит» дейилиши саросималик «сирини» очгандай бўлади. «Чиройлилик» умумий тушунча. Ёзувчи Мунисхоннинг ўзидағи бу умумий таассуротни секин-аста конкретлаштириб боради. «Қизнинг ваҳима билан ўтмасланган зеҳни залнинг эшигидан чиққандан сўнггина аслига қайтди: ёнида соғлом, ҳар бир ҳаракатидан куч-қувват акс этиб турган, бежирим йигит боради».

Мунисхон Саидий билан яқиндан танишиб, уни бошқалар билан солиширади. «Мунисхоннинг назарида, Саидий нимаси биландир бошқа студентлар, ҳатто барча йигитлардан ажralади. У ювош, оғир, яна қобилгина йигит, гапга тез ту-

шунади ва киши қандай кайфиятда бўлса, шунга қараб муносиб муомала қиласди.

Мунисхон — гўзал қиз. Ўқувчи унинг қиёфасини Сайдийнинг қарашлари ва ҳис-туйғулари оша кўради ва унинг гўзал эканига дарров ишонч ҳосил қиласди. Чунки Сайдий кўнглига биринчи учрашуда муҳаббат солган, унинг тинчлигини ўғирлаган қизнинг чиройли бўлиши ўз-ўзидан маълум бир нарсадай туюлади. Сайдий ҳар гал Мунисхон билан учрашганда унинг юзида, ҳаракатида, кийинишида қандайдир гўзал томонларни кашф қилиб боради. У Мунисхонни биринчи марта паришонхотир бир кайфиятда учратади. Мунисхон иш билан идорага кириб кетар экан, Сайдийнинг кўз олдидан «қизнинг лаб тишлаб бош чайқashi», қулоғидан эса «майин товуши» кетмайди. Сайдий «юзи ташқарига ўғирилган бўлса ҳам, кўзининг қири билан қараб, Мунисхоннинг узун, қора киприклирига зеҳн» солади.

Мунисхоннинг кўзлари табиий гўзаллиги билангина эмас, балки ифодаси билан ҳам жозибалидир. «Бу лутфкорона кулиб, ҳаётга чақириб турган кўзлар» Сайдийни мафтун қиласди. Кейинчалик Мунисхон ўзгаради, у енгил табиатли аёллар йўлига киради. Шунда «Мунисхон илгариги Мунисхон эмас, илгариги кишини мафтун қиладиган кўзлар, энди маст кишининг кўзидай қизил ва қисилган, худди ёшланиб тургандай кўринади; хусусан кишига қараганда, атайлаб кўзларини сузуб қарайди ва шу қарави билан гўё «Мени яхши кўрмайсанми?» деганга ўхшайди».

Мунисхоннинг кўзлари унинг портретини, моҳиятини очувчи кучга әгаки, ёзувчининг Мунисхон қиёфасининг бошқа фазилатларини тасвирлаши учун эҳтиёж қолмайди.

Езувчи Мухторхон портретини ҳам фақат Мунисхон ва Сайдий нуқтаи назари, мулоҳазалари ва таассуротлари орқали беради. Бу табиий. Чунки Мухторхон образи кўпроқ асар қаҳрамонларининг шахсий ҳаётларида ўйнаган роли, ошиқмаъшуқалар ҳаётини поймол қилгани билан характерланади. Ўқувчи у билан бирон марта юзма-юз туриб гаплашмайди, уни кўрмайди. Бироқ Мухторхонни Мунисхон кўзлари билан кўрар экан, ўқувчида унга нисбатан маълум муносабат пайдо бўлади.

Мунисхоннинг тўйдан кейинги ҳолати янада ачинарли. Езувчи Мунисхон ҳаёллари, умидлари барбод бўлишини яна асосий масала билан — Мунисхон ҳаётининг маъноси бўлган мол-мулк билан, бойлик билан боғлайди. «Никоҳдан бурун Мунисхонга икки нарса тасалли берар эди: бири — Салимхон айтганча, никоҳдан сўнг кўникиш... иккинчиси — унинг бойлиги. Никоҳдан сўнг Мунисхон бунинг ҳеч қайсисини кўр-

мади. Мухторхон ҳамон ўша; илгари ҳам баҳарнав эди, энди ундан офтобда қолган чўмичнинг ҳиди келади. У ўпгандаги худди калтакесакнинг чирқиллашига ўхшаган бир товуш чиқади». Ўқувчи Мунисхон нуқтаи назаридан чизилган қиёфани кўрибгина қолмай, Мунисхоннинг унга бўлган муносабатини, унинг руҳий кечинмалари ва ҳатто ачинарли ҳолатини чуқур ҳис этади.

Мухторхон билан Мунисхоннинг ўзаро муносабати Сораҳон билан Саидий муносабатларини эслатади. Биз юқорида Сораҳонда Саидийга нисбатан аниқ муносабат йўқ, деган эдик. Чиндан ҳам Саидийнинг келишган, чиройли йигит эканнини Сораҳон билдими, йўқми? Мунисхондек гўзалга Мухторхон қандай қаради; унинг чиройлилигини ҳис қилдими, йўқми? Бу ҳақда романда ҳеч нарса дейилмаган. Ёзувчи учун персонаж портретини кўрсатиш, кўрсатганда ҳам ким нуқтаи назаридан ва қай шароитда кўрсатиш қанчалик аҳамият касб. этса, персонажларнинг бир-бирларига бўлган бефарқлиги, уларнинг кўринишларига бўлган эътиборсизлиги ҳам маълум мақсадга бўйсундирилган, асар ғоясини очишига шунчалик қаратилган ҳамdir.

Ёзувчи Мухторхон қиёфасини бирон марта чизмайдигина эмас, уни умуман «ўз-ўзича» кўрсатмайди, Мухторхонни Мунисхон билан бирон марта гаплаштиrmайди. Мухторхон Мунисхонни севадими, йўқми, ўқувчи билмайди. Унинг уйланишдан кузатган мақсади ҳам қоронғи. Унинг Мунисхон ҳақидаги фикр-ўйлари, қарашлари ҳам йўқ. Гўё Мунисхон билан боғлиқ масалалар унга тааллуқли эмасдек, унга қизиги йўқдек... Саидий эса қанча куйиб ёнмасин, қанча ҳаракат қилмасин, қўлидан ҳеч нарса келмайди. Лекин Мухторхон Мунисхонга оппа-осон етишади. Мухторхон Салимхонлар гурӯҳидаги одам, уларнинг мақсадлари бир; муҳаббатнинг қадр-қиммати бўладими, йўқми — бу ҳақда улар ўйлаб ҳам кўрмайди. Мухторхоннинг Мунисхонга нисбатан қарашлари бўлмаса ҳам, у дўстлари, ҳамфирлари юклаган навбатдаги топшириқни бажариб, унга уйланади. Характерлиси шундаки, Саидий устоз деб билган одамлардан бирортаси унинг муҳаббатини била туриб, унинг тақдирни тўғрисида ўйлаб ҳам кўрмайди. Чунки уларга севги-муҳаббат каби инсоний туйғулар бегона. Мухторхоннинг Мунисхонга уйланиши эса улар ўйлаган иш учун керак. Шундай қилиб, Мухторхоннинг Мунисхонни кўрмаслиги, унга ўз муносабатини билдиримаслиги ҳам улар қиёфасини кўрсатувчи воситага айланади (Ёзувчи шундай приёмни Сораҳон образига нисбатан ҳам қўллаган эди).

Умуман, «Сароб» романни ёзувчининг ижодий камолотида маълум босқични ташкил қилган асар сифатида, унинг ба-

дийи-тасвирий компонентлардан ва айниқса персонаж портретларидан фойдаланиш маҳорати ўсганини кўрсатувчи асар сифатида ўзбек адабиёти тараққиётида муҳим роль ўйнайди. Абдулла Қаҳҳор мураккаб ҳаётин жараён таъсирида фикр-ўйлари, хатти-ҳаракатлари ҳар дақиқа ўзгарувчи ва айни пайтда ўzlари ҳам ижтимоий муносабатларни ўзгартиришга интилувчи, ижтимоий табақалар тақдири билан узвий боғланган кишилар образини биринчи марта шу асарда кенг планда ишлади.

А. Қаҳҳор ижоди ҳақида гап кетганда, ёзувчининг услубига хос ихчамлик, унинг «иккинчи даражали» масалаларни сиқиқ бир тарзда беришини таъкидлаш керак. Бу фикр, шубҳасиз, ёзувчининг персонажни ўраб турган шароит ва пейзажни тасвирлаши, портрет чизиш санъатига ҳам тааллуқли.

«А. Қаҳҳор кўпроқ кишилар психологиясини бевосита тасвирлаш билан банд бўлганидан портрет ва пейзажга жуда кам эътибор беради», деб уқтиради адабиётшунос Матёқуб Қўшчонов¹. Шубҳасиз, сиқиқлик ва ихчамлик ҳам нисбий тушунча. Бунда масалага ёзувчининг муайян асар foясидан келиб чиқиб, қўллаган бадиий тасвир приёмлари нуқтаи назаридан ёндашиш тўғри бўлади. Унинг айрим ҳикояларida умуман ташқи қиёфа бир кичик деталь (масалан, «Уғри» даги элликбошининг пучуқлиги) орқали тасвирланади, бошқа асарларида портрет тасвири образ моҳиятини очишда асосий восита ролини ўйнайди.

Ёзувчининг «Қайгулар» ҳикоясида икки персонаж иштирок этади. Уларнинг номи ҳам, ёши ҳам, касби кори ҳам маълум эмас. Лекин бу икки шахс тўгрисида ўқувчи етарли маълумот олади. Бунда уларнинг кўриниши асосий роль ўйнайди. Абдулла Қаҳҳор ҳикоя қаҳрамонлари билан шундай таништиради: «Гўзал бир йигит эшикни қоқди. Чочига битта иккита оқ оралаган хотин чиқиб очди». Ёзувчи эшикни очган аёл ҳақида бошқа ҳеч нарса демайди. Йигитнинг гўзаллигини эса уч марта қайтаради. Лекин, воқеадан маълум бўлишича, бу гўзал йигит ниҳоятда гўзал бўлмаган қилиқлар кўрсатади — ўзидан катта аёлга шилқимлик қиласи. Аёл уни ҳақорат қилиб, уйидан ҳайдаб чиқаради. Бор гап шу. Лекин шу воқеанинг ўзиёқ йигитнинг ташқи гўзаллигини бир пул қилиб қўяди. Чочига бир-икки оқ оралаган хотиннинг салмоғи ошибб, унинг нуроний бир қиёфаси гавдаланади. Бу ерда

¹ М. Қўшчонов, «Ҳаёт ва маҳорат», Тошкент, Уззадабийнашр, 1962, 35-бет.

портрет деталлари улар қиёфасини, кайфиятини бевосита кўрсатмайди, балки улар билан содир бўлган воқеа қаҳрамонлар қиёфасига «таҳрир киритади».

А. Қаҳҳорнинг «Қизлар» ҳикоясида портрет бир жойнинг ўзида икки хил йўл билан чизилади. Ҳикояда портрети тасвирланган персонажларга нисбатан ёзувчининг қарashi йўқ, атрофдагиларнинг кўришлари бор. Лекин шу қарашга автор муносабати аниқ: «Лабининг икки бурчи ҳамиша оқариб туради дейишиади. Бу ҳам... қусур эмас, балки фазилат — маъсумлик нишонаси». Ёзувчи қаҳрамонини оқламоқчи бўлса ҳам, аслида уни қоралайди. Қачондан бери лаб бичилиши маъсумлик белгиси бўлиб ҳисобланади? Инсонга хос табиий нарсалар Нурматжонга қолганда қандайдир бошқача бўлиб қолади. «...қоматини айтинг, афсуски, минг афсуски, қўли иккита-да, йўқса энг чиройли наша чилимга ўхшар эди». Наҳот бир нарсага дафъатан ўхшаб кетгани учун бечора Нурматжон табиий фазилатлардан маҳрум бўлиши керак?! Ҳамма гап мана шунда — унинг ақлий тушунчаси шундай чегараланганки, табиий нарса унинг учун ғайри табиий, қандайдир фавқулодда воқеа бўлиб кўринади.

Бу персонаж асар бошланишида қандайдир нодир ва ноёб шахс сифатида тасвия қилинар экан, бу нарса кейинчалик воқеа тасвири билан очилади. «Қани, бирон холис одам бўлса айтсин: бутун Ўзбекистонни қидиргандা Нурматжонга ўхшаган йигитдан яна биронта топилармикан? Бўлган тақдирда ҳам, у ёшлигига ойнага қараб, Нурматжондай «мен қанақа хотин олар эканман» деган эмасдир. Баъзи одамлар — ҳазилми, чинми — ҳар хил гаплар тарқатишади: ёзда унинг кетидан пашша эргашиб юрар эмиш. Елғон! Нима қилади эргашиб?...». Ёзувчи қаҳрамон портретини одамларнинг унга бўлган муносабатларига гумонсираш, яна аниқроғи, пичинг ва қочириқ формасида беради. У айни бир пайтда айтилганларни инкор қиласида ва яна янги фактлар келтириш билан гумонларини кўпайтиради. Ёзувчининг мақсади (портрет чизиқларини кўрсатганда ҳам) — гумон орқали тасдиқлаш: у аслида шундай одамлар бизнинг замонда бўлмаслиги керак, лекин кам бўлса ҳам, учраб туради демоқчи. Қайсиadir бир кавакда қолиб кетган ўтмиш сарқитларини ўзида ташувчиларга нисбатан шафқатсиз бўлиш керак деган ғоя асарнинг қон-қонига сингиб кетган. Бу ғояни ўтказишда персонажнинг ташқи қиёфаси, тасвири ҳам фоши қилувчи роль ўйнайди.

«Тўйда аза» ҳикоясида ёши анчагина ерга бориб қолган доцент Мухторхон Мансуров ёшига, тутган мавқеига, маҳалла-кўй олдидаги обрўсига қарши иш қиласи — қизи тенги студенткасига уйланади. Шу воқеа содир бўлгунга қадар

маҳалла-кўйнинг унга бўлган ихлоси жуда баланд эди. Унинг ҳаёт кечиришида, маҳалла-кўйга бўлган муносабатида, юриш-туришида ибратли томонлари кўп эди: «Аммо лекин Мухторхон домла нафсамбирига одамнинг жони эди. Унинг хушфеъллиги, тўпорилиги... маҳаллада катта-кичик ҳамма билан саломлашар, ёш билан ёш, қари билан қари бўлиб гаплашар, хурсанд қиши билан чақ-чақлашиб, хафа билан дардлашар эди. Бу одам маҳалла ҳаётига, ҳар бир кишининг дилига кириб, шу қадар сингиб кетган эдикি, отпускага ё командировкага кетса, бутун маҳалла ҳувиллаб қолгандай бўлар эди». Ёзувчи Мухторхон Мансуров образини яратишда, унинг характерини очишида кўпинча маҳалла-кўйнинг унга бўлган муносабатидан келиб чиқади. Натижада қаҳрамоннинг ўзи эмас, балки унинг кирдикорларига, ҳаётига, юриш-туришига бефарқ бўлмаган кишиларда унинг қолдирган таассуроти биринчи планга ўтади. Ёзувчи Мансуровнинг ўзига бирор марта сўз бермайди, унинг фикр-ўйлари билан ўқувчини таништирумайди. Унинг «тўғри йўлдан» четга чиқишини эса унда рўй берган ташқи ўзгаришлар орқали кўрсатади. Агар дастлабки пайтларда «унинг битта-иккита қора тук чап бериб қолган оппоқ чўққи соқолни»дан ҳайратга келган («Ё пиримай, соқол ҳам одамга шунча ярашадими-я!») маҳалла-кўйдагилар кейинчалик «ҳанг-манг бўлиб қолишади: чол ўлгур соқолини, шундай чиройли соқолини таг-туги билан қирдириб ташлабди!».

Ёзувчи ўқувчини домла билан бирор марта ҳам «бевосита юзлаштирумайди», унда рўй берган ўзгаришларни, кўнглидаги фикр-ўйларни асосламайди. Чунки ёзувчи домла ҳаётида юз берган бу баҳтисиз воқеани тасодифий, охирига қадар ўйлаб қилинмаган бир ҳол, деб қарайди. Агар у озроқ фикрлаб кўрганда, балки шу воқеа содир бўлмасмиди! Ҳар вақт ҳар нарсада ҳамма учун ибрат бўлган бу одам шундай хотога йўл қўйдики, бунинг мантиқий натижаси сифатида ўзи ҳалок бўлди. Қаҳрамоннинг ўзи, маҳалла-кўй тинчлигини бузган, қариганида ўзига номуносиб иш қилиб, обрўсидан ажralган Мухторхон Мансуров ҳеч ким билан гаплашмайди, қилмишини оқлашга ҳаракат ҳам қилмайди. Агар шундай ишни маҳалланинг «оддий одами» қилганда, балки шунча шов-шувга сабаб бўлмас эди. Мухторхон Мансуровнинг ҳаракати ўз шаънига номуносиб бўлибгина қолмади, балки унга ишонган, ҳурмат қилган кишиларга нисбатан ҳурматсизлик ҳам бўлди. Бу хото шахсийликдан чиқиб, ижтимоий характер касб этди. Мухторхон Мансуров ўз хотти-ҳаракати билан социалистик ахлоқ нормаларига зид иш қилди ва шунинг қурбони бўлди. У ўзининг хотти-ҳаракатини ҳеч ўйлаб-

кўрмади (шунинг учун ҳам ёзувчи бир марта ҳам домланинг кечинмалари билан ўқувчини таништирамайди, уни ўйлаб турган ҳолда кўрсатмайди, унда рўй берган руҳий ўзгаришларга тўхтамайди). Шундай қилиб, автор домла қиёфасида рўй берган кичик ўзгаришни тасвирилаш орқали унинг ҳаётида содир бўлган катта хатони кўрсатади. Гарчи давр домланинг фақат ташқи кўринишидагина эмас, балки саломатлигига ҳам из қолдирган бўлса-да, домла ўзини сунъий равишда ўзгармоқчи бўлди. У бир амаллаб ташқи кўринишини ўзгартиб, яшаргандай ҳам бўлди, лекин табиат қонунини — кексаликни ўзгарта олмайди. Домла сиймосидаги инсон билан видолашиб у қазо этган куни эмас, балки ундан олдинроқ унинг тўйида рўй берган эди. Ана шу тарзда портрет Абдулла Қаҳҳорда персонажнинг бутун хатти-ҳаракатлари билан, ёзувчининг гояси, асарнинг композицияси билан боғланиб кетади.

Абдулла Қаҳҳор асарларида ижобий қаҳрамон портрети тасвирининг ўзига хос томонларидан бири шуки, ёзувчи ўз қаҳрамонларини жуда чиройли ва кўзга яқин қилиб кўрсатишига уринмайди. Ёзувчи қаҳрамонларининг қалби, ишлари гўзал деган мақсадда уларнинг ташқи тузилишига кўп эътибор бермайди. Лекин ўқувчи қаҳрамон ҳақида, унинг кўриниши ҳақида тўлиқ тасаввур ҳосил қиласди. Шундайлардан бири «Синчалак»даги Саида, «Минг бир жон» ҳикоясидаги касал Мастира образларидир. Адабиётшунос, У. Норматовнинг Мастира портрети муносабати билан айтган қуйидаги мулодазаси, бизнинг ҳам фикримизни ифодалайди: «Минг бир жон»даги Мастиуранинг сиртқи кўриниши бир қарашда ниҳоятда хунук. Аммо автор Мастиурани ниҳоятда севади, унинг зўр иродга эгаси экани учун ҳурмат қиласди. Авторнинг ўз қаҳрамонига бўлган муҳаббати шу қадар зўрки, у секинаста қаҳрамоннинг даҳшатли кўринишидан ҳам чирой ахтаришига тушади. Ёзувчи Мастиуранинг «ўлик, ҳақиқий ўлик, сап-сариқ тери-ю, сукдан иборат бўлган мурда» тарзидаги қиёфасини тасвиirlар экан, бирдан унинг «ўлим пардаси»ни қоплаган юзида чақнаб турган кўзлари»ни кўриб қолади. Бу «ҳаёт тўла кўзлар» гўё Мастира юзидан «ўлим пардаси»ни кўтариб юборади, «ўлик юзига жон киргизгандай» бўлади; китобхон ҳам энди Мастиурадан жирканмайди, аксинча, унинг «ҳаёт тўла кўзларига шайдо бўлиб қолади».

Мана, Мастира бутунлай тузалиб кетди. Уни хасталигида кўрган Мирраҳимов танимади. «Ўрта бўйли, хушқомат, вужудидан ёшлик кучи ва ғайрати ёғилиб турган қоп-қора жувон отда олма еб, йўл бўйида турар» эди. «Энди ҳам танимадингизми?— деди. Танидим! Фақат кўзидан танидим! Кулимсираб, оламга табассум сочиб турган бу жувон ўша

Мастура эди»². Мастурани чиройли қилган нарса унинг ҳаётни севиши, оптимистлигидир. Ёзувчи уни ишда кўрсатмайди, унинг ғалабалар билан тўлган меҳнатини тасвириламайди. Бу керак ҳам эмас. Чунки бусиз ҳам унинг умумий қиёфаси тасвири орқали унинг ажойиб қалбини, катта-катта ишларга қодир эканини ҳис қиласиз.

Ўзбек адабиётининг энг ёрқин образларидан Саида ҳам кўзга яқин қизлардан эмас. Унинг бир кўрганда кўзга яқъол ташланадиган, йигитлар бир кўришда ошиқ бўлиб қоладиган кўриниши йўқ. Лекин Саидага нисбатан ким лоқайд бўлиши мумкин, ким унга ўхашни орзу қилмас экан? У «баланд бўйли, жуда нозик», бармоқлари ингичка қиз. Унинг кийиниши ҳам оддий, «арzon чит бўлса ҳам, яхши тикилган» кўйлак устидан «йўл-йўл баҳмал жилетка» кийган.

Саиданинг портрети аввал ёзувчи томонидан объектив тарзда — холисона чизилади. Ўқувчи шундан сўнг унинг Қаландаровда қолдирган таассуроти билан танишади. Қаландаров унинг қош-кўзларига, юз тузилишига эътибор бериб ўтирамай, «мўртгина нарса экан», дейди. У: «Синчалак деган қушни биласизми, оёғи ипдай... Шу қуш «осмон тушиб кетса, ушлаб қоламан», деб оёғини кўтариб ётар экан!» деганида, Саиданинг ташқи кўринишига ҳам шама қиласи, албатта. У кейинчалик буни яна таъкидлайди: Мен Саидахонни (Қаландаровнинг биринчи марта «хон»ни кўшиб гапириши — M. C.) ўшанда синчалак деган бўлсанм, кейинроқ бу хатони ўртоқ Носировнинг олдида тузатган, колхозчиларнинг умумий мажлисида ҳам тўғрилаганман, ўзига қўл бериб, кичкина, нимжон бўлсанг ҳам, осмонни кўтаргулик қувватинг, ғайратинг бор экан», деганман».

Саиданинг «оддийлиги» қанча таъкидланмасин, барибир, ўқувчи уни севади. Чунки унинг иши катта. Ёзувчи Саидада фавқулодда бир ҳусн кўрмас, минглаб қизлардан ташқи чироий билан ажратмас экан, бошқача қилиб айтганда, у кўриниши билан типик экан, бу унинг қилган ишлари, ҳаётни тушуниши, ақл-фаросати, дунёқараши совет ёшлари учун типик воқеа эканлиги ифодасидир. Ёзувчи Саидани атайнин «кўримсизгина» қилиб, яхши иш қилиш учун чиройли бўлиш шарт эмас дейиш ниятидан узоқ.

Саида портрети ёзувчининг тасвиридан ташқари асосан Қаландаров «кўришида» берилади. Унинг фикри эса ниҳоятда субъектив: Саида Қаландаровдагина шундай таассурот қолдиради. Лекин уни севиб қолган Қозимбек отаси Қаландаров фикрига қўшилармикан?

² Шарқ юлдузи, 1964, № 9, 146—147-бетлар.

Умуман, «Синчалак»да ёзувчи ўз ҳикояларидагидек персонажларнинг портрет чизиқларини ниҳоятда қисқа — биринки деталлар билан (Эшон образи мустасно) беришга ҳаракат қиласди. Лекин бу характерли бир-инки чизиқ персонажни ўқувчи кўз олдидা тўла гавдалантиради. Қаҳрамоннинг ташқи қиёфасини бевосита ундан қоладиган умумий таассуротдан ажратиб бўлмайди. Қаландаровнинг шоп мўйлови, овози, Эшоннинг кийим-боши (амиркон туфлисига ўхшаш силлиқ қилиб тараған сочи)дан тортиб юришигача — ҳаммаси бу шахслар ҳақида тўла таассурот беришга хизмат қиласди.

Абдулла Қаҳҳор «Синчалак»даги персонажлар портретларини беришда хилма-хил йўл тутади. Бир тарафдан, ёзувчи китобхонни ўз қаҳрамони билан танишириб, қаҳрамон портретини турли оттенкалар билан чизади. Персонажнинг асардаги роли — мавқеига қараб қаҳрамонлар бир-бирларини кўрадилар.

Ёзувчи ниҳоят хуш кўрган образлардан бири, шубҳасиз, Саидадир. Абдулла Қаҳҳор одамларни унинг кўзи билан кўради, баҳолайди. Ёзувчи унинг дидига ишонади ва ўқувчини ҳам шунга ишонтиришга эришади. Саида қарашлари қанчалик «субъектив» бўлиб кўринмасин, унинг гапи, қарashi, одамларга берган баҳоси, бари бир, тўғри бўлиб чиқади. Унинг «қарашлари» ва «кўришлари» ҳам турлича. Баъзида Саида одамни «кўради»гина эмас, балки унинг шу кўринишига муносабатини ҳам билдиради: баъзида эса у персонажлар портретларини чизишда «иштирок» этмайди, лекин ёзувчи шунда ҳам Саида билан боғлиқ воқеани топиб тасвирлашга ҳаракат қиласди. Асар қаҳрамонларининг портретларини шу тариқа яратиш ҳам асар ғояси билан, ҳам муайян воқеада иштирок этувчи персонаж роли билан боғланади. Ёзувчининг асардаги барча қаҳрамонларни Саида қарashi, мушоҳадаси, муносабати призмаси орқали бериши бош қаҳрамонга ажратилган ғоявий-бадиий функцияларнинг хилма-хиллигини кўрсатади.

Саида — ниҳоят синчков раҳбарлардан. У ким билан гаплашмасин, ким билан танишмасин, кимни кўрмасин, унга бефарқ бўлмайди. Саида характеридаги синчковлик кишиларнинг ташқи кўринишига бўлган қарашлари орқали ҳам конкретлашади.

Козимбек образи ҳам, аслини олганда, ўзининг Саидага бўлган муносабати ва унинг ҳаётида ўйнаган роли билангина аҳамиятлидир. Ўқувчи Козимбек ҳақида кўп эшитади, лекин уни фақат Саида кўзи билан кўради. Биринчи марта Саида Козимбек қиёфасида «бўйни ингичка, калласи катта, шалпанг қулоқ бир боланинг кўзларини катта очиб ва лабларини қимтиб» тушган суратини кўради. Кейинчалик унинг касал-

лигини эшитиб, Қозимбек кўргани келади: «Бўсағада новча, бўйни ингичка, қулоқлари елпифичдай бир йигит пайдо бўлди. Саида дарров билди: доктор Қозимбек». Кўрамизки, Қозимбекнинг ҳар иккала портрети бир-бирига зид эмас: суратдаги ва ҳаётдаги реал Қозимбекнинг қиёфалари бир-бирларига икки томчи сув сингари ўхшаш.

Саида Қозимбек билан гаплашгач, уларнинг Қаландаров ҳақидаги фикрлари ҳам муштарак эканини билади. «Қаландаровнинг феълини билиш мумкин, лекин уни ҳеч ким бундай таъриф қила олмас эди. Бу гап Қаландаровни таърифлаш билан бирга Қозимбекнинг ўзини ҳам тўла-тўқис таъриф этгандай, бутун вужудини сиртдан, ичдан ёритгудай бўлади. Саиданинг қаршисида ҳатто шалпанг қулоги ўзига ярашган, истараси иссиқ, очиқ, хушчақчақ бир йигит ўтирас эди». Саида Қозимбекни яқиндан билган сари, унинг ташқи тузилиши ўзгармагани ҳолда, у Саида қаршисида чиройлилик касб эта бошлайди. Қозимбек соддалиги, тўғри сўзлиги, софлиги, принципиаллиги билан ҳаммага маъқул бўлади. «Қозимбек чап томондаги «ўғри тиши»ни кўрсатмасликка тиришиб» кулар экан, қиёфасидаги яна бир «айб»ни ошкор қилиб қўяди. Бироқ у бу ҳаракати билан ҳам ёшлигини, Саидага бефарқ эмаслигини кўрсатади.

Саида Қаландаровлар уйига борар экан, Ҳуриқисо бўлаjak келинини мақтайди: «— Оқи-оқ, қизили-қизил! Қошлари қундуздай! Кўчага чиқса, ҳамманинг кўзи ўшанда. Бир куни бозорга бориб узум олмоқчи бўлган экан, узумфуруш ангра-йиб, тарозиси қўлидан тушиб кетибди». Саида Ҳуриинсонинг гапи тўғри-нотўғрилигини ўйлаб кетади. Партком секретари бўлгани билан, ҳали ёш, турмуш кўрмаган Саида мақтоларга шубҳа билан қарайди. Бунинг сабаби «бўлажак» келин ота-онасининг Саидага ёқмаганида эди. «Саида раиснинг бўлажак келини Манзурахонни кўз олдига келтириш учун Қифоятхонга зимдан разм солди. Унинг жағи кенг, кўк томирлари бўртиб турган, икки чаккаси ичкарига ботган, пешаси кавушнинг бетига, йўқ, умуман, юзи мардона кавушга ўхшар эди».

Саида келган куни Манзурахоннинг отаси — Эшонни ҳам кўрган эди: «икки қаватли идора биносининг ўнг қанотига тақаб солингган баланд ёзги қизил чойхона зинасидан чамандагул дўппи, оқ шойи кўйлак ва шим кийган бир бола югуриб тушди ва чопқиллаганича Қаландаровнинг олдига келиб, қўл қовуштирди. Эшон бола эмас, ёши элликдан ошган кўса экан. Унинг бўйни тошбақанинг бўйинини эслатар, юзи сўриб ташланган ҳусайнини узумга ўхшар, лекин бир томонга силлиқ

қилиб таралган сочи оёғидаги амиркон туфлисидан ҳам қорароқ ва кўпроқ ялтиар эди».

Саида Эшонни жуда конкрет ва деталма-деталь кўради. Унинг кўринишигагина эътибор бермай, юриш-туриши, хатти-ҳаракатларини ҳам кузатади. Эшондек типларнинг тўла-тўкис таърифланишида жон бор. Чунки бундай шахслар ўзларини одам қилиб кўрсатиш учун ташқи кўринишларига алоҳида эътибор берадилар. Бундайларни аниқ ва тўла тасвирлаш характер чизиқларининг мукаммалланишини таъмин этади. Ана шундай одамларнинг фарзанди чиройли бўлишига Сайданинг ақли етмайди. Бу ҳақда ё Саида, ё ёзувчи очиқ бирор нарса демайди. Буни кейинчалик Саида Манзурани кўриб, ҳайрон бўлиб қолганидан ҳам билиш мумкин:

«...Саида Манзурахоннинг ҳусн-жамолига маҳлиё бўлиб, ҳамма нарсани унугиб, ўтириб қолди. Манзурахоннинг пайваста қоши, онасининг кўзидаёт ўйноқи, лекин қора учқун сочиб, ялт-ялт этган катта-катта кўзлари, нозик-енгиллигидан ҳавода қалқиб тургандай туюлган вужуди, тиниқ овози, қувноқ кулгиси...» уни мафтун қилди. Саида Қифоятхонни биринчи кўрганда, «унинг ўйнаб турган кўзлари бир лаҳзада хонтахтадаги турли закуска, шириналлик, кўкат қўйилган тарелка ва ликопчаларни, вино тўлдирилган рюмкаларни, Эшоннинг олдида турган шишаларни кезиб чиқди; ер остидан Қаландаровнинг юзига, Сайданинг билагидаги соатига, кўкрагидаги тўғнағичига тушди». Бир-бирига ўхшаш кўзларнинг ҳаракати улардан бирини чиройли қилса, иккинчисини хунук қилиб кўрсатади. Манзурахондаги одамийлик, одоб, мустақиллик унинг юзида акс этади. Шунинг учун у онасига ўхшаса ҳам, чиройли, олижаноб кўринади.

Саида Эшонни кўрди, у ҳақда ўқувчидаги маълум таассурот қолди. Лекин Эшон бутунлай ёмон эмас, унда қандайдир яхши томонлар ҳам бор. «Унинг дутор чалиши унча-мунча дутор машқ қилиб юрадиган Саидага манзур бўлди: Эшон дуторнинг қорнига бармоқларини текизмай, торига зўр келтирмай товушини жуда тиниқ чиқарар эди. Эшон иккита машқ қилиб, битта ашула айтди. Унинг овози ҳам ширали эди». Лекин унинг бутун борлиғи талантига ёпишмай турибди. Шунинг учун бўлса керак, кейинчалик унинг бу фазилати бошқа ҳаракатлари олдида аста-секин эсдан чиқарилади. Унинг инсонга завқ бағишилай олиш фазилати ҳам шахсий манфаатга йўналтирилгани, колхоз раисининг кўнглини олишга қаратилгани маълум бўлади.

Сайданинг атрофидагиларга бўлган қараши орқали ҳам унинг юзига хос томонлари очила боради. Бу ёзувчи ижодида

кенг қўлланиладиган приёмлардан бўлиб, биринчи марта бунинг ёрқин намуналари «Сароб» романида берилган эди.

Биз юқорида Саидани Қаҳҳор ижодига хос типик ижобий қаҳрамонлардан деган эдик. Саида баъзи ижобий қаҳрамонлардек кишиларда фақат фазилат кўрувчи ёки ахтарувчи, барчага баробар, қиласидиган иши, ўй-фикрлари фақат ибратлилардан эмас. У кимнидир хуш кўради, унинг фикри билан ҳисоблашади, ўз шахсиятига тегадиган гап бўлганида ҳам, шу нуқтаи назардан индамай қўяди (аччиғланганини ички нутқидан биламиз), кимнидир ёқтирилмайди, кимнингдир фикрларига, одамларга бўлган муносабатига ишонмайди. Буни Саиданинг одамларнинг ташқи қиёфасига бўлган муносабатидан ҳам билиш мумкин. Лекин шунга қарамасдан, Саидага бўлган муҳаббат бир даражага ҳам совимайди. Унда инсонга хос мураккаблик мавжуд. У схемалашган қаҳрамонлардан эмас.

Саиданинг диддилиги унинг одамларга, уларнинг ўй-жой тутишларига бўлган муносабатида кўринади.

Саида Қаландаровнинг ўйига келар экан, у ҳамма нарсага эътибор билан қарайди: «Қаландаровнинг ҳовлиси каттагина экан. Бир томонда унча дид билан солинмаган бўлса ҳам, каттагина иморат, сиркор айвон; унинг рўпарасида ҳовуз, чоғроқ шийпон, сим тортиб кўтарилиган ток, боғча — полиз... Лекин буларнинг ҳаммаси ҳовли эгасининг ҳаваси зўр-у, ҳафсала ва диди йўқлигини кўрсатиб турар эди: токнинг бир неча новдаси симга ўз ҳолича тармасиби-ю, қолгани ерда ётибди; мева дараҳтларининг остини, полизни шўра ва ғумай босиб кетибди; ҳовузнинг ўргасида аллақанаقا қофоз яшик ярмигача сувга ботиб, қийшайиб ётибди ва шапканинг гардиши, фанер парчаси сузиб юрибди; шийпон қаҷондир бир бўялган экан, ҳозир бўёқдан асар қолибди холос; айвоннинг зинаси олдида синиқ хум ағнаб, каттакон қадоқтош занг босиб ётибди». Саида ичкарига кирди, «у ёқ-бу ёққа кўз ташлади. Уй ҳам ҳавас, ҳафсала ва дид борасида ҳовлини эслатар эди: деразаларга ип билан осилган оқ крепдешин пардалар салқи; деразанинг чап томонига қўйилган чиройли ёзув столи устида каттакон сариқ самовар, жўмрагига ранг-баранг қофоз гуллар тиқилган бир талай чойнак, қопқоғи тоб ташлаган қизил патефон, столга тираб қўйилган қиммат баҳо триляж, унинг иссиқ чойнак излари қолган тумбасида керосин лампа, чақилган гугурт чўплари, каттакон қизил совун...». Албатта, уйга биринчи марта келган аёлларга хос кузатувчанлик орқали Саида уй эгасини билиб олмоқчи. Саиданинг қараши орқали Ҳуринисо ўқувчиларга таништирилади: дидсизлик, ҳафсаласизлик, караҳтлик каби Ҳуринисо

характеридаги етакчи чизиқлар Саида кўзига ташланади. Бу тасвирлар орқали ёзувчи фақат Ҳуринисони таърифлаб қолмай, балки шу билан бирга Саида характерини ҳам тўлдиради. Сайданинг диди, фаросати мана шу «кўриши» орқали ҳам конкретлаша боради. Мана шу ўлтириш-турнишига яраша Ҳуринисонинг тузилиши шундай: «жуда семиз, бақбақалари осилган, қип-қизил юзи ялтираб турган, афтидан ёшини белгилаб бўлмайдиган бир хотин». Раиснинг хотини бўлгани учун уйда одам ишлатиб, ташвишсиз ҳаёт кечиришга ўрганиб қолган бу аёл Сайданинг ғашини келтиради. Ёзувчи бир персонаж портретини иккинчи бир киши қарашида берар экан, биринчи навбатда, кўрувчининг муносабатига эътибор беради. Ҳуринисо ҳаёти Сайданинг ғашинг текканини ўқувчи Қаландаров орқали ҳам билади: «...пишиллаб, қарийб бутун ўринни эгаллаб ётган хотинини зўрға нари сурар экан, унинг бунчалик семириб кетганини энди пайқади ва Сайданинг гапи эсига тушди: «Наинки одам эгилиб, ариқдан бир пиёла сув ололмаса!».

Повестда эпизодик образларнинг портретлари батафсилроқ чизилганини кўрамиз. Бундай ҳолни ёзувчининг бошқа асарларида ҳам учратиш мумкин. Одатда ёзувчи персонажлар ҳаёти ҳақида, уларнинг ўтмишлари, қилмишлари ҳақида ҳикоя қиласар экан, уларнинг қандайдир томонларини ёрқинроқ чизади, кўзга ташланадиган, эсда қоладиган қилишга ҳаракат қиласди. Мана шундай образлардан бири Мехридир. Мехри анчагина «донги чиққан» аёллардан бўлиб, унинг номи Зулфиқоров номи билан тез-тез ёнма-ён келади. Саида у ҳақида кўп эшитган, лекин уни кўрмайди. Саида ўз ҳужрасига қайтса, уни бир аёл кутиб турган бўлади. «Саида унинг ким эканини билолмади, эшикни очди, чироқни ёқиб, аёлни ичкарига таклиф қиласди. Остонада оқ шойи кўйлак, тақдўзи дўппи кийган, ўзи қора, бўйни калта, пакана ва семизгина бир жувон пайдо бўлди. Саида курси қўйиб берди. Жувон қоп-қора қўлидаги оқ рўмолчасини маҳкам сиқимлаганича бориб курсига ўтиреди. Ўйни жуда ўткир совун ҳиди тутиб кетди». Бу Мехри эди. Саидага у ёқмади. Мехри босида ўтганларини бирма-бир айтиб беради. У ҳаётда адашди, енгил кун кўришга қизиқди, сохта обрў, шон-шуҳрат орттириш йўлидан боришга ҳазар қилмади. Унинг сири очилди, эл-юрт ичиди уятли бўлди. «Саида унинг силлиқ қилиб таралган ва йилтиллаб турган сочига, ўз аҳволини идрок этиб, мусибатдан бир пастда сўлиган чўтироқ, тўла юзига қаради...».

Ёзувчи Мехри портретини икки ерда чизади. Бир ерда унинг соф кўриниши бўлса, иккинчи ерда унинг руҳий ҳолатини ҳам ифодаловчи портрет деталларини беради.

Абдулла Қаҳҳор кейинги йилларда ёзилган асарларида («Даҳшат», «Минг бир жон») портрет яратар экан, ёзувчинг қаҳрамон кайфиятини ҳисобга олиши айниқса яққол кўзга ташланади. Қаҳрамон портретининг кенг ёки тор планда (деталлар, штрихларда) акс эттирилишидан қатъий назар, бу портрет персонажнинг руҳий ҳолати, муайян шароитдаги кайфиятига мослиги, алоқадорлиги билан характерланиди. Масалан, «Даҳшат»даги Додҳо, «Синчалак»даги Қаландаров образларини яратишда ёзувчи ниҳоятда қаттиқ қўллик қиласиди.

Үқувчи Қаландаровнинг шоп мўйловини эслаб қолади. Бу мўйлов воқеалар давомида бир неча марта эсланаар экан, у, албатта, Қаландаров кайфиятини кўрсатувчи деталга айланади. Қаландаров Саида устидан ёзган аризасини райкомга топшириб қайтгач, жуда ўзгаради, ўғлиниң ҳол сўраб: «Дада, эсон-омон келдингизми... тобингиз йўқми? деб берган саволига «Қаландаровнинг йўғон, фўлдираган ва шу билан бирга, ҳорғин товуши эшитилди». Қаландаровнинг бу ҳолатини унинг юзидан ҳам билиш мумкин: «Унинг юзи узоқ вақт фам-койиш тортгандай сўлган, кўз остлари нимадандир йилтирас эди». Қаландаров ҳолатини шундай кўрсатиш муайян шароит билан, кайфият билан боғланишдан ташқари умуман бу одам характерини тўлароқ кўрсатиш имконини ҳам беради. Қаландаров сингари қаддини роз кўтариб, керилиб айтгани-айтган, дегани-деган одамларнинг «синиши» ана шундай ачинарли бўлади; улар бир ҳолатдан тамом иккинчи ҳолатга ўтадилар. Бу нарса уларнинг ташқи кўринишларида ҳам кўзга ташланади. Биз кўриб чиқсан мисоллардан қўйидаги хулоса қелиб чиқади.

Ёзувчининг портрет яратиш усули фавқулодда хилма-хил ва оригиналдир. Деталма-деталь чизилган ташқи портрет билан бирга икки-уч бўёқ билан гавдалантирилган хомаки портрет... Образнинг маънавий моҳиятини очувчи ички инсоний фазилатлар билан уйғун ҳолда берилган ташқи аломатлар... Юзаки қараганда бир хил ва ўхшаш приёмлар билан чизилган ва аксинча қарама-қарши қутблардан иборат бир-бирига зид қиёфалар; штрихлар орқали берилган портретлар ва аксинча сербўёқ ва мураккаб портретлар... Бундай хилма-хил портретлар ёзувчига асар фоясини, характернинг психологик моҳиятини ёрқин очища катта ёрдам беради.

А. Қаҳҳор асарларида фақат тасвир учунгина чизилган портретлар йўқ. Образнинг ташқи қиёфасидаги ҳар бир

штрих одатда характернинг янги бир хислатини очишга, авторнинг бу персонажга бўлган муносабатини кўрсатишга ёки бошқа персонаждаги бу образ учун муҳим хусусиятни, демак, бутун асар учун ҳам муҳим ҳисобланган нарсани қайд этишига қаратилган бўлади. Шунинг учун ҳам портрет А. Қаҳҳорнинг индивидуал ижодий услуби учун образ яратишнинг асосий приёмларидан бири бўлиб хизмат этади. Кишиларнинг ташқи қиёфасини ички психологик мазмун билан чамбарчас бойлай билишлик бадиий воситаларнинг шундай бир гармониясидирки, бу пировардида тўлақонли ёрқин ва мураккаб образни вужудга келтиради. А. Қаҳҳорнинг образ яратиш соҳасидаги йўли ана шунга асосланади.

* * *

Абдулла Қаҳҳор персонажлар портретини ҳар доим ҳам батафсил чизишга ҳаракат қилмайди. Лекин кўринишдан унча аҳамиятсиз бўлган бир-икки чизиқлар (персонажларнинг кулгиси, юз тузилиши, овози сингари) қаҳрамон қиёфасини белгилашга ёрдам беради. Бундан ташқари портрет персонажларнинг диалоглари, нутқлари ва кийим-бошлари орқали янада конкретлашади. Бу эса ўз ўрнида қаҳрамонларнинг ички ва ташқи қиёфаларининг бирлигини ва бир-бирларини ўзаро тақозо этишини белгилаб беради. Кишиларнинг ташқи портрети, қиёфаси, диди уларнинг кийинишида ҳам намоён бўлади. Кийиниши одатда киши кўринишини, портретини тўлдирадиган элементлардан саналади.

Абдулла Қаҳҳор қаҳрамонларининг кийинишига у қадар катта аҳамият бермайди. У одатда персонажларнинг кийимларини бир-икки деталь билан характерлашга эришади. Ёзувчининг портрет чизишдаги кўпгина тасвир воситаларини биз кийим-бош тасвирида ҳам кўрамиз. Бунда қаҳрамон кийимларини тасвирлаш ҳам маълум мақсадга бўйсундирилади. Қаҳрамон кийимлари одатда унинг портрет чизиқлари билан бирга тасвирланади.

Саидий Мунисхонларникига биринчи марта таклиф этилар экан, унинг уйини, киши кўзидан яширган турмушини тасаввур қилолмайди. Саидий севгилисини биринчи марта уй шароитида кўрар экан, кўзига у янада гўзал ва шу билан бирга дам умид бағищловчи, дам ниҳоятда узоқ бўлиб кўринади. Мунисхон «енгил кийимда, узун ва йўғон-йўғон икки кокилини бошига ўраган, унинг устидан оқ тақдўзи дўппи кўриниб турар эди».

Саидий мол-дунёга, кийим-бошга, савлатга алоҳида эътибор беради. Ундаги бу хусусиятни ёзувчи аста-секин ўстириб

боради. Саидий тушунчасича, давлат билан бирга кишига ишонч, савлат, лавозим ҳам келади.

Саидий редакциядан хат олади. Кўпдан бери кутилган бу хабарда у редакцияга таклиф этилган эди. «Кираверишда ўнг томонга қўйилган абжаққина стол ёнида бир йигит ўти-рар эди. Уйнинг тўридаги, кўринишда каттароқ одамнинг ўрни кўринган стол устида даста-даста қофоз ётар... Саидий тўғри серсавлат стол ёнига бориб кутди». Саидий тузукроқ кийинган одамни кўрса, ўзини ниҳоятда камситилган деб билади, ўнғайсизланади. «У бир куни китоб магазинида ўзининг ҳаммактаби Жамол Қаримийни учратди. У йўғонлашган, семирган, танимаслик ҳолга келган, шу китоб магазинининг хўжайинидай мағрут қадам ташлаб айланиб юрар эди. Унинг устидаги кийими ва савлатини кўриб, Саидий унинг яқинига боргани ийманди, ўзи кўриб, қўл узатгандагина у билан сўрашди.

— Ҳимм,— деди Жамол Қаримий қўлидаги кумушдан нақш солинган йўғон ҳассасини ликиллатиб,— ўқиётибман! денг. Қачон мулла бўласиз?

Саидий унинг олдидаги ўзини жуда оёқ остида қолган сезди.

Ёзувчи Жамол Қаримий кийимини деталма-деталь тасвирламайди. Саидий унинг кийим-бошини умуман кўрди. Шу умумийлик бир деталь билан конкретлашди, энди бу одам кўринишини, қиёфасини ёритгандай бўлади. Бу деталь Жамол Қаримий қўлидаги кумушдан нақшланган йўғон ҳассадир. Бу типдаги одамлар кийим-бошига зеб бериш орқали ўз мавқенини кўтармоқчи, қашшоқ қиёфасини яшиromoқчи бўладилар. Бундайлар «қуруқ» савлати билан обрў орттиришга, кишилар кўзига ташланиб туришга уринадилар. Бу бежиз эмас экан. Саидийдек ақлли, ёш, талантли (бу Саидий душманлар йўлига кирмаган, кўнгли яхши орзулад билан тўлган даврда эди) бир йигит Жамол Қаримий савлати олдида ўзини жуда кўримсиз ҳис қиласди.

Жамол Қаримий кўринишини, ундағи характерли белгиларни Саидийнинг кўзи билан беришда яна бир маъно бор. Саидий поччаси билан орани очиқ қилгандан кейин аввалги дўстлари, таниш-билишларидан ажралади. Энди у янги бир ҳаётга қадам қўяди, янги одамлар билан танишади. Устки ялтироқликка катта эътибор берувчи Саидий ўзининг бечоралигидан ҳар доим озор чекади, азобланади. Саидий характеридаги бундай шуҳратпарастлик, молпарастлик хусусиятлари аста-секин ривожлана боради ва уни душманлар лагерига олиб келган, Муродхўжа домлага кўёв қилган омиллардан бирига айланади. Ёзувчи Саидийнинг бу хусусиятидан

келиб чиқиб, Муродхўжа домла уйини, бойлигини батафсил тасвирлайди.

А. Қаҳҳор салбий персонажлар кўринишидан ғайри табиий юз чизиқларни ахтармайди, лекин, барибир, улар қиёфасидаги қандайдир аломатга разм солиши билан ўқувчидаги үларга нисбатан нафрат уйғотади. Шу билан ёзувчи ўзи аралашмаган ҳолда, персонажларни китобхонга ҳавола қилгандай бўлади.

Совет тузуми маъқул тушмаганлардан бири Ҳайдарҳожидир. Саидий уни биринчи марта бир ўтиришда кўрган эди. «Ҳайдарҳожи қирқ ёшлардаги, ўрта бўйли, озғин, қораҷадан келган бир киши бўлиб, кийган кийими уни яна ҳам кўримсиз қилар эди. Бошида ёғи чиқиб, чармдай қотиб кетган дўппи, устида кирлиқда дўппидан қолишмайдиган румча камзул; белбогини анча юқоридан боғлагани учун қорни кўкрагининг ярмидан бошлангандай кўринар эди. Ҳаракатлари, ўзини ҳаммадан паст тутишга уринишлари уни янада кўримсиз қилар эди. Ҳайдарҳожи портретини унинг кийимларисиз, ҳаракатларисиз тасаввур қилиш қийин. Биринчидан, Ҳайдарҳожининг табиатан ифлослиги унинг кийинишидан ҳам маълум, иккинчидан, бу унинг ниқоби ҳамдир. У ўзига киши эътиборини тортмоқчи эмас, қилаётган ишлари, бойлик тўплаш йўлида олиб бораётган яширин ҳаракатлари шу ниқоб остида қилинади. Ёзувчи Ҳайдарҳожининг кийим-бошига нисбатан атрофдагиларнинг қарашларини таъкидлаш орқали ҳам унга бўлган муносабатларини билдиради (Саидий Ҳайдарҳожини биринчи марта кўриб, ғаши келади, уни назар-писанд қилмайди. Аммо Мирзамуҳиддин унинг «пилтаси чиқсан дўп-писини» тож ўрнида кўради).

Шундай қилиб, персонажларнинг кийими ҳам бирор мақсад учун хизмат қилиши керак. Бир кичик деталнинг катта вазифани бажариши асарнинг таъсирли, жозибали чиқишига ёрдам беради. Биринчи кўрганда ғаши келган Саидий кейинчалик «Ҳайдарҳожингиз дуруст одам экан,— деди... орадан бир неча кун ўтгандан сўнг Мирзамуҳиддинга.— Даствлаб кўрганимда нафасим қайтган эди. Яхши улфат, кўп фазилатлари бор кўринади». Саидий Ҳожини таниди, йўллари бир эканини билди, табиийки, бундай одам унга ёқар эди.

Мана, Шарофат Сидиқжонни қидириб колхозга келади. Колхоз энди ташкил бўлаётган вақт, колхозчиларнинг ясантусан қилиб юришга шароитлари ҳам, вақтлари ҳам йўқ. Шундай экан, колхозга «..қизил паранжи ёпинган, хонатлас кўйлак ва амиркон кавуш-маҳси кийган, болали бир жувон» нинг келиши дарров маълум бўлиб қолади. Сидиқжон ҳам хотини билан орани очиқ қилиш, боласи тақдирини белгилаш

учун судга борар экан, «судда нима дейишдан ҳам кўра Шарофатга рўпара бўлишини кўпроқ ўйлаб, кўп ясанди: Сариқ хиром этигини, беқасам тўнини, чуст нусха дўпписини кийди; соқолини қирдириб, мўйловини икки томонга шопдай қилиб бураб қўйди; колхознинг энг яхши отларидан бири — боши кичик, бели узун, сағриси ярқираган, ҳамиша гижинглаб турадиган саман отини минди». Сидиқжоннинг Зуннунхўжалар оиласида турган вақтини, кунда эшитадиган миннатини («увада, ислиқи тўн, чилвир белбоғини») эсланса, унинг ўзига бундай оро беришининг мазмуни чукурлашади. Афсуски, Сидиқжоннинг ҳаракатлари бекор кетди, ўз ўйи, мақсадлари, ташвишлари билан банд бўлган Шарофат унга диққат қилмади, агар диққат қилган бўлса ҳам, буни ўзининг бирор ҳаракати билан билдирамади, лекин Сидиқжон назарида, «у эгнида жигарранг эски гулли чопон, сариқ кўйлак, бошида гажимлик қора рўмол» билан жуда ночор кўриниб кетди.

Ёзувчининг бутун ижодий манерасига хос бўлган «хасислик», ёрдамчи тасвирий воситаларга бўлган «қаттиқ қўллик» қаҳрамонларнинг кийим-бошига бўлган муносабатида ҳам кўринади. Ёзувчи қаҳрамонлар кийими тасвирига ниҳоятда кўп нагрузка юклайди. Ёзувчи «Миллатчилар» ҳикояси асосига олинган воқеа тасвири орқали революциядан илгариги ҳаётнинг маълум бир томонини кўрсатишга ҳаракат қиласди. У содир бўлган қизиқ воқеанинг иштирокчилари — асар персонажларини реал тасвиirlар экан, унга уларнинг кийим-бошини кўрсатиш қўл келади. «Мирза Баҳром қайрилма ёқа жужунча камзулининг қўйин чўнтагидан кичкина дафтарча чиқариб Тавҳидийга берди ва бинойи иш қилгандай гердашиб, хитойи елпуғич билан ўзини елпиди». Мирза Баҳромнинг кийими у яшаган давр зиёлиларининг маълум гуруҳини тасаввур қилиш имконини беради. Мирза Баҳромнинг фикрлаши, гапириш манераси, ўзини тутиши — ҳаммаси унинг кийинишига мос. Бунда қандайдир ғайри табиийлик сезилмайди.

Ҳар бир жамият, давр кишиларининг кийинишида ўзига хос хусусиятлар кўзга ташланади. Одат тусига кирган бундай қоидаларнинг бирор одам томонидан бузилиши сезилмасдан қолмайди, албатта.

Маҳалланинг энг обрўли одамларидан Мухторхон Мансуров («Тўйда аза») ҳаётида ўзгариш рўй берди. У хотини ўлгач, бошқага уйланишга қарор қилди. Бу гапдан хабар топган маҳалла-кўй жуда хурсанд бўлди. «Ҳеч ким қариган чоғида жуфтидан қолмасин, осонми, киши нима бўлишини билади, бош ёстиққа тегиши бор... Қари одамга маҳрам керак...». Лекин маҳалла оқсоқолининг ўзини тутиши негадир

ғалатироқ бўлиб қолади. «Домла бозор қилишни, магазинга киришни жинидан баттар ёмон кўрар эди, кимдир уни универмагда очередь турганини кўрибди; эртасига чойхона олдидан чамандагул дўппи кийиб ўтди». У бу ҳаракати билан маҳалладагиларнинг тинчлигини бузди, одамлар нима бўлаётганини билолмай қолишиди. Маҳалладаги бир йигит «домлани шаҳарнинг нариги чеккасидаги паркда кўрибди. Домла бошида чамандагул дўппи, эгнида калта ва тор шим, катак кўйлак, енгини баланд шимарган, билагида каттакон тилла соат, ўзи якка пиво ичиб ўтирган эмиш!». Домланинг ўзига ярашмаган бу ҳаракатлари, кийим-бошлари унинг ўзига но-муносиб хотин топганидан дарак берар эди. Домланинг танлаган хотини ёш студентка бўлиб чиқади. Ёзувчи бу қизнинг портретини тасвирлаб ўтиrmайди. Бир кичик деталь билан (у ҳам бўлса маҳалла аёлларининг кўришида) характерлайди! «...дарҳақиқат ёш, лекин худди қизиқчиликка семиргандай юм-юмалоқ». Бу қизнинг гавда тузилишидаги номутаносиблик нимагадир ишорадек бўлиб туюлади. Ёзувчи унинг кўриниши, портрети ҳақида кўп гапирмайди. Асосий диққат унинг кийинишида. Бу унинг ихтиёридаги нарса, хоҳишини белгиловчи омиллардан бири: «...эгнида енгизиз қизил кўйлак, бошида попушакнинг тожига ўхшаган, лекин қизил шляпа; қўлидаги сумкаси, оёғидаги пошнаси бир қарич туфлиси ҳам қизил». Уни маҳалла аёллари бир сўз билан характерлашди — «хўроқанд». Ким билади, у нима ўйлаб чолга турмушга чиқди? Ҳикояда бу ҳақда ҳеч нарса дейилмаган. Унинг кийиниши шу саволларга жавоб беришда ёрдамчилик ролини ўйнайди. Гап унда ҳам эмас, гап домлада. Лекин шунга қарамасдан, домлани шарманда қилган аёлнинг қиёфаси ҳам диққатдан четда қолмаган, бунинг учун унинг кийинишини кўрсатиш кифоя.

Ёзувчи бу образни яратишида оригинал йўл тутган. Мухторхон Мансуров образи асосан атрофдагиларнинг унга бўлган муносабати, қарashi, ҳаётида рўй берган воқеани баҳолашлари орқали яратилган. Унинг портрети ҳам, кийиниши ҳам шу йўл билан кўрсатилади. Кўрган одамнинг ўзи ҳам йўқ. У ҳам ўз навбатида бирордан эшишган; кимдир кўрган, кимдир айтган. Ёзувчи учун Мухторхон домлани шахс сифатида кўрсатишдан кўра унинг қилмишини кўрсатиш аҳамиятироқ. Шунинг учун ўқувчининг домла билан бевосита танишиши шарт эмасдек туюлади. Ёзувчи асарларида бундай образларни шартли равишда асарда бевосита иштирок этмаган образлар дейиш мумкин. Бундай образлар одатда бошқа одамлар орқали, уларнинг қарашлари, талқинлари, тушунишлари орқали тасвирланади. Уларнинг фикр-ўйлари йўқ. Воқеа

улар атрофида содир бўлгани сабабли улар асар марказига қалқиб чиқадилар. Улар асардаги бирор воқеанинг ё асосий сабабчиси сифатида, ё шу воқеада, ёки асар қаҳрамони ҳәтидаги муҳим роли билан ҳар доим асар саҳифаларида яшайдилар.

Образларни шу йўсинда яратиш Абдулла Қаҳдор ижодига хос бўлиб, буни унинг бошқа асарларида ҳам учратамиз. Масалан, «Синчалак» даги Қодиров ҳар доим Қаландаровнинг ўларида «яшайди», бугина эмас, Қаландаровнинг Қаландаров бўлиб қолишига сабабчилардан бири ҳам унинг ўзи. «Кўк конверт»даги Латофатхон ҳам воқеанинг бош сабабчиси. Агар Қодиров бир дақиқа бўлса ҳам, воқеага ўзи аралашса, Латофатхон ўқувчига «қўринмай» ўтади. Асарнинг бош қаҳрамони Эркабой Мирзаев ёш Латофатхонни кўрмай, унинг хати орқали ошиқ бўлган. Табий, у Латофатхонни кўрмасдан, тасаввур қилмасдан иложи йўқ. Ўқувчи ҳам Латофатхонни фақат Эркабой Мирзаевнинг тасаввури ва ҳиссияти орқали кўради.

«Қизлар» ҳикоясининг бош қаҳрамони Нурматжон эса икки опа-сингил — Каромат ва Адолат хаёли билан яшайди. Лекин бу қизлар ҳақида Нурматжондан эшитилган умумий маълумотгагина эгамиз.

Дарҳақиқат, Нурматжон хаёлларининг, режа ва ўйларининг сабабчиси бўлган қизлар асарда кўринмайди. Бир вақтлар Тошхўжа эшонга назр қилинган қизлар Нурматжоннинг ўйларидан бутунлай бехабар. Қизларини не-не умидлар билан эшонга назр қилган уларнинг онаси янги замон келиши билан ваъдасини унтиб қўяди. Тўғрироғи, давр кампирни ўзгартиради, уни янгича фикрлашга ўргатади. Лекин Нурматжонга замон таъсир қилмади, отаси ўлгач, унинг бошқа молдунёси қатори назр қилинган қизлар ҳам унга мерос қолишига у ҳеч шубҳа қилмайди. Шунинг учун ёзувчи Нурматжонни қизлар билан эмас, балки уларнинг онасини — Нурматжоннинг шу кўйга тушишига сабабчи бўлган шахс билан учраширади. Қизлар эса фақат Нурматжон хаёлларида яшовчи персонажлар сифатида тилга олинади.

Ёзувчи бу уч асарида бевосита иштирок этмаган персонажларга юклатилган вазифаларга кўра уларга турли ўрин беради.

Латофатхон Эркабой Миразевнинг ошиқлик кўйига тушишига сабабчи, шунинг учун унинг номи, қилиқлари, суратдаги қарашларининг мазмунини келтириш қонуний. Латофатхон истаса-истамаса, совғасини «Фарбий фронт, ўнтадан ортиқ фашистни ўлдирган қора қош, қора кўз йигитга тегсин» шар-

ти билан юборар экан, шу билан ўзига Эркабойнинг сиртдан кўнгил қўйишига асос берган.

«Қизлар»даги Адалот ва Кароматларга келсак, улар айбиз деб аталгани билан унда қизларнинг бўлмасликлари, улардан кўра воқеанинг сабабчиси, Нурматжоннинг куйишида бош айбдор бўлган она образининг биринчи планга ўтиши ўз-ўзидан тушунарлидир.

Худди шундай ҳодисани «Санъаткор» ҳикоясида ҳам учратамиз. Асарнинг бош ва ягона персонажи артист хаёлида, гапларида, мушоҳадаларида конфликтнинг бош сабабчиси — тракторчи образи гавдаланади (хизматчи образи ҳам трактористдек фақат артист характеристикасини тўлдириш учунгина олинади). Санъаткор кўришида, таассуротида «субъектив» тарзда характерланган тракторчи образи пировардида обьектив аҳамият касб этади.

Тракторчининг ҳам, санъаткорнинг ҳам исми-шарифи йўқ. Лекин улар умуман тракторчи, умуман санъаткор эмаслар. Тракторчи билимдон, саводлигина эмас, балки дангалчи ҳам; шарт гапириб санъаткорнинг дилини сиёҳ қиласди, тинчлигини бузади. Санъаткорнинг билимсизлиги, маданиятсизлиги айтган ашуласининг маъносини билмаслигида, сўзларни нотўғри қўллашида ҳам, ўз камчилигини тан олмаслигида ҳам эмас, балки одамларни табақаларга бўлишида. Унга таъсир қилган нарса танқиднинг тўғри-нотўғрилигида эмас, у буни ўйламайди, балки «тракторист танқид қилганига санъаткор асти чидай олмас эди: трактор қаёқда-ю, масалан, «Чорзарб» қаёқда, тракторист қаёқда-ю, ашулачи қаёқда!». Гап мана шунда.

Санъаткорнинг танқидчидан олган биринчи таассуроти — ким танқид қилганигидадир. Бир оз вақт ўтиб, биринчи таассурот алами босилгандан кейин санъаткор яна тракторчини эслади, яна тутоқиб кетди: «ҳеч бўлмаса айтадиган ашулангни ўрган, сўзларини тўғри айт» эмиш!. Тракторчининг танқиди энди бир оз конкретлашди, унинг нимага танқид қилгани маълум бўлди. Артистдан овқат ўтмади, чой ичди. Бироқ унга «...туриб-туриб наша қилас» эди: «Ашулани меҳайлистик айттар эмишман!». Демак, бу гапдан маълум бўлишича, санъаткор тракторчи айтган гапини, ишлатган сўзини тушунмайди ҳам. Шунинг учун «товушим ёмон бўлса, пластинкага оладими?» деб ўзини оқламоқчи ҳам бўлади. Ниҳоят бўғилиб кетиб, тракторчининг гапини эслайди: «...— лабингдан бўлса олсан, эй шакарлаб» деганим у кишига ёқмабди, «бўлса» эмас, «бўса» эмиш!. Шундай қилиб, персонаж ўзини танқид қилувчи билан воқеа давомида сиртдан

уришиб, обрў талашар, ўзининг ҳақ эканлигини исботламоқчи бўлар экан, бевосита иштирок этмаган образ ўқувчи кўз олдида озми-кўпми гавдаланади. Бу билан ёзувчи қаноатланмайди. Санъаткорнинг тракторчи билан «сиртдан» олиб борган мунозараси камлик қилгандай, воқеага санъаткорнинг хизматчиси ҳам аралашади. Санъаткорнинг тракторчи билан бахслари унинг хизматчига айтган гаплари олдида ҳолва бўлиб қолади. Энди унинг оддий алфавитни билмаслиги ҳам ошкор бўлади.

«Қўшчинор»даги райком секретари Аҳмедов ўзбек адабиётida яратилган партия ходимлари образининг энг ёрқин, ҳаётийларидан биридир. Бу образ деярли асарнинг бошидан охиригача тилга олинади. Лекин асадардаги воқеаларда унинг ўзи кам кўринади. У асар воқеаларига аралашган деярли ҳамма персонажлар тилида яшайди. Аҳмедовнинг айтганларини ҳар бир персонаж ўз савияси, бўлаётган воқеаларни тушуниш даражасига қараб қабул қиласди. Улар Аҳмедов гапларининг ўзига керакли, фойдали томонларини эслаб қолади ва ўрни билан унга мурожаат қилиб туради. Аҳмедов воқеаларга ўзи аралаша бошлар экан, у ўзи ҳақида айтилган гапларни тасдиқлаши билан бирга, бундан кейинги воқеаларга, персонажларга алоқадор бўлган фикрни билдиради. Шундай қилиб, партия вакили Аҳмедов образи ҳаётий бўлиши билан бирга у асарда меъёри бузилмаган ҳолда, керакли ва зарур ўринларда бевосита иштирок этади, бошқа вақт эса у айтган фикрлари билан асар воқеаларида қатнашаверади.

Шу типдаги мисолларни ёзувчининг бошқа асарларида, чунончи «Миллатчилар»даги Қосимжон бойвачча, «Хотинлар» ҳикоясидаги Умри образларида ҳам кўриш мумкин.

Абдулла Қаҳҳор асарларида персонажлар портретини, асарга персонажларни киритиш йўлини ва қаҳрамонларни ўраб турган шароитни кўрсатиш масалалари эсар foяси билан боғланади. Бу фақат Абдулла Қаҳҳор учун характерли бўлмасдан, деярли ҳамма ёзувчиларга озми-кўпми таллуқлидир.

Абдулла Қаҳҳор ўзбек адабиётida образ яратишдаги тасвирий воситалардан бири бўлган портрет имкониятларини кенгайтирди, қиёсий тасвирининг ажойиб намуналарини яратди. Ёзувчи ўз қарашларини, персонажга бўлган муносабатларини унинг портрети тасвирига сингдириб юборди. Портрет тасвири автор ўтказмоқчи бўлган фикрни ўзида усталик билан «яширди».

ФОЯ, ОБРАЗ, ПЕЙЗАЖ

«Адабий асарнинг идеяси йўқолса эмас,
хатто сусайса ҳам ҳеч қандай ташқи эфект
уни адабий асар ҳолида тутуб туролмайди.
Идеяга етган зарарни ҳеч қандай ташқи
эфект тўлдира олмайди».

Абдулла Қаҳҳор

А. Қаҳҳор ижоди устида баҳс борар экан, одатда ёзувчининг пейзажга кам эътибор билан қарashi ҳақида галирадилар. Чиндан ҳам Абдулла Қаҳҳор ўз қаҳрамонларини куршаган табиат тасвирини жуда ихчам формада беради, лекин бу нарса унинг асарларида пейзажнинг эмоционал таъсир кучидан маҳрум эканлигини англатмайди. Аксинча, А. Қаҳҳор асарларида тасвирланган воқеа билан шароит ўртасидаги узвий муносабат бениҳоя ёрқин. Ёзувчи жуда усталик билан чизилган фонда характерларни ҳаракатда, доимий ўзгаришда кўрсатади.

Бадиий асарда пейзажнинг қўлланиш йўллари ниҳоятда хилма-хил бўлиб, у ёзувчининг манераси, ўзига хос стили ва асар жанри билан белгиланади. Пейзажни тасвирлашдан кузатилган мақсадлар ҳам турлича. У гоҳ воқеа содир бўлган вақтни билдиради, гоҳ қаҳрамонлар кайфиятини кўрсатишга ёрдам беради, гоҳ асар воқеаларини бир-бири билан боғлаш вазифасини ўтайди ва бошқалар. Асарда ўринли ишлатилган пейзаж одатда ёзувчи ғоясига бевосита алоқадор бўлади. Табиат манзаралари тасвири бирор ғоявий вазифани бажармас экан, у асарда ҳеч қандай аҳамиятга эга бўлмайди.

Абдулла Қаҳҳор, портрет, кийим-бош, табиат лавҳалари ва бошқа майда деталлар, имо-ишоралардан қаҳрамонларнинг психологиясини, кайфиятини, уларнинг асар воқеаларида тутган ўрнини беришда максимал фойдаланади. Ёзувчи асарларида, айниқса ҳикояларида табиат тасвирига катта

эътибор билан ёндашилганини кўриш мумкин. Унинг ҳикояларида табиат тасвири лўнда ва сиқиқ бўлиши билан авторнинг лирик чекинишлари сифатида эмас, балки қаҳрамонлар кайфиятига, тасвирланаётган воқеаларга, шароитга бевосита алоқадорлиги билан характерланади.

«Сароб» да қаҳрамон қарашларини, кечинмаларини уни ўраб турган нарсалар тасвири ва биринчи навбатда пейзаж орқали беришга ҳаракат қилинган. Мунисхон ўтмишни қумсади, отаси ҳаёт вақтларини эслайди. У борлиқдан бир дақиқа узилиб қолади. Ёзувчи Мунисхон хаёллари орқали унинг ўтирган ерини, ўтмиши ва ҳозирги пайтини беради ва бу билан Мунисхоннинг ҳаётга, янги тузумга бўлган муносабатини янада конкретроқ қилиб тасвирлайди. «Мунисхон ўша вақтда ҳам ҳозир ўтирган ерини билар эди. У вақтда бу ерлар зиёратгоҳ эди. Ўйилиб, хас-ҳашаги чиққан томлар, ёмғир суви ювиб, нураган эгри-буғри деворлар, чордеворга зийнат бўлиб унда-бунда ағнаб ётган арава шотилари, гупчаклар, турли рангдаги синиқ сополлар, занг босган тунука парчалари, шоҳларига алам боғланган кекса тут, чинорлар, уларнинг остидаги қўтиrlenган сағаналар, ўхшовсиз ўсан буталар, худди шу ернинг ўзи сингари кишиларида бир гашт бор эди. Ҳозирги ипга тизилгандай солинган бинолар, ёши шаҳар, ёш боғ, ёш ҳаво, ёш дараҳтлар, гулларнинг гашти йўқ. Мунисхон учун буларнинг ҳаммасидан у зиёратгоҳнинг бир синиқ сополи, бир кўтарилган сағанаси ортиқроқ, гўзалроқ, ширин турмушнинг рамзи эди». Тасвир ёзувчи томонидан олиб бориляпти, лекин бу парчада автор интонацияси Мунисхон хаёллари билан туташиб кетади.

«Сароб» романининг 8-боби табиат тасвиридан қишининг аста-секин баҳорга ўз ўрнини бериб кетиши, табиатнинг ажойиб кийимга бурканиши билан бошланади. Бу лирик тасвир икки ёшнинг — Мунисхон ва Саидий муҳаббатларининг очиқ-ойдин тасвири билан жўр бўлиб кетади. Лекин бу ажойиб баҳор бир-бирларига айни пайтда ҳам яқин, ҳам ниҳоят узоқ бўлган бу икки кишининг ҳар қайсисига хос туйғуларини намойиш қиласиди. Бу Саидий учун катта нарсалар ваъда қилгандай бўлади. У ўзини бир неча дақиқа ниҳоятда баҳтли ҳис қиласиди. Лекин баҳтни у хаёлига келтиришга ҳам ҳақи йўқлигини Мунисхоннинг рад жавобидан кейин билади. Чунки Саидий ҳис қилган баҳор Мунисхонга бутунлай бошқача таъсир қиласиди. Баҳор унинг ўтмишдаги шоҳона ҳаётини эслатади, уни Саидийдан ниҳоятда узоқлаштириб юборади. Кишиларга одатда ажойиб кайфият баҳш этувчи баҳор бу икки ёшга алам олиб қелади: Мунисхоннинг эски ярасини янгилайди, Саидийни ҷоҳга итаради.

Пейзаж кўп ўринда авторга ўз фикрини тугаллаш учун ҳам керак бўлади. Мунисхон очиқдан-очиқ Саидийга тегмас-лигини айтди. Айтганда ҳам, уни менсимаслик тарзида айтди. Орага совуқ сукунат тушади — бирор сўз ҳам ортиқчалик қилиши сезилиб туради. Чунки ёзувчининг Саидийга муносабати маълум — у Саидий муҳаббатини ҳурмат қиласди. Бу эпизодни «ўнғайсиз жимлик ҳукм сурди» тарзида тугаллаш тўғри бўлмас, нимадир етишмаётгандек туюлар эди. Бу боб пейзаж тасвири билан бошланган эди. Модомики Саидий билан Мунисхон табиат қўйнида ҳаракат қилас, табиат билан яқин муносабатда бўлар эканлар, ёзувчи Мунисхон ва Саидий ҳаётлари учун ҳал қилувчи аҳамиятга эга бўлган бу сұхбат эпизодини табиат манзараси билан тугаллаш ўринли бўларди. Ёзувчи шундай қилди. Мунисхоннинг рад жавобидан сўнг «ўнғайсиз жимлик ҳукм сурди. Фириллаб турган шабада, очиқ қолган китобни варақлаб, устидаги гулни ерга туширди, қоғоз парчаларини учирив кетди». Бу тасвир Саидий ва Мунисхон ҳолатларига ҳамоҳанг эканлигидан ташқари, умуман ўқувчига ҳавола қилинган баҳор тасвири, Саидий ва Мунисхон кирган боғ тасвирининг давоми ва мантиқий якунидек сезилади.

Саидий ва Мунисхон сұхбатларидан аввал бу пайт ҳақида шундай дейилган эди: «Дараҳтларнинг тиниқ япроқлари кундузи тинимсиз ҳаракатдан кўтарилган чангни ўзига қўндиришни истамагандай, кучсизгина эсган шабадада елпинади. Мусичалар ҳу-ҳулайди, дараҳтларда, деворлар устида бир-бирини қувлашади. Осмон кўм-кўк. Унда-бунда юзиб юрган оқ булат парчалари гўё қишидан қолган хиралик фуборини артиб юргандай». Кўп нарса ваъда қилувчи ажойиб манзара! Лекин инсон истаги, мақсади бундай нарсалардан юқори бўлди. Мунисхон Саидий муҳаббатини рад этди. Саидий чорасиз аҳволда. Баҳор, ҳаёт эса ўз йўлида давом этди. У инсон истаклари, мақсадлари, руҳий кечинмалари билан ҳисоблашмади, ёзувчи мана шу фикрини айтмоқчи. Мунисхоннинг «йўқ» жавоби кўринишдан номуносиб пайтга, ҳаёт уйғонаётган, атроф яшашга, ишлашга даъват этаётган бир пайтга тўғри келди. Мана шу «номуносиблик» ҳам унинг ҳаётида ҳал қилувчи роль ўйнади. Дарҳақиқат, унинг Саидийга «йўқ» дейиши улар баҳтсизлигининг бошланиши эмасмиди?

Солиштириш, қарама-қарши қўйиш Абдулла Қаҳҳор ижодида кенг ишланган приём; табиат ҳодисаларидан, турмуш зиддиятларидан фойдаланиш ёзувчига реалистик картина яратишга, характер чизиқларини белгилашга кенг имкон беради. Туробжоннинг хотини эрига аччиқ галириб қўйганидан жуда хафа бўлади. «Қоронғу, узоқ-яқинда итлар ҳуарар

эди. Кўча эшигини очиб уёқ-буёққа қаради: жим-жит. Гузар томонда фақат битта чироқ милиллар эди. Самоварлар ётган». Кўнгилга аллақандай ваҳима солувчи тинчлик Туробжон хотинининг кечинмаларига ҳамоҳанг бўлиши билан бирга Туробжоннинг хатти-ҳаракатларига маълум даражада контраст эди. Кун бўйи хизмат қилган Туробжон бутун борлиқ ором олаётган бир вақтда ҳам ухламай, хотинининг орзусини қондириш мақсадида ўғирлик қилишга мажбур бўлди.

«Бемор» да кўнгилга ғашлик солувчи «ҳамма ёқ» жим-жит. «Фақат пашша финфиллайди, bemor инграйди; ҳар замон яқин-йироқдан гадой товуши эшитилади...» Бу тасвирдан ўтмишнинг аянчли типик картинаси кўз олдимишга келади. «Миллатчилар» ҳикоясидаги табиат тасвиридан куннинг қай пайт эканини, воқеа қайси даврда содир бўлганини, қаҳрамонларнинг ким эканлигини билиш мумкин. «Кун тиккада. Соя дим. Шаҳар мудрайди» — бу тасвирдан саратон экани, кишини сулайтирадиган, унинг гапиришга мажоли бўлмайдиган бир пайт экани англашилади. Шунда Мирза Баҳром билан Тавҳидий «миллат» ғамини еб, гапдан тинмайдилар. Бу ҳам камлик қилгандай, иссиқдан ҳуришга ҳоли келмаган итни ҳам безовта қилишдан эринмайдилар.

«Хотинлар» ҳикояси асосида одамларнинг қўрбоши томонидан отиб ўлдирилган Маърифатхон қабрини зиёрат қилиши воқеаси ётади. «Майдоннинг бир чеккасидаги кекса мажнун тол остида бир-бирига суюб қўйилган икки тош тахта сафана шаклини олиб турар эди.» Ёзувчи Маърифатхон дафиҳа этилган жойни чизиш билан бирга унинг Асқар отада қолдирган таъсирини ҳам кўрсатади: «Асқар отанинг назарида бундаги ҳар бир дараҳт, ҳар бир бута мотамсаро, баҳорда япроқ чиқарганда ҳам, қора япроқ чиқарадиган ва ҳозир «энди кедингизми, Асқар ота?» — деб тургандай кўринар эди». Бу парча А. Алимұхамедов томонидан нозик таҳлил қилинган: «бу мисолда ёзувчи бир варакайига бир қанча мақсадни ифода қиласи. Биринчидан: бу ерда «ички сўз» жонли кишининг ташқи ҳаракатлари, имо-ишоралари билан эмас, балки «тилсиз» табиатнинг чехрасида кўрилган аломатлар тасвири билан берилади, иккинчидан, табиатнинг устидаги «мотамсаро»лик либоси халқнинг Маърифатга бўлган ҳурмат ва муҳаббатини ифода қиласи ва, учинчидан, бундай мўътабар шахснинг зиёратига кечикиб келгани учун Асқар отанинг юрагида кўтарилган чуқур хижолатлик ҳолатни тасвир этади»¹.

¹ А. Алимұхамедов, Абдулла Қаҳҳор ҳикояларида одам образи. Кандидатлик диссертацияси, 1948, ЎзССР ФА кутубхонаси, 38-бет.

«Асрор бобо» ҳикоясида ёзувчи фақат бир ердагина пейзажга эътибор беради. Ҳайдар ота Асрор бобо ташкил қилган самоварга бормоқчи бўлади. «Ҳайдар ота шу баҳона билан у ёқ-бу ёқни ҳам кўрай деб, айланишроқ бўлса ҳам, бозор бошидан юрди. Уруш бошланган йили баҳорда икки ошна мана шу бозор бошидаги мактабнинг саҳнида Ленинни кўрган, унинг гапини эшитган эди. Ҳордиқ кунлари шаҳардан чиқадиган автомобиль шу ерда картина қўйиб берар эди. Ҳайдар ота қараса, шу ялангликка янтоқ босиб қўйишибди. «Ҳа, ҳозир картина қолдими,— деди Ҳайдар ота ўзича.— Биз Ленинни кўрган кечаси ўйин-кулги қилиб, қишлоқни бошига кўтарган ёшлар қаерда?». Ҳайдар ота кўнгилни ғаш қилувчи ана шу манзарадан сўнг Асрор бобо самоварни кўради: «Асрорқул самоварини жуда баҳаво жойга қурган эди. Икки том бўйи пастда Шўхсой шовуллайди. Тегирмоннинг кўмиб ётган дараҳтлар пастда худди самоварнинг саҳнидаги гулзорга ўхшар эди. Тепаликдаги чинор, икки туп сада қайрафоч, тўрт-беш кишилик талай супаларга соя солиб туради. Супаларнинг ораларига, атрофига анвойи гуллар экилган».

Асрор бобо ўғлини урушга жўнатиб, уни соғиниб, ҳар доим ҳавотирда, безовталиқда яшайди. Лекин фақат ўз ғами билан яшашни ўзига эп кўрмайди. Ўғлига бўлган муҳаббатини, садоқатини унга ёрдам беришда деб билади — қўлидан келган ишга киришади. Шу билан Ватан олдидаги бурчини адо этади. Мана шундай катта фикр асарда Асрор бобонинг самовар очиши билан боғланади. Бу нарса ўз навбатида янги даврда рўшноликка чиқсан, қадр-қимматини таниган ҳақиқий совет кишиси — Асрор бобо характеридаги муҳим хусусиятларни кўрсатиш имконини беради. Шунинг учун ҳам ёзувчи ўқувчи дикқатини самоварга тортади, уни тасвирлашга катта эътибор беради. Ҳайдар ота «бу гулзор кўқрагингда ёнган ўтдан бино бўлган» экан, дейди Асрор-қулга.

Ҳикояда тегирмон ҳақида ҳам гап бор. Асрорқул Ҳайдар отани «тушга яқин тегирмон бошига чиқиб борсин», деб кампирга тайинлайди. Бу тегирмон Шўхсой бўйида эди. Самоварнинг тегирмон ёнида бўлиши тасодифий бир ҳол, албатта. Лекин бу икки нарсанинг ёнма-ён бўлиши маълум символик характерга ҳам эга. Янги тузум барпо этилгандан кейин, Узбекистонга Қалинин келган йиллари дарбадар юрган Асрорқул ўз қишлоғи Үлтартмага кўчиб келади, «тегирмони бузилиб кетган экан, тузатади: колхозга сув тегирмони билан киради». Мана шу икки воқеа ички моҳиятига кўра бир-бири билан узвий боғланади, давр руҳини, қаҳрамон характерини

чукурроқ ҳис қилишга ёрдам беради. Асрор бобо мамлакатимиз тақдири ҳал бўлаётган ёхуд энг муҳим тарихий воқеалар рўй берәётган даврларда қўл қовуштириб турмай, ижтимойи ҳаётда фаол иштирок этади. Унинг колхозлаштириш давридаги тегирмони ҳам, уруш давридаги самовари ҳам душманга қарши мамлакатимиз қудратини мустаҳкамлаш учун кураш олиб борувчи жабҳаси эди. Ёзувчи ана шу ҳар иккала даврни, Асрор бобо ҳаётидаги ҳар иккала муҳим ҳодисани бир-бири билан моҳирона боғлайди.

Абдулла Қаҳҳор асарларида табиат манзаралари, қаҳрамонни ўраб турган шароит тасвирининг ёйиқ ё йиғиқлиги уларга берилган ғоявий юқ билан белгиланади. Абдулла Қаҳҳорда «соф табиат тасвирига берилиб кетиш жуда кам. Табиат манзаралари қаҳрамон билан муносабатда, алоқада (унинг ҳис қилишида, тушунишида, кечинмаларига ҳамоҳанг ёки контраст ҳолда) тасвирланади. Бошқача қилиб айтганда, пейзаж ёзувчининг асосий ниятини очиб беришга ёрдам қиласидиган дараҷада олинади.

Озод Шарафиддинов «Синчалак» ни таҳлил қиласар экан, Абдулла Қаҳҳор асарларидаги «ҳар бир манзара авторнинг ғоявий мақсадларига шу қадар уйғунки, уларда ҳам ёзувчининг маҳоратини яққол кўриш мумкин», масалан, «Синчалак» повестидағи «Карима отасини перроннинг у бошидаги қари мажнунтол остидаги ташландиқ бир будка ёнида топади. Хотинини сўйиб қўйиб қамалиб кетган, кейин қамоқдан чиқиб, дарбадарликда умр ўтказган Алибобонинг ғамини, кулфатини, ғарифлигини қари мажнунтол, ташландиқ будка бўрттириб, қабартиб кўрсатади», деб ёзган эди². Бу фикрга қўшилмаслик мумкин эмас.

1960 йилда Абдулла Қаҳҳорнинг ўтмиш циклидан «Даҳшат» ҳикояси эълон қилинди. Бу ҳикоя кўп фазилатлари билан ёзувчи асарлари ичидаги алоҳида ўрин тутади. Бу ерда ҳикояни пейзаж нуқтаи назаридан таҳлил қилишдан аввал умуман асар ҳақида гапириш эҳтиёжи сезилади.

Абдулла Қаҳҳор 30-йиллар ўрталарида ўтмиш циклидан бир қанча ҳикоялар ёзди. Бу ёзувчи номини кенг китобхонлар ўртасида машҳур қилган «Анор», «Ўғри», «Бемор» ва бошқа асарлариdir. Орадан чорак аср ўтгач, ёзувчи яна ўтмиш темасига мурожаат қилди (шубҳасиз, бу ўтган давр ичидаги ёзувчи бир қанча асарлар — роман ва повестлар, драма ва очерклар яратди, унинг ижодий манерасида янги-янги қирралар пайдо бўлди).

² «Ўзбек адабиёти масалалари». Адабий-танқидий мақолалар тўплами, Тошкент, Уззадабийншр, 1959, 122—123-бетлар.

Абдулла Қаҳҳор ҳикоясига эпиграф қилиб, ўтмишдаги хотин-қизларга ўтказилган зулмларни ўз бошидан кечирган ва бундай ҳақоратларга қарши бош кўтарган аёлларнинг бири — Тўрахон аянинг: «Хотин-қизларнинг бурун замонда кўрган кунини билмайсизлар, қизларим, айтган билан ишонмайсизлар!» — деган сўзларини олган. Ёзувчи бу сўзларни тасодифан келтирмайди, албатта. Биринчидан, ўтмиш ҳаётини, фақат катталардан эшитиб, китоблардан билган ўқувчи — янги авлод пайдо бўлди. Уни ҳамма нарсага ишонтириш қийин. Ёзувчи «Даҳшат»да ҳикоя қилган воқеани ўтмишда бўлган ё бўлиши мумкин бўлган ҳаётий ҳодисалардан бир кичкинагина мисол демоқчи. Иккинчидан, бу эпиграф билан ўқувчини кўнгилсиз ҳодисанинг ҳикоя қилинишига тайёрлади, воқеа интонациясини белгилайди.

Асарга эпиграф бериш Қаҳҳор учун, унинг ўтмиш циклидаги ҳикоялари учун янгилик эмас. Лекин унинг асарларидаги эпиграф одатда халқ мақолларидан олинарди. Бунда эса кўпчиликка у қадар маълум бўлмаган, аммо реал кишининг сўзлари келтирилади. Ёзувчи қўрққанича ҳам бор. Авваллари «Ёшлар ҳикояларда тасвир этилган воқеаларни ортиқ даражада муболаға деб билишарди. Йиллар ўтиб, янгидан-янги китобхон авлоди етишган сайин бу эътиrozлар кескин тус ола борди... Ёш китобхонларнинг таънаси хусусан сўнгги йилларда дашномга айлана бошлади»³.

Ёзувчи «Даҳшат» эълон қилингач, ўқувчилардан кўплаб хат ола бошлади. Улардан бирида шундай дейилган: «...ўтмишда шундоқ бўлса, эҳтимол, бўлгандир, лекин ўзбек хотин-қизлари тарихининг шундай маломатли саҳифаларини ҳозир, бугунги кунда тирилтириш шартмиди? Сиз ўтмишни қаламга олганингизда, баъзан уйдирмачиликка берилиб кетасиз...»⁴. Албатта, уйдирмачилик нимада экани маълум; инсоннинг ниҳоятда эзилиши, хўрланиши арзимас (икки дона аниор нима!) тилакларни қониқтириб бўлмасликни тасаввур қила олмаслик натижасида шундай фикрга келиш мумкин.

Ёзувчи «Даҳшат»да ўтмиш темасини ишлар экан, асосан бир мақсадни — ўтмишда инсоннинг эзилиши, инсонлик ҳуқуқларининг поймол этилишини кўрсатишни; эзувчи синфларга нисбатан чексиз нафрат ва шу билан эркин замонамизни янада қадрлаш ҳиссини уйготишни кузатади. Ҳикоя қаҳрамони Унсин тақдирига тан берган, «бошга тушганни кўз кўрар» қабилида ўйловчилардан эмас. У исёни қилди. Унинг исёни ўз даври учун шундай катта, ақл бовар қилмай-

³ Шарқ юлдузи, 1965, № 9, 30-бет.

⁴ Ўша ерда.

диган исёнлардан бўлди. Ёши бир ерга бориб қолган Олимбек Додходек одам «ҳамманинг кутганига қарши қўлига қамчи олиб, Унсинни «қаеринг қичиди»га солмади, аксинча, заҳарханда билан бўлса ҳам, мулойим гапирди». Унсиннинг исёни шунга олиб келдики, у ўлим эвази билан бўлса ҳам, озодликка чиқди. Албатта, бу ўз даври учун катта исён эди. Ёши пайғамбар ёшидан ошган, саккиз хотин тутган, гапини бирор одам қайтармаган, бетига бирор одам тик қарамаган Додхонинг юзига эндигина ҳаётга қадам қўяётган ўн етти ёшли кичик хотини тик қаради, ундан озодлик сўради.

Бу фожиали воқеа «кўз очирмаётган кеч кузак шамоли жайдоқ дараҳтлар шохида чийилаган, гувуллаган вақтда содир бўлади. Табиатнинг ғазаби, шовқин-сурони асар воқеасида «иштирок этади», фожианинг сабабчиларидан бирига айланади. Ёзувчи табиат қутирган пайтни батафсил тасвирлашдан кўра, унинг одамларда қолдирган таъсирини, тўғрироғи, одамларнинг табиат ҳодисасига бўлган муносабатини кўрсатишига кўпроқ эътибор беради.

Оила бошлиғи Олимбек Додхонинг бошига турли қўрқинчли фикрлар келади: «Ҳозир гўристон қанақа ваҳималик бўлса экан...» Додҳо «Гўристон ҳақида болалигидан қулогифда қолиб кетган ваҳимали гапларни, ҳодисаларни жонлантириб юборади».

Ёзувчи биринчи планга Додҳо кечинмаларини олиб чиқади. Додҳо — уй бошлиғи, оиласининг энг кексаси, қоловерса, эркак киши; шу одам шунча қўрқдими, бошқаларни қўявенинг. Шунақа вақтда киши хаёлига турли ваҳимали воқеалар келади. Бойнинг катта хотини Нодирмоҳбегим ўтмишда бўлган бир воқеани — бир йигитнинг ўртоқлари билан бас бойлашиб, кечаси мозорга борганини ва ғоят қўрқанидан ўша ерда ўлганини ҳикоя қиласди. Шунда Унсин: «— Ўлсин нокас одам экан, битта қўйни деб... кошки арзийдиган нарса бўлса!...» — дейди. Бундан Додхонинг жаҳли чиқади. Унсин Додхога қараб: «— Жавоб берсангиз... Ганжиравонга кетсам... Битта гўрга битта пичноқ эмас, ўнта гўрга ўнта пичноқ санчиб келаман», — дейди. Додҳо унинг гапига тушунмайди, тўғрироғи, нотўғри тушунади — «уйимга бориб келаман деди», деб ўйлайди. Унсин яна такрорлади. «— Йўқ. Мен буткул кетсам дейман, жавобимни берсангиз, демоқчиман...» Унсинга рухсат теккач, у хурсанд бўлиб, йўлга чиқади. Агар биз Унсин ёш, гўристон ҳақида Додҳо эшитган даҳшатли мишишлардан бехабар бўлганлиги учун шундай жасорат кўрсата олган деб ўйласақ, гап фақат қаҳрамоннинг жасорати ҳақидагина эмас, балки уни шу жасорат учун оёққа турғизган куч — ички туғён ҳақида бораётганлигини ҳам англамас-

лик бўлур эди. Гўристон тўғрисида Додҳо нималар эшитган бўлса, шуни Үнсин ҳам эшитган. Шамол, қоронғи гўристон Додҳо хаёлида қандай даҳшатли бўлса, унинг хаёлида ҳам шундай даҳшатли. Шунга қарамасдан, Үнсин «чопқиллаб, қаршидан эсаётган шамолга сўз бермай, баъзан ирғишлаб борар эди». Лекин Үнсин ҳам одам, у инсонга хос хусусиятлардан маҳрум эмас, мозорга яқинлашган сари юрагини аллақандай ваҳималар қоплади. «Ганжиравон, ота-онаси, дугоналари хаёлидан кўтарилиб, кўз олдига оппоқ кафанга ўралиб, сафана ва гўрлар атрофида елиб юрган арвоҳлар келди». Барibir, Үнсин орқасига қайтмади. Үндаги озодлик истаги, ички туғён унинг қўрқув ҳисларидан устун келди. Агар Үнсиннинг қўрқуви таъкидланмаса эди, унинг жасорати, озодлик истаги бу даражада таъсирили чиқмаслиги ҳам мумкин эди.

Үнсин ҳамма даҳшатларни енгиб, қўрқиб-қўрқиб бўлса ҳам, Додҳо шартларини бажаради. Лекин унинг гўристон даҳшатини енгган юраги Додҳо қилган разилликни кўтаролмайди. «Гўристон деганда тиззаси қалтирайдиган», бирор «оламга подшо қиласман» деган тақдирда ҳам гўристонга боришни хаёлига келтиролмайдиган Додҳо ёшгина ўсмирнинг орқасидан гўристонга маймунини ҳам қўйиб юборади. Үнсин қайта туриб, паранжисини эсидан чиқарганидан «нима қилишини билмай, туриб қолди. Шу аснода каттакон бир сафанинг ичиданми, нарёғиданми алла қанақа бир товуш эши-тилди-ю, ҳаял ўтмай, нимадир келиб, Үнсиннинг елкасига миниб олди, афтидан, бўғмоқчи бўлиб, қўл узатди. Үнсин кўкрагига ниҳоятда оғир бир нарса билан урилгандаи, кўнгли озиб, тентираб кетди-ю, йиқилмади, лекин оёқ узра туриб ҳушидан кетди; орадан қанча вақт ўтганини билмади, кўзини очиб қараса, жонивор елкасидан тушибди, эмаклаб, бояги сафананинг орқасига ўтиб кетди. Үнсин қўрқувдан телба бир ахволда бўлса ҳам, фаҳмлади: маймун! Додҳонинг маймун!». Табиат даҳшати инсонлик хусусиятини йўқотган Додҳо келтирган даҳшат олдидаги ҳеч нарса бўлмай қолади. Үнсинни ҳам ана шу Додҳо даҳшати ўлдиради⁵.

⁵ Үнсин жасорати беиз қолмайди. У ўз жасорати билан Додҳонинг катта хотини Нодирмоҳбегимнинг бош кўтаришига олиб келди — Нодирмоҳбегим Додҳо уйини бутунлай ташлаб кетди. Нодирмоҳбегим Додҳонинг бош хотини, у билан ҳаётнинг аччиқ-чучугини бирга тортган, унга кўниккан, унинг гапларига сўзсиз итоат қилган, бошқа ҳаётни ўйлаб ҳам кўрмаган аёл. Қариган чоғида Додҳо уйини ташлаб кетишининг ўзи Нодирмоҳбегим тоифасидаги аёллар учун катта исён эди. Озодлик сари интилган ва ҳеч нарсадан ҳайқмай-қўрқмай ўз орзузи сари дадил интилган Үнсиннинг ўлими — Нодирмоҳбегимни ҳам катта жасоратга унади.

«Шом қоронғусида унинг жасадини қизил кўрпага ўраб-аравага солишиди». Шунда ҳам табиатда безовталиқ давом этар эди: «Шамол ҳамон гувуллар, яйдоқ дараҳтларнинг шоҳида чийиллар, гувуллар эди». Лекин энди бунга ҳеч ким эътибор бермади. «Дарвозадан, бошида паранжи ва қўлида оқ тугунча, Нодирмоҳбегим чиқди. У дарвозага юзини ўгириб чўнқайди, қўлини фотиҳага очиб бир нималар деди, Додхонинг ўзи билан бирга бу даргоҳни ернинг қаърига юборгандай, иккала муштини уч марта ерга қадади: кейин «бу даргоҳни энди елкамнинг чуқури кўрсин», дегандай бир ҳаракат билан кескин бурилди ва аравага чиқди, марҳумнинг боштомонига ўтиб ўтириди».

Даҳшат — бу Унсин фожиасининг, ўлимининг сабабигина эмас. Унинг исёни ва ўлеми эвазига қозонган ғалабаси ҳам Додҳо учун даҳшатлидир. Ўй ичидағи заифа — тилсиз чўри томонидан билдирилган озодлик истаги — мана шу даҳшатдир. Шунинг учун ҳам ёзувчи қўрқувдан ҳалок бўлган Унсинни эмас, балки унинг тенглик ва озодлик учун бошлаган кураши ва бу кураш даҳшати олдида кути ўчган Додҳо кечинмаларини, фикр-ўйларини батафсил тасвирлайди. Додҳо ҳар доим қўрқув ҳолатида бўлади. Унсиннинг мозордан қайтиши ҳам уни қўрқитиб юборади. «Унсинни кўрди-ю, «жон берәётиби» деб ўйлади шекилли, кўзлари олайди, ундан кўзини олмай, секин ўрнидан турди, худди ўлим хавфидан қочгандай, бир ирғиб, сандалдан ошди-да, ўзини эшикка урди...». Шундай қилиб, Унсиннинг ўлеми табиат ғазабланган пайт билан уйғун келади. Унинг ҳалокати Додҳони даҳшатга солди. Энди бу шамол — бўрон Додҳонинг куни битиб бораётганидан далолат беради.

«Даҳшат» ёзувчининг ўтмиш ҳақидаги ҳикоялари орасида ўзининг кучли исёнкорлик руҳи билан ҳам ажralиб туради. Турабжон хотинига анор олиб беролмай, ўғирлик қилди. Бошқа чора тополмади. Қобил бобо ҳўқизини ўғирлатиб, бу ҳам етмаганидек, эшикма-эшик юриб, бор-йўғидан айрилди. Сотиболдининг хотини врачга кўрсатилмай ўлиб кетди. Буларда қандайдир чорасизлик, соддалик устун. Шу соддалик, бўшлиқ ёзувчи томонидан замон билан, ҳукм сурган ижтимоий тузум билан боғланади.

«Даҳшат» да ёзувчининг ўтмиш циклидаги бошқа ҳикояларида бўлган фош қилиш пафоси ҳам бор. Шу билан бирга унинг бошқа ҳикояларида баралла кўринмаган исёнкорлик, чорасизларга ягона ва тўғри йўл кўрсатиш майли ҳам бор. Унсин ҳам Турабжон, Қобил бобо ва Сотиболдилардек чорасиз эди. Лекин у чорасизликдан чора топди, тақдирига тан бермади, ўз имконияти доирасидан чиқиб, исён қилди. Унинг

исёни табиат «исёни» фонида рўй берар экан, у ўзининг ундан кучлироқ эканини намойиш қилди. Абдулла Қаҳҳорнинг ўтмиш циклидаги, бошқа ҳикояларига асос қилиб олингандан воқеалар кундалик турмушда кўп учраб турадиган воқеалардан бўлса, «Даҳшат» да бундай эмас. Гарчи бойнинг бир қанча хотини бўлиши тасвириланган давр учун типик ҳодиса бўлса-да, ҳикоянинг мағзини ташкил этган Унсин бажариши керак бўлган шарт ниҳоятда кам учрайдиган, балки ҳали ҳаётда содир бўлмаган воқеа бўлиши ҳам мумкин. Асарда бундай воқеанинг танланиши ҳаёт ҳақиқатига зид эмас. Чунки додхолар ҳукм сурган давр учун Унсин исёни, жасорати унинг бажарган шарти каби кам учрайдиган, лекин бўлиши мумкин бўлган воқеа эди.

Ёзувчи «Даҳшат» ҳикоясида табиат тасвирига катта эътибор беради. Бу нарса Абдулла Қаҳҳорнинг 30-йиллар ўрталарида ёзилган асарларида ва умуман шу давр ўзбек совет адабиётида қаҳрамон характерини яратиш имкониятлари бойий бошлаганлигининг гувоҳи эди.

Абдулла Қаҳҳор — табиат манзараларининг тасвирига нисбатан қаттиққўл ёзувчилардан,/Пейзаж унинг асарларида умуман кам тасвириланади./ Лекин ёзувчининг «қаттиқ қўллиги» унинг табиат манзараларини Чехов айтганидек, «қисқа ва ўринли» чизишида, ундан асар ғоясини ёрқинроқ очиш, қаҳрамон образини теранлаштириш ниятидагина фойдаланишида кўринади. Юқорида таҳлил қилинган «Даҳшат» да «шамоли-бўронли» манзара ҳикояда тасвириланган воқеаларнинг моҳиятини кучайтириб кўрсатар экан, бу ёзувчи ғоясини ёрқинроқ очиш учун, Унсиннинг исёнини таъкидлаш ва бу исёнинг ички мазмунини кўрсатиш учун хизмат қиласди. Худди шунингдек, «Мастон» ҳикоясини чўл тасвирисиз тасаввур қилиш қийин. Бу ҳикоядаги воқеа тасвири чўлга кўчирилади, табиат тасвири қаҳрамонларнинг кечинмалари билан уйғун бўлиб келади ҳамда воқеанинг асосий иштирокчиларидан бирига айланади.

«Мастон» нинг биринчи эълон қилинган варианти билан кейинги (1957 йилда «Танланган асарлари»га кирган) вариантини солишиши ёзувчининг маҳорати ошганини яққол кўрсатиш учун яхши материал беради. Ҳикоянинг биринчи вариантидаги узундан-узоқ чўл тасвири кўп ўринларда ёзувчи «измидан» чиқиб кетган эди. Кейинчалик ёзувчи кўп ўринларини қисқартиб ташлаган.

«Мастон» ҳикоясида ҳам табиат «Даҳшат» дагидек маълум даражада рамзий роль ўйнайди. Лекин «Мастон» да ёзувчи кузатган ғоя асар воқеаларига усталик билан едири-

либ юборилмаган. Ёзувчи айтмоқчи бўлган гапни Мастон тилидан гапиртирган, натижада асар воқеаларининг асосий «иштирокчиси» бўлган чўл тасвирининг аҳамияти ҳам маълум дараҷада хиралашган. «Даҳшат»да эса бундай эмас. Автор фояси воқеалардан, қаҳрамонларнинг хатти-ҳаракатларидан келиб чиқади.

Пейзаж Абдулла Қаҳҳор асарларида ҳеч қачон жимжи-мадорликни англатмайди. Дарё тўлқинларида бемақсад чўмилаётган қуёш, сув устида бемақсад чирқиллаб учайдиган қалдирғочлар сингари ёзувчи фояси ва қаҳрамон характери билан бевосита боғлиқ бўлмаган ташқи эфектлар унинг асарларида учрамайди. Унинг асарларида ҳамма нарса фояни очиш, тўлдириш, кучайтириш учун хизмат қиласди.

Абдулла Қаҳҳор бадиий-тасвирий воситаларнинг ҳамма имкониятларини ишга солади. У учун катта-кичик ёки аҳамиятсиз нарса йўқ. Ёзувчи асар фоясини реаллаштиришга хизмат қиласдиган воситаларнинг ҳаммасини муҳим деб билади. Ана шундай воситалардан бири деталдир. А. Қаҳҳорнинг деталлардан фойдаланиш маҳоратини навбатдаги бобда кўрамиз.

ОБРАЗ ВА ДЕТАЛЬ

«Қизиқ деталь, чиройли парча шу вақтда асарнинг ҳимматини оширадиши, шу қизқилиги, шу чиройлигиги билан идеяниң ташвиқ қилиншишига хизмат қиласа».

Абдулла Қаҳҳор

Абдулла Қаҳҳор ўзбек адабиётида бадиий деталь имканийларининг чексиз эканини кўрсатган ёзувчилардандир. Унинг асарлари ҳақида гап кетар экан, биринчи навбатда, унинг тежамлилигини — кам сўз ишлатиб, бой мазмун бера билишини таъкидлаш лозим. Ўндаги бу хусусият фақат ҳикояларига хос бўлмасдан, балки повесть ва романларига, умуман ёзувчининг ижодига хосдир. Абдулла Қаҳҳор асарларидаги деталлар муайян шароит ва психологик ҳолат тасвири учун ўринли бўлиб, қаҳрамон дунёқарашини, унинг характеристидаги айрим томонларини кўрсатишида катта аҳамият касб этади.

Ўмрида врачларга рўбарў бўлмаган ва уларнинг нима билан шуғулланишини ҳам тузуккина билмаган содда ва саводсиз Сотиболди сингари кишиларга докторхона қандайдир сеҳрли кўринган. «...докторхона тўғрисида Сотиболдининг билгани шу: салқин, тинч паркда дараҳтлар ичига кўмилган баланд ва чиройли оқ иморат: шиша қабзали кулранг эшигига қўнғироқ тугмаси бор». Докторхонанинг қаерда ва қандай жойлашгани Сотиболдининг диққат-эътиборини тортар, унинг кулранг эшигидаги қўнғироқ тугмаси эса аллақандай мўъжиза бўлиб туюлар эди. Бу деталь Сотиболдининг содда табиатинигина эмас, балки унинг онгига юз берадиган ўзгаришларни ҳам тушуниш учун ёрдам беради. Унинг докторхона ҳақидаги тасаввури яна бир хотира билан қўшилиб кетган: «Чигит пўчоқ ва кунжара билан савдо қиладиган хўжайнини Абдуғанибой, омборда қулаб кетган қоплар остида

қолиб ўладиган бўлганида, бу докторхонага бормай, Симга кетган эди». Бу воқеа ҳам Сотиболди кўнглида қарама-қарши фикрларни туғдирган ҳолда, унинг эсида қаттиқ сақланиб қолган.

Ҳикоядаги деталлар давр характерини кундалик майдачуйда нарсалар орқали кўрсатиш учунгина хизмат қилмай, балки ҳикоя қаҳрамонининг билим савиясини, дунёқарашини ҳам белгилайди. Рўзгорини бир амаллаб тебратиб турган одам бошига катта кулфат тушади, хотини касал бўлиб ўлади. Бир амаллаб кун кўришдангина иборат ҳаётий мақсад Сотиболдидек одамларни умуман ҳаёт, жамият, сиёsat устида ўйлаб кўришдан маҳрум қилган. Турмуш унинг миясини карахт қилиб қўймаган бўлса, докторхона эшигидаги қўнфироқ тугма унга мўъжиза бўлиб кўринармиди. Бироқ бу мўъжизавий таассуротнинг асоси ўнлаб, юзлаб ва минглаб сотиболдиларнинг бу даргоҳга боришга ҳадди ва имкони йўқлигига эди.

«Томошабоғ» да оддий инсоний муносабатларнинг тенгиззлик ва адолатсизлик ҳукм сурган шароитда катта қаршиликка учраши кенг, сиёсий аспектда кўрсатилади. Уста кулол қадрдон дўсти Ҳамроқулнинг касаллигини кўриб, уни ўзи қоровуллик қилган «боққа олиб кирди ва қайрагоч остидаги чўян оёқли зангори эшакка ўтқазиб, сув келтириди». Рус кишиси, Уста кулол ва Ҳамроқулнинг катта гуноҳлари — бир-бирларини ҳурмат қилишлари бўлиб, улар бунинг учун мишибхонага тушадилар. Абдулла Қаҳҳор ҳикояни якунловчи охирги воқеагача газетада хабар чиқмагунча, уларнинг нима учун мишибхонага олиб борилганликларини, «хотинчалиш бир офицер» уларни нима учун тепганлигини айтмайди. Тўпланган халойиқ нима гап бўлганини бир ҳафтадан кейин «Туркистон ўлкаси» газетасида босилган хабардан билади: «Утган 23 сентябрда мазкур шаҳарда Русия даҳасидаги Романовский боғида ҳам шу қабила беадаблик содир бўлган. Чунончи, сартиялардан бири ўзларига соҳиблик қилиб турган Русия тўраларининг истироҳатгоҳларига кирган, яъни ниҳоятда беадаблик қилган».

Рус тўраларининг оддий халқ вакилларига бўлган муносабатини кўрсатиб турувчи бундай деталга ёзувчининг мурожаат этиши тасодифий эмас. Уста кулол ўз дўсти Ҳамроқулни боққа таклиф қилиши унинг инсоний муносабатларини кўрсатади. Шунинг учун ҳам шов-шувни эшишиб тўпланган халойиқ нима рўй берганини тушунмайди: оддий халқ Ҳамроқулнинг боққа киришида қандайдир одоб қоидасининг бузилганини кўрмайди ва, бинобарин, тўполоннинг сабабини тушунмайди. Шундай кичик бир воқеанинг газетада ёрити-

лиши ва шу орқали одамлар бўлиб ўтган воқеанинг моҳиятини тушунишлари эса чор Россияси амалдорлари, миршабларининг қиёфаларини очиб ташлайди. Шундай қилиб, ҳикоя охирида берилган газета эълонининг содир бўлган воқеа моҳиятини очиши асарнинг дўстлик туйғулари ва оддий инсоний муносабатлар ҳоким синф қаршилигига учраб қаттиқ таъқиб остига олинганини фош қилувчи пафосни кучайтиради.

«Қайғулар» да қаҳрамоннинг портфеллик экани 3 марта бақайтарилади. «Йигит ичкари кирди: қўлидаги портфелини диванга улоқтириди; уф тортиб, пешанасига урди» (Бу ерда ўқувчи қаҳрамон қўлида портфель борлигидан хабардор бўлади). «Йигит портфелидан бир шиша вино олиб, хотиннинг ҳай-ҳайллашига қарамай, икки пиёлани устма-уст шимириди». Ниҳоят, йигитнинг мақсади амалга ошмагач, у уйдан портфелини олиб жўнайди. Ёзувчининг қаҳрамон портфелига ўқувчи диққатини учинчи марта тортишдан кузатган мақсади аниқ. Олифта йигитнинг бу хотиндан олган сабоги уни бундан кейин шундай иш қилмасликка ўргатмайди. Унинг портфелини олиб кетиши таъкидланишидан шу фикр кузатилади: У: «Ёмон бўлди... Бу алвости хотинимга, албатта, айтади. Шу фалокатдан ҳам эсон-омон қутилсан, эндигиттан нари хотинимга таниш аёлларга қўл узатмайман...» деб хаёлидан ўтказади.

Абдулла Қаҳҳор ижодининг характерли томонларидан бири шундаки, у ҳаётда катта мақсадсиз яшаб, кунини бекорга ўтказувчи кишиларнинг образларини яратишда уларнинг ташқи қиёфаларини, ҳаракатларини айrim деталлар орқали тасвирлаш билан чегараланиб, уларнинг юрагига, фикр-ўйларига, ҳаётни тушунишларига кўпинча тўхтамайди, масалан, «Қайғулар» ва «Тўйда аза» ҳикоялари, «Сароб» романида шундайдир.

Юқорида тилга олинган ҳикояларда асосан деталнинг йиғиқ формасини кўрамиз. Бўндан деталь вазифасини бажа-раётган предмет (масалан, портфель) асар қаҳрамонларида бирор туйғу уйғотмайди, «воқеалар»га ўсиб чиқмайди, шунингдек, асарда кўзга кўринарли жойни ҳам эгалламайди. А. Қаҳҳор ишлатган деталлар ҳаётийлиги, табиийлиги, ўринлилиги билан характерланади. Ўқувчи уни бирдан кўрмаслиги, сезмаслиги, умуман унга эътибор бермаслиги ҳам мумкин. Лекин бу деталсиз асарни, ундағи бу деталь билан боғлиқ бўлган воқеани, образни тасаввур қилиш қийин.

Деталларнинг характери ниҳоятда хилма-хил. Деталь «авторники» ҳам, «қаҳрамонларники» ҳам бўлиши мумкин. Деталь нутқда, пейзаж, портрет ва бошқа тасвирий восита-

ларда бўлиши ҳам мумкин. Лекин уларнинг аҳамияти, албатта, асар ғояси билан образ ва персонажларни характерлашдаги хизмати билан белгиланади.

Эҳсон Москвадан врач бўлиб қайтгач, Саидий билан кўришади. Улар бир вақтлар қалин дўст эдилар. Лекин кеиничалик Саидий бошқа йўлдан — душманлар йўлидан кетгач, уларнинг ораларига совуқчилик тушади. Эҳсон кўпдан бери кўрмаган дўсти Саидий билан кўришар экан, ораларида ўтган гапларни унудишига ҳаракат қиласди ва Саидийнинг таклифи билан унинг уйига келади. У Саидийнинг хотини билан қизиқади, унинг кимлигини, нима иш қилишини билгиси келади. Уйда йўқлигини эшишиб, «сурати йўқми?» деб сўрайди. Ёшлидан бирга ўсан қизлар ҳақида Саидий билан кўп гаплашган Эҳсон унинг хотини билан қизиқиши, жилла бўлмаса, суратини кўришни истashi табний эди. Ана шу деталь орқали Москвада ўқиб келган Эҳсоннинг бояги-бояги ёш, очиқ кўнгилли, Саидий тақдирига, у танлаган хотинга бефарқ қарамайдиган яқин дўст экани очилади.

«Сароб» романидан яна бир детални таҳлил қилиб кўрайлик. Муродхўжа домланинг иши чатоқ. Унинг режалари астасекин чиппакка чиқа бошлади. Ер ислоҳоти, колхоз қурилиши домланинг ҳам ер-сувлари қўлдан кетишига сабаб бўлади. У фақат моддий жиҳатдангина эмас, балки маънавий томондан ҳам инқирозга учради. Эски тузумни қайтариш учун қилган ҳаракатлари бутунлай зое кетди. Унга халқнинг янги ҳукумат тарафида эканлиги, янги тузумни ҳимоя қилишига тайёр эканлиги маълум бўлди. Ҳаракатлари бефойда эканлигини тушунган домла ўзи учун шундай оғир кунларда жаҳл аралаш «бир эчкисини супурги билан уриб, ўлдириб қўйди». Кўринишдан, бой одамга эчки деган нарса нима бўлиби! Лекин бир эчкига домла қанча куйса, сиёсий ҳаётда бўлаётган воқеаларга ҳам шунча куяди: У бир-бираiga асло ўхшамайдиган бу икки масалада умумийлик ва яқинликни кўради. Унинг моддий ва маънавий ҳаёти сиёсатга бўлган муносабати билан чамбарчас боғланиб кетган. Эчки билан битта газетада чиққан сиёсий мақоланинг аҳамияти бир. Бу домла қиёфасини кўрсатувчи деталь. Уз ҳаёти, борлиғи хавф остида турганда ҳам, у эчкисини ўйлади.

Деталнинг характеристи унга юклатилган вазифа билан белгиланади. Бу ерда асарнинг жанр хусусиятини ҳам ҳисобга олмаслик мумкин эмас. Агар «Қайгулар»даги деталь (портфель) образни характерлаш учун етарли бўлса, «Қўшчинор чироқлари» даги беҳи воқеаси катта можаронинг сабабчиси, асар қаҳрамони ҳаётини ўзgartувчи омилга айланади. Энди буни бир предмет — деталь орқали бериб бўлмайди, бу ерда

воқеа деталь характерини касб этади. Сидиқжон Зуннунхўжа оиласига ичкуёв бўлгач, онаси Хадича хола жуда кам келадиган бўлиб қолади. Лекин ҳар келганида топган-тутганини олиб келади. Бир гал беҳи қўтариб келади. Ҳар ҳолда совға ёқмаган бўлса керак, уйдагилар уни назар-писанд қилишмади. Сидиқжон онасини кузатиб қайтганида, «ток остидаги эски сўрида сочилиб ётган беҳиларга кўзи тушди. Беҳи унга мунғайиб қараб тургандай бўлиб туюлди. Сидиқжон ҳаммасини йиғишириб олди-да, айвоннинг токчасига элтиб қўйди. Беҳи бу ерда унга ғарифона назар ташлаб, «мени бу ерга нега ҳам олиб келди, нега ташлаб кетди. Мени бу ерда ким ҳам қўлга олар эди», деб тургандай туюлар эди. Сидиқжон бирданига тўртта беҳи олиб еди». Лекин бу билан тинчланмай, онасининг кетидан етиб олиб, уни уйигача кузатиб қўяди. Шу куни у Ўрмонжон билан учрашиб, колхозга киришга қатъий қарор қиласди. Албатта, бундан агар беҳи бўлмаса у Ўрмонжон билан ҳам учрашмас, колхозга ҳам кирмас эди, деган хулоса чиқариш мумкин эмас. Ҳар ҳолда беҳи Сидиқжон ҳаётининг ўзгаришида катта туртки бўлди. Шу билан беҳи устида гап тугамайди, балки бунга янги бир маъно берилади. Буни Шарофатнинг қуийдаги гапидан биламиз: «Э, энди билдим: онаси ўлгур ҳам бир илм-амал қилган, уни мендан советган: советмаган бўлса, шундай ювош одам бирданига бунаقا бўлиб қолмас эди. Онаси ўлгур ўша келишида беҳи олиб келган эди, шу беҳида бир гап бор экан. Бу гапни ҳам худо кўнглимга солди».

Авторнинг ўзига хос индивидуал томонларини деталларда айниқса яққол кўриш мумкин. Ёзувчининг у ё бу воқеага бўлган муносабати, қаҳрамонларга нисбатан тутган позицияси деталлар орқали ҳам билинади.

Абдулла Қаҳҳор — салбий типларга нисбатан шафқатсиз. Муродхўжа домла асарда сатирик планда берилган образ. Домла оғир аҳволда қолган бир пайтда эчкининг эслатилиши бир бачканаликка ўхшаб кетади. Лекин бу билан ёзувчи фақат уни фош қилибгина қолмай, балки унинг устидан заҳарханда кулади ҳам.

Саидий қандай мураккаб кечинмаларга берилмасин, унинг душманлар лагерига ўтиши, улар тилига тушуниши қийин бўлмади. Индамас, қўпол, заҳар Еқубжон билан Саидийнинг яқинлашиши шундай бўлди: «Бир пайшанба кечаси бўлган ўтиришда иттифоқо Саидий унинг ёнига ўтириб қолди. Саидий бир сафар ўзининг май навбатини унга тутди. Шундан сўнг иккovi шунча қалинлашдики, ҳатто бир жума куни Муродхўжа домланинг меҳмонхонасида бўлган ўтиришда бу индамас йигит бир ҳафталик сўз бойлигини қадаҳ икки айлангун-

ча айтиб тамом қилди». Бу ерда келтирилган кичик деталь душманлар орасидаги муносабатларни аниқлашга ёрдам беради. Бу деталь ёзувчининг бу образларга, уларнинг ўзаро муносабатларига бўлган қарашларини ҳам белгилайди.

Абдулла Қаҳҳор ўз ҳикояларида Чеховнинг ижодий принципига тўла амал қиласди: agar «милтиқ осилиб турибди» дер экан, у маълум вақтга келиб отилиши керак — бирор бадиий деталь ёхуд воқеа мақсадсиз асарга киритилмаслиги керак. «Туробжон эшикдан ҳовлиқиб кирар экан, қалами яктагининг енги зулфинга илиниб тирсаккача йиртилди» («Анор»). Бу воқеа Туробжоннинг «шаштини» қайтаради, лекин асабини бузмайди. Ҳомиладор хотинини хурсанд қилиш имконияти олдида енгининг йиртилиши нима бўпти! Воқеа шу ҳодиса билан бошланади. Воқеалар ривожида ўқувчи Туробжоннинг ягона мақсади — хотинининг кўнглини олиш эканини билади; анор ўрнига олиб келинган нарса унинг хотинини қониқтирмайди. Унинг анор ейиш истаги Туробжоннинг асабига тегади, яктагининг енгини кўриб, унинг жаҳли чиқади. «Энди учтўрт сув ювилган янгигина яктак эди» деб афсусланади у. Шундай қилиб, йиртилган яктак орада юз берган келишмовчиликни чуқурлатувчи важга айланади. Туробжон енгининг йиртилиши, кели ағанаб, ундаги жўхорининг ерга тўкилиши қандайдир кўнгилсизлик белгиси бўлиб туюлади. Ўқувчининг кўнглига ғашлик чўкади. Ёзувчи бир деталга икки марта қайтади ва шу детални ўзгартмаган ҳолда персонажда икки хил кайфият уйғотади.

«Малоҳатхон Жонифон извошлиликдан ҳайдалган йили, маҳалладаги актив аёлларнинг ҳимояси остида, эрининг қаршилигига қарамай, район советига уборвица бўлиб кирган экан: ўқибди, ҳадемай саводи чиқибди, бир йил-бир ярим йилдан кейин ҳатто мажлисларда докладчига «ўртоқ, сизга саволим бор», дейдиган бўлибди». Уйдан эшикка чиқмаган, эркакларга тик қарамаган бир аёлнинг мажлисда туриб савол бериши унинг онгидаги рўй берган кескин ўзгаришни ифодаловчи деталга айланади. Яна шу ҳикоядаги Малоҳатнинг буқофини кестириши деталини олиб кўрайлик.

Жонифон Малоҳатни: «буқофинг бор деб, кўз очиргани қўймас...» эди. Энди у ўзини ҳамма қатори кўрганида, одамларга аралашганида, ўз камчилигини ҳам йўқотмоқчи бўлади — буқофини олдиради. Мана шу кичик факт ёзувчига асар персонажлари характеристерининг айрим томонларини конкретлаштиришга туртки бўлади. Жонифон оиласидаги келишмовчилик устидан чиқиб қолганлар жанжал нимадан чиққанини сўрашади. Жанжал Малоҳатнинг буқофини кестирганидан келиб чиққан эди. Агар авваллари Жонифон хотинини

буқоғинг бор деб, кўз очиргани қўймаса, олдирғандан сўнг «менга буқоғинг билан ҳам ёқа берар эдинг» деб жанжал чиқаради. Лекин Малоҳат бегона одамлар олдида жанжал сабабини айтгиси келмайди, ундаги хотинлик, инсонлик ғурури бунга йўл қўймайди, уялади. Жонғифоннинг ҳоли ҳам аянчли, ҳам кулгили. У ўз хотини билан жанжаллашар экан, хотинининг жамият, оила олдида бирор гуноҳли иш қилганини «тўртта одамнинг олдида» исботлаб беролмайди. Нима қилиб бўлмасин, хотинидан айб қидирап экан, ўзи кулгили ҳолга тушиб қолади.

Ёзувчи ҳаётдан, жамиятдан орқада қолган, янги инсоний муносабатларга тушуниб етмаган ишёқмас, дангаса кишини танқид остига олар экан, уни оддий оиласвий ҳаёт фонида тасвирлайди. Жонғифоннинг қилмишларини катта идоралардан келган ёки олий мактабда ўқиб, яхши-ёмонни ажратадиган одам эмас, балки унинг турмуш йўлдоши — Малоҳат фош этади. Жонғифон фожиаси шундаки, у ўзи билан бирга яшаган «сочи узун, ақли калта» хотинидан ҳам қолиб кетибди, хотини ундан номус қиладиган бўлибди. Авваллари унинг ўқишига «нотавон кўнгил... орзуга айб йўқ» деган назар билан қаровчи Жонғифон «бир вақт қарасаки Малоҳат курсни битириб, грузовой миниб юрибди!». Жонғифон бунга ҳам парво қилмай, «ҳа энди, минса минибди-да, шу ҳам марта-бами, машинани ўзи ўйлаб чиқариптими», деб ўзига тасалли беради, Малоҳатнинг икки йилда уч марта мукофотланганини ўз гази билан ўлчагани учун бунга ҳам унча эътибор бермайди: «олган мукофотига от билан тия берармиди», дейди у. Бироқ истироҳат боғида «шаҳарнинг ман-ман деган стахановчилари қаторида» Малоҳат портретининг осилиши билан Жонғифоннинг тинчлиги бутунлай бузилади. Хотинидан бирор айб тополмаган Жонғифон унинг буқоғини кестирганини тъяна қиласди, гуноҳларини бўйнига қўймоқчи бўлади.

Бу ҳикояни таҳлил қилган адабиётшунос-танқидчилар фикрини маъқул деб билган Абдулла Қаҳҳор «Танқидчилар марказий, ижобий ва салбий образлар ўртасида номутаносиблик мавжуд, Жонғифонга қараганда у ҳаракат қилмайди; Жонғифонга ўз таъсирини ўтказишга интилмайди, ҳолбуки, ҳикоянинг ёзилишидан мақсад шу гояни олдинга суриш эди, деб бир неча бор кўрсатишди» деб ёзган эди¹. Бизнингча, бу фикр тўғри бўлмаса керак. Чунки ҳикояда бир такасалтанг, ишёқмас, дангаса одам фош қилингапти. Ёзувчининг мақсади шу. Асар қурилиши, олинган материал мана шунга мўлжаллан-

¹ «Шарқ юлдузи», 1965, № 5, 145—146-бетлар.

тан ва маҳорат билан тасвирланган. Лекин бу асардан илғор, замонавий, меҳнаткаш аёлнинг ўз эрига таъсир ўтказишини тасвирлашни талаб қилиш бошқа янги асар ёзиши талаб қилишдир. Иккинчидан, Малоҳат образини хира, ҳаракатсиз тасвирланган, дейиш ҳам тўғри бўлмайди. Унинг индивидуал хусусиятлари бор. Малоҳатнинг меҳнатсевар, ҳалол, виждонли аёл эканлиги айрим деталларда ишонарли кўрсатилади.

А. Қаҳҳор асарларида айрим деталлар, юзаки қараганда, ўз-ўзидан ҳеч бир нарса билдирилмаган бўлиб кўриниши мумкин. Лекин ташқи тарафдангина шундай. Аслида эса деталь асарда катта роль ўйнайди. «Хотинлар» ҳикоясида ёзувчи давр имтиҳонидан — уруш қийинчилкларида ўтолмаган аёл образини яратади.

Умри эри армияга жўнагач, енгил ҳаётга берилади; кўп ўтмай, эрини ўлган деб, янги турмуш қурмоқчи ҳам бўлади. Лекин ҳамма унга нафрат билан қарай бошлагач, у ҳамқишлоқлари орасида туролмай, шаҳарга кўчиб кетади. Уни шаҳарда тасодифий учратиб қолган Собирахон бу учрашувни шундай ҳикоя қиласди: «Бир куни кўчада кетаётсам, Умри бир бош узум кўтариб келяпти; мени узоқдан кўриб чақирди, «мана буни қаранг, мана буни кўринг!» деб бир қофозни кўрсатди. Қарасам, Ғаффоржон нобуд бўлганлиги тўғрисида унинг номига келган қора хат». Бу тасвирда Умрининг ҳаракатлари олган хатининг мазмунига мос тушмайди. Умри эридан келган қора хатга бутунлай бефарққина эмас, балки бу хабардан мамнун ҳам. Тўғри, ёзувчи бу ҳақда ҳеч нарса демайди. Лекин Умрининг ўзини тутиши, унинг қўлидаги бир бош узуми унинг кечинмаларини яхши кўрсатган. Уларнинг бундай бефарқлиги шундай экан, унга нисбатан ўқувчида чексиз ғазаб уйғотади. Ватан учун жон берган йигитга нисбатан ўқувчи муҳаббатини янада кучайтириб юборади.

Абдулла Қаҳҳор асарларида турли хил деталларни учрастиш мумкин. «Даҳшат»даги икки деталга эътибор берайлик: Үнсин, нима бўлмасин, Додҳо оиласидан кетмоқчи. Ниҳоят, у Додҳо билан гаплашиб, талоқ хатини оладиган ҳам бўлди. Үнсин Додҳо шартини эшигтан заҳоти ундан дарров юзини беркитганча чиқиб кетади. У тилагига етди, бу оиладан чиқиб кетиш йўлланмасини олди. Энди унга Додҳо — бегона эркак. Олдида қанча қийинчилик бўлмасин, у Додҳо розилигини олади, у озод — Үнсин муайян дақиқада шундан бошқа нарсани ўйламайди. Қаҳрамоннинг мана шу ички кечинмалари орқали ёзувчи асар гоясини конкретлаштиришга ҳаракат қиласди.

Яна шу асардан иккинчи мисол. Унсин гўристонга кетгани, унинг қай аҳволда қайтиб келиши Додхони ҳеч безовта қилмайди, чунки Унсин унинг юзига тик қаради, бу оиласдан кетиш ўзининг энг олий тилаги эканлигини билдириди. Ў Додхода озгина бўлса ҳам қизиқиш пайдо қилиши керак эди, чунки Унсин Додхо хаёлига келтиришга ҳам қўрқадиган ерга кетди. Йўқ, Додхо тинч. Бўлмаса «сандалда ўтириб пинакка» кетадими? Мана шу тариқа ёзувчи айрим кичик деталь орқали характер чизигини бўрттиради, воқеа моҳиятини очади, шароитни конкретлаштиради.

Асар гоясини очишда персонажларнинг нутқларидаги деталлар ҳам катта аҳамиятга эгадир. Сидиқжоннинг онаси Хадича хола умрини хорлик-зорликда ўтказган. Янги турмуш унинг рўзгорини тузатди, уй-жойи, кийим-боши бут бўлди. Энг муҳими, у ўз инсонлик қадрини била бошлади. Бу фикр ёзувчи томонидан бир неча марта таъкидланади. Буни ўқувчи оддий деталлар — кундалик воқеалар орқали ҳис қилади. Хадича хола ўғлини янги ҳаётга жўнатар экан, «жон болам,— деди ҳовлининг ўртасида туриб,— хат юборгин, бизни хавотир қилма. Шукур, эл қатори эшигимизга номер қоқилган. Ҳар қаердан бир юз олтмиш учинчи деб хат ташласанг, келади. Аҳмадалининг уйи бир юзу олтмиш саккизинчи. Унга ўғлидан ҳар ҳафта хат келади».

Персонаж нутқи бирор ерда ёзувчи томонидан таҳлил қилинмайди, унга изоҳ ҳам берилмайди. Лекин шу кичик деталь орқали қисқагина бир давр ичида эркинликка чиққан, бутунлай ўзгарган аёлнинг фикр-хаёллари, орзу-умидлари намоён бўлмоқда. У ҳеч кимдан кам эмас — эл қатори кун кўрмоқда (ўғли бойнинг уйида шунча туриб, бирор марта онасига хат ёзмаган). Бу фикр очиқ айтилмайди. Иккинчидан, хат ёзилса келади, бунга кампирнинг далили бор: қўшнисининг ўғлидан ҳар ҳафта хат келади.

Ёзувчи қўллаган баъзи деталлар кўринишдан шароитга, персонаж характерига номувофиқдек туюлса ҳам, аслида воқеа моҳиятига боғланиб кетади, персонажнинг киши қўзидан яширинган томонларини очишга ёрдам беради. Бунга «Синчалак» даги Қаландаров образи билан боғлиқ деталь яхши мисол бўлади.

Қаландаров циркни яхши кўради. У қандай кайфиятда бўлмасин, қай масала билан Тошкентга тушмасин, циркка кирмасдан кетмас эди. Бу гал Тошкентга боришининг сабаби — Саидадан тўйганида. Қаландаров Саида устидан ариза кўтариб, обкомга кирмоқчи. У «кечки пайт етиб келиб, меҳмонхонага тушди-ю, циркка билет олгани югурди...» Қалан-

даров циркда ўтирад экан, болалардек ҳамма нарсани унуби қўяди, «хўп» деганда ирғиб қасқондан ўтаётган лайчанинг ҳар бир ҳаракатидан завқланиб ўтиради. Тасодифни қарангки, Қаландаров «...бирдан рўпарадаги иккинчи қаторда ёш боладай талпиниб, қулиб чапак чалаётган Қодировни кўриб» қолади. Улар бир-бирини қучоқлаб, йиғлаб кўришади». Ўқувчи «...Овқатлардан фақат паловни, раҳбарлардан фақат ўртоқ Қодировни, дорилардан фақат пенициллинни» «тан» олган Қаландаровнинг собиқ райком секретари Қодировга бўлган муносабатини яхши билади. Ёзувчи цирк баҳонаси билан Қодиров ва Қаландаров ўртасидаги яна бир умумийликни таъкидлаб ўтади. Қап-кatta одамнинг ёшина Саида билан умумий бир тил топиб, ишлаб кета олмаслиги ва унинг устидан арз қилиб, шаҳарга тушгани шу деталь орқали қандайдир кулгили тус олади. Қаландаровнинг обрўсига путур етгандек туюлади. Ёзувчи Октябрь революцияси ғалабасига қарийб ярим аср бўлишига қарамай, ҳали ҳам аёлларга паст назар билан қаровчи Қаландаров устидан кулади. Унинг кулгиси ана шундай кичик-кичик деталларга яширинади.

Асар бошида ўқувчи Қаландаров билан милиционер ўтрасида юз берган конфликтни райком секретари Носировдан эшигади. Оқибатда «Қаландаров шу куни кечқурун автоинспекцияга кирибди,— деди Носиров кулиб.— Ўша милиционерни топиб, узр сўрабди. Милиционер начальнигига рапорт берган экан. Қаландаров тоза ялинибди: «Жон ука, начальнинка рўпара қилиб, эркак қаддимни букма, қанча штраф олсанг, ол, деб чўнгтагини тутибди». Қаландаров милиционерга ялиниб-ёлборишдан уялмайди, «эркак қаддини» буккан деб ҳисобламайди. Нима бўлса ҳам начальникнинг олдига кирмоқчи эмас, чунки «автоинспекциянинг начальниги хотин киши экан». Мана шу ҳазил тариқасида айтилган гапнинг моҳияти чуқур эканлиги кейинги воқеалар давомида билинади. Аввалига бу кичик деталга ўқувчи ўзиб ўтибор қилмаслиги мумкин. Кейинчалик Қаландаровнинг Саидага бўлган муносабати ҳамда хотинига «ҳазил» қилиб «хотин киши раҳбарлик қилса, калавамнинг учини йўқотиб қўяман» дейиши тасодифий эмаслигига сигнал вазифасини ўтайди.

Ёзувчи тутган позицияси, унинг муайян образга, воқеа ва ҳодисага бўлган муносабати деталь ҳарактерини белгилайди. Ёзувчи бир ерда қаҳрамонига ачиниб, унинг соддалигидан кулади, иккинчи ерда эса лақма, муғамбир, жоҳил, илмсиз одам устидан заҳарханда кулади — бунинг учун бир ҳарактерли деталнинг ўзи етарлидир. Шуни айтиш керакки, ба-

дий деталь А. Қаҳҳор асарларида ҳар жиҳатдан типиклиги билан характерланади. Деталь асар ғоясини, кишилар образи ва воқеалар мөҳиятини очиш билан бирга асарнинг реалистик кучини ошириш учун ҳам хизмат қиласи.

Хулоса сифатида шуни айтиш керакки, Абдулла Қаҳҳор ўзбек адабиётида бадиий-тасвирий воситаларнинг, шунингдек деталнинг бой ва ранг-баранг имкониятларини очиб берган мөҳир ёзувчиларданdir.

ХУЛОСА

Абдулла Қаҳҳор ижодини ўрганиш тадқиқотчига катта завқ бағищлайди, фикрлаш, мулоҳаза қилиш учун бой материал беради. Унинг асарларини ўқиган сайин ёзувчи маҳоратининг янгидан-янги қирраларини, ўзига хос томонларини топа бериш мумкин.

Биз бу ишда Абдулла Қаҳҳор ижодининг айрим томонларини—ёзувчи асарларидағи нұтқ, портрет, пейзаж ва деталларни алоҳида-алоҳида таҳлил қилас эканмиз, буни маълум даражада шартли деб қараш керак. Чунки бу бадий тасвири компонентлари қанчалик оригинал ва чиройли бўлмасин, ўз ҳолича асарга ҳеч нарса бермайди. Бу тасвирий воситалар ҳаммаси (биз ўрганмаган бир қанча бошқа воситалар билан) ўзаро биргаликдагина асар қимматини белгилаб келади.

Иш монографик характерда эмас, бинобарин, А. Қаҳҳор ижодининг барча томонларини қамраб олишини даъво ҳам қилмайди. Муаллифнинг диққат-эътиборида ёзувчи маҳоратининг ҳамма масалалари эмас, балки анализ қилинаётган асарлар учун характерли бўлган проблемалар туради.

А. Қаҳҳор асарларининг муҳим хусусиятларидан бири уларнинг чуқур замонавийлиги ва ҳозиржавоблигидadir. А. Қаҳҳор китобхон дилидаги гапларни, унинг орзу ва истакларини ифодалай олгани ва энг муҳими, зарур ҳодисалар ҳақида китобхон истаганидек образли сўзлай олгани учун ҳам унинг асарлари танқидчилар ва ўқувчилар оммасининг диққат-эътиборидан четда турмайди.

«Ўқишлик китоб ёзиш,— деган эди Абдулла Қаҳҳор,— унинг ҳар саҳифасини, ҳар сатрини китобхонга манзур қилиш, китобхонни қувонтириш. унинг кўнглини топиш осон эмас. Бундай китобни ёзиш учун ёзувчининг маҳорати, китоб ёзишга ҳаваси, ҳатто енгиб бўлмайдиган хоҳиши ҳам кифоя қилмайди, булатнинг устида дард, ҳаёт берган илҳом, калла, қалбдан бошқа ҳар қандай майдада орзу-ҳавасини, ҳар қандай манфаат — ғаразни қувиб чиқарадиган йирик — юксак ғоя, мавж урадиган илҳом керак. Илҳом билан маҳорат топишгандагина, китоб ёзувчининг қалбидан отилиб чиқади, китобхоннинг қалбida акс-садо янграйди»².

Бадий ижод ҳақидаги бу ажойиб гапларни А. Қаҳҳор Саид Аҳмаднинг «Ўфқ» романига ёзган тақризидаги айтган эди. Бу қимматли фикрларни, даставвал, А. Қаҳҳорнинг ўзига, унинг сермазмун ижодига татбиқ қилиш адолатдан бўларди. Тўғри, бу сўзларда ёзувчининг меҳнати ҳақида ҳеч нарса айтилмайди. Ёзувчи меҳнаткаш бўлиши, доим ишда, ҳаракатда, ўқиши-ўрганишда, изланишда бўлиши керак. Шу билан бирга, А. Қаҳҳор таъкидлашича, ёзувчидаги инсоф ҳам бўлиши керак. «Адабий асар ёзиш учун, ҳеч шубҳасиз, талант керак, лекин ёзилган нарсани ўчириш, китобхонга зарур гапларнигина қолдириш учун талантнинг ўзигина кифоя қилмайди, инсоф ҳам керак»³. А. Қаҳҳорнинг ўзи ҳам шундай ёзувчилардандир. Унинг илҳоми, туғма қобилиятидан ташқари заҳматкашлиги ҳам унинг асарларида кўриниб турибди.

² «Ўзбекистон маданияти», 16 октябрь 1965 йил.

³ «Совет Ўзбекистони», 28 февраль 1965 йил.

МУНДАРИЖА

Автордан	3
Образ ва бадий нутқ қирралари	6
Фой ва портрет	78
Фой, образ, пейзаж	111
Образ ва деталь	123
Хулоса	134

На узбекском языке

М. М. Султанова

СТИЛЬ АБДУЛЛЫ КАХХАРА

Издательство «ФАН» УзССР
Ташкент — 1967

Мұхаррір А. Мансурхұжаев
Техмухаррір Г. Колесник
Корректорлар: М. Холмуҳамедова, М. Алиева

P—02610. Теришга берилди 12/VI-67 й. Босишга рухсат этилди
12/VII-67 й. Формати 60×90^{1/16}=4.25 қоғоз. л. 8.5 босма л.
Ҳисоб-нашриёт листи 8,2. 1 вкл. Нашриёт № 2223. Тиражи 3000.
Баҳоси 89 т.

ЎзССР «Фан» нашриётининг босмахонаси, Черданцев кўчаси,
21. Заказ 194.
Нашриёт адреси: Гоголь кўчаси, 70.